


pg 36

f Th. Chénier. De "Histoires prodigieuses" etc.
(met bibliographie) Het Boek 24 (1336-37)
2^e deuk (ca. 1714) met adres van V. Leteras [p. 235-56]
(I, 2) ca. 1714 " E. L. Gravelleau



L.

2073

1911

HISTOIRES
PRODIGIEUSES,
EXTRACTES DE

PLVSIEURS FAMEUX AVTHEVRS,
Grecz & Latins, sacrez & prophanes : mises en
nostre langue par P. Boaistuau, surnomé Launay,
natif de Bretagne: avec les pourtraicts & figures.

Dediées à treshault, & trespuissant Seigneur,
Iehan de Rieux, Seigneur Dasserac.



A PARIS

*Pour Ican Longis, & Robert le mangnier Libraires,
tenans leur boutique au Palais, en la gallerie
par ou on va à la Chancellerie*

M. D. L X I.
Avec PRIVILEGE DV ROY.

EXTRAICT DV
Priuilege.

IL est permis à Vincēt Sertenas, & Jean Lōgis libraires,
demourans à Paris, de faire imprimer ce liure, intitulé
Histoires prodigieuses extraictes de plusieurs fa-
meux auteurs, Grecz, & Latins, sacrez & pro-
phanes : mises en nostre langue par Pierre Boai-
stuaue, surnommé Launay, natif de Bretagne.
Et est defendu à tous autres de l'imprimer, iusques à six
ans prochainement venans, à compter du iour qu'il sera
acheué d'imprimer, sur peine de confiscation de ce qui se-
roit imprimé oultre leur gré & consentemēt, & d'amēde
arbitraire, cōme plus amplemēt est contenu en leurs lettres
de priuilege, signées Par le Conseil,

80. DECOURLAY.

Et scellées de cire iaune, sur simple queue.



A TRESHAVLT ET TRESPVISSANT SEIGNEVR

Iehan de Rieux Cheualier, seigneur Dasserac,
Faugaret, Lisle-Dieu, Guédelisle, la Fueillée,
Vicôte de Plohedel, Gentilhomme ordinaire
de la chambre du Roy, &c. Pierre Boaistuau,
furnommé Launay, Salut.



ONSEIGNEVR, entre
toutes les choses qui se peuent
contempler soubz la concavité
des cieulx, il ne se voit rien qui
plus éueille l'esprit humain, qui
ranisse plus les sens, qui plus
effouente, qui engendre plus
grande admiration, ou terreur
aux creatures, que les monstres, prodiges & abhominations,
esquelz nous voyons les œuvres de nature non seulement
preposterées, renuersées, mutilées & tronquées, mais
(qui plus est) nous y descouurons le plus souuent vn secret
iugement & fleau de l'ire de Dieu, par l'obiet des choses
qui se presentent, lequel nous faict sentir la violence de sa
iustice si aspre, que nous sommes contrains d'entrer en nous
mesmes, frapper au marteau de nostre consciëce, esplucher
noz vices, & auoir en horreur noz meffaitz, specialmēt
quand nous lisons aux histoires sacrées & prophanes, que

quelquefois les Elemens ont esté Heraulx, Trompettes, ministres & executeurs de la iustice de Dieu: Cômme lors que les eaux se débordèrent de leurs Canaulx, & que les veines du Ciel s'ouurirent par telle impetuosité, qu'elles surpassoyent de quinze coudées toutes les plus hautes montaignes de la terre. Le feu semblablement obeissant au commandement de son Createur, embrasa cinq fameuses Citez, & les mist incontinent en cendres. L'air aussi quelquefois s'est trouué si corrompu, veneneux & infect en certaines provinces, que penetrant de l'une en l'autre comme un soudain embrasement, il a suffoqué & esteint la pluspart du genre humain, & a presque laissé la terre deserte. La terre semblablement, ouurât ses soupiraux, a englouty une infinité de superbes Citez avec leurs Citoyens: Encores est ce peu de tous ces prodiges, si nous voulons considerer mesmes que lors que la fureur diuine s'enflâme contre noz pechez, elle ne nous honore pas tant, que de nous daigner chastier par ses Elemens, mais afin de nous mieux abaisser, & tenir en bride, elle veult que les plus pusilles & abietz animaux de la terre soyent les tyrans & bourreaux de noz vices: Comme ce grand Monarque Pharaon experimenta lors que les grenouilles, mousches & sauterelles l'allerent assaillir iusques à son liét. Et tout ainsi que nous auons mis en auant ces chastimens estranges & espouventables, encores en pourrions nous memorer d'autres qui ne sont pas moins esmerueillables, ny indignes d'estre contemplez, à ceux principalement qui ont quelque apprehension des iugemens de Dieu: Cômme quand nous voyons naistre des creatures viues entre nous qui ont deux testes entées & liées ensemble en vn seul corps, comme deux rameaux en vn tronc d'arbre. D'autres qui sont si bien collées & cymentées l'une avec l'autre, que par aucun artifice humain on ne les

peut

peut separer. D'autres sont si abhominables & difformes, qu'ilz semblent auoir esté produictes sur terre en contumelie de Nature, & perpetuelle infamie & regret des parens. Lesquelles choses estans viuement apprehendées par le Prophete Ozée, il s'escrie, chapitre neuuiesme: Ilz ont esté faictz abhominables en leurs amours, & quand ilz auront nourry leurs enfans, ie les destruyray, tellement qu'ilz ne deuiendront point hommes. Ie leur donneray la matrice abortiue, & les mammelles tariées, & leur racine sera dessechée, & ne fera plus de fruiet: & s'ilz engendrent, ie mettray à mort le fruiet de leur ventre. Ce qui est semblablement confirmé par le Prophete Esdras, chapitre cinquiesme, ou entre les autres cruelles maledictions desquelles Babylone est menacée par l'ange, il est expressement dit, que les femmes soillées de sang enfanteront des Monstres. Mais par ce que le mystere de telz secretz est un peu ardu, & qu'il merite d'estre contemplé plus à loisir, ie remetx le reste au discours que i'en fays par mes histoires, lesquelles ne sont peuplées d'autres choses, que de telz accidens estranges, & prodigieux euenemens, desquelz toutes les prouinces du monde ont esté effouentées depuis la natiuité de Iesus Christ iusques à nostre siecle. Or maintenant (Monseigneur) que i'ay combattu avec le labour, & qu'à mon aduis ie suis sorty victorieux, il ne me reste autre chose pour le parfait accomplissement de mes desseings, que de vous offrir, consacrer & dedier ce fruiet abortif de mes muses, & iuste tribut de mes peines. y estant non seulement astringet par beaucoup de particulieres obligatiōs, que ie tairay pour le present, mais mesme par le merite d'une infinité d'heroïques vertuz, qui vous rendent si admirable, que vous meritez d'estre celebré de tous ceux qui escriuent: Car oultre le sang illustre de l'ancienne maison

DE RIEUX, dont auez prins vostre origine, les dōs excellens de l'esprit & de Nature, vne singuliere cognoissance de plusieurs ars & disciplines, vne ardente amytie que portez à ceux qui en font profession, encores auez-vous vne generosité & adresse aux armes si émerueillable, vne telle affectiō & deuotion au seruice de vostre Prince, qu'il ne s'est fait de vostre tēps assēblée, dressé assault de ville, saillie ou escarmouche en Italie ou ailleurs, ou vous ne vous soyez trouué des premiers sur les rengs, avec telle assurance & mespris de vostre vie, que ceux qui vous cōgnoissent n'esperent point moins de vous, que de ce grand Marechal *DE RIEUX* vostre ayeul, duquel les Croniques & Annales resonnent si souuent les louanges. Je ne doy semblablement en ce lieu passer soubz silence les genereux exploitz & actes memorables de Monsieur du Gué de l'Isle vostre frere, lequel vous a acompagné en tous voz perilz & trauerses de fortune, & a en ce ieune aage donné tel tesmoignage de luy par tout ou le sang a esté respandu pour le seruice du Prince, qu'il merite bien que la memoire de sa magnanimité & vertu ne soit iamais enseuelie ou exteincte. Mais par ce que ie me reserue, en quelque œuure que ie luy prepare, d'en faire plus ample mention, il me suffira pour le present (Monseigneur) de vous supplier d'auoir agreable l'œuure que ie vous offre, mesme luy seruir de defense & sauf-conduit: afin qu'estant fortifié de l'ombre & splendeur de voz generositez & vertuz, il vole assuré par les plus perilleux destroictz de nostre France.

F I N.

I. D. R. S. D.

*Si Bretagne, L'AVNAT, se sent bien honorée
De tes premiers escritz, que chacun a peu voir,
Ores tu luy fais bien meilleure cause avoir
De se sentir de toy plus encor decorée.
Ta vertu seulement n'y est pas admirée,
Mais en tous les endroitz, que peult appercevoir
De son œil le soleil, tu as fait recevoir
Tes escritz maçonnez de peine elabourée.
Si que tout l'univers rempli de ta memoire
Tes œuvres admirant, ia te donne la gloire
D'estre l'un des premiers qui le mieux a escrit:
Et puis que me portant si bonne affection
Tu m'as tout rendu tien par obligation,
Je seray toujours tien & de corps, & d'esprit.*

René de Rieux au S. de
Launay, Boaisseau.

*Les Muses t'ont donné ceste grande abondance,
L'AVNAT, de tes escritz pleins de divinité,
L'univers qui les a admirables gousté
N'en peut assez louer la force & l'excellence.
Tu sçais assez combien tu es loué par France,
Et combien ton país, ou tu n'as guiere esté
A d'honneur, de plaisir, & de félicité
De t'avoir donné nom, vie, lait & naissance.
Mais ores nous donnant cest œuvre de Prodiges,
Au plus hautain sommet de l'immortalité
Tes œuvres, & ton nom immortel tu eriges:
Et si fais esbahir de ceste rareté,
Auecques la Vertu qui t'est toujours compaigne,
Les Muses, l'univers, la France, & la Bretagne.*

DE ALIS DICT DE CENAC,
sur les Histoires Prodigieuses du S.de
Launay Boaiſtuau, Sonnet.

*L'Hercule des Gregois, qui par ſa grand vaillance
Douze fois eſtonna les hommes & les Dieux,
Eſt maintenant là hault fait Citoyen des cieux,
Pour auoir combatu les monſtres à outrance:
Launay tu es auſſi l'Hercule de la France,
Et auras quelque iour autant que luy ou mieux,
Ayant par ton ſçauoir d'un bras victorieux
Tant de fois abatu le monſtre d'ignorance:
Tu as, Launay, tu as doctement eſclarey
Le point qui plus tenoit l'homme docte en ſoucy,
Des Prodiges monſtreux décrivant la nature,
Et as rendu ce nom ſi doux & gracieux,
Que i'oſe bien nommer, Launay, Prodigieux
Ton eſprit, ton ſçauoir & ta docte eſcriture.*

LOYS DV LYS AV SEIGNEVR
de Launay, ſur les Histoires Prodigieufes.

*Ceux là, mon cher Launay, ſont ilz mors au tumbeau,
Qui nous ont enſigné les Monſtres, les oſtentes,
Les prodiges fatalz, les horribles portentes,
Nous predire & monſtrer de noz vices le fleau?
Ceulx là ne viuront ilz, qui d'un diuin cerueau
Dans telz ſignes ont leu les menaſſes cuiſſantes,
Les verges du Seigneur deſia toutes ſanglantes,
Comme dans vn cartel, ſans en rompre le ſéau?
Et plus que tous ceulx là, celuy ne doit il viure,
Qui tout ceſt vniuers de tout d'anger deliure?*

Ne crains doncques la mort, toy qui chasse de France
Par tes doctes escriptz tant de monstreuses voix,
Et qui contrains par l'œil à se rendre aux abois
De tes monstres hideux, le monstre d'ignorance.

B. DE GIRARD.

Tant d'œuvres, mon Launay, dont nostre France abonde
Que tant heureusement à leur fin as conduit,
Ton ouvrage Tragicq, ton Chelidon traduit,
Et ce liure diuin du Theatre du monde,
Auoient assez remply toute la terre ronde
De ton nom, qui courant par l'univers, reluit,
Sans que d'un art nouveau tu nous eusses produit
Ces Prodiges remplis de diuine faconde.
Ha ie me doubtois bien que tu ferois, Launay,
Quelque œuvre monstrueux en honneur & doctrine,
Puis qu'aux premiers tu as esté si fortuné.
Tu as tes motz diuins, l'inuention diuine,
Et tenant ton esprit de la grandeur des Cieux,
Plus que ton liure encor tu es prodigieux.

R. DE RIEUX LAVNEO.

Quæ Iouis è cerebro metuendus prodiit armis
Pallas, mille operum credita prima dea est.
Prodigiosa quidem res olim visa, sed istis
Quæ das prodigiis, prodigiosa minus.
Nam dum tu à primis scrutaris & eruis annis,
Quicquid prodigij posse videre datum est.
Dum causam euoluis, totumque educis in orbem
Quod sit in Assaraca nomina prima domus.

*Quid non prodigio maius grauiusq; relinquis,
Ingenij prodens lumina vincta tui?
Concedat Pallas, nam si Iouis illa putata
Nata fuit, natus prodigiosus eris.*

B. G. HALHANII AD
Launæum. Boaiſtuau.

*Qui mundi celſo vitæque, hominẽsque Theatro
Egit, ſpectaculi qui actor & auctor erat:
Quique Chelidonium, Reges præcepta docentem
Vita, regnandique, imperiique modum:
Qui tragicas primus ſcripſit ſermone ſoluto
Hiftorias, tragicis dans ſua verba tonis:
En ſtudij, tantæque en ſemper prodigus artis
Prodigia hæc vario lecta labore premit.
Prodigiis, monſtris, portenta, oſtentæque iungit,
Et quæ ſignorum nomen, & omen habent.
Et dum prodigia hæc deſcribit monſtræque, monſtrat
Et monſtrum ingenij, prodigiũque ſui.
Ominæque hæc ſcribens ſibi magni eſt nominis omen,
Maius prodigiis & ſibi prodigium.*

IOSEPHVS SCALIGER,
P. Launæo.

*Non igitur Natura poteſt, Launæe, iubere
Sola nouis miram rebus adeſſe fidem.
Quandoquidem vna nouis audet ſe tollere lingua
Laudibus, eloquij fida miniſtra tui.
Quippe immenſa canens, mirandaque fœdera rerum
Non potuit tanti parte carere loci.*

Que

*Qua si quanta canit, tot habet miracula vecis,
Et tot honorata pignora laude capit:
Cætera quantus hgnos Naturæ mira parentis
Supra Naturæ munera posse loqui?*

C. ROILLET BELNENSIS,
Launæo, Boaiſtuau.

*Quod Phrygiū Aſſaracū noſtra hæc quoque tēpora norūt,
Doctōrum effecit cura, laborq̃ue virūm.
Britonis Aſſaraci proles quòd ſe efferat, ut ſit
Quam populus præſens, poſteritasq̃ue legat,
Quam ſic doct̃rina, ut doctōrum agnoſcat amantem,
Id, Launæ, tua voce, manūque facis,
Qui dum Prodigiiſ variis ſcripta aurea comples,
Qua penna ſolui non metuente volent:
Sic volitas, ut te Aſſaracus ſit notior olim,
Tu quoque ſis dicto notior Aſſaraco.
Non aliter Græco Pelides notus Homero,
Non Pelidæ aliter notus Homerus agit.*

ADVERTISSEMENT

au Lecteur.



Lecteur, avant que penetrer plus
avant en noz discours prodigi-
eux, ie te veux aduertir que ie
n'ay pas esté content de fueil-
leter plusieurs auteurs, pour
rechercher si i'y pourrois trou-
uer quelque chose de rare, estrange, admirable &
conforme à mon subiect : mais d'abondant i'ay
voulu lire par grande curiosité tous les auteurs
qui auoient escript quelques traictez particuliers
des prodiges : Côme vn Ioachimus Camerarius,
Polydorus Virgilius, Iulius Obsequens, Carda-
nus en son 14. liure, De varietate rerum, Gasparus
Pucerus en ses Commentaires De diuinatione,
Iacobus Ruoffus en ses liures De conceptu : les-
quelz ont tous doctement traicté en Latin ceste
mesme matiere: mais sur tous autres, ie suis gran-
demēt redeuable à Conradus Lycosthenes Ru-
beaquensis, lequel oultre la doctrine qui luy est
cōmune avec les autres, encores a il surpassé tous
ceux qui l'ont precedé, en labeur, & diligence.
Et afin que ie ne me fraude moy-mesme de ce
qui m'est deu, cōbien que i'aye esté grandement
soulagé des doctes œuures Latines dessus nom-
mez, si est-ce que i'ay traicté beaucoup d'histoi-
res, desquelles ilz n'auoient faict aucune mention
en leurs escritz: mesmes ay rédu la raison des Pro-
diges, ce que ie n'ay encores obserué auoir esté
faict

faict d'aucun auant moy. Partant (lecteur) ie te supplie préds encores en gré ce miē labeur, & le reçoÿ avec tel tesmoignage de beneuolence, que tu as faict noz œuures precedentes. Et i'espere, avec la grace de Dieu, te faire veoir en brief en nostre langue, la Cité de Dieu de saint Augustin, laquelle ie traicteray d'un stile plus serieux, grave, solide, & mieux élaboré, que ce traicté d'Histoires, lequel a esté tant precipité par les Imprimeurs, qu'ilz le m'ont presque arraché des maïs. Au reste (lecteur) ie te veux aduertir que j'ay laissé expres grand nombre de noms propres Grecz & Latins en leur langue (contre la coustume de ceux qui escriuent aujourd'huy) afin que ceux qui voudront conferer le Latin avec le François de quelques auteurs rares que ie cite en mon œuvre, puissent avec moindre labeur les recouurer chez les Imprimeurs & Libraires.

F I N.

ODE DE
IAQVES GREVIN
DE CLERMONT, AV
SEIGNEVR DE LAVNAY.

CELVY qui d'une main soigneuse
Append le doux fruit de ses ans
Avec la troupe desiruse
Des plus asseurez courtisans,
Qui ont d'une course premiere
Franchy le sentier peu battu,
Pour dans une longue carriere
Cherir les filles de vertu.

Celuy qui d'un grand cœur mesure,
Avec la Rithme de ses vers,
Le beau chef-d'œuvre que Nature
Monstra batissant l'univers:
Ou qui par le fil d'une histoire
Poursuit les faictz plus merueilleux
Dont la veritable memoire
Se chargea dès les siècles vieux:

Celuy certes, se renouvelle
Une autre vie apres sa mort,
Que iamais la Parque cruelle
Ne pourra tirer sur le bord,
Ou les vndes obliuieuses
De l'impetueux Acheron
Emportent les vmbres pourceuses
La part ou les conduict Charon.

Ce grand Demon, ce vieil Homere
Immortel, delaiſſa ſon corps
Auec la commune miſere
Fidele compagne des morts,
Pour voler iuſqu'à noz oreilles,
D'aage en aage renouuellant
Le doux nectar de ſes merueilles
Qu'il va dans noz cœurs diſtillant.

Pour auoir diſcouru l'enuie
Et le flambeau, qui fiſt armer
Toute l'Europe encontre Aſie,
Et les orages de la mer,
Ou il a faiçt vaguer Vliſſe
Comme banny dix ans entiers,
Luy grand Prince exerçant l'office
Des miſerables mariniers.

Ainſi toy par ta preuoyance
Tu te baſtis en tes eſcriptz
Vne éternelle demeure
Auecques ces diuins eſpritz,
Que d'autant deſ-ia tu ſurpaſſes
Qu'eſt admirable le proieçt,
Sur qui doçtement tu compaſſes
Le beau deſſein de ton ſubieçt.

Car c'eſt luy qui te fera viure
Tant qu'on verra les branſlementz
Des corps celeſtes ſ'entrefuyure,
Tant qu'on verra les elementz
Et les diuerſes ſympathies

Des corps culbutantz de trauers
Renouueller dix mille vies,
Dans le vague de l'vniuers.

Bien que pour l'heure nostre France
Ingrate, semble despiter
Ceux qui d'une braue assurance
Or s'efforcent de resister
Aux effortz de la Parque fiere,
Qui nous ferrant soubz le fardeau
Dont nostre vie est heritiere
Cache vn beau nom dans le tombeau.

Bien qu'une Brigide eshontée
De badins, de sotz, d'ignorans,
Se voye plus souuent montée
Aux degrez ou font aspirans
Ceux là, qui forgent dans la teste
De leur auare volonté,
Les desponilles & la conqueste
Que iamais ilz n'ont meritée.

Bien qu'ilz soyent des premiers, si est-ce
Que le temps moins fauorisé
Regrette ce qu'en sa ieunesse
Trop ignare il a desprisé:
Et ia commence à se desplaie,
Prisant d'aduantage tous ceux
Qui plus heureux ont sceu parfaire.
Le chemin pour monter aux cieux.

Poursuys doncq, de Launay, cest ceuure,

Dont

Dont tu as mis le fondement,
 Et qui docte nous a faict preuue
 Du reste de ton iugement:
 Poursuis-le, & pense que la France,
 Ia des-ia desilliant ses yeux,
 Commence à chasser l'ignorance
 De qui s'armoient les enuieux.
 Que te puissé-ie, afin de viure
 Entre les mains des plus-sçauantz,
 Dedans ce beau sentier ensuyure,
 Pour monstrier à ces ignorantz,
 Ennemis des dons que Mercure
 Et les Muses ne m'ont caché,
 Ce que dans le sein de Nature
 Plus curieux i'ay recherché:

LYDOVICVS LILIVS

P. Launæ, Boaiſtuau.

Viden' moleſto qualis ab otio
 Audace tentans lucis iter via,
 Launæ, non parua decorem
 Laude tuus labor aucupetur,

Iuſſus ſuperbi pignore præmii
 Sperare duris functa laboribus
 Momenta, velocémque famam
 Auxilio melioris Auræ?

Non ille molles fallere conſcius
 Opiniones: hoc animus vetat

Et certus, & solers modestis
Facta sequi meliora verbis,

Vindex malignæ laudis, & inuidens
Danti sinistris iudiciis fidem,
Et stulta peruersis stupenti
Scilicet ingeniis popello.

Nunc monstra sæclorum auribus offerens
Monstris petitem percipies decus,
Aeternitatis imperito
Immeritum obsoluisse sæclo.

Hoc cana sæclis fama perennibus
Vero per auras eloquio vehet,
Non turpibus mendaciorum
Opprobriis metuente vinci,

Nec ista solùm: maius adhuc feres,
Non iam ministrans prodigiis decus,
Sed nempe naturæ minister
Prodigij decus vniuersi.

TABLE DES MATIERES

contenues au traicté des histoires
Prodigieuses.

EN la premiere histoire sont contenues quelques Prodiges, & illusions de Sathan.
fueillet.1.2.3.4.

En la deuxiesme, les ires, fieux & maledictions de Dieu, enuoyées sur la miserable cité de Ierusalem, avec plusieurs aduertissemens pour les attirer à penitence, mesme vne prediſtion, & prophetie d'un païsant.
f.4.5. & 6.

En la troiesme il est fait mention de plusieurs morts de Princes, & grandz Seigneurs, avec la mort prodigieuse d'un Roy de Poloigne & d'un Archeuesque de Maſſence. f.7.8.9.10.11.

En la quatriesme est deſcrite l'histoire de Nabuchodonosor, avec un discours Philosophique par lequel est monſtré en quel peril ſont ceux qui cōmandent. f.11.12. & 13.

En la cinquiesme ſont declarées ſuccinctement les cauſes principales de la generation des monſtres, avec plusieurs hiſtoires memorables à ce propos. f.14 15. & 16.

Au chapitre 6. est racomptée vne histoire notable de deux filles engendrées de noſtre temps, qui eſtoient collées emſemble par les teſtes. f.17.18.

Si les diables peuuent conceuoir, avec l'histoire d'un horrible monſtre engendré de noſtre temps. f.19.20.21.22.

Vn enfant tiré viſ du ventre de ſa mere, laquelle eſtoit morte depuis deux iours, avec plusieurs hiſtoires des ſoudres & tempeſtes. f.22.23.24.25.

Le tonnerre entrant par la bouche d'une fille qui eſtoit à cheual, luy fiſt ſortir ſa langue par ſes parties honteuses.

fueillet.26.

Histoire Prodigieuse d'un homme qui de nostre temps
se lauoit la face & les mains de plomb fondu. f.28.

Enfant crucifié par les Iuifz, avec quelques autres hi-
stoires des Ladres, qui empoisonnerent les Fontaines &
Puis avecques eulx. f.31.

Deluges, & cruelles inundations d'eaux aduenues de
nostre temps. f.34.

Prodigieuse mort de Plume, avec les causes des flammes
qui sortent des entrailles de la terre. f.36.

L'astuce du diable qui fist precipiter un chevalier Ro-
main en un gouffre, sous le pretexte de deliurer son pays
de tribulation. f.39.

L'histoire prodigieuse d'une fille qui auoit deux testes,
& n'auoit qu'un corps. f.42.

Histoire prodigieuse d'un homme monstrueux qui appa-
rut à saint Antoine au desert. f.44.

Histoires memorables des pierres precieuses. f.45.

Histoire admirable de deux Princeesses faulcement accu-
sées, lesquelles ne peurent estre endommagées du feu. f.54.

Prodiges de la mer, ou il est fait mention des monstres
marins, Nereides, Syrenes, Tritons, poissons vollans, & au-
tres monstres aquatiques. f.57.

Pourtraict d'une espee de poisson volant, ou autre mon-
stre aquatique, figure sur celuy qui est au cabinet du Sei-
gneur Dasserac. f.60.

Prodige des chiens qui mengeoient les Chrestiens. 67.68.

Pourquoy on voyt quelquefois plusieurs Soleiz au Ciel,
ou plusieurs Lunes, avec la cause & signification des Co-
metes. f.69.

Comette prodigieuse, laquelle estoit si horrible que plu-
sieurs esponentez d'un si estrange spectacl: tomberent ma-
lades

lades & les autres moururent. f.71.

Flammes qui ont sorty des testes d'aucunes personnes notables, avec grande admiration & terreur. f.74.

Plusieurs histoires memorables de l'amour, avec la vie dissolue des trois plus renommées courtisanes desquelles les auteurs Grecz & Latins ayent iamais faict mention. f.76.

Monstre execrable qui sortoit entier du ventre d'un autre homme, reserué la teste. f.86.

Les plus memorables histoires que tous les Medecins anciens & modernes ayant escriptes des plantes: Avec une histoire prodigieuse de la racine de Barra, de laquelle Iosephus auteur Hebreu faict mention. f.88.

Monstre brutal ayant figure humaine, duquel Gesnerus faict mention en ses histoires Latines des animaux. f.100.

De l'excessive despence & prodigalité des anciens & modernes en leurs festins & banquetz. 101.

L'histoire de Denys Heracleot, qui devint si gras que de peur que la graisse l'estouffast, il estoit cōtrainct par le conseil des Medecins se faire tirer la graisse avec des sangsues. f.109.

Diueres histoires des visions faulses & vrayes qui apparoissent la nuict & le iour en veillant & dormant, Avec un traicté des umbres, figures, fantosmes, spectres, & autres choses semblables, qui se representent souvent à nous. f.110.

De Catalde Euesque de Tarēte, qui apparut à un enfant. 114.

D'une femme enchanteresse qui cheut morte. 119.

D'un Conseiller qui cuyda estre noyé pour adherer à la voix d'un Echo. 125.

D'un monstre veu par Calius Rhodiginus, ayant deux testes, le demeurant de parfaicte nature. f.128.

Prodige d'un enfant qui fut produict vif sur terre, lequel auoit le ventre ouuert, de telle sorte qu'on luy voyoit toutes les plus secrettes parties du corps nues & descouuertes. f.130.

Histoire prodigieuse, obseruée par l'auteur d'un chien engendré d'une Dogue & d'un Ours, avec plusieurs autres histoires sur ce subiect. f.132.

L'histoire notable d'une femme qui porta cinq ans son fruiet mort en son corps, laquelle il faillit en fin ouurir, & tirer ceste putrefaction de son corps membre à membre, avec grand estonnement. f.141.

Enfant produict sur terre avec quatre bras & quatre iambs du temps que les Venitiens & Geneuoys furent reconsiliez. f.143.

Serpent monstrueux, ayant sept testes, avec quelques autres histoires de ces animaux. f.146.

Histoire notable d'une mere qui mangea partie de son enfant, & offrit l'autre à quelques soldatz qui la tourmentoyent. f.155.

Histoire notable d'un oyseau descouuert de nostre temps, lequel n'a point de piedz, & ne vit qu'en l'air, & iamaïs ne se trouue prins que mort. f.157.

Prodige de deux filles iumelles ioinctes & collées ensemble par les parties posterieures. f.161.

Cruautez prodigieuses, avec une detestation de ceux qui font si bon march.e du sang humain. f.163.

L'histoire d'Astiages, qui fist manger à Arpalus son filz. f.166.

Abomination estrange d'un enfant demy chien & demy homme, engendré avec telle forme par l'incontinence

&

Et brutale lasciueté de la mere.

f.164.

Histoire notable d'un homme monstrueux lequel forma
vne merueilleuse complaincte au Senat Romain contre les
abbus & pilleries de quelques Censeurs & magistratz.

f.170.

De la monstrueuse auarice de deux hommes, dont l'un
fist manger de la chair humaine, l'autre de la chair de
porc qui auoit esté mordu des chiens enragez.

f.177.

Monstre ayant elles & les piedz d'oyseau engendré du
temps du Pape Iule second, & du Roy Loys douzième.

f.179.

F I N D E L A T A B L E.



PRODIGES DE SATHAN.
Chapitre. I.





Ombien que Sathan depuis la creation du monde ait exercé son regne & tiranie par toutes les provinces de la terre, & se soit faict adorer à vne infinité de peuples soubz diverses especes d'animaulx, si

est-ce qu'il ne se trouue point en toutes les histoires sacrées, & prophanes, que nostre Dieu luy ait plus donné de liberté, ou lasché la bride plus longue pour escumer sa rage contre ses creatures, qu'il a faict en deux lieux: Le premier desquelz a esté en l'oracle d'Apollo, tât célébré par les histoires, ou il a tenu escolle, & boutique ouverte de tyrannie, & cruauté l'espace de mille ou douze cens ans: Et auoit cest esprit sanguinaire si bien charmé & enchanté ceux qui le venoient adorer en ce lieu, que s'ilz vouloient auoir respõse de leurs demandes, il les contraignoit le plus souuent de luy sacrifier des hommes tous vifz, quelquefoys des vierges, mesmes les peres leurs enfans: Et non contét de ceste boucherie, encore il exerçoit vn magazin d'auarice, & rapine, soubz le pretexte de Religion, de sorte que la pluspart des Roys & Monarques de la terre, le venoient adorer en ce lieu, enrichissant son temple d'vne infinité de tresors & dons precieux, & d'un grand nombre de statuës toutes massiues d'Or, qui fut cause que le petit nyd, & cauerne, ou il se logeoit au commencement, fut par quelque interualle de temps enflé en vne grosse & su

Dionysius
Halicarnas
seus escrit
Iupiter &
Apollon auoir affligé
l'Italie de
grâdes pertes, & defaites
de guerre, pourtât
que la decime des hommes
ne leur auoit esté
immolée.
Aristodemus.
Melanippus.

perbe cité: Et sceut si bien cest esprit maling vè-
 dre ses coquilles, & faire valloir ses offrandes aux
 pelerins qui l'alloient adorer (comme Diodore
 escrit) que pour telle foys on a trouué en ses tre-
 fors plus de dix mille talens, qui vallent selon no-
 stre computation six millions d'Or. Le lieu ou
 cest ennemy de lumiere tenoit son siege, & ren-
 doit ses oracles, estoit desert & montueux, situé
 en la Grece, sur la brèche d'un hault Rocher, du
 quel yffoit vn souspirail fort profond, & tene-
 breux: Et d'iceluy estoit poulsé en hault vn
 esprit froid comme vent: Et sur ce trou & con-
 duict infernal, certains prebstres & deuins se pan-
 choient comme s'ilz eussent voulu couuer: Et a-
 pres auoir receu le soufflé de ce vent, remplis nō
 pas de l'esprit de Dieu, mais du diable, demou-
 roient alienez de leurs sens, & estans en cest estat
 rendoient responce au peuple sur les interroga-
 tions qu'on leur faisoit: Mais ce qui rendoit en-
 core plus admirable, & monstrueux ce lieu con-
 sacré à Sathan, c'estoit qu'il estoit si soigneuse-
 ment gardé par les Diables, qu'il ne se trouuoit
 homme mortel qui l'osast assaillir, nō plus que
 les trefors qui y auoient esté cōgregez de toutes
 les parties du monde, de sorte que quand ce grād
 Roy Xerxes bruslant d'auarice alla pour destrui-
 re la Grece avec son armée, & se fust mis en ef-
 fort de piller ce temple, certaine partie du Ro-
 cher ou il estoit assis roulla sur ses soldats, & cō-
 mença le Ciel à fouurir, & vomir flammes de feu,
 Esclairs & Tonnoires si horribles que ceulx qui
 estoient sur la montaigne tomberent en bas enra

Tresor de
 Sathan.

Pausanias
 in phocicis

Gaspard Pu-
 cer² au liure
 de diuina-
 tion.

gez: Et comme Trogus escrit, Il y mourut bien quatre mille hommes: Ce qui n'aduint pas vne foys seulement: car les Gaulois qui estoient soubz la conduite de Brenus experimenterent le semblable, lesquelz s'efforceans de monter la montagne pour piller le temple de Delphe, vn violent tremblement de terre, come vn Torrent desbordé estonna si bien ladicte montaigne, que la plus grande portion d'icelle tomba sur l'exercite, & suffoqua tout ce qu'elle rencontra: & apres toutes ces playes, le diable iouissant de sa gloire iusques au dernier periode, esmeut tellemēt le Ciel avec fouldres, tourbillons, tempestes, gresles, éclairs & tonnerres, que la pluspart de l'armée fut estouffée, & Brenus leur chef tellement blecé, que ne pouuāt supporter la douleur de sa playe, fut contrainct par impatience de mal se sacrifier luy mesme de sa dague. Le second lieu ou Sathan a tenu son throsne, & s'est faict reuerer avec grand merueille, & magnifier comme Dieu, est encore aujourd'huy en essence, C'est en Calicut, l'une des plus opulentes & fameuses citez des Indes, & bien d'une façon plus estrange, admirable, & es-pouētable, qu'en l'oracle d'Apollo, ou il se masquoit, de peur d'estre veu: mais il est maintenant plus effronté, car soubz la plus hideuse & abominable forme qu'on ayt accoustumé de le des-peindre (ialoux de l'honneur de son Createur) il veult estre contemplé, & reueré de tous: Et si a si bien fillé les yeux, & ensepuely les sens de ce miserable populace de Calicut, qu'encore qu'ilz croient vn Dieu, toutesfois ilz adorent & re-

Auētinus.

Pausanias
lib. 10.

Mort de
Brenus.

Le diable
adoré enco-
re pour le
iourd'huy
en Calicut.

uerent le diable , luy font sacrifices , luy erigent statuës , le parfument , encensent , & embasment , comme si c'estoit quelque deité. Tous ceulx de leur prouince,encore qu'elle aye fort longue estendue,ensemble leur Roy,croyent qu'il y a vn seul Dieu,Createur du ciel & de la terre, & autres clemens, & de tout le monde vniuersel, mais Sathan pere de mensonge a tant gaigné sur eulx par son astuce & cautelle, qu'il leur a persuadé & mis en teste,que Dieu craignant l'ennuy & fatigue de iuger du tort, du droict, & autres controuerfes qui suruiennent entre les hommes, luy a donné la charge d'estre iuge en la terre,& par ainsi ce pauvre peuple auueuglé des tenebres d'ignorâce, croyt que Dieu ayt enuoyé le diable sur la terre pour exercer ceste charge,auec pleine puissance de faire iustice, & rendre le droict à vn chacun,& appellent entre eulx ce diable Deumo: L'effigie duquel le Roy tient en sa chappelle comme quelque sanctuaire, & est la figure de ce faulx Imposteur assise en vne chaire de leton , portant sur sa teste vne couronne faicte comme vn tyare , avec trois couronnes , mais elle a d'auantage quatre cornes,quatre dens avec vne grand bouche ouverte,le nez & les yeulx de mesme,les mains cōme vn Singe,les piedz comme vn Coc: Et comme ce diable est monstrueux, & espouentable, aussi est tout le reste de la chappelle ou il est enclos,laquelle n'est enrichie d'autres tableaux,ou peintures que de petiz diableteaux de semblable pareure:Encore n'est-ce pas tout,car leurs preb-

ftes qu'ilz appellent Bramines, ont charge expresse de lauer ceste Idole avec eaux odoriférantes, de la parfumer, & l'ayant ainsi enuironnée plusieurs fois, l'encensent avec l'encensoir, & apres auoir sonné vne cloche se prosternent deuant elle, & luy font certains sacrifices, & ce qui est plus ridicule, le Roy ne prend iamais son repas, que quatre de ses prebstres n'ayent offert à ce diable les viandes apprestées pour le Roy. Et ce prince d'ambition n'estant content de s'estre ainsi faict reuerer en l'oratoire du Roy, a bien encore souffert (en l'ignominie de Dieu) qu'on luy ayt edifié vn temple magnifique au milieu d'un estang, basti à l'antique avec deux rangs de coulones, comme celuy de saint Iean de Rome. Au dedans duquel y a vn grand autel de pierre, & le vingtiesme de Decembre qui est le iour de Noël, tous les Gentils-hommes, & prebstres de vingt-cinq iournées à l'enuiron viennent pour y faire sacrifice, accompagnez du menu peuple venu en ce lieu pour gaigner les pardons, & lors ces Bramines leur oignent la teste de certaine huile, puis vnt se prosterner deuant ce grád Sathan espouventable, l'effigie duquel est erigée sur l'autel, & l'ayât adoré en ceste extreme deuotion, chacun s'en retourne à sa maison, & durant trois iours entiers que telles cerimonies durent, il y a si grande liberté & franchise par toute ceste terre, que tous les meurtriers, malfaiçteurs & banniz peuuent venir en assurance à ce pardon, à l'assemblée duquel se trouuent bien pour telle fois, cent mille personnes, lesquelz ce meurtrier
 du genre

du gère humain a si bien emmartelez & deceuz, qu'ilz pensent faire sacrifice à Dieu, & obtenir remission de leurs pechez, honorant le capital ennemy de leur salut. Ce qui doibt seruir d'exemple & miroir perpetuel à ceulx qui sont illustrez de la lumiere de Dieu, afin qu'ilz mettent peine de faire fructifier leur talent, & conseruer le tresor de la grace qui leur est faiëte, consideré que le seruiteur sachant la volonté de son maistre ne l'excutant point, est beaucoup plus reprehensible deuât Dieu, que celuy qui l'ignore: Et afin que tu ne penses que soyent discours ou Prodiges faiëtz en lair, ou inuentez à plaisir, lis l'histoire de Paulus Venet⁹, de Ludouicus Patricius Romanus, de Vartomanus en leurs histoires des Indes, ou tu trouueras toutes ces choses amplement descriptes, non comme les ayans entêdues des autres, ou leües en aucuns auteurs, mais cōme ceulx qui y ont assisté & veu par presence les choses par nous descriptes, t'assurant ceste fois pour toutes, que ie ne raconteray aucune histoire en tout ce traicté des Prodiges que ie ne confirme par autorité de quelque fameux auteur, Grec ou Latin, sacré ou prophane. Quelques modernes ont escript que ce peuple auoit esté reduict depuis quelques années à nostre Religion Chrestienne par les gens & ambassadeurs du Roy de Portugal, lors qu'il enuoya voyager aux Indes.

Fin de la premiere histoire.

A iiii

HISTOIRES
PRODIGES ET ADVERTISSE-
mens de Dieu, envoyez sur la cité de Hierusalem,
pour les induire à penitence.
Chapitre. I I.





Considerons vn peu, Chrestiens, combien cest oracle & Prodige diuin est differēt du precedent. L'vn edifie, l'autre ruyne, l'vn veult perdre, dissiper & gaster, l'autre cōseruer, reparer, & viuifier.

En quoy nous experimentons combien grande & esmerueillable est la bonté & clemence de nostre Dieu, lequel iaçoit que l'ayons offensé par vne infinie multitude d'exécrables pechez, neātmoins il nous tend sa main, nous appelle, admoneste & conuie de retourner à luy, ores par maladies & autres particulieres afflictions, quelque fois par signes & Prodiges, qui sont le plus souuent les heraulx, trompettes & auant-coureurs de sa iustice, comme il est euidemment monstré sur ceste miserable cité de Hierusalem, laquelle demeura tellement ensepuelié en son peché, que pour aucun estrangc aduertissement qui luy fust enuoyé de Dieu, elle ne peut oncques estre retirée de ses vices: Les signes & prodiges par lesquels le Seigneur leur predisoit la ruine de leur cité, sont ceulx qui suyuent, descriptz par Iosepheliure septiesme de la guerre des Iuifz, & par Eusebe en son Histoire Ecclesiastique.

Ioseph.
lib. 7.
cap. 12.
Eusebius
Cæsariensis
lib. 3.
cap. 8.

Le premier message qui leur fut enuoyé du ciel, fut vne comette en façon d'vn glauiue, qui continua l'espace d'vn an, dardant ses rayons sur leur cité. Le secōd aduint le huictiesme iour d'Auril, ainsi que le peuple f'estoit assemblé pour solemniser la feste des azimes, & lors on vid si grāde lu-

miere à l'entour de l'autel & du temple sur la
 neufiesme heure de la nuict, qu'il sembloit qu'on
 fust en plein iour: & continua ceste clarté l'espa-
 ce de demye heure. Le mesme iour de ladicte fe-
 ste vn beuf (ainsi qu'on le menoit pour le sacri-
 fier) faonna au mielleu du temple: d'auantage vne
 porte de cuyure du temple qui estoit si pesante
 qu'il failloit xx. hōmes à la fermer au soir, estant
 liée à barres & ferrures de fer, s'ouurit d'elle-mes-
 me sur la sixiesme heure de la nuict. Puis ledit Io-
 séphe adioust; ce que i'ay dict & racōpteray cy
 apres, sembleroit fable ou mēsonge, si ceulx qui
 l'ont veu n'estoiēt encores au-iourd'huy viuans,
 & que les calamitez ne fussent suruenues, dignes
 de si malheureux presages. Aduint donc que
 quelque temps auant que le Soleil se couchast,
 on apperceut en l'air des chariotz courans par
 toutes les regions du ciel, des armées qui trauer-
 soient les nuées, & enuironnoïēt quelques citez.
 Et le iour de la feste qu'on appelle Pēthecouste,
 les prestres, acheuans le seruice diuin, ouyrent
 quelque bruyt: & puis incontinent entendirent
 vne voix qui disoit, partons d'icy: mais le dernier
 Prodige est le plus espouventable de tous. C'est
 qu'un homme Rustique des champs & de basse
 condition, filz d'un païsant appellé Nanus, la cité
 estant en paix, & abondante en tous biens, estant
 venu à vne feste, commença en vn instāt à crier.
 Voix du costé d'Orient, voix du costé d'Occi-
 dent, voix de tous les quatre vens: voix cōtre Ie-
 rusalem & le temple: voix contre les nouueaux
 mariez & nouuelles mariées: voix contre tout ce
 peuple:

Le pour-
 trait en
 est figuré
 cy dessus.

peuple: & huant & criant ainsi, alloit par toutes les rues de la cité: de quoy quelques-vns des pl^r apparens, ne pouuans endurer ce triste augure & predi^ction de leur cité, le feirent fustiger, mais il ne rendit oncques vn seul mot de responce à ceux qui le flagelloient, ains il continuoit avec vne extreme obstination son mesme cry. De quoy les Magistratz estonnez, cognoissans au plus pres que cela procedoit de quelque diuine inspiration, le firent mener à celuy qui auoit le gouuernement pour les Romains, lequel le fist tant tourmenter qu'il estoit déchiré iusques aux os: mais il demeura si constant & assuré, qu'il ne rendit oncques vne seule larme, & ne requist iamais qu'on le laissast, ains à chacū coup de foiet qu'on luy donnoit il s'exclamoit de rechef, Malheur malheur sur Ierusalem: Et estant interrogé d'Albin qui estoit Iuge, d'ou il estoit, & pour quoy il se lamétoit ainsi, il ne feist aucune responce, & ne cessa par ses criz acoustumez de plaindre le desastre de ceste miserable cité: Qui fut cause qu'Albin (le pensant incésé) le lascia aller: Et ce qui est plus estrange, il cōtinua l'espace de sept ans cinq moys, iusques à la destruction de la ville de Ierusalē sans cesser de continuer ses criz, sans se trouuer enroué, ne sans remercier aucun de ceux qui luy donnoient à boire ou à manger, mais à tous ceux qui s'adrescoient à luy il responoit tousiours sa triste chanson, iusques à ce que la ville fut assiegée, & que Titus donna l'assault & se campa deuant: Et lors de rechef tournoyant la muraille, commença à enfler son cry, & crier

d'une voix horrible : Malheur sur la cité, sur le
 Témple, & sur le peuple. Puis il adiouta (pour fai-
 re fin) ces motz, malheur aussi sur moy-mesme.
 Cela acheué, une pierre poulsee d'un engin par
 les ennemis, le tua soudainement, & l'Empereur
 Titus incontinent apres desmolit & embrasa la
 cité, ou le carnage fut si grand (comme Ioséphe
 écrit) que durant ce siege ilz y moururent onze
 cens mille personnes : Et fut la bonde de l'ire de
 Dieu si bien laschée sur ce pauvre peuple des
 Iuifz, qu'apres auoir mangé toutes les viandes
 immundes, ordes, sales, qu'ilz pouuoient rencon-
 trer, finalement ilz mangerent iusques aux cour-
 royes de leurs souliers, & le cuyr de leurs Paois
 qu'ilz arrachioient & faisoient detremper : mes-
 mes le vieil foing pourry leur seruoit de viande.
 Et (ce que nous ne pouuons apprehender sans
 horreur) les meres n'auoient pas leur saoul de la
 chair de leurs enfans: tât la fureur de la iustice de
 Dieu estoit enflâmée contre ceste miserable cité.

Voy Iose-
 phe li. 7.
 cha. 7. & 8.
 de la guer-
 re des Iuifz
 ou tout ce-
 cy est écrit

Fin de la deuxiesme histoire.

PRO-

PRODIGIEUSES MORTS DE
plusieurs Roys, Princes, Pontifes, Empe-
reurs & Monarques.

Chapitre.

III.





Homme entre toutes les dignitez du monde il ne s'en trouue aucune plus excellente ou admirable, que celle des Rois, ny en laquelle reuiue plus naïuement quelque rayon ou marque de diuinité, aussi n'y en a il point de plus perilleuse, plus suiecte à ecclipse ou mutation, ne qui sente plus asprement les fleches & iugemens de l'ire de dieu, qu'ilz s'ot lors qu'ilz degenerēt de l'excellēt degré d'hōneur, auquel le Seigneur les auoit appelez. Ce qui se peut verifier par vne infinité d'exēples, sacrées & prophanes. Crœsus ce grād Roy de Lydie (fil estoit ressuscitē des mors) en sçauroit bien que dire, lequel se publiāt par tout estre le pl^r heureux Roy du mōde, fut en fin par Cyrus vaincu, ruynē & bruslé. Policrate ce grād Roy des Samyens, lequel (ainsi que tesmoigne Valere) n'auoit oncques senty aguillon de fortune, vaincu par Darius, fut par son Preuost crucifié sur la sommité d'vne montaigne. Valerian Empereur des Romains, vaincu par Sapor Roy des Perses, termina sa vie en telle seruitude, qu'il luy seruoit de marchepied & d'estrieu montant à cheual. Diocletian aussi Empereur, ayant laissé l'Empire, mourut de poison que luy mesme festoit préparé. Mais ou est maintenant ce grand Roy Xerxes qui faisoit ployer la mer soubz la multitude de ses Nauires? Ou est cest inuincible Hānibal, qui par son labour indomptable a trenché les montaignes & rendues accessibles? Ou

est Paule Æmile, Iules Cæsar, Pōpée, & autres infiniz Grecs, & Romains? que leur reste il maintenant de la splendeur de leur gloire & maiesté antique, sinon vne fable & songe entre les hommes, de laquelle encore sont ilz redeuables aux historiens qui ont laissé le tesmoignage de leur penible vie à la posterité? Que sont deuenuz leurs corps aornez de pourpre, leurs diademes, parfuns & autres telles especes de vanitez, sinon os & cendre, & les vers heritiers de leur gloire? laquelle en fin s'est monstrée si vaine & caducque, qu'à l'endroit de leur vie ou ilz pensoiét estre plus heureux, & auoir touché au comble de toute prosperité, c'est l'heure, ou ilz ont senty les plus furieux traictz de la fortune. Hercules ne mourut il pas piteusement entre les bras de s'amie, apres auoir eschappé tant de perilz par mer & par terre? Alexandre le grād ne peut mourir guerroyant toute la terre, mais il fut en fin vaincu par poison. Caius Cæsar sortit victorieux de cinquante & deux batailles, & pësant estre en repos, il fut tué au Senat. Zeno 12. Empereur de Constantinople, apres tāt de glorieuses victoires ne mourut pas en son liēt, mais il fut enterré vif par le cōmandemēt de sa femme, sans qu'il peust estre secouru d'aucun. Asclepius frere de Pōpée ne perit allant vingt & deux ans courfaire par la mer, mais apres se noya tirant de l'eau d'un Puis. Mempricius Roy d'Angleterre ne mourut pas en son liēt Royal, mais il fut ensepulturé au ventre des Loups, lesquels le dechirerent & mirent en pieces estant à la chasse, escarté de ses gens.

Mort de
Hercules.

Alexandre
fut empoisonné.

De Caius
Cæsar.

Polydore
Virgille
en son
histoire d'An
gleterre.

Drusus ayât vaincu les Parthes n'y mourut pas, mais receuant son triumphe à Rome dedans vn chariot vne tuille luy fendit la teste. Bazille 35.

Müster⁹ en
sa geogra-
phie. Bapti-
ste Fulgose
en l'histoi-
re memora-
ble.

Empereur de Constantinople ne termina pas sa vie aux cruelles guerres qu'il eut cōtre les Sarrazins, mais pensant faire sa retraicte des vanitez du monde, s'esgayât à la chasse il fut tué d'un Cerf.

Vn serui-
teur s'ap-
prochât de
luy sans y
pēser ayât
la chādelle
y mist le
feu.

Charles Roy de Nauarre ne mourut pas en exploitant plusieurs genereux actes, mais il fut fortuitement bruslé vif en vn linceul trempé en eau de vie, par la persuation des medecins qui le pensoient guerir d'une douleur de nerfs qui le tourmentoit. L'Empereur Otho troisieme de ce nom, ne mourut pas en la cruelle guerre qu'il eut à Rome contre Crescentius, mais il fina sa vie par vne paire de gands empoisonnez que luy auoit donnez la femme de Crescence. L'empereur

Polydore
Virgille.
Platine.
Carion.

Henry septiesme ne mourut en vne infinité de perilleux hazardz, esquelz il s'estoit souuēt trouué aux guerres, mais il mourut d'une Hostie empoisonnée par vn moine, comme il faisoit ses pasques. Le Pape Iean vnzieme ne mourut pas annonçant la parolle de Dieu à son troupeau, mais il fut estouffé en vn oreiller enfermé en vne austere prison. Le Pape Benoist sixiesme ne mourut pas viuant en delices comme plusieurs Prelatz font auourd'huy, mais il mourut de male rage de faim, enfermé en prison. Le Pape Victor troisieme ne mourut pas de vieillesse, mais il mourut par la poison qu'on auoit mis en son Calice, pendant qu'il celebroit sa messe. Toutes ces especes de mors par lesquelles tant de Monar-

Platine en
la vie des
Papes.

ques

ques ont terminé leur vie, sont eſtrâges, & dignes d'eſtre exactement conſiderées à ceux qui ont quelque apprehenſion des iugemens de Dieu, & ſpecialement à ceux qui enſanglantēt la terre, & qui ſuſcitent tant de tragedies par le mōde, attendant qu'autant leur en pend à l'œil: car, comme diſoit ce genereux Empereur Marc Aurelle, quelle infortune apres ſi bonne fortune? quelle ignominie apres ſi grand gloir.? Aſſez vous (diſoit il) que moy eſtant eux, i'euſſe mieux aymé ma vie eſtre moins glorieuſe, & que ma mort euſt eſté honorable, car mauuaſe mort met en grand doute la bonne vie, & la bonne mort excuſe la mauuaſe vie. Mais ſi tant d'eſpeces de mors de Roys & d'Empereurs par nous deſcriptes vous ſemblent eſtranges, les ſéquētes vous ſembleront plus admirables, meſmes plus conformes à noſtre ſubieſt, car elles ſont prodigieuſes: par leſquelles nous ſommes inſtruiſtz que lors que la iuſtice de Dieu ſ'enflamme contre noz pechez, & qu'il ſouldroye les fleches de ſon ire contre noz vices, les puſilles & abieſtz animaux ſont les bourreaux, executeurs & miniſtres de la peine qui nous eſt preparée, laquelle ne ſ'eſtēd pas ſeulement ſur le vulgaire, mais ſur les plus grandz: comme il ſera maniſteſté par la mōſtrueuſe mort d'un Roy, & d'un Eueſque, eſcrite par plus de cinquante fidelles hitoriens, leſquelz tous d'un commun accord les deſcriuent ainſi. Vn Roy nommé Popiel, Roy de Poulongne (qui regnoit l'an 346. apres l'incarnation de Ieſus Chriſt) auoit acouſtumé entre ſes autres particulieres

execrations de iurer & affirmer ainſi. Si cela n'eſt
 vray, que les ratz me puiſſent menger : qui luy
 fut vn tresmauuais preſage, car à la fin il en fut de
 uoré, comme vous entendrez cy apres. Le pere
 de ce Roy Popiel ſentât les angoiſſes de la mort,
 laiffa l'adminiſtration du Royaulme aux deux
 oncles de ſon filz, gens reuerrez de tous ceux du
 pays, pour leur preudhomie & ſaincteté. Popiel
 eſtant paruenù à l'aage requis, le pere decedé, &
 l'eſfant ſe voyât en pleine liberté, & ſans frein, cō-
 mença à ſe laiſſer tranſporter à ſes deſirs, de ſor-
 te qu'en peu de iours il deuint ſi effronté, qu'il
 n'y eut eſpece de vice qu'il n'experimentaſt, iuſ-
 ques à machiner la mort de ſes oncles, leſquelz
 il ſeit mourir de poiſon. Ce faiât il commença à
 ſe faire couronner de chapeau de fleurs, & per-
 fumer d'vnguens precieux. Et afin de mieux
 ſolemnifer l'entrée de ſon regne, il fiſt prepa-
 rer vn ſumptueux & magnifique banquet, ou
 tous les Princes & ſeigneurs de ſon Royaume
 eſtoient congregez : Et comme ilz commen-
 çoient à banqueter, voicy vne infinie multitu-
 de de ratz qui ſortirent des corps putriliez de
 ſes oncles, leſquelz luy & ſa femme auoient em-
 poiſonnez, qui vindrent aſſaillir ce cruel tirant
 entre ces delices, & commencerent à le caſſer
 à belle dens: Ce que les archers de ſa garde cuy-
 derent empêcher, mais ce fut en vain: car ilz l'aſ-
 ſaillirent ſi viuement iour & nuict que les paures
 gens demurerent ſi las qu'ilz ne pouuoient plus
 reſiſter: A raiſon de quoy il fut aduiſé par le con-
 ſeil d'environner le Prince de feu, ne cognoiſſant
 pas

pas qu'il n'y a puissance humaine qui puisse résister au conseil de Dieu: mais ce fut chose prodigieuse, que les rats passans par les braises & flammes, ne cessioient de ronger cest execrable meurtrier de ses oncles: ainsi se voyans frustrer de leur premiere intention, ilz s'aduiferent de le mener par bateau au meilleu d'un lac, mais ces animaux n'estans aucunement intimidés de la fureur de cest element, trauersans les vndes penterent iusques au bateau, ou ilz cōtinuerent leur rage avec telle impetuosité, que les bateliers, & autres deputez pour sa garde, sentans que cela procedoit de fureur diuine, furent contrainctz amener le bateau à terre, ensemble d'abandonner leur Prince à la misericorde de ces bestes: lequel se voyant seul despourueu & habandonné de tout humain conseil, ne sachant plus que faire, s'enfuyrent luy & sa femme en vne tour, ou ilz furēt en fin deschirez & consummez iusques aux os par ces petis animaux. Les Alemans ont vne semblable histoire celebrée par toutes leurs Croniques & Annalles, de Hato 32. Archeuesque de Mayence, durāt lequel il y eut vne cruelle famine en la terre. Ce loup rauissant voyant que les pauures estoient pressez de male rage de faim, (speciallement ceux de sa prouince), s'aduisa par l'instinc du diable d'en faire cōgreger vne grande multitude en vne grange, en laquelle estans enuironnez il y mist le feu, & les brulastous vifz: Estant quelques iours apres interrogé pourquoy il auoit vsé de telle tyrannie à l'endroit de ces miserables innocens, il respōdit qu'il

Tu trouue
ras ceste hi
stoire am-
plement
descripte
aux Cro-

niques de
 Maiéce, &
 aux annal.
 les de Bru-
 ges.

les auoit bruslez pour-ce quilz ne differoient en rien aux ratz, qui mengent le grain, & ne seruent de rien : mais le seigneur lequel (comme dit le Prophete, a mesme soing du passereau) ne laissa point vne telle tyrannie impunie, car à l'instant mesmes il fuscita vne grande troupe de ratz, qui le poursuyurent iusques en vne tour située en vn Lac ou il se pensoit sauluer, & lá executerent si promptement le commandement de Dieu, qu'ilz ne luy laisserent que les os, qui sont encore pour le iourd'huy enterrez au monastere de sainct Aulbin à Magence, & la Tour ou ce malheureux pasteur termina ses iours, est encores aujourd'huy en essence, qui se nommela tour des ratz, de laquelle Munstere, apres plusieurs autres, a fait mention en sa Cosmographie vniuerselle, mesme que c'est le lieu de sa natiuité. Ce qui ne semblera estrange à ceux qui ont leu aux histoires que les poux (qui sont beaucoup moindres que les ratz) ne peurét estre empeschez pour toute la prudence des medecins qu'ilz ne consummassent l'Empereur Arnoul, ne luy laissant que les cartillages & les os tous secz : comme en semblable Ce grand monarque Antiochus, voulant esteindre la memoire de la synagogue de Dieu, & introduire l'adoration des ydoles, vit yfsir vn si grand nombre de vers de son corps, & fut tellement plongé en douleur, que de l'odeur qui sortit de sa corruption, son armée en fut infectée. Celuy qui cuidoit par orgueil commander aux vndes de la mer, & peser à la balance la haulteur des montaignes, & qui estoit si enflé

enflé d'ambitiō qu'il pensoit toucher les Estoil-
le du ciel, est tellement 1 abaissé par l'espouenta-
ble iugement de Dieu, qu'aucun ne peut endu-
rer sa puanteur & corruption: vōy ceste histoi-
re 2. des Machabées. chapitre 19.

Fin de la troisieme histoire.

B iij

HISTOIRES
PRODIGE D'UN ROY MON-
strueux, par lequel est monstre en quel peril sont
ceux qui commandent, & autres qui ont
administrations de Republiques.
Chapitre. I I I I.





Ristote, Xenophon, Platon, & generalemēt tous ceux qui ont traicté de la police humaine, ont recongneu par leurs écritz, qu'il n'est rié plus difficile que de bien regner, ou commander aux Republicques, car l'affluence des biens & honneurs esquelz les princes sont coustumierement confictz, liberté de mal faire sans estre repris, la corruption du conseil de ceux qui leur assistent, sont les vrayes allumettes pour les enflammer es vices: Tellement que si nous voulons curieusement rechercher par ordre tous les discours des histoires sacrées & prophanes, nous trouverons que le nombre des mauuais Roys, Empereurs & anciens Monarques, a presque tousiours surpassé celuy des bons: car depuis qu'ilz sont emmiellez de la douceur de ce sceptre, s'ilz ne resistent au commencement à leurs affections, ilz sont en peril de se veoir precipitez en vn eternal Labyrinthe de vices. La bonté de Saul, comment a elle esté celebrée par les saintes lettres, iusques à auoir esté esleu Roy par la bouche du Seigneur? Et toutesfois se sentant erigé en ce degré d'honneur, il fut peruertie & gasté. Le commencement du regne de Salomon cōbien fut il admirable? iusques à faire retenir la memoire de sa sagesse par toutes les parties du mōde, & toutesfois estāt esleué en ce theatre de gloire, il se dōna en proye aux femmes, & fut priué de la grace du Seigneur. Caligula, Mitridates & Neron, quel tesmoignage donnoient

ilz au commencement, de leur preudhomie & bonté? mais l'issue en fut telle, que toute la terre fut infectée de leurs tyrannies, & cruautéz. De vingt & deux Roys de Iuda, il ne s'en treuve que cinq ou six qui ayent persisté en leur vertu, & bonté. Quant aux Roys d'Israel, si tu veux esplucher leur vie, depuis Ieroboam filz de Nabath, iusques au dernier, qui estoient dixneuf en nombre, tu trouueras qu'ilz ont tous en general mal administré le mesnage public. Les Romains qui ont semblablement commandé à l'une des plus florissantes Republiques du monde pour vn petit nombre d'entre eux, comme Auguste, Vespasien, & Tite, Antonius Pius, Antonius Verus, Alexander Seuerus, qui se sont assez bié portez: tu en trouueras vne infinité d'autres, tous consummez en vices, & cruautéz. Et si tu es curieux de penetrer iusques aux gestes des Grecz, Assyriens, Perses, Medes & Egyptiés, il s'en trouuera plus de mauuais, que de bons. Lesquelles choses estans viuement considerées par ce grand Roy Antiochus, la premiere fois qu'on luy presenta le Sceptre Royal, auant que le poser sur son chef (ainsi qu'écrit Valere) il le contempla longuement, puis s'escriant à haulte voix, il dist: O Diademe plus noble qu'heureux! Si la pluspart des Princes de la terre, qui te poursuuyent par fers & flammes, consideroient diligemment les espines, & miseres qui t'accompaignent, tât s'en fault qu'ilz te desirassent, que mesmes ilz ne te daigneroient leuer de terre. Et non sans cause: car si quelque ambitieux veult mesurer à droicte aulc, & peser

fer à iuste balance les delices & honneurs, avec les anxietez & perilz qui acompaignent la couronne, il y trouuera pour vne liure de miel, dix liures d'absynthe, sans mettre en compte le peril eminent d'un pauvre peuple: car s'il aduient que le Prince soit desbordé, les pauvres membres s'en ressentent, lesquelz (ainsi que Herodianus écrit) ne sont que les Singes des Princes: car ilz ne sont que ce qu'ilz leur voyent faire. Partât, puis qu'il est ainsi, que les princes, Roys & Monarques, sont comme les Fontaines publiques, ou tout le monde boit, les Theatres ou tout le monde regarde, & les torches qui esclairent à tous, & qu'ilz ne pechent pas seulement (comme disoit Platon) par le peché qu'ilz commettent, mais aussi par le mauuais exemple qu'ilz donnent à leur peuple. Qu'ilz mettent donc peine & s'esuertuent de si bien moderer leurs actions, & si bien reigler l'estat de leur vie, qu'ilz rendent un iour loyal compte au seigneur de leur troupeau, de peur qu'il ne face pleuvoir la malediction de son ire sur eulx, cōme il fist sur le miserable Roy Nabuchodonosor, quatriesme Roy des Babyloñiēs, lequel (ainsi qu'il est écrit en Daniel cinqiesme) sentit la fureur de la iustice diuine si aspre, qu'il fut l'espace de sept ans chassé & exillé de son royaulme, vagant par les deserts avec les bestes brutes, viuât de semblable pasture, & demoura nud en tel estat, battu du chauld, du froid, de la gresle & rousée, iusques à ce que le poil luy creut comme celuy de l'Aigle, & ses ongles comme ceux des oyseaux: Quel miroir! quel exem-

ple ! quel spectacle ! quel prodige pour ceux qui commandent ! de voir celuy qui estoit si somptueusement seruy de delicates viandes, oster aux desers la nourriture aux bestes, & banqueter avec elles : Celuy qui fouloit estre vestu de pourpre, & aorné de ioyaux precieux, estre si bien abaissé par la main forte de Dieu, qu'il n'est plus couuert que de poil, qui est la parure des bestes :

Fin de la quatriesme histoire.

DES ENFANTEMENTS
monstrueux, & de la cause de leur
generation.

Chapitre.

V.





Yant succinctement mō-
stré es chapitres precedés
les Roys, Empereurs, Pō-
tifes & Monarques n'estre
exempts de Prodiges, nō-
plus que le vulgaire, reste
maintenant, continuant
nostre subiect, recher-
cher les matieres de plus pres, & deduire les Mō-
stres horribles, & prodiges espouventables, qui se
retrouuent au commun peuple: mais afin que la
Philosophie, & contemplation de ces choses soit
mieux manifestée, & rendue plus claire, il est ne-
cessaire, auant que passer outre, d'exprimer les
causes dont ilz procedent & naissent. Il est tout
certain que le plus souuent ces creatures mon-
strueuses procedent du iugemēt, Iustice, chasti-
ment, & malediction de Dieu, lequel permet que
les peres & meres produisent telles abhominations,
en l'horreur de leur peché, par ce qu'ilz se
precipitent indiffermment, comme bestes brutes
ou leur appetit les guide, sans respect ou obserua-
tion d'aage, de lieu, de temps, ou autres Loix or-
données de nature, comme saint Gregoire en-
seigne en ses dialogues, de l'incontinence d'une
nourrice qui se fist engrossir à son enfant, aagé
seulement de neuf ans. Ce qui est confirmé & at-
testé avec serment par saint Hierosme d'un au-
tre qui n'auoit que dix ans, lequel fût tellement
enflammé par les gestes lascifs & contenance
amoureuses de sa nourrice, qui le faisoit coucher
avec elle, que aagé seulement de dix ans il l'en-

Hierony-
mus ad Vi-
tallem.

grossa. C'est ce que le prophete Osée crie, chapitre neufiesme, disant: Ilz ont esté faictz abhominables selon leurs amours, & quand ilz auront nourry leurs enfans, ie les destruiray tellement qu'ilz ne deuiendront point hommes, ie leur dōneray la matrice abortiue, & les mammelles tarries, & leur racine sera defechée, & ne fera plus de fruit: & filz engendrent, ie mettray à mort le fruit de leur ventre. Ce qui est confirmé par le prophete Esdras chapitre cinquiesme, ou entre les autres cruelles maledictions, desquelles Babilone est menacée par l'ange, il est expressement dict que les femmes souillées de sang menstrual, enfanteront des Monstres: Et cōbien que le plus souuent le fruit monstrueux soit le tesmoing de l'incontinence, & peché des parens, si est-ce que cela n'est pas tousiours veritable, & n'a pas tousiours lieu: car il y a beaucoup de peres & meres chastes, & continens, qui produisent leur fruit defectueux, comme il est monstré en saint Iean chapitre neufiesme, de ce pauvre homme qui estoit né aueugle, lequel ayant recouert la veue par la grace de Iesus Christ, fut interrogé de ses disciples, si le peché de luy, ou de ses parés estoit cause qu'il eust esté ainsi produit aueugle dès le iour de sa natiuité: mais le Seigneur voulāt monstrier qu'on ne doibt point accuser les parens des defaulx de leur fruit, leur respondit: que ny luy, ny son pere, ny sa mere, n'auoiēt peché: mais c'estoit afin que les œuvres de Dieu fussent manifestées en luy. Les anciēns Philosophes, & autres qui ont recherché les secretz de nature, ont assigné

beaucoup d'autres causes des prodiges, & enfans monstrueux. Aristote, Hippocrate, Empedocle, Galien, & Plin les ont referez à vne ardente, & obstinée imagination que peult auoir la femme pendant qu'elle conçoit, laquelle a tant de puissance sur le fruit, que le rayon & caractere en demeure sur la chose enfantée. Et de cecy se trouuent vne infinité d'exemples memorables, lesquelz sembleroient ridicules, ou fabuleux, si l'autorité, & fidelité de ceulx qui l'ont écrit, n'en faisoient pleine foy: En confirmation dequoy, Damascene, auteur graue, assure auoir esté présentée à Charles 4. Empereur, & Roy de Bohême, vne vierge velue entierement comme vn Ours, laquelle la mere auoit enfantée ainsi deforme, & hideuse, pour auoir trop ententiuement regardé l'effigie d'un saint Iean vestu de peau, laquelle estoit atachée aux piedz du liect pendant quelle conceuoit. Par semblable consideration, Hippocrates sauua vne Princesse accusée d'adultere, par ce qu'elle auoit enfanté vn enfant noir comme Ethiopien, son mary ayant la couleur blanche, laquelle à la suasion d'Hippocrate fut absoulte, pour le pourtraict d'un more semblable à l'enfant, lequel coustumierement estoit attaché à son liect. Lis de cecy saint Hierosme en ses questions sur Genese. Et sans nous amuser trop curieusement à deduire le tesmoignage des Philosophes, & autres docteurs, cecy mesme est verifié par l'autorité de Moysé grand legistateur de Dieu. 30. chap. de Genese, ou il monstre comme Iacob deceut son beau-pere La

Tu en as le
pourtraict
au fueillet
precedent.

Tu en as la
figure au
fueillet pre
cedent.

D'Ennuy.

ban, & s'enrichist de son bestial, ayant faict peler des verges, & mettre à l'abreuvoir, afin que les chèvres, & brebis regardans ces verges de couleurs diuerses, faonnassent leurs petiz marquetez de diuerses taches. Outre les causes precedentes de la generation des Monstres, les bons secretaires de nature en ont encores assigné d'autres. Empedocle & Diphile ont attribué cela à la superabondance, ou au deffault & corruption de semence, ou à l'indispositiō de la matrice, ce qu'ilz verifioient estre vray par la similitude des choses fusibles: esquelles si la matiere qu'ō veult fondre n'est bien cuicte, purifiée, & preparée, ou que le moule soit raboteux, ou autrement mal ordonné, la medalle qui en sort est defectueuse, hideuse & difforme. Les astrologues cōme Alcabitius, ont referé les Mōstres aux astres, iugeans que si la Lune est en certains degrez & coniunctiōs lors que la femme conçoit, son fruct sera mōstrueux: ainsi que Iulius Maternus écrit, & apres luy doctement le iurifconsulte Alciat, sur le tiltre de la signification des parolles, & des choses. Aucune fois les Monstres sont engendrez de la corruptiō des viandes ordes & salles, cōme charbōs ardans, chair humaine, & autres seblables choses que les femmes appetēt apres qu'elles ont cōceu, lesquelles sont cōtagieuses à leur fruct: Et de cecy nous auos vn exēple notable en Leuini^o Lēnius en son premier liure de occultis naturę miraculis, d'une certaine matrōne de Belges, grosse de deux enfā, qui fut enuieuse de māger de la chair d'un beau garson, sur lequel au despourueu elle auoit ietté

l'œil, & craignant d'estre refusée si elle demandoit, ou peult estre trop excessiuement pressée de ce desfreiglé appetit, se ruant sur luy, avec les dens luy deschira la main, & deuora soudain ce morceau de sa chair, ce que l'enfant endura, eu esgard à son mal, mais ainsi qu'elle cuidoit retourner pour en auoir encore autāt, l'enfant ennuyé de telle cruaulté la repoulse, dequoy honteuse & despitée apres auoir vescu quelques iours en continuelle melancholie, elle acoucha de deux iumeaux, l'un vif, & l'autre mort, & les medecins congregez pour sçauoir la cause de ceste abortion n'en trouuerent aucune que le refus qu'on luy auoit fait de ce second morceau de chair. Voyla en somme les causes les plus frequentes de la production des Monstres, deduites selon l'opinion de tous les plus sçauans auteurs Grecz & Latins. Je sçay qu'il y a encore vne espeece de Monstres artificielz, laquelle est fort familiere à ces prestygiateurs qui vont par les prouinces abuser le peuple pour en tirer argent: Ceux icy, soudain que leurs enfans sont nez, & que la tendre paste de leurs corps est flexible, leur rompent & froissent les bras, & les iambes, leur enflent le ventre par certain artifice, leur cauent le nez & les yeux pour les faire sembler prodigieux, ce qui estoit en vsage mesme dès le tēps d'Hippocrates en l'Asie, cōme il enseigne en son liure de Aëre, & Locis.

LES CAUSES GENERALES
de la generation des Monstres, avec plusieurs histo-
res memorables sur ce mesme subiect.
Chapitre. VI.





Es anciens ont eu les creatures prodigieuses en si grande horreur, que filz en rencontroient fortuite ment quelque vne en leur chemin, ce leur estoit vn presage, ou augure de desastre. Pour ce regard

l'Empereur Adrian pour auoir apperceu vn More au despourueu, s'assura de mourir en brief.

Les soldatz de Brutus estās prestz à se ioinde cōtre ceux d'Octaue Cezar, ayās récōtré vn Ethio pien en leur voye, prognostiquerent la perte de la bataille, ce qui aduint. Les anciēns Romāns semblablement les ont euz en tel mespris, qu'ilz defendirent estroictement qu'on ne receust entre les vierges Vestales celles qui auroient quelque mēbre difforme, ou qui auroiēt quelque autre vi

Gal. lib. 1. ce sur leur corps, cōme enseigne Fenestelle en sō
Cap. 12. liure des Magistratz & dignitez de Rome : mais ce qui est encore plus esmerueillable, c'est que nostre Dieu mesme a defendu à son peuple par Moyse, qu'ilz ne fussent receuz à offrir les sacrifices. Malachie 1. & au Leuitique 21. Ce qu'estant profondemēt consideré par saint Hierosme en son epistre à Demetriade vierge, se cōplainct des Chrestiens qui dediēt à Dieu, & mettēt en religiō leurs enfans boyteux, bossuz, & cōtrefaictz : mais encore est-ce chose plus estrāge que Iules Obsequēs, & les autres qui ont écrit les prodiges des Romains, assurent que les anciens Romains auoiēt ces petites creatures monstrueuses en telle abomination,

abhominacion, qu'incontinēt qu'ilz estoient nez ilz les faisoient ietter au Tybre, mais nous qui sommes nourriz à meilleure escolle, les traictōns plus humainement, & congnoissants que sont creatures de Dieu, les souffrons estre incorporez à son eglise par la regeneration, & sacrement du saint baptesme, cōme tu peulx voir apertement en la figure de ces deux filles collées & ioinctes ensemble par vne estrange infirmité de nature, lesquelles ont esté veues viues de nostre aage de plusieurs milliers de personnes, en la forme cōme tu les voy pourtraictes : mais afin que l'histoire de leur naissance soit mieux entendue, ie recēseray ce que Sebastien Munstere en écrit, lequel assure les auoir veues, & cōtéplées en la maniere qui s'ensuyt. L'an dit-il, 1495 au moys de Septēbre, vne femme enfanta vn monstre aupres de Vormes du costé droiēt du Rhin, en vn village nōmé Bristāt. C'estoiēt deux filles, ayās les corps entiers: mais leurs fronts s'entretenoient ensemble, sans que par aucun artifice humain on les peust separer, ilz se regardoient intentiuemēt l'une l'autre, moy Munstere les ay veuz à Mayēce, l'an 1501. Et lors elles auoient enuiron six ans, & estoient contrainctes de marcher ensemble, mais la chose estoit pitoyable, que lors que l'une marchoit en auant il failloit que l'autre reculast: se leuoient ensemble, dormoient ensemble, & s'entretenoient presque du nez, & ne pouuoient tourner les yeulx droiēt, mais seulement de costé, pource que leurs frōts s'entretenoiēt vn peu au dessus des yeulx: elles vesquirēt iusques à dix

ans, & lors il en mourut vne, laquelle fut ostée & separée de l'autre, mais celle qui demoura viue, mourut bien tost apres, pour la playe qu'elle auoit receue quand on separa sa sœur morte d'avec elle. Voicy (dit il) qui fut la cause de cest enfantement monstrueux. Deux femmes caque-toient ensemble, l'une estoit grosse d'enfant, sur cela vint vne troisieme qui fist choquer leurs testes, ne sachât point qu'il y en eust aucune grosse: celle qui estoit grosse s'estonna, duquel estonnement son enfantement depuis a rendu tesmoignage. Voy semblablement Cardan en ses liures de Subtilitate, ou il confesse que l'estonnement a peu ayder à lyer ces deux enfans ensemble: Mais il dict qu'il fault qu'il y ayt eu encore quelque autre cause.

Fin de la cinquiesme histoire.

PRODIGES D'UN HORRIBLE

Monstre de nostre temps, sur le discours duquel la question est décidée, si les diables peuvent engendrer & exercer les œuvres de nature.

Chapitre.

VII.





E monstre hideux (duquel tu voy le pourtraict cy dessus) nasquit en la basse Polõgne, en la noble cité de Craouie, au moys de Feburier, l'an de grace mil cinq cens quarante trois, ou (selon aucuns) mil cinq cens quarante sept, le iour de la Conuerfion S. Paul. Lequel combien qu'il ayt esté engendré de parens honorables, si est-ce qu'il estoit fort horrible, difforme & espouventable, ayât les yeulx de couleur de feu, la bouche & le nez semblable au muffle d'un beuf, avec vne corne approchant du promuscide & trompe de l'Elephant, tout le derriere du corps estoit velu comme un chien: Et au lieu ou les autres ont acoustumé d'auoir les tetins situez, il auoit deux testes de Singes, & au dessus du nombril le caractere de deux yeux de chat: aux ioinctures des genoux & des bras, quatre testes de chië avec leur mine truculente & furieuse. Les palmes de ses piedz & de ses mains estoient comme ceulx d'un Signe: & si auoit avec tout cela vne queüe retrouffée en hault, de la haulteur d'une demye aulne: apres auoir vescu quatre heures, il mourut. Aucuns escriuent qu'auant que mourir, il dist: Veillez, le Seigneur vient. Encore que ceste creature fust hideuse, si est-ce qu'elle a esté anoblie & decorée de beaucoup de doctes pleumes, comme de Gasparus Pucerus en ses liures de Teratoscopia, de Hieronimus Cardanus, de Munsterus, & entre tous les autres fort elegamment en vers latins par
Gasparus

Gasparus Bruchius. Mais par ce que Egidi^o. Facius faisant mention de ce monstre en son liure de Cometa, dict qu'il ne se peult persuader, qu'une creature si horrible ait esté engendrée de semence humaine, mais plustost de quelque esprit malin. Il me semble bon d'esplucher ceste matiere, mesmes que les plus excellēs Philosophes qui ayent regné depuis la creation du monde iusques à nostre siecle, se sont grandement tourmentez sur la recherche de ceste question, si les diables peuuent engendrer, cōcepuoir, & exercer les œures de nature, comme font les autres creatures. Aucuns ont pensé que si, & ont asseuré par leurs écritz que Platon auoit esté engendré d'une vierge, & du phantome d'Apollo. Les anciens Annalistes & Croniqueurs, qui ont redigé par écrit les memorables actes d'Allemaigne, ont écrit que les femmes des Gotz, comme elles erroient par les desers de Scithie, furēt engrossies des diables, & de telz atouchemēs les Huns auoient esté procréez: les autres, cōme Psellus, n'ont pas esté contens de dire que les diables engendroient, & qu'ilz auoiēt semence, mais mesmes que d'icelle plusieurs animaux de la terre en estoient produictz & engédrez. Lactāce Firmian auteur graue, & le quel saint Ierosme a tant exalté, a creu que les demōs estoient capables de generation, mesmes qu'ilz auoient engédéré, cōme il enseigne au chapitre quinziēme du secōd liure de ses diuines institutiōs. Agrippe en quelques vns de ses liures, & Hieronimus Cardanus en son traicté de Rebus cōtra naturā, semble auoir suiuy ceste opi

nion: Et pour confirmation de son dire, il cite vne histoire de certaine ieune damoiselle d'Escoffe, qui fut engrossie d'un diable incube, pensant que ce fust quelque beau iouuenceau qui fust couché aupres d'elle, dont elle enfanta vn monstre si hideux, qu'il espouenta tous ceux qui assisterent à l'enfantement, de sorte que les obstetrices, & sages femmes furent contrainctes incontinent de le precipiter en vn feu. Ledit Cardanus cite encore vn semblable exemple, recité par Thomas Liermont, de quelque autre femme qui fut engrossie d'un esprit malin: mesmes pour confirmation de ces choses precedentes, toute l'Angleterre, ensemble tous les historiés qui ont écrit leurs gestes, ne resonnent autre chose que l'estrange natiuité de leur Prophete Merlin, lequel ilz croient obstinément auoir esté engendré d'un diable. Combien que plusieurs personnes notables ayēt asseuré les choses susdictes comme veritables, si est-ce qu'elles sont faulses, absurdes & nō seulement repugnātes à nature, mais mesmes à nostre Religio, laquelle croit qu'il n'y eut oncques hōme engendré sans semence humaine, reserué le filz de Dieu: mesmes, cōme disoit Cassianus: Quelle absurdité, repugnance & cōfusiō seroit-ce à nature, s'il estoit licite aux diables succubes & Incubes de conceuoir d'hōmes, & les hōmes d'eux? Et combien que depuis la creation du monde iusques à nostre temps, les diables eussent produict des Monstres par tout le genre humain, iectans leurs semences par les vaisseaux des bestes, creans ainsi par les perturbatiōs de semē-

ces, vne infinité de monstres & prodiges : Nous confessons bien (ce que mesmes sainct Augustin n'a pas nyé) que les diables quelquefoys transforment en formes d'hommes ou de femmes, puis sent exercer les œuvres de nature, & auoir affaire avec les femmes & hommes pour les alescher à luxure, tromper & deceuoir : Ce que les anciens n'ont point seulement expérimenté, mais mesmes de nostre temps cecy est arriué en plusieurs provinces, à diuerses personnes: avec lesquelz les diables ont eu affaire, transfigurez en hommes & en femmes. Iacobus Ruoffus en ses liures de conceptu & generatione hominis, tesmoigne que de son temps vne femme perdue eut affaire à vn esprit malin la nuict, ayant forme d'homme, & que soudain apres le ventre luy enfla, & pensant estre grosse, elle tomba en vne si estrange maladie, que toutes ses entrailles tomberent, sans que par aucun artifice des medecins elle peust estre guarie. Il écrit le semblable du seruiteur d'vn boucher, lequel estant profondemēt plongé en vaines cogitations de luxure, fut estonné qu'il apparut incontinent deuant luy vn diable en figure de belle femme, avec lequel ayant eu affaire, les genitoires & autres parties honteuses commencerent à senflâmer de telle sorte, qu'il luy sembloit auoir le feu ardent dedâs le corps. Et comme i'ay produict ces deux exemples, i'en pourrois produire vne infinité d'autres semblables, recitées nō seulement par les Philosophes, mais aussi par les ecclesiastiques, lesquelz confessent que les diables, par la permission de Dieu, ou pour punition de

Chap. dernier du 5.
liure.

noz pechez, peuuent ainsi abuser des hommes & des femmes : mais que de telle coniunctiō il se puisse engēdrer quelque chose, cōme nous auōs predict, cela n'est pas seulement faulx, mais contraire à nostre Loy. Et en ce qui cōcerne le prophete Merlin, & plusieurs autres semblables, en la natiuité duquel tant de monde a esté abusé, qu'on a creu (comme vn oracle) qu'il ayt esté engendré du diable, nous confessons comme nous auōs ia deduit, que sa mere peut auoir eu la cōpagnie d'un diable, mais qu'il ayt peu engēdrer, cela est absurde: & s'ilz alleguēt qu'elle fut veue grosse, & qu'elle enfanta, il n'est point impertinent: & ceux qui ont leu aux bōs auteurs les prestiges, ruses & cautelles du diable, ne s'estonneront point de cecy: car il est possible que le diable par sa subtilité luy peut faire enfler le ventre, troublant & corrum pant les humeurs de son corps, luy fist sentir les douleurs que sentēt les femmes quand elles acouchent, puis quand ce vint à l'enfantement, ayant quelque enfant supposé qu'il auoit desrobé ailleurs, troublāt la veüe des sages femmes, il le supposa, afin de faindre que le diable l'auoit engendré: & en ceste sorte il peut mesmes tromper la mere, laquelle auoit occasion de penser que le diable l'eust engrossie. Et afin que tu ne pēsés que cest artifice du diable soit anciē, il l'a encore practiqué de nostre temps en semblable sorte, comme plusieurs ont veu, & beaucoup d'hommes doctes l'ont écrit, d'une fort belle ieune fille à Constance, laquelle auoit nom Magdaleine, & estoit seruāte d'un riche citoyen

de la

de la ville, laquelle publioit par tout que le diable vne nuit l'auoit engrossie: & pour ce regard les potestatz de la ville la firent mettre en prison pour attendre l'issue de cest enfantemēt : l'heure venue de ses couches elle sentit les trenchées & douleurs accoustumées des femmes, & quand les sages femmes furent prestes de receuoir le fruit, & qu'ilz pensoiēt que la matrice se deust ouurir, il commença à sortir du corps de ceste fille des clous de fer, de petiz tronçons de boys, du voirre, de os, des pierres, des cheueux, des estoupes, & plusieurs autres telles choses fantastiques & estranges: lesquelles le diable par son artifice malin y auoit appliquées, pour decepuoir & embabouyrner le vulgaire, qui adiouste legieremēt foy à ses prestiges & trôperies. Licostenes Amberbachius, & Iacobus Ruof. excellent medecin de Zurich, a écrit cecy en ses liures de hominis generatione: ce qui ne semblera incredible ou estrāge de verité à ceux qui ont leu en sainct Paul, qu'il se transfigure en ange de lumiere pour deceuoir: mesmes qu'il a esté si effrōté quelquefois, qu'il s'est adressé à Iesus Christ, le pensant seduyre. Mais par-ce que nous auōs à traicter plus amplement de ses machines en quelque endroict de cest œuure, ou no^r traicterōs s'ilz ont corps, nous ferons fin à ceste matiere, & nous resouldrons en ce, que combien que les malins espritz puissent coir, que toutesfois ilz n'ont point de semēce, ne peuuent engendrer, car il n'y a point de diuision de sexe entre eux, de sorte qu'ilz ne peuēt estre diuisez en hommes ou femmes.

Fin de la sixiesme histoire.

HISTOIRES
PRODIGES MERVEILLEUX
des foudres, Tonnoirres & tempestes, avec les
exemples de ce qui est advenu de
nostre temps. Chap. 8.





I ie me voulois amuser à déduire par le menu les anciennes & superbes citez, Theatres, Amphiteatres, colizées, colonnes & autres edifices magnifiques qui ont esté ruinez par la violence des fouldres & tem-

pestes, il me seroit requis pour le regard de ce seul subiect, de bastir vn gros œuure : mais sans emprunter le tesmoignage de l'antiquité, ie des-crieray seulement en ce chapitre ce qui est adue-nu de nostre siecle, afin que les choses que nous auons experimentées de noz ans, touchét de plus pres au marteau de nostre consciēce, & nous ren-dent plus diligens à contempler les merueilleux effectz de l'espouventable iustice de Dieu. L'an mil cinq cens vingt & vn, la populeuse cité de Milan fut tellement combatue de la fureur de la fouldre, que tous les cytoiens pensoient finer les derniers iours de leur vie par ce genre de tour-ment. Les François estans en garnison à Milan, la fouldre tomba sur vne tour du chasteau fort excellentement elabourée, qui seruoit d'orne-ment, & de defence, en laquelle on gardoit la mu-nitiō de la pouldre pour l'artillerie, & la fouldre rencontrāt ceste matiere qui estoit propre à brus-ler, démolit & renuersa non seulement la tour ius-ques à ses fondemens, mais continuāt son cours, elle abbatit les chambres prochaines, & autres membres du chasteau, esleuant plusieurs gros-ses pierres en l'air, desquelles les vnes tomberent

sur les deux Preuostz du chasteau, qui se promenoient en la place, & les briserēt aussi menu que cendre: Les autres rompoiēt les bras, les iambes, les testes, à tout ce qu'elles rencontroient: de sorte que de deux cens soldats qui y estoient, à peine en demeura il douze en vie, & estoit chose esmerueillable à veoir la grāde multitude de pierres qui auoiēt esté iectées à plus de cinq cens pas loing, dōt les vnes estoient si grosses, & massiues, que vingt beufz ne les eussent sceu leuer de terre. Ces choses sont terribles, mais encores semblent elles legieres, eu esgard à celles qui suyuent, & desquelles beaucoup d'autres citez ont esté affligées, cōme Malynes, ville située en la duché de Brabant, seigneurie par le Roy Catholique, laquelle le septiesme iour d'Aoult 1527. enuirō vnze heures de nuict, endura vne si grāde & horrible calamité, qu'à peine iamais a on leu la semblable: car le tōnerre esbrāla tellement ceste miserable cité, que les citoyens pensoient en vn instant estre engloutis aux entrailles de la terre: car apres ce grand esclat, & bruyt horrible de nuées, commença à se manifester vn esclat cōme vne lampe ardēte, duquel sortoit vne puāteur intollerable, cōme de souffre: sans qu'on peust sçauoir dōt cela procedoit, sinō ceux sur lesquels ceste foudre estoit tōbée, iusques à ce que finablement le bruit courut par la ville que le feu du ciel estoit tombé sur la porte d'Arene, en laquelle on auoit mis plus de huiet cens caques de pouldre à canon. Cest embrasement si soudain engendra vne si horrible confusiō dedās ceste desolée cité, qu'on

ne veit oncques vn plus miserable spectacle: Car en moins d'un fil d'œil, la susdicte porte fut demolie & brisée en dix mille pieces, & non seulement les fondemens furent arrachez, mais aussi les murailles prochaines iusques aux fondemens, & les pierres d'icelles espâchées par toute la ville: & qui plus est, les eaux des fossez furent en vn moment taries par la violence de la chaleur du feu. Le lendemain on trouua (côme lon dit) tout à l'entour de ceste tour demolie, des corps mors, iusques au nōbre de trois cens, & bien cent cinquante dechirez & blesez. Et entre autres choses memorables & prodigieuses, on y trouua vne femme morte, qui estoit enceinte, du ventre de laquelle on tira l'enfant encores tout vis, comme tu voys en ce pourtraict, lequel fut porté au baptisme. Il y en eut encores vne autre, de laquelle vn tourbillon de ce feu, ainsi qu'elle voulut fermer sō huys, emporta la teste aussi net, que si elle eust esté decapitée d'un glaive. Il y en a aussi d'autres, qui iouans aux cartes furent tous bruslez & ars de ce feu, hors mis l'hostesse ou ilz estoient logez, qui estoit allée à la caue querir de la ceruoise. On trouua semblablement vn hōme caché en vne cauerne, lequel sortant troys iours apres hors delà, demandoit avec vne grand' frayeur si le mōde estoit encores en estre. Brief, c'estoit vn spectacle horrible de contēpler ainsi ceste pauvre cité gastée, & defigurée, n'y ayant tēple en la ville qui ne se resentsist de ceste esclādre: mesmes les rues toutes entieres estoient renuersées, & brisées. Ce n'est pas assez ce me semble pour con-

tenter le lecteur, auoir recensé tant de piteux & estranges exemples des fouldres & tempestes, si nous n'assignons les causes dont ilz naissent, & sont engendrez. Aristote en ses Metheores, & en ses liures du monde, nous enseigne comme il y a deux sortes de vapeurs qui montent incessamment en l'air: dont les vnes sont chaudes & humides, & d'autant qu'elles sont les plus pesantes, demeurent en la mediane region de l'air, & lá sont condensées & espoissies, & en fin se resouldent & conuertissent en pluyes, gresles, neiges, & autres choses semblables: Les autres exhalatiōs qui sont esleuées de la terre en l'air, sont chaudes & seiches, & par leur chaleur & ficcité elles sont esleuées plus hault que les precedentes, de sorte qu'elles paruiennēt iusques à la supreme region, & lá s'eschauffent & s'enflamment de telle sorte, que d'icelles se procréent & engendrent les feuz & flammes, les commettes ardentes, dragons & autres choses semblables, lesquelles le plus souuent engendrēt terreur au peuple qui ignore les causes d'icelles. Or s'il aduient que ces vapeurs seiches, viennent quelquefoys à penetrer & s'engouffrer dedans quelque nuée, elles la fendēt par la partie la plus subtile, & lors l'esclair apparoiſt, & le ciel tremble, puis de l'ardeur de ce conflict qui sort de la nuée, naissent les fouldres, de sorte que nous pouuōs dire que le tonnerre est au ciel, & que le tremblement est à la terre. Combié que ceste raison soit naturelle, & bien industrieusement recherchée par ce grand Philosophe Aristote, si est-ce que les tempestes ne sont pas tousiours

iours referées és causes naturelles, mais quelque-fois les diables, desquelz la principale puissance est en l'air (côme saint Paul tesmoigne) les suscitent & engendrét, quand il plaist au Seigneur de leur lacher la bride. Ce qui est verifié par vne infinité d'exemples és lettres saintes, mesmes en Iob premier, ou Sathan ayant obtenu son saufconduit du Seigneur, brussa par tempeste de feu les seruiteurs & le bestial du prophete : Ce qui n'est pas seulement acertené par le tesmoignage des lettres saintes, mais mesmes les Etniques l'ont reconnu & confessé par leurs écrits : Car lors que le temple de Hamon tant célébré en Libie extérieure, estoit en essence, & que Sathan par prodiges, & faulx miracles se faisoit adorer soubz la figure d'un belier, & qu'il eut cōgregé (des pelerins qui venoient en ce lieu) vne infinité de thresos, & que Cambises Roy de Perse eut enuoyé son exercite pour piller ce temple cōsacré à Sathan, cest esprit malin esmeut incontinent le ciel de tourbillons, esclairs, tempestes & tonnoirres, de sorte qu'il y demeura bien cinquante mil hommes estouffez, & bruslez. Les anciens, comme Plin & autres, enseignent que les Hetruriens ont esté si curieux obseruateurs de ces mouuemens, & autres euenemens des fouldres, que mesmes ilz osoient bien par telle obseruation predire & annoncer les succés des choses, iusques à déterminer le iour de la mort & de la vie des hommes : de sorte que quelque temps avant que Auguste Cesar mourust, & la foudre eust effacé la premiere lettre de son nom, grauée en certaine mu-

raille, les Augures interrogez respondirent que
 l'Empereur n'auoit plus que cent iours de vie,
 par-ce que C. effacé, il ne demeuroit que Esar,
 qui signifie en l'ague Hetrusque Dieu, & les Ro-
 mains par le C. exprimoient le nombre de cent.
 Et partant ce prodige de tonnerre qui auoit ef-
 facé le C. donnoit à entendre que dedans le cen-
 tiesme iour il seroit avec les dieux: ce qui aduint,
 car il mourut comme ilz auoient predict, chose
 certainemēt esmerueillable, & en laquelle est ma-
 nifestée vne estrange puissance & astuce du dia-
 ble, lequel peut par son artifice predire la mort
 d'un si grand Empereur. Aristote entre autres a
 fort diuinemēt philosophé sur les effectz des fou-
 dres & tempestes, & les diuise en trois manieres,
 l'un qui brulle, l'autre qui noircist, le troisieme
 duquel la nature est admirable, & presque du
 tout incongneüe des Philosophes: car il deseché
 les vaisseaux pleins de vin, sans les endommager,
 ou leur faire ouuerture: Il penetre par tout par
 sa subtilité, il fond l'Or & l'Argent sans endom-
 mager la bourse, il brulle l'acoustrement duquel
 on est vestu, sans endommager ou apporter au-
 cune nuisance au corps: il esteinct & suffoque
 l'enfant dedans le ventre de la mère, sans luy fai-
 re aucun tort. Si tu veux entendre comme ces
 choses se peuuent faire, lis le deuxiesme liure de
 subtilitate, & le quatorziesme de varietate rerum
 de Cardanus: lequel, apres plusieurs autres, assi-
 gne les causes de ces choses. Les histoires par
 nous décrites des merueilleux effectz des tempe-
 stes, semblent estranges, ilz sont neantmoins veri-
 tables:

tables: Et mesmes beaucoup d'excellens, & notables personnages ont esté les vns fort intimidéz, les autres rompus, meurtris & tuez par ce genre de mort. Le Pape Alexandre celebrant la messe vn iour de Pasques à Sienne, & le diacre prononçant la Passion, fust paruenü à la clausule de Consummatū est, vn soudain esclair de tonnerre comença à penetrer le tēple avec telle impetuosité, que le Pape fut contrainct d'abandonner la messe, & le tēple, le diacre le liure: & mesmes tous les asistans furent tellement effrayez, qu'il n'en demeura vn seul qui ne se sauuaſt à la fuitte. Zoroastes Roy des Braçtiens mourut de tēpeſte: Capanus ſemblablement à la guerre de Thebes: Anastasius Empereur fut ſemblablement tué du tonnerre, apres l'an 27. de ſon empire: Carius auſſi, & quelques autres Empereurs. A Terracine Marcus Claudius Preteur fut brulé dedans ſa Nauire, par la fouldre qui tomba deſſus. Iulius Obsequens recite vn prodige memorable, duquel tu vois le pourtraict en la page ſuiuante, de Pōpeius Liuius cheualier Romain, lequel ſ'en retournant avec ſa fille de quelques ieux qu'on auoit exhibez à Rome, fut eſtōné qu'il vit ſa fille ieune pucelle eſtāt à cheual ſaiſie de fouldre, laquelle aſſiſſuſſoquée & eſteincte, & l'ayant apperceue ſans vie la fiſt deſpouiller nue, & fut ſa lāgue trouuée ſortir par les parties hōteuſes, cōme ſi le ſeu l'eufſt attaincte droit par la bouche, prenant ſon yſſue par le bas. Ce n'eſt pas aſſez d'auoir memoré les cauſes & memorables exēples des tōnerres, mais encore nous conuient il enſeigner le moyen de

Hōmes notables mors par tonnerre.

Marcus Fritchi⁹ in metheoris.



nous deliurer de leur fureur. Les anciens entre leurs
 secretz, ont experimenté certaines choses qui resi-
 stent aux tonnerres & fouldres, lesquelles mesmes
 n'en peuuet estre endommagées. Entre les oyseaux,
 l'Aigle,

l'Aigle, mesme ses plumes portées en panache, empeschent que ceulx qui les ont n'en soient at-
tainctz. Entre les poissons, le veau de mer, com-
me quelques modernes escriuent apres Plin en
leurs histoires des poissons: Mesmes affirment
aucuns auoir esté sauuez des fouldres, pour auoir
porté des ceinctures de veau marin. Le Laurier
entre les arbres est immune de l'assault des ton-
nerres, & pour ce regard, les anciens l'ont touf-
iours planté comme vn portier asseuré à l'entrée
de leur Palais. Et pour ceste occasion, Auguste
Cesar en portoit souuent des branches en la
main, ou s'en faisoit couronner le chef, pour la
continuelle craincte qu'il auoit d'estre saisy du
tonnerre. Si est-ce qu'aucuns Latins escriuēt que
depuis quelques ans en ça, vn Laurier à Rome a
esté blessé du tonnerre, mais ilz en font mention
comme d'vne chose rare ou prodigieuse. Tar-
con Etruscus écrit, par certaine propriété occul-
te la vigne blanche resister aux tonnerres, & dit
qu'aux regions ou ilz y sont subiectz, ilz enui-
ronnent leurs maisons des rameaux d'icelles.
Combien qu'on ayt experimenté toutes les cho-
ses precedentes profitables & vtils pour em-
pescher les fouldres, si est-ce qu'il ne se trouue
rien plus expedient ou profitable pour empes-
cher ceste iniure du ciel, que la vraye hyacin-
the: car il ne se list point en aucū auteur, que ce
luy qui l'ayt portée sur luy ayt iamais esté offē-
cé de tonnerre. Les anciens medecins, cōme Se-
rapio, n'ont pas seulement asseuré les hommes
estre hors du peril de tonnerre qui portēt la pier-

Si tu veulx
sçauoir
pour quoy
le Laurier
n'est endō-
magé de
foudre, liz
Frācfortius
en son li-
ure de sim-
pathia &
antipathia
rerum.

re d'hyacinthe, mais mesmes ont écrit que la cire portée soubz la graueure d'icelluy, reiette le tonnerre, & dict on que cecy a esté experimenté es regiõs, esquelles plusieurs perissent par tōnerres, veu qu'aucune personne n'en a esté touché qui ayt porté le Hyacinthe. Je ne veulx oublier pour mettre le dernier seau aux prodiges des fouldres & tonnerres, d'écrire qu'avec les esclairs & tourbillons de fouldre, il tombe quelquefois du ciel certaines pierres de monstrueuse grosseur, qui sont de couleur de fer, adustes & brulées, comme celle que les anciens celebrēt par toutes leurs histoires, qui tomba en Thrace, qui esgalloit presque vn chariot en grosseur: laquelle Anaxagoras Philosophe excellēt auoit quelques années deuant predict deuoir tomber. Et mesmes de noz ans, en Sugolie située sur les confins de Hongrie, il tomba vne pierre du ciel avec vn horrible esclattement le septiesme iour de Septembre. 1514. de la pesanteur de deux cens cinquante liures: laquelle les citoyens ont faict enclauer en vne grosse chesne de fer au meillieu de leur temple, & se montre avec grand merueille à ceulx qui voyagent par leur prouince. Cardan en son quatorziesme liure de varietate rerum, assure auoir veu vn grand nombre de pierres dures de couleur de fer, ayans odeur de souffre, lesquelles estoient tōbées du ciel en certain champ d'Italie, dont l'vne d'icelles pesoit cent vingt liures, l'autre soixante, lesquelles furent montrées comme chose miraculeuse, à la seigneurie Françoisise, au voyage de Naples: ou il dict qu'il est grande-

grandement estonné, comme le ciel peut soustenir la pesanteur de ces pierres l'espace de deux heures, attendu que depuis trois heures iusques à cinq, on ne cessa d'ouyr le tonnerre, & de voir les flammes au ciel, & sur la cinquiesme heure on entendit le bruyt & croulement des pierres.

Fin de la septiesme histoire.

D iij

HISTOIRES
HISTOIRE PRODIGIEVSE
d'un homme de nostre temps, qui se lauoit la
face & les mains de plomb fondu.
Chapitre VIII.





Ierohymus Cardanus li-
ure sixiesme de subtilita-
te, écrit vne hystoire pro-
digieuse, & quasi repu-
gnante à nature, mais par
ce qu'en la presence de
tous les citoyens d'une ci-
té l'experience en a esté
veüe, cela la rend & probable, & croyable. Lors
(dit il) que i'escrivois mō œuure des subtiles in-
uentions, ie veiz vn quidam à Milan, lequel lauoit
ses mains & sa face de Plomb fondu, s'estant pre-
mierement laué de quelque autre eau. Cardan
(cōme il a acoustumé avec grāde curiosité) s'es-
force de rechercher ce secret en nature, & dict
que par necessité, il faillloit que l'eau de laquelle
il se lauoit premierement, fust extrêmement froi-
de, & qu'elle eust vne vertu obscure & crasse, la-
quelle reiectoit la chaleur du plomb, mesmes em-
peschoit qu'il n'adherast au corps. Aucuns, dit-
il, asseurent l'eau de laquelle il se lauoit, estre fai-
cte de suc de pourpié, & de mercuraille, pour
cause de la glutinosité & lenteur, ce qui ne me
semble estre veritable, par ce qu'il vsoit fort aua-
rement de cest'eau, & n'en mettoit que bien peu
sur la partie ou il vouloit mettre le plomb fon-
du, mesme qu'il prenoit vn escu de chacun des
spectateurs. Si l'eau doncques eust esté faite de
ces deux herbes, qui sont à si vil pris, il en eust
faict meilleur marché, & en eust ietté plus grāde
quantité qu'il ne faisoit sur son corps: puis il cō-
clud qu'il croit que l'eau de laquelle il vsoit, fust

metalique cōme du Stybium. Conferant doncques en mon particulier ce que dit Cardan, & ce que i'ay leu en autres autheurs, i'ay trouué que le temps passé cela n'estoit point en si grande admiration comme il est auiourd'huy, veu que nous voyons par experience ordinaire plusieurs choses lesquelles par vne secrette propriété de nature, resistent au feu mesmes, ne peuuent estre consommées d'iceluy, Le poulce de Pirrhus, quand son corps fut bruslé, ne peut estre cōsommé par le feu: Les dens humaines & le diamant ne peuuent estre macerées par feu. Il y a certaine gomme qui sort du pin masle, de laquelle les tables & autres boys qui en sont frotées, ne peuuent estre endommagées par feu, cōme Theophraste enseigne. Silla auec son armée, ainsi qu'il batailloit contre Archelaus, ne sceut oncques endommager vne tour de boys, encores qu'il l'eust environnée de tous costez de flammes ardâtes: parce qu'elle estoit frotée de certain alun par dedâs: ce qui engendra grand espouementement à Silla. Isydorus & plusieurs autres ont écrit qu'il fut fait vn presnt au Pape Alexandre d'une chemise de laine blâche, laquelle pour plaisir & admiration, il gettoit au feu quand les ambassadeurs estrâges le venoient voir: Et toutefois il la y laissoit vn iour naturel sans qu'elle fust endōmagée, mesmes elle deuenoit plus belle au feu. Aucuns assuret que la laine de ceste chemise estoit faicte de ver qu'õ nōme Salemandre, lequel vit dans le feu (cōme Aristote enseigne) mais si cela est vray, il est plus probable que cela fust fait d'alumen plu-
mé, duquel i'en laisse à iuger à ceulx qui ont fait plus lōgue experien-

Gellius
lib. 15.
Cap. 1.

Il est plus
probable
que cela
fust fait d'a-
lumen plu-
mé, duquel

experiente des secretz de nature , que moy. Si scay-ie bien que sainct Augustin faict mentiõ en sa cité de Dieu, lib. 21. cha. 5. d'une lampe qui estoit au temple de Venus, laquelle combié qu'elle fust exposée aux vens , aux pluyes , & autres iniures du ciel, elle ardoit tousiours sans estre consommée, ne sans y adiouster ne huile ne meche. Et apres que ledict sainct Augustin a recherché fort curieusemēt la cause émerueillable de ce feu qui ne se consommoit point, il se resoult en fin ainsi: Ou il failloit (dit il) qu'il y eust en ceste lampe quelque chose d'une pierre qu'on nomme Abeste qui croist en Arcadie, laquelle allumée ne s'esteint point : ou bien (dit-il) failloit que la lampe fust forgée par art magicque, ou bien que quelque diable soubz le nom de Venus, fist apparoirre ce prodige , afin de s'y faire adorer, & d'entretenir le peuple en telle erreur. Ludouicus Viues sur l'exposition de ce mesme chapitre, lequel a doctement commenté & illustré les liures de la cité de Dieu de sainct Augustin , assure auoir veu à Paris du temps de ses estudes, des meches qui n'estoient point consommées de feu : Et pour confirmation de ce, il raconte comme du temps de noz peres il fut ouuert vn sepulchre enclos en la terre, auquel il fut trouué une lampe ardente qui auoit demouré allumée, & sans estre esteinte quatorze ou quinze cens ans , comme il apparut par l'inscription du temps qui estoit écrit dessus, laquelle incontinct qu'on commença à la manier & toucher , elle fut conuertie en pouldre. Si ie voulois dilater

(ainsi que Dioscoride tesmoigne liu. 5. cha. 99) les Indes du linge qui ne peut brusler, mais il blanchist au feu. Voy Volaterran liure 22.

Plinẽ écrit aussi de sõ tẽps en auoir veu de semblables. lib. 19.

ceste matiere, ie te pourrois produire beaucoup de semblables exemples des anciens autheurs, qui font mention de plusieurs choses qui resistent au feu, & qui n'en peuuent estre endomagees, mesmes qu'il y a quelques modernes qui ont écrit auoir experimenté que le petit muguet dict Aster Samius, ou Atticus, & la chaux exteincte au suc de Mauue ou de mercurialle, peuuent faire que le feu ne nuist, & ne blesse les mains qui en sont frottées.

Fin de la huitiesme histoire.

PRODIGIEUSES.
HISTOIRES PRODI-
gieuses des Juifs.
Chapitre.

31

IX.





Este malheureuse vermine de Iuifs a tant de fois inquieté nostre Republique Chrestienne, qu'il n'y a historien de nostre tēps qui ne leur ayt donné quelque attainte par ses écrits. Qui aura leu ces cruelz blasphemés & abhominables execrations qu'ilz ont publié contre Iesus Christ sauueur de tout le monde, en vn certain liure (vulgaire en leurs synagogues) qu'ilz appellent Talmud, il iurera ay sément que ceste seule cause est suffisante pour les exiller, & bannir de toutes les prouinces ou Iesus Christ est adoré. Ce pauvre peuple auueuglé, n'a pas esté cōtent de diffamer le nom de nostre sauueur par ses écrits, mais qui plus est, il a esté si effronté de l'oser assaillir par effect. L'an mil cent quatre vingtz, du regne du Roy Philippe, ce peuple maudit en l'ignominie de la Passiō de Iesus Christ, le iour du grand Vendredy, pédant que les Chrestiens vacquoient à leurs ceremonies, ilz enfermoient en vne caue tous les ans, à semblable iour, vn ieune enfant qu'ilz auoient desrobé, le flagelloient, le couronnoient d'Espines, l'abreuuoient de fiel, finablement le faisoient mourir en vne Croix: & tant continuerent ceste cruelle tragedie, que le Seigneur ennuyé de la mort de tant de pauvres innocens, permist qu'ilz fussent apprehendez comme le larrō sur le faict, & apres auoir esté mis aux questions & tourmēs, ilz confesserent que par diuerses années ilz auoi-

ent

ent faict mourir grand nombre d'enfans en ceste sorte . Dequoy le Roy Philippe acertené, non seulement les chassa de son royaume, mais encores en fist il brusler enuiron octante, en vn brasier de feu ardent. Depuis le Roy Philippes se voyant opprimé de guerres , & bas d'argent, leur permist retourner, & traffiquer en France, moyennant quelque somme de deniers qui luy furent liurez comtens: Mais ainsi que les vices sont enchesnez, & que les vns attirent les autres, ces malheureux se resentans de la premiere iniure qu'ilz auoient receuë, delibererent & resolurent entre-eux d'esteindre entierement le nom des Chrestiens, & de les faire tous mourir par poison : & pour mieux executer leurs desseins, ilz s'allierent de quelques ladres , par le secours desquelz ilz firent vn vnguent , & quelque confection composée de sang, d'vrine d'homme, & de quelques herbes venimeuses, & enueloient cela dedans de petiz drapeaulx avec vne pierre pour le faire aller au fons, puis iectoient cela de nuit aux profondz des puy, & fontaines, & de ceste corruption d'eaux s'engendra vne telle contagion en l'Europe, qu'il y perit presque la tierce partie du genre humain: car cest air infecté voloit comme vn soudain embrasement d'une ville en l'autre, & suffoquoit ce qu'il rencontroit ayât vie. Mais apres que le seigneur eut permis que la tyrannie de ces malheureux eust regné quelque temps, ainsi borna il leur mauuaise volonté, & empescha qu'elle ne passast outre: Car par succession de tēps, quelques puy

& fontaines se tarirent, & furent trouuez leurs sacs au fons de l'eau, & par coniectures aucuns furent apprehendez, lesquelz vaincuz des tourmens, confesserent la debte, & fut faict vne telle boucherie de ceux qui furēt trouuez coupables par toutes les prouinces de l'Europe, tāt de Iuifs que de Ladres, qu'il ne sera iour de leur vie que toute leur posterité ne s'en resente: Car on leur fist experimenter tant de sortes de tourmens & martyres, qu'incontinent qu'ilz estoient prisonniers, ilz auoient plus cher se tuer, ou se brusler les vns les autres, que de demeurer exposez à la misericorde des Chrestiens. Conradus de Memdember Mathematicien, & Philosophe excellēt, écrit qu'on fit bien mourir en Alemaigne seulement, douze mil Iuifs. Et comme le spectacle de les voir ainsi affligez estoit estrange, aussi la desolatiō estoit extreme de voir les pauures chrestiens auoir en telle horreur & abomination les eaux des puyz & fontaines, que silz eussent deu mourir de soif, si n'en eussent ilz pas mis vne seule goutte en leurs corps: mais ilz auoient recours aux eaux de pluyes ou de riuieres, desquelles ilz auoient grande necessité & disette, par ce qu'il ne s'en retrouve pas par tout: & tout aīsi que ces faulx imposteurs de Iuifs se sont rēdus odieux à toutes les autres nations, ainsi ont ilz souuent experimēté diuerses especes de calamitez (comme les histoires tesmoignent) mesmes Conradus Licostenes entre autres, en recite vne estrange, aduenue l'an 434. Enuiron le quel temps il se trouua fortuitement en l'Isle de Crete vn seducteur

faulx

faulx prophete, ou plustost esprit malin, comme on peult coniecturer par l'issue de son entreprise. Ce prophete ayât circuit en vn an toute l'Isle, preschoit publiquement qu'il estoit le mesme Moyse qui auoit retiré les Israélites de la seruitude de Pharaon, & qu'il estoit derechef enuoyé de Dieu pour deliurer les Iuifs de la persecution & seruitude des Chrestiens: Et apres auoir planté les premiers tiges de sa pestilente doctrine, il gaigna tant sur ce peuple par faulx miracles & autres illusions diaboliques, qu'ilz commencerent à abandonner maisons, terres, possessions, & tout ce qu'ilz auoient de bien pour le suyure, de sorte qu'on ne trouuoit autre chose par le païs, qu'une grand troupe de Iuifs, acompaignez de leurs femmes & petiz enfans, qui suiuoient ce saint homme comme leur chef. Et apres qu'ilz eurent bien erré en telle misere, il les feit monter à la fin sur la sommité d'un rocher ioignant la Mer, & commença à leur donner à entendre qu'il les vouloit faire passer la mer à pied sec, comme il auoit autrefois fait au peuple esleu de Dieu le fleuve de Jourdain, & sceut si bié desployer son artifice, qu'il leur persuada aisement, de telle sorte que ce pauvre peuple tout congregé en vn monceau, se precipita dedans les vndes, dont la plus grande partie furent submergez, les autres se sauuerét par le secours de quelques pescheurs Chrestiens qui estoient lors en la mer. Ces Iuifs apres auoir descouuert la fraulde qui leur auoit esté faicte, ne sceurent oncques par aucun artifice humain sçauoir nouuelles, ny descouurir

qu'estoit deuenu leur prophete: Ce qui a donné occasion à plusieurs de penser, mesme d'écrire que c'estoit vn diable, lequel soubz figure d'homme les auoit ainsi deceux. Sebastian Munstere écrivit en sa Cosmographie vniuerselle vne autre histoire d'eux, mais executée d'une façon plus gaye. Il dit que l'an de salut 1270. pendant que le Cöte de Sternemberg estoit Euesque de Mandebourg, vn des plus apparens Rabis de toute la synagogue des Iuifs, tomba fortuitement le iour du Sabat en vn profond retraict, duquel ne se pouuant retirer, force luy fut appeller ses cöpai-gnons à son ayde, lesquels arriuez luy dirent avec grosses complainctes que c'estoit le iour du Sabat, & qu'il ne leur estoit licite ouurer de leurs mains ce iour la, & qu'il eust patience iusques au dimanche qui estoit le iour suyuant. L'Euesque de Mandebourg aduertiy de cecy, qui estoit homme fort ingenieux, fit incontinent publier à son de trompe sur peine de la teste, que les Iuifs eussent desormais à sanctifier & solemniser le Dimanche comme le propre iour de leur Sabat: partant ce pauvre martyr demeura ainsi parfumé iusques au Lundy au matin.

Fin de la neuuesme histoire.


DELV-

PRODIGIEUSES.
DELUGES, ET INVNDATIONS
prodigieuses.

34

Chapitre.

X.



E ij



'Antiquité a tant expérimenté de chastimens de l'eau, que si ie les voulois tous recenser par ordre, la parolle me defauldroit plustost que le subiect. Le premier, & le plus memorable est amplement décrit par Moyse, en Genese 7. quād nostre Dieu feist ouurir les veines du ciel, & enuoya vne si grāde laixiue d'eaux sur la terre, pour la purifier & nettoyer des pechez des hommes, qu'elles surpassoiēt de quīze coudées la sōmité des plus hautes montaignes. Du regne de Henry quatriesme, les eaues se desbōderēt par telle impetuosité en Italie, que non seulement plusieurs milliers d'hommes furent noyez, mais, qui plus est, les historiēns racomptent que mesmes les animaux domestiques & priuez, comme poules, oyes, paons, & autres semblables, furent si bien intimidez de la fureur des eaues, qu'ilz deuindrēt sauuages, & errerēt par les deserts & forestz, sans qu'ilz peussent estre appriuoisez par apres. Ce que mesme sainct Augustin confirme, liure troisieme de la cité de Dieu. L'an de salut 1446. le 17. iour d'April, du temps de l'Empereur Federic troisieme (qui fut l'an que l'Imprimerie fut trouuée) il y eut en Holāde vne si grāde inundatiō d'eau, & la mer se desborda de telle fureur, qu'elle rompit les chaussées, regorgea derriere Dordrecht, couurit toute la terre, renuersa les villes & villages, de sorte qu'il y eut lors seize paroisses noyées, & biē cēt mil hōmes perduz avec leurs femmes, enfans, & bestiail. L'an 1530. En

Holande, Flandres & Brabant, la mer se desvoya de telle sorte, que les chaussées & rampars ne furent pas seulement rompus, mais les villes, willages & toutes creatures animées furēt rauies & emportées par la violente irruption de l'eau, & toutes les villes maritimes furent rendues nauigables comme la pleine mer. Ce qui n'aduint pas seulement en Flandres, mais la mesme année, le Tybre s'enfla à Rome, & s'esmeut de telle sorte, qu'il monta par dessus les plus haultes tours & estages de leur cité: Et sans le dommage des pontz rompus, des biens, or, argent, bled, vin, draps de Soye, farines, huilles, laines, & autres meubles, iusques à la concurrence de trois millions d'or, il y eut plus de trois mille personnes, tant hommes, femmes, que petitiz enfans, qui furēt suffoquez & exteinctz. Toutes ces choses sont esmerueillables, mais les anciens, & modernes n'ont point encores expérimenté, ny leu depuis le Deluge vniuersel de Noë, le semblable de celuy qui aduint en Phrize, l'an de grace 1230. Car ainsi qu'ilz se dōnoient du bon temps, qu'ilz banquetoient, crapuloient & s'adonnoient à toutes especes de voluptez, voicy toutes les terres prochaines de la mer de Phrize & Halderic qui furent en vn moment si couuertes d'eau, que la mer estoit si peuplée d'hommes & de bestes, qui bramoient & crioient si fort, qu'il sembloit que Dieu eust oublié la promesse qu'il auoit faicte à Noë, de ne plus ruiner le genre humain par eau: Car les hommes se branchoient sur les arbres comme les oyseaux, les autres rampoient aux mōtaignes, les meres mesmes

iettoient leurs enfans contre terre, pour estre plus legieres à la fuitte, & euter la fureur de cest element. Brief la desolation fut telle, que non seulement il y eut vne infinie multitude d'hommes, femmes, enfans & bestes noyez, mais mesmes de l'exhalation qui sortit des corps putriez, apres que les eaux furent retirées en leur canal, il s'esleua vne corruption d'air, comme vn soudain embrasement, qui fit mourir le reste de ce que l'eau auoit laissé, de sorte que ceste miserable & affligée prouince demeura presque deserte & inhabitée. Si tu veulx voir les autres Deluges plus recens, & desquelz les autres citez ont esté tourmentées, liz Carion en l'abregé de ses Croniques : Et sur tous Gaspard Contareus, en l'œuvre docte, & plein de philosophie, qu'il a fait De quatuor elementis.

Fin de la dixiesme histoire.

PRODI-

PRODIGIEUSE MORT DE
Plin, avec une briefue description de la cause des
flammes, qui sortent de certains en-
droitz de la terre.

Chapitre.

XI.





L n'est point estrange que le feu tóbât du ciel, brusle les lieux ou'il attaißt, mais il est môstrueux de le voir ylsir de la terre, sans sçauoir d'ou il prent sa nourriture, origine & naissance, comme celuy duquel faict mention Tite Liue, & Orose, qui sortit des

Calene est
ville de
Champai-
gne diste
pour
iourd'huy
Carigno-
le, à quize
mil de Ca-
pue.

entrailles de la terre, au territoire de Calene, qui ne cessa d'ardre par l'espace de trois iours & trois nuitz, iusques à ce qu'il eust mis en cendre enui rô cinq arpés de terre, desséchât si bié tout le suc & humeur de la terre, que nō seulement les bledz & autres fruißt, mais aussi les arbres avec toutes leurs racines furét bruslées & cōsommées. Pour vne semblable violēte irruptiō de feu, qui sortit de quelque souspirail incongneu, & cauerne de terre, la pluspart du royaume d'Escoffe fut anciē nemēt bruslée, cōme les hictoriens escriuent. Les philosophes ont cherché la cause de ces flāmes avec grāde diligence, puis ont trouué en fin, que le souffre, alú, le bitumē & l'eau, sōt cause d'être-tenir ce feu, mesmes aux lieux ou la terre est fort grasse: & ce feu ne pouuāt lōguemēt viure sās souspirail, lors qu'il trouue yssue, il cōmēce à se produire avec violence. Ces flammes ont esté veuës quelquefois avec grand merueille & terreur du peuple à l'entour des sepulchres & cimétieres; & autres lieux gras & humides, qui estoiet engendrées de la gresse & humidité des corps mors, qui y estoiet éterrez. Or que l'hōme être tous ani

Le peuple
pense estre
chose mira-
culeuse de
veoir le
feu à l'en-
tour des se-
pulchres.

maux soit de substâce tressubtile, & mesmemēt sa gresse, il est euidemment monstré par ce qui a esté descouuert de nostre téps au sepulchre d'Alexandre Duc de Florence, lequel, combiē qu'il fust construiēt d'un marbre blanc fort espois & solide, si est-ce neantmoins que ledict sepulchre estoit tout maculé de la gresse du corps qui auoit passé outre, mesmement les gouttes de gresse auoient penetré le fons des coulomnes. Semblablement la gresse du corps d'Alphonse Aualus, combien que son corps eust esté deseché par medicamens, sel & sable, il gasta neantmoins & macula les pierres de dessus le tombeau, trauerçant le plomb de part en part. Il y a vne montaigne en l'isle d'Islande, nommée Hecla, de laquelle Georgius Agricola, homme de nostre temps digne de memoire, faict mentiō, & plusieurs autres. Ceste montaigne iette de telles flammeches, & faict si grand bruyt, qu'il semble qu'elle soit enragée, elle iette & darde de fort grosses pierres, elle vomist le souffre: Ceux qui desirēt en approcher pour contempler la nature de ce feu, sont incontinent engloutis comme dans vn gouffre: le vulgaire du païs est en cest erreur, qu'il croit que ce lieu soit la prison des damnez, ioinēt que plusieurs historiēs escriuent, qu'il se trouue là des Phantosmes qui se montrent visibles, & font du seruice aux hommes, & principalement apparroissent en figure de ceulx, qui ont esté tuez ou noyez par quelque violente aduenture, & quād ceulx qui les cognoissent, les prient de retourner à leurs maisons, ilz respondent avec plainctes &

Merueille
de sepul-
chre.

Islande est
vne Isle
qui est en
Sueue bien
auant en la
mer Ocea-
ne.

merueil-

merueilleux gemiffemens, qu'ilz s'en retournent à la montaigne d'Hecla, & tout soudain difparoiffent & euanouiffent. Quant à mō regard, j'ay tousiours pensé que foyent quelques diables disciples de Sathan, qui ayent voüé leur obédience en ce lieu, pour deceuoir ce peuple, qui est de nature groffier & barbare. Et quant aux flammes hideuses & perpetuelles qui sortent de la montaigne, la cause, comme nous auons ia dict, est naturelle: C'est la gresse de la terre, & le souffre duquel les marchans emportent aux païs estranges grand nombre de Nauires chargées. Quant à la gresse de la terre d'Islande, les anciens & modernes historiens écriuent que les pasturages sont si gras (mesmes au plat païs) qu'on est contrainct chasser le bestail des prez, autrement il auorteroit, & ne viuroit point, & seroit incontinent suffoqué de gresse, comme ilz experimentent tous les iours. Et sans nous amuser trop curieusement à rechercher la cause des flammes des montaignes qui sont esloignées de nous, nous auons le mont Vesuue pres de Naples, duquel Martial, Strabo, & Xiphilnius en la vie de Seuerus l'Empereur, fōt souuent mention en leurs écrits, laquelle a esté autrefois tant fertile, & toutefois le feu qui y est naturel, a tout embrasé, gasté & ruiné: mesmes du temps de Tite Cesar, elle ietta tant de feu, que deux villes en furent embrasées, & sortit du sommet d'icelle des fumées si espoiffes, que la lumiere du Soleil en estoit obscurcie, & les iours sembloient nuictz, & tout à l'entour les champs estoient si pleins de cendres, qu'ilz egalloient la

hauteur

hauteur des arbres. Et comme Pline (qui regnoit du temps de Vespasian l'Empereur) desirant de sçauoir la cause du continuel embrasement de ceste montaigne la fust allé voir, & se fust approché de trop pres, il fut estonné qu'il se sentit incontinent surpris de flammes, & que son corps fut mis en cendres cōme tu vois cy dessus en pourtraict. Ce qui s'est encore renouuellé de nostre temps, en l'an 1538. ou elle fist de rechef vne si grande eruption, qu'elle estonna tout le peuple circonuoisin. Nous pouuons semblablement mettre au rang de ces prodigieuses montaignes, le mont d'Ætna, autrement dict le mont Gibel en Sicille, duquel saint Augustin faiēt si souuent mention en ses œuvres, & lequel Strabo atteste auoir veu, mesmes auoir monté iusques à la sommité pour considerer ses merueilleux effectz. Suetone tesmoigne que Caius Cesar, Caligula Empereur des Romains, ayant contemplé ce grand Torrent de feu, que ce mont vomissoit, il fut tellement espouenté, qu'il s'enfuit de nuit à Messane, & non sans cause : car depuis que l'impetuosité des vens s'entonne dedans les souspiraux de ceste montaigne, elle darde de grosses pierres, & de grandz tourbillons de feuz embrasez qui consomment tout ce qu'ilz recontrent. Thucidide faiēt mention de trois memorables embrasemens du mont d'Ætna, depuis que les Grecz eurent tenu la Sicile. Orose recite que du temps que M. Æmille & L. Oreste, estoient consulz, elle desgorgea vne telle quantité de flammes sulphurées, que tout le pais circonuoisin fut gasté : & pour ceste

cause les Romains remirent le tribut ordinaire qu'ilz receuoient de ceux de Casine, pour l'espace de dix ans. On auoit pensé de noz ans que la matiere, dont ce feu auoit acoustumé se nourrir, fust cōsommée, par ce qu'il cessa pour vn temps, mais l'an mil cinq cens dixsept, on experimenta bien le contraire: Car on fust étonné qu'une grande masse de feu, avec vne lumiere obscure, ainsi que de souffre allumé, tomba du hault du sommet en bas, laquelle par aucune froideur ne peut estre si bien temperée, que courant ça & lá, elle ne bruslast champs, pierres, forestz, mesmes deux villages, & tout ce qu'elle rencōtra. Ce feu pour le iourd'huy a cessé, à raison dequoy la terre a commencé à produire plusieurs bōs fruietz, & à deuenir fertile.

Fin de l'vnziesme histoire.

PR O D I-

PRODIGES DE QUELQUES

horribles tremblemens de terre, aduenuz en diuerses
prouinces, auec vn prestige de Sathan, lequel
par son astuce feit precipiter vn cheua-
lier Romain en vn gouffre.

Chapitre. XII.





Es histoires & Annalles des Romains, Grecz, Parthes, Medes, Perses & autres semblables, font si souuent mentiō des ruines aduenues à plusieurs citez, & prouinces par tremblemens

de terre, que i'en pourrois memorer iusques au nombre de cinq cens, bien renommées, qui toutes sont peries, & desmolies par ce genre de tourment, comme Ephese, Magnese, Sardos, Cesarée, Philadelphie, Mirinne, Apolonie, Nicomedie, Antioche & plusieurs autres, de sorte que pour vne nuit, du temps de l'Empereur Tybere, soubz lequel le sauueur du monde fut crucifié, douze des plus superbes villes de l'Asie furent ruinées de nuit, par vn soudain tremblemēt de terre, comme Pline, & Cornelius escriuent. Du

2. liure de
ses histoi-
res Romai-
nes.

temps que Flaminius batailloit contre Hannibal, comme leurs deux exercites estoient prestz à se ioindre, la terre commença si fort à soulsirer, & à trembler par telle impetuosité, que beaucoup de fiers membres de citez, & plusieurs sommetz de montaignes furent moulus & brisez, & toutefois

Liuius lib.

2. Deca. 3.

Plutarch^o

in vita Fa-

bij Maxi-

mi.

Flor^o li. 2.

(dict Tite Liue) les deux camps estoient si bien acharnez les vns contre les autres, qu'ilz continuerent leur rage, & n'eurent aucun sentiment de ces prodiges. Qui vouldra lire Dion, Niceus, & Xiphilinus en la vie d'Anthonin l'Empereur, il y trouuera de si estranges tremblemens de terre aduenus en l'Hellepont, & en Bythinie, qu'il sembloit proprement que toutes ces prouinces deussent estre deuorées & englouties. Rhodes

ille

isse tant celebrée par les écritz, a souuent esté ruinée par tremblement de terre, mesmes la grand Idole & statue du Soleil, qui decoroit tant Rhodes, que Chares Lindius disciple de Lisippus, auoit faicte en douze ans de son aage, laquelle estoit de haulteur de soixante-seize couldees, fut ruinée & abatue par tremblement de terre, cinquante & cinq ans apres qu'elle eut esté erigée, laquelle estoit encore couchée par terre du temps de Plin, avec grand esbahissement de ceux qui l'alloient veoir, de sorte que le poulce seulmēt de ceste statue estoit plus grand que les plus grandes statues qui se peussent trouuer: & estoit la richesse de ceste statue si esmerueillable, que lors que le Soudan d'Egypte enuahit Rhodes, il emporta la charge de neuf cens Chameaux de quelques fragmens & reliques de l'airain de ceste statue, qu'il trouua abatue, & l'enuoya par terre en Alexandrie. Iosephe en son liure premier de la guerre des Iuifz, faict mention d'un tremblement de terre qui aduint en Iudée, par la violence duquel trente mil hommes furēt tuez. Les Anciens soubz la conduction d'Eudoxius, voulans celebrer vn second Concile à Nice, pour oppugner les articles arrestez par le Concile general, furent estonnez que ainsi que leurs Euesques & Prelatz estoient assemblez, la cite de Nice fut tellement esmeuë par tremblement de terre, qu'il y eut plusieurs edifices abismez, & plusieurs milliers d'hommes suffoquez: & cognoissans que Dieu resistoit à leurs desseins, ilz furent contrainctz d'abandonner

leurs sieges, & retourner en leurs prouinces, comme Fuctius écrit. L'an mil trois cens quarante cinq, le iour de la Conuersion saint Paul, il y eut vn si horrible tremblement de terre en Venise (comme Sabellique écrit) que par l'espace de quinze iours assidus on ne voyoit autre chose, que maisons & edifices ruinez, & qui plus est, toutes les femmes qui estoient grosses, pendant qu'il dura, auorterent, & perdirent leur fruit: Mais afin que nous ne consommiōs trop de tēps à cōmemorer les playes que l'antiquité a receūes par les esclatemens de la terre, nous auons mesmes de noz ans experimēté le semblable, en l'an de nostre sauueur, mil cinq cens trente huit, le vingtsixiesme iour de Iāuier, ou le Royaume de Portugal fut tellemēt esbranlé par le croulement de la terre, qu'il tomba à Lisbonne (cōme les modernes escriuent) biē mil ou douze cens edifices, & plus de deux cens autres qui tendoiēt à ruine, & dura ce tourment huit iours, reiterant les assaulx cinq ou six fois le iour: Dequoy tous les pauures habitans furent si bien intimidez, qu'abandonnans leurs maisons, ilz erroient par les champs, & logeoient soubz le ciel. Tite Liue liure septiesme, Decade premiere: Orose liure 3. chap. 5. Iules Obsequēs, Polidore Virgile, & plusieurs autres font mention d'vn si estrange tremblemēt de terre aduenū à Rome, qui m'a semblé digne d'estre memoré en celieu, pour la nouueauté d'vn acte si estrangement aduenū. Ilz escriuent que du tēps de Seruilius Hala, & L. Genutius estoient Consulz, la cité de Rome fut agitée de quelque soudain

soudain tremblement de terre, lequel cessé, laissa certaine cauerne ou abisme au milieu de la place de la ville, lequel pour quelque grande quantité de terre ou autre matiere qu'on y peust ietter, ne peut estre cōblé: mesme de ce trou ord & infect sortoient quelques vapeurs si pestilentes, que la pluspart des citoyens de la ville en estoient infectez: Et apres auoir cherché tous les moyens de remedier à leur mal, s'aduiserent (pour dernier refuge) de demander conseil à leurs Deuins & Augures. Et apres qu'ilz eurent vſé de leurs ceremonies acoustumées, ilz respondirēt que ce trou par aucun artifice humain ne pouuoit estre bouché, si ce qui estoit le plus précieux en toute la cité n'estoit ietté dedans. Et apres que les dames, & autres citoyens Romains eurent liberallemēt ietté dedās, les pl^s précieux ioyaux qu'ilz eussent en leurs cabinetz, sans y profiter ou pouuoir appaiser la fureur de ce gouffre, Marcus Curtius excellent & magnanime cheualier Romain, armé de toutes pieces, & monté sur le meilleur cheual de son escuirie, se precipita en cest abisme, lequel à l'instant mesme fut bouché. Tāt les prestiges du diable estoient grands en ce siecle, auquel les hommes pensans faire sacrifice à leurs dieux, & liberer leur patrie de captiuité, faisoient vn volontaire sacrifice aux diables de leurs ames. Ayāt mis fin à ces tremblemens de terre, reste seulement de deduire les causes dont ilz naissent. Aristote, Plin, & en general tous ceux qui ont traité de l'emotion de la terre, attribuent les causes de ce malheur, aux vapeurs & exhalations qui

Le pour-
trait de
M. Curtius
est figuré
cy dessus,
au cōmen-
cement de
ce present
chapitre.

font encloſes aux entrailles de la terre, leſquelles cherchans à ſortir, & à ſ'éuaporer, la ſecoüent, mouuent, & agitent, & eſtant ainſi eſbranlée, en aucuns lieux les murailles tombent, aux autres ſe font des abifmes, comme en ccluy de Rome, duquel nous auons faiët mention: aucuneſois il en ſort des feuz, mais deuant que l'afſault ſe donne, ou quelqueſois à l'heure meſme, on oyt vn horrible ſon & murmure, ſemblable à des muglemens, ou à vne clameur d'hômes, ſelon la quantité de la matiere qui eſt eſbranlée, ou la forme de la cauerne par laquelle paſſe la vapeur: il y demeure quelqueſois vne cauerne qui monſtre ce qui eſt englouty, aucuneſois la terre ſe referme ſi ſoudain, qu'on n'y voit nulle trace, deuorant quelque fois des villes routes entieres, meſmes engloutiſt toute vne contrée de païs. Et eſt à noter, que les tremblemens de terre aduiennent plus toſt au printemps & en Antonne, qu'en autre temps ou ſaiſon.

Fin de la douzième hiſtoire.

PRO.

PRODIGE DE DEUX CORPS

antez ensemble, comme deux greffes en un tronc
d'arbre: Duquel saint Augustin faict
mention en sa cité de Dieu.

Chapitre X I I I.





Eux là ne s'estonneront point de la figure de ce Monstre, qui ont leu en saint Augustin, chapi. 8. liure 16. de sa cité de dieu, que peu deuant son temps. il nasquit vn enfât es parties d'Orient, qui estoit double par dessus, & simple par dessous, ayant deux testes, deux poitrines, quatre mains, & le reste du corps n'estoit qu'un : sçauoir est deux cuisses, deux piedz, vn ventre, & au reste depuis le nombril embas, n'auoit que la figure d'un homme, lequel comme il tesmoigne au lieu preallegué, vescu tant que plusieurs l'allerét veoir, pour la renommée qui en estoit: Ce que j'ay bien voulu mettre en auant, par-ce que celui duquel tu vois icy le pourtrait, est tout semblable à celui qui est descrit par saint Augustin, reserué que cestuy là auoit figure d'homme, & cestuy de femme, lequel fut engendré sur les Confins de Normandie, & d'Angleterre, du temps de l'Empire de Henry troisieme: & si tu le consideres bien, tu trouueras que c'est vn estrange spectacle en nature, attendu que ces deux corps estoient antez ensemble depuis le hault iusques au nombril, comme deux greffes en vn tronc d'arbre, ayant deux testes, deux bouches, deux nez, avec leurs belles faces, bien formées & accomplies de tout ce qui est requis en nature iusques au nombril, & depuis le nombril en bas il n'y auoit que la figure d'une seule, sçauoir, de deux iambes, deux cuisses,

ses, vne nature, & vn seul conduict, par ou ilz ren-
doient leurs excremens : Et ce qui estoit plus pi-
toyable, toutes leurs actions estoient le plus sou-
uent diuerses, car quelquefois que l'une ploroit,
l'autre rioit : l'une parloit, l'autre se taisoit : l'une
mangeoit, l'autre beuvoit : & vescuient ainsi lon-
guement, iusques à ce que l'une mourut, & l'au-
tre fut contraincte de trainer ce corps mort a-
pres elle iusques à quelques années d'apres, ou
par la puâteur & corruption de l'autre elle mou-
rut infectée. Les auteurs de cecy, sont Guyle-
rinus, Matheus Palmerius, Vincentius liure 26.
chapitre 38. Hierosme Cardan excellent mede-
cin Millannois, grád rechercheur des secretz de
nature, lequel est encores pour le iourd'huy vi-
uant, liure quatorziesme de ses liures De diuersa
historia, afferme que l'an mil cinq cens quarante
quatre, au moys de Ianuier, vn semblable Mon-
stre fut engendré en Italie, lequel il décrit par les
parties tout semblable à cestuy, & la mere le
produict sur terre au terme de neuf moys, bien
formé au reste, & corpulent : Neantmoins il mou-
rut incontinent apres que la mere en eut acou-
ché, par ce que les saiges femmes auoyent vsé de
trop grand effort & violence à le tirer hors du
corps de la mere. Et si décrit apres vne chose di-
gne d'estre notée, c'est qu'un Chirurgien nom-
mé Gabriel Cuneus, homme fort expert en son
art, qui auoit esté autrefois son disciple, anatomi-
fisa ceste fille monstrueuse, & la mist en pieces,
& apres auoir faict ouuerture des parties interieu

res, il y trouua double ventricule, tous les intestins doubles, reserué celuy qu'on appelle rectû: Luy trouua deux poulmons, & ainsi presque de toutes les autres parties, reserué le cueur qui estoit simple. Ce qui nous induict à penser (dict Cardan) que nature en vouloit créer deux, mais que par quelque defectuosité, elle demeura ainsi manque.

Fin de la treziesme histoire.

HISTOIRE

HISTOIRE D'VN MONSTRE,

duquel saint Hierosme fait mention, lequel
apparut à saint Anthoine au desert.

Chapitre X I I I I.





Ainct Hierosme, Licoftenes, & Ifidorus, font mention d'un Mōstre lequel fortuitement apparut à saint Anthoine, pendāt qu'il faisoit sa penitence au desert, lequel (aīsi qu'ilz décriuēt) auoit forme d'hōme, le nez hideux & crochu, deux cornes en la teste, & les piedz semblables à vne Cheure, cōme tu le peux voir figuré en ce pourtraict : Ce saint hōme espouenté de voir vne creature si prodigieuse en son desert, l'adiura au nom de Dieu de luy dire qui il estoit, lequel luy respondit, Je suis homme mortel comme toy, qui habite en ce desert, l'un de ceux que le vulgaire (deceu) appelle Satyres ou Incubes. Saint Augustin liure premier de ses questions sur Genese, questiō troisiēme, faisant mention des diables Incubes, écrit ainsi : Il se dit tant de diuerses choses de quelques diables qui sont mauuais aux femmes, qu'il n'est ayse ne facile d'en donner resolution : Mais au quinziesme liure de la Cité de Dieu, chap. 23. Il enfle vn peu son stile, & en parle plus hardiment, & dit ce qui s'ensuit : Que les anges ayent apparu aux hommes avec les corps, lesquelz non seulement se pouuoient veoir, mais aussi toucher, l'escriture l'affirme . Et par ce qu'il est grand bruit, & que beaucoup disent auoir experimenté, & ouy d'autres qui l'auoient aussi esprouué, qu'il y a des Faunes & des Syluains, que le vulgaire appelle Incubes, qui n'ont pas seulement desiré les femmes,

femmes, mais ont eu affaire à elles, & mesmes qu'il y a quelques Demon, que les Gaulois appellent Dusiens, lesquelz aiment ceste immundité. Il y a tant de gens qui l'asseurent qu'il est quasi honteux de l'oser nier. Toutesfois quant à moy, ie n'oserois asseurer, si ces espritz qui ont vn corps d'air, peuuent exercer ou souffrir ceste volupté. Si tu veulx voir vne bien ample dispute de ceste matiere, lis Guilielmus Parisiēsis, au chapitre de succubis & Incubis, en sa partie troisieme, ou il a recueilly les opinions de tous les Theologiés sur ceste matiere: mais beaucoup plus doctemēt Ludouicus Viues sur le 23. chapitre du 15. liure de la cité de Dieu de saint Augustin, ou il se mocque des Huns & de ceux de l'isle de Cypre, qui se glorifiēt par leurs écritz d'auoir prins leur origine des diables succubes & incubes, desquelz i'ay plus amplement traicté cy dessus.

Voy Alexā
der ab A-
lexā. lib. 2.
Cap. 9.

Fin de la quatorzieme histoire.

HISTOIRES
HISTOIRES PRODIGIEUSES
des pierres precieuses, & plusieurs autres choses esmer-
ueillables, qui se retrouuent es entrailles de la terre.

[Chapitre.

XV.





L ne se trouue aucune
 chose plus admirable en
 nature, ny plus digne de
 contemplation philoso-
 phique, que l'excellence
 & propriété des pierres
 precieuses: Lesquelles de-
 puis qu'elles sont tirées
 des entrailles & matrice de leur mere nourrice la
 terre, elles rauissēt noz sens, & esblouissēt nostre
 veuë de telle sorte, qu'il semble que ce soit quel-
 que charme ou nouueau spectacle ; que nature
 enuoye à noz yeulx. Ludouic^e Vartomanus Ro-
 main écrit auoir veu au Roy de Pege (qui est vne
 fameuse cité en l'Inde) des Escarboucles dictes
 en Grec, pyropi, si grâdes & lucides, que si quel-
 qu'un les regardoit en lieu tenebreux, il sembloit
 que sō corps fust diaphane, car il estoit tellemēt
 illuminé de ces pierres qui reluisoiēt d'une claire
 lumiere, cōme si l'y eust eu les plus clairs & luci-
 des rayōs du Soleil. La pluspart presque des Phi-
 losophes Grecz & Latins, comme Theophraste,
 Mutianus, Pline, Ruoffus & plusieurs autres ont
 tāt deferé aux pierres precieuses, qu'ilz n'ont pas
 seulemēt écrit qu'elles engēdroiēt, mais mesmes
 qu'elles souffroiēt maladie, la viellesse & la mort.
 Les pierres precieuses sōt engēdrées entre les ro-
 chers, quand le suc distille des pierres dedans les
 lieux creux, aīsi qu'est engēdré l'ēfant du sīg ma-
 ternel: Quelquefois elles sōt engēdrées par le suc
 des metaulx precieux, cōme on lestrouue aux mi-
 nes d'Or & d'Argēt. Et disēt ces grâds secretaires

Generatiō
 des pierres
 precieuses.

de nature que leur naissance vient comme les neudz aux bois, comme les glandules aux hommes, ou comme les semences aux herbes. Il y a encore eu d'autres philosophes beaucoup plus effrontez, car ilz ont asseuré que les pierres auoient sentiment & mouuement. Ilz prouuoient le sentiment par l'Aimant qui sent le fer, & l'attire, duquel nous traicterõs cy après plus amplemēt. Quāt au mouuement, l'experience le monstre en vne petite pierre precieuse, nommée Astroites, fort vulgaire en France, & en Italie, laquelle se mouue de soy-mesme dans le vin aigre, ou dedās le vī, & imite & ensuit le cheminer des animaux, allant tantost d'un costé, tantost de l'autre. I'ay bien voulu proposer toutes ces opinions, pour mieux authoriser l'excellēce des pierres, desquel les nous traicterõs cy apres, nompas que ie croye que les pierres ayent mouuement. Et quant à la pierre dicte Astroites, il est certain qu'elle se mouue toute seule en du vin, comme i'en ay veu souuent l'experience, mais cela ne prouient pas qu'elle ayt mouuement naturel d'elle-mesme: Toutefois qui voudra bien exactement confiderer le naturel de ceste pierre, il trouuera aisément en nature la cause de ce mouuement: car ceste petite pierre qui n'est point lucide, & qui est couuerte de taches grises & cédreées (dont elle a prins son nom) est composée d'un humeur fort subtil, lequel peut estre conuertie en vapeur, par la force du vin portant ceste vapeur, cherchāt voye pour sortir, & ne trouuant issue, elle pousse facilement ceste pierre ça & lá, qui est legiere, & le vray indice &

Ceste pierre est à vil pris, & se trouue par tout à qui en veult voir l'experience.

ce & argument de la subtile vapeur est, que ceste pierre a de petites bosses : donc il fault croire qu'elle est poreuse, & qu'il y a de grandz meats & conduitz. Nous sommes (peut estre) trop amusez à rechercher la cause du mouuement de ceste pierre, si croy-je que ceste philosophie n'est inutile, car elle donne estonnement à ceux qui la voyent se mouuoir ainsi seule, sans en sçauoir la cause. Si ie me voulois employer à rechercher des prodiges plus estranges aux pierres, que n'est le mouuement de la pierre dessus nommée d'Astroïtes, ie le pourrois faire aisément, avec grand esbahissement des lecteurs, mais encores avec plus grand espouuement de ceux qui l'ont expérimenté. Hector Boethius fait mention d'une pierre spongieuse, qui est en Escosse, laquelle rend l'eau de la mer douce quand elle est passée par dedans. Les historiens font mention d'une espèce de pierre perce, qui est un peu palle, qui s'appelle le Niculus, qui rend celuy qui la porte triste & melancolique, & contrainct les espritz tant fort, qu'elle excite de merueilleuses perturbations en l'ame. Je croy que la pluspart de ceux qui ont pénétré aux secretz des histoires anciennes, ont leu la memorable & prodigieuse vertu de la bague pandue au col de Hermion, laquelle faisoit perir malheureusement tous ceux qui la portoient. Il est tout certain qu'il y a en Argadie, région d'Escosse, une espèce de pierre, laquelle ayant demeuré quelque temps sur la paille, ou serment bien sec, elle l'allume & enflamme sans estre aidée du feu. Je pourrois produyre beaucoup de

telz exemples des estranges & presque incroyables proprieté des pierres, mais ie ne veux ennuyer le lecteur à la contemplation des choses qui sont si rares, & tant esloignées de noz sens. Il nous fault doncques rechercher l'essence & propriété de celles qui se representent ordinairement à noz sens, & qui sont plus communes. Entre les plus riches trefors que la terre ayt iamais couué en ses entrailles, ou enuoyé à l'homme, le Dyamant tient le premier lieu, lequel oultre le violent éclair par lequel il esblouist la veue, comme fil partoit d'un soudain tonnerre, encore a il vne dureté inuincible, laquelle ne resiste pas seulement à la lime, ny aux metaulx, mais qui plus est, elle ne peult estre vaincue des flammes. Plin au dernier liure de ses histoires naturelles écrit, que de son temps le Dyamant ne se trouuoit qu'aux cabinetz des princes, encores bien rarement, mais nature, qui est deuenue prodigue depuis son siecle, l'a si bié prophané, qu'il n'y a si petite bourgeoisie pour le iourd'huy, qui n'en aorne ses doigtz. Deux des plus grans prophetes de l'Eglise de Dieu, Zacharie & Ezechiel, ont honoré ceste pierre par leurs écritz, & non sans cause: car outre les communes proprieté qu'elle a de resister aux venins, poisons, charmes, songes & visions nocturnes, encores a elle vne vertu presque prodigieuse, de resister au feu, de sorte que les philosophes ont experimenté qu'elle peult durer neuf iours assidus dans les brasiers ardés, sans en estre offécée. Je ne veux obmettre en cest endroit d'aduerter les lecteurs des deux enormes fautes,

Du Dyamant.

Ezechiel.
Chap. 3.
Proprietez
du Dyamant.

fautes,esquelles les anciens & modernes se sont enuolopez,pour auoir mal obserué la propriété de ceste pierre.Plaine entre les anciens, avec tous ceux qui l'ont precedé, & entre les modernes, François Ruel medecin en son traicté des pierres, & Marbodeus poëte Latin au mesme subiect,ont grandement erré en ce qu'ilz ont écrit, que l'Aymant n'attire iamais le fer, le Dyamant present:car le contraire se voit à l'œil,par l'expérience qui est aysée.Aussi ont ilz erré en ce qu'ilz ont asseuré que le Dyamant ne peult estre vaincu par fer,ny par autre moyen, que par le sang de bouc : car il est tout certain que le coup du marteau le met en pieces, quand il est assommé par quelque forte main. Je n'ignore point qu'il n'excede toutes les autres pierres en dreté,mesmes qu'il diuise les autres pierres precieuses par sa solidité, & qu'il n'est presque poly ne lymé d'autre chose que de sa limeure,& qui plus est,i'adiouste vn plus grand argumēt de la subtilité,& dreté du Dyamant, que les anciens ont practiqué avec grand merueille: C'est que si la poincte d'un dard, d'une dague, ou de quelque autre instrument tranchant, est trempée en la forgeant en la pouldre de Dyamant,facilemēt elle pourra penetrer les armeures:car le fer & l'acier eschauffé par le coup, avec la dreté de la trempe, penetrent aisement. Nature a encores doué le diamant,d'une autre secrette propriété, qui n'est pas moins esmerueillable que la precedente: C'est qu'il attire le festu eschauffé ainsi quel Ambre, mais nompas avec

Prodige du
Dyamant.

Le Dya-
mant est
veneneux.

telle vigueur. Les anciens & modernes ont attribué plusieurs autres proprietéz estranges au Diamant, mais par ce qu'elles sont suspectes ou fautiveuses, e n'en feray pour le present aucune mention en mes écritz. Encore fault il noter qu'entre tant de riches aornemens, desquelz nature a decoré ceste pierre, pour contrepoix de ses graces, elle l'a infecté d'un vice, car il est veneneux, & est mis au rang des poisons violentes, qui soudain estouffent, quand il est beu en pouldre. Aucuns disent que c'est par son extreme frigidité, les autres disent que c'est par la violente erosion qu'il fait aux boyaux : mais la premiere opinion me semble plus probable. Et est à noter que le plus grand Dyamant qu'on ayt oncques veu, n'excede point la grosseur d'une amande, lequel est pour le iourd'huy entre les mains de Soliman Empereur des Turcs. Les modernes ont tousiours presque donné le second lieu d'honneur à l'Emeraulde, par ce que par sa viue verueur, elle ne recrée pas seulement la veuë plus que toutes les pierres, mais elle surmonte en grace & gayeté les forestz, les arbres & les plâtes: de sorte qu'il semble que nature ait eu cōtentiō avec la terre, à qui remporteroit le pris en verueur, ou l'Emeraulde, ou les plantes. Tous ceux qui ont écrit de la nature & propriété des pierres, écrivent entre autres choses, que l'Emeraulde est amye de chasteté, & qu'elle abhorre les immundes & paillars: Et pour confirmation de leur dire, ilz citent l'histoire vulgaire du Roy de Hongrie, lequel estat couché avec sa femme, ayant une Emeraulde en son

son doigt, fut estonné qu'elle se brisa en plusieurs pieces. Je ne veulx affermer que ces choses soient vrayes, ou faulses, sinon que cela fust aduenu par cas fortuit: Car l'Emeraulde est la plus fragile & rendre de toutes les pierres. Les proprietéz les plus vrayes, qui luy sont attribuées par les doctes, sont celles qui sensuyuent. Aristote suade qu'on l'attache à la teste de ceux qui ont le mal caduc. Rabi commande qu'on en boyue la pesanteur de neuf grains, & qu'elle desseche les humeurs. Sanauorola écrit que si on l'applique sur la cuisse de la femme qui sent les angoisses de son fruit, qu'elle soulage l'enfantement. Rasis & Dioscoride ordonnent au Lepreux de boire l'Emeraulde puluerisée. Je scay qu'on luy attribue beaucoup d'autres proprietéz, mais par-ce qu'elles ne sortent point de bonnes boutiques, j'ay me mieux les taire que les recenser. Je ne veux obmettre entre mes plus rares & monstrueux prodiges, de celebrer le Roy d'Angleterre Edouart, le quel ayant receu vn liure qu'Erasme luy presenta, luy feist don d'une Emeraulde, qui fut appréciée, apres sa mort, trois mille escus: laquelle ce philosophe auoit si chere, qu'il l'auoit encores en son doigt à l'heure de sa mort. Suetone écrit que Nero auoit acoustumé de cōtempler les ieux des gladiateurs dedans vne Emeraulde. Les bonnes Emerauldes s'esprouent à la pierre de touche, dicté Lidia, & si elles sont naïfues & vrayes, elles y delaissent vne macule d'airain. Sainct Iean en son Apocalipse a tant honoré ceste pierre, qu'il en a voulu faire mention. L'Escarboucle

Present du
Roy d'An-
gleterre
faict à Era-
me.

Cōme se co-
gnoissēt les
bonnes Eme-
rauldes.

De l'Escar-
boucle.

des anciens n'est autre chose, que ce que nous appellons en nostre vulgaire le Ruby, laquelle est ainsi nommée pour la similitude qu'elle a en splendeur, avec le charbon ardent: icelle iettée au meilleur des flâmes, les surmonte en lueur, & ne peut estre vaincue ny maculée d'icelles. Les plus communes excellences, & proprietéz que les philosophes attribuent au Ruby, sont de chasser la melancholie, empescher les songes & illusions nocturnes, & de servir d'anthidote contre l'air pestilent & corrompu. Je n'ignore point qu'il n'y en ayt plusieurs especes, côme le Grenat, le Balays, & autres semblables, mais ie me reserue à en parler ailleurs. Le Saphy ne cede en rié au Ruby, car si l'un nous represente le feu, lors qu'il est en sa plus viue & penetrante ardeur, aussi l'autre nous represente le ciel azuré, lors qu'il est en sa plus grande serenité. Il n'y a pierre plus celebrée des auteurs pour les vsaiges de medecine, que le vray Saphy. Auicenne tesmoigne qu'il est de vertu si astringente pour sa frigidité, qu'il estanche promptemēt le flux de sang qui decoule du nez. Galien & Dioscoride assurent qu'il reprime les excrescences, & pustules qui offensent les yeulx. Les medecins modernes avec grand effect l'ont mis soubz la langue de ceux qui sont affligez de fiebres chaudes & ardentes, & ont trouué que par sa grande frigidité il desaltere & refraichist: Il sert d'anthidote cōtre tous venins & poisons, & repercute le mauuais air de celuy qui le porte en temps pestilentieux, comme Isidore, & Anglicus Marbodeus & Ruoffus escriuent. Aucuns assurent

Vertus du
Ruby.

Le Saphy.

Le Saphy
desaltere.

Du Saphy.

seurent auoir leu en Dioscoride que le Saphy enclos en vne boëte avec l'Araigne, la tue subitement, tant sa puissance est violente contre le venin: mais ie croy qu'ilz luy imposent, car ie ne me recorde point auoir leu en Dioscoride, qu'il ayt faict mention de ces choses. L'Amatiste du temps d'Aristote, ainsi qu'il écrit, n'estoit point recommandée d'autre chose, que de resister à l'ebriété. Le Hyacinthe resiste aux tonnerres, cōme nous auons monsté au chapitre des tōnerres, de sorte que Serapio a affirmé qu'oncques hōme ne fut offencé du tōnerre, qui portast le Hyacinthe sur luy. La Turquoise selon les philosophes n'a rien de propre ou excellent en elle, que de chasser les espouentemēs & troubles du cerueau. Les meilleures viennent de Perse, d'une ville nommée Balascha, ou il y en a en abondance. En ce qu'est de l'Agathe, Je n'ay rié trouué de plus esmerueillable entre toutes ses vertus, que ce que les Arabes escriuēt des anciens, qui la donnoient puluerisée en breuuage à leurs femmes, pour experimenter si elles estoient pucelles, mais par-ce que ces choses me semblēt vaines, ie les passe legieremēt. Je pourrois semblablement traicter des Perles, du Chrysolite, de la pierre Aquilin, d'Alectre, Absynthe, Abselte, Achats, Opale & plusieurs autres, mais ie m'en deporteray pour le present, parce que Dieu aydāt ie feray voir en brief à nostre Frāce, la descriptiō vniuerselle de toutes les pierres precieuses, desquelles les Arabes, Hebreux, Egyptiens, Grecz & Latins ont faict mention en leurs écrits: mesme descouuriray les secretz des-

Voy Galie
li.9. simpl.
chap. 19.
Dioscoride
lib. 8
chap 100.
De l'Amatiste.

Lisez Pline
li.7. chap.9.
Isidorus
lib. 10.
Des vertus
de Hyacinthe, Lisez
Auicenne,
De viribus
cordis. Pli.
37. cha.9. Se
rap. agre.
cap. 39.
Solin. 4.

Les anciens
experimen-
toient si
leurs fēmes
estoit pu-
celles avec
l'Agathe.

quelz les imposteurs vsent en leurs pierres artificielles, ce qui apportera grand profit au public, car par tel moyen on trenchera la voye aux Italiens, & aux autres qui ne s'estudient à autre chose qu'à corrompre, contrefaire, sophistiquer & adulterer ce qui nous est enuoyé de nature, synce re, pur & net: ioinct aussi que les seigneurs & autres qui demeurent reclus à leurs maisons, pourront auoir le plaisir des pierres artificielles, & imiter la nature, si bõ leur semble, à peu de fraiz, par le moyen de mon œuvre, & sans l'ayde d'aucun, de sorte que ce que i'ay obserué par longues nuitées avec grãd coust & labeur, mesmes avec l'interruption de mes plus graues estudes, leur sera communiqué gratuitement, avec telle facilité, que les plus grossiers pourront comprẽdre l'art, & s'en donner plaisir, comme i'ay fait cõnoistre par experience à ceux qui me frequentent: lesquelz scauent que par le long vsage & exercice quotidian que i'en ay fait, i'ay si bien trouué la perfection, que les plus excellens Lapidaires trauaillent bien à discerner mon œuvre artificiel d'auec le naturel, sans l'esprouue du feu ou de la lime. Laissons donc les pierres en repos, iusques à ce que la saison soit venue de les produire en lumiere, & ce pẽdant par maniere d'anthidote nous traicterons de leurs vices, & des moyēs de discerner les vrayes d'auec les faulses. Les plus communs vices qui se retrouuent es pierres, sont certaines fumées, vmbres ou nubecules, qui les obscurcissent si bien, qu'elles diminuent de leurs graces. Les autres sont cassidonienſes, & ont vne asperité,

té, vn cheueu, vn point, vn apostume, qui rabais-
 sent leur pris & valeur. Les vrayes sont discer-
 nées d'auec les faulses, par la veue, par la li-
 me, par la substance & attouchement. Par la
 veuë d'autant que la splendeur de la vraye pierre
 est plus nitide, plus constâte, plus contentâte les
 yeulx, & n'est tant hebetée par la lumiere de la
 chandelle, que celle qui est faicte par artifice, de
 sorte que si ie voulois bié experiméter vne pierre
 de grand pris, ie la vouldrois contempler à la chā
 delle: par la lyme semblablement se cōgnoissent
 les pierres, quand elles resistent furieusement à
 sa viue trempe, car ceste durescé ne se peult imiter
 par aucun artifice humain. Les pierres se iugent
 semblablement par leur substāce & attouchemēt,
 d'autant qu'elles sont plus legieres, & plus froides
 que les faulses, de sorte que les Indiens, qui sont
 les plus excellens Lapidaires du mōde, les approu-
 uent par l'attouchement de la langue, & celles
 qu'ilz trouuent tresfroides, ilz y employent har-
 diment leur argēt. Il s'engendre semblablement
 quelques pierres precieusēs au vêtre de animaux,
 comme celle que Georgius Agricola a obseruée
 aux entrailles des vieulx chappons, dicte Alec-
 torius: de laquelle Pline faict aussi mention, parlant
 des victoires de Milo Crotoniates. Il y a aussi vne
 autre pierre qui s'appelle Borax ou Stelon, aucūs
 Chelonites, qui se trouue(cōme ilz escriuent) en
 la teste des vieulx & grans crapaulx, ce que Brasa-
 uolus refere auoir trouué en la teste du Crapault,
 mais il dict qu'il luy semble plustost que soit vn
 os, qu'une pierre. On écrit qu'elle resiste aux ve-

Comme les
 Indiens expe-
 rimentent
 leurs pier-
 res.

Pour la ma-
 ladie de la
 pierre.

nins, & qu'elle est souueraine pour le calcul. Il se trouue des pierres dedans les fielz des beufz, qui sont en trescommun vsage de medecine pour le iourd'huy en Turquie, ilz se trouuent semblablement en France en noz Beufz, mais nompas en tous, de sorte qu'être vne douzaine de vessies de fielz de beufz, il s'en pourra trouuer quelque vne. Quelque medecin moderne écrit que depuis quelque peu de temps en ça, il s'est trouué vne pierre en la vessie du fiel d'un homme Lepreux. I'ay veu anatomiser vn corps mort en ceste ville de Paris, qui estoit mort de la maladie de pierre, qui en auoit vne en la vessie aussi grosse qu'un œuf de Pigeon. Il s'en engendre quelquefois aussi en la teste des poissons, cōme Aristote écrit de la Maigre & de plusieurs autres: mais ie me reserue (comme i'ay promis cy dessus) à traicter ailleurs copieusement toutes ces choses. L'Aymant dōcques mettra fin à noz pierres, la vertu duquel a rauy en si grand admiration, quelques philosophes de nostre tēps, qu'ilz l'ont estimé auoir sentiment, & quelque esprit vital. Les anciens par deffault d'auoir eu congnoissance de ceste pierre, ont esté si empeschez en leurs nauigations, qu'ilz ne perdoiēt presque point la terre de veuë, ou ne se guidoient seulement ny en paix ny en guerre, que par l'adresse ou coniecture de l'Oriēt du Soleil, & couchant: ou par quelques autres estoilles. Mais depuis que Dieu nous a eslargy ses graces par le benefice de ceste pierre d'Aymant, la nauigation est si facile & ouuerte, que deux hommes s'oseront aduanturer de trauerser la mer en

Pierre de
merueilleu
se grosseur
trouuée en
la vessie
d'un hōme.

Del'Ay-
mant.

vne

une petite barquerotte, mesmes s'exposeront aux plus furieux abbays & tempestes de la mer, ce que les anciens n'eussent osé faire, ny entreprendre, par-ce qu'ilz n'auoient l'aguille & Cadrá fro-
tée avec la pierre d'Aymant. On trouue en ceste pierre deux vertus bien contraires: car l'un des boutz, faict que l'aguille regarde en tout temps la partie de Septentrion, & l'autre bout le Midy.

Celuy qui fut le premier inuenteur de l'vsage de ceste pierre d'Aymant, auoit nom Flavius: mais le premier qui en a écrit la vertu, est Albert le Grand. Aristote auoit bien congneu qu'elle attiroit le fer, mais le bon homme n'auoit oncques sceu comprendre qu'elle seruist aux nauigations: car s'il eust eu ceste intelligence, il eust beaucoup soulagé les anciens, lesquelz sont tombez en vn million d'extremes miseres & naufrages en leurs guerres naualles, par default d'auoir cõgneu la propriété de ceste pierre. Ce n'est doncques point sans cause que Pline a tant exalté ceste pierre d'Aymant, & qu'il a formé ses cruelles complainctes contre nature de ce qu'elle n'estoit pas contente d'auoir donné la voix aux rochers pour respondre aux hommes comme à l'Echo, mais encores a elle voulu donner le sentiment, & les mains aux pierres, comme à l'Aymant, avec lesquelles il retient & embrasse le fer, & semble estre touché de quelque ialousie quand on le luy rauist. La plus vulgaire dignité & excellence de l'Aymant, est d'attirer le fer, mesme de trāsferer sa vertu aux choses qui luy ont touché.

Ce qui n'a pas seulement esté experimenté des

De ciuitate
Dei lib. 21.

prophanes, mais sainct Augustin mesme confesse auoir veu & manié de l'Aymant qui attiroit vn anneau de fer. Cest anneau frotté à l'Aymant, en tiroit vn autre: Le tiers tiroit le quart, & ainsi consequemmét des autres, de sorte qu'il se faisoit vne liaison d'anneaux ayant forme de chesne, par l'atouchemét de ceste pierre. On a de nostre temps experimenté vne chose presque miraculeuse en ceste pierre d'Aymant, qui est telle, qu'on mette vn couteau sur la table, & qu'on ayt vne grand piece du meilleur Aymât, & qu'ô la mette soubz la table, sa vertu penetre la table interposée, de sorte que vous verrez le couteau tourner tout seul, avec grand merueille & admiration des assistants. Ces proprieté de l'Aymât sont vulgaires, mais il nous fault chercher ie ne sçay quoy de pl^o prodigieux en ceste pierre, afin que le lecteur avec le profit recoiue quelque plaisir. Il s'est retrouvé de noz ans vne autre espece d'Aymât qui attire la chair, de sorte que quand on l'approche de la bouche, il se prêt & lye avec les leures, mesme a vne autre vertu encôre plus prodigieuse: car si vne aiguille en est frottée, elle penetre toutes les parties du corps sans faire mal, ce qui sembleroit incredible si l'experièce n'e auoit esté faicte avec grand merueille & espouuement. Hierosme Cardã écrit qu'un medecin empirique de Tours, appellé Laurentius Grascus, auoit de ceste pierre, & promettoit par le moyen d'icelle de penetrer toute la chair sans douleur, ce que ledict Cardan pensoit estre fabuleux, iusques à ce qu'il en eust faict l'experièce, car il frota vne aiguille de cest Aymant,

Aymant, puis la mist au trauers de son bras, sans sentir aucune douleur, & la y laissa par plusieurs iours. Encore est-ce vne chose plus estrange, que celuy qui auoit cest Aymant n'obseruoit point le lieu des veines ou des nerfz, quand il mettoit indifferemmēt les fers ou aiguilles en ses bras, afin qu'on congneust par cela la grande vertu de son Aymant. Ceste pierre d'Aymant qu'auoit ce medecin de Tours, n'estoit point plus grosse qu'une febie, & estoit de couleur de fer, distincte de veines, & legiere, & ne pesoit que douze grains de blé. Cest Aymant a donné occasion de deceuoir beaucoup de peuples, & d'entretenir beaucoup de personnes en erreur, comme i'ay veu par experience depuis quinze ou seize ans que i'estois à Poictiers aux estudes, ou il arriua vn quidam qui se disoit Grec naturel, monté de cinq ou six pieces de cheuaux, & bien acōpaigné de seruiteurs, lequel se donnoit de grās coups de dagues, & de cousteaux, par les cuisses, par les bras, & presque par toutes les parties du corps, puis s'estant frotté de certaine huile qu'il appelloit huile balsamin il consolidoit ses playes comme si le fer n'y eust point touché. Il y a encores pour le iourd'huy en Italie (s'il n'est mort depuis quatre ou cinq ans que i'y estois) vn nommé Alexandre le Veronnois, qui vsoit de semblable artifice : car il auoit force seruiteurs, qu'il bleissoit en presence de tout le peuple à grāds coups de dagues, pions, cousteaux, & autres ferremēs avec telle horreur, que les yeulx humains abhorroiēt presque ce sanglant spectacle, puis leur ayant frotté leurs

playes de certaine huille, il les rendoit tous sains en presence des spectateurs, & le peuple ainsi abusé & deceu, acheptoit son huille ce qu'il vouloit, laquelle il asseuroit n'estre seulement profitable aux vlcères & playes faictes par ferrement, mais à toutes autres especes de maladies: & si scauoit si bien cōduire son affaire, qu'il n'estoit iour qu'il ne gaignast dix ou douze escuz, sans ses pratiques qu'il receuoit de medeciner les malades: car il estoit en opinion d'estre le plus scauant medecin du monde, & alloit ordinairement par les villes, vestu de pourpre, mōté sur la haquenée de semblable pareure, de sorte qu'il estoit plus reueré qu'un Hipocrates resuscité. Cardan lequel l'a veu plusieurs fois blesser ainsi ses gens, recherche fort curieusement, cōme il a de coustume, la cause de cecy, & apres qu'il s'est profondément intrinqué en vn grand labyrinthe de philosophie, il confesse qu'il ne scauroit assigner la cause de cecy, sinon qu'il enchâtoit le peuple: & dict pour resolution, qu'il fault laisser quelque chose à decider à ceulx qui viendront apres nous, & que quāt à luy, il ignore la cause de cecy: En ce qu'est de l'huille qu'il vendoit, & avec laquelle il faignoioit guarir ses seruiteurs blessez, il cōfesse qu'elle ne valloit rien, & que ce n'estoit que fiction, attendu que ceux qui en acheptoient de luy, ne receuoient aucune guarison au par apres. Pour tirer certaine resolutiō de toutes ces choses, il est vray semblable que le Grec duquel no^r auōs parlé cy dessus, & Alexandre le Veronnois, & tous les autres semblables qu'on a veu se decouper, & lace-

Puissance
esmerveil-
lable de
l'Aymant.

rer ainsi leur chair par les prouinces, ne se guarissent par leurs huilles ou pharmaques, comme ilz faignent, mais ilz frottent les couteaux, dagues & poinçons avec lesquels ilz se blessent, de ceste seconde espee d'Aymant, laquelle a ceste vertu occulte de consolider la partie offencée, & de resister à la douleur : Et afin que tu ne penses que ie sois autheur de cecy, liz Paludanus en son secōd liure, De secretis orbis, & rerum miraculis.

Fin de la quinzieme histoire.

HISTOIRES
PRODIGES DE CERTAINES
Princesses iniquement accusées, lesquelles ont
eschappé vifues, la fureur
des flammes.
Chapitre XVI.



Cen'est



E n'est point chose nouuelle, & qui ne soit souuent aduenue, que les creatures innocentes n'ayent peu estre endommagées des flammes, comme il est verifié en plusieurs personnes illustres, qui se retrouuent es saintes lettres: mais il est estrange qu'en noz siecles, esquelz le peché a plus abondé, & esquelz nous auons moins veu de miracles, cela soit aduenue. Polidore Virgile liure huictiesme de son histoire d'Angleterre, comme aussi attestent les autres qui ont écrit deuant luy, faict mention comme Godouin, prince d'Angleterre accusa iniquement de plusieurs vices Emnia mere d'Edouart Roy d'Angleterre, second de ce nom, lequel fist tant par ses menées, & faulses accusatiōs, que le Roy son filz la spolia de tous ses biens: mais par interualle de temps, ainsi qu'un peché attire l'autre, continuât sa mauuaise volonté, apres luy auoir osté les biens, encore luy voulut-il raur l'honneur: car il l'accusa de rechef d'auoir commis adultere avec l'Euesque de Vincestre: dequoy le Roy Edouart indigné outre mesure, de voir celle qui l'auoit porté en ses flans, accusée de tant d'execrables vices, resolut de la faire mourir, & ce pendant que toute la court estoit empeschée sur les enquestes du faict, il la fist mettre en vne estroicte prison, & l'Euesque en vne autre: mais elle impatiente en son mal, vn iour entre autres, demanda à parler au Roy son filz, en presence duquel elle se precipita en vn brasier ardent,

criant à haulte voix, Ainsi ses viues flâmes puis-
sent ardre mon corps, comme ie suis coupable
des faictz dont on m'accuse. Et ces propos finiz,
le Roy fut estonné qu'il la veit yfsir du feu en-
tiere, sans qu'il apparust aucune lesiõ à son corps.
Crautius en ses Annalles d'Allemagne, & plu-
sieurs autres qui ont écrit les histoires des Alle-
mans, escriuent vne histoire semblable de Henry
le Boyteux, quinziesme Empereur des Romains,
homme fort religieux, lequel fut marié avec la fil-
le de Sigefroy Palatin du Rhein, appelée Gunc-
gonde, femme chaste, & de bonne vie, s'il en fut
onques, avec laquelle l'Empereur viuoit en mer-
ueilleuse continëce, & chasteté, l'aymant vnique-
ment. Toutefois quelque gentilhomme de leurs
domesticques persuadé de l'esprit maling, s'adui-
sa pour voir leur contenance, de semer quelque
ialousie entr'eux, & trouuant l'Empereur à pro-
pos, luy raporta qu'il auoit veu l'Imperatrix re-
garder vn cheualier impudiquement, dequoy la
Royne aduertie, commâda en secret, qu'on feist
ardre fix gros fers de charuë, & qu'on les appor-
tast en la presence de l'Empereur, lequel ne sa-
chant l'occasion, fut incontînët esmerueillé qu'il
veit son espouse nuë piedz marcher hardiment
& sans aucune craincte par dessus; & ainsi qu'elle
se maintenoit debout sur les fers ardents, le regar-
dant attentiuelement, luy dist: Voyez (dict elle)
Empereur que le feu ne m'a pas blessée, aussi suis-
ie nette de toute immundicité: Dequoy l'Empe-
reur estonné, cōmença à penser en la vaine super-
stition qu'il auoit eüe, & soudain se prosternant
en terre

en terre, requist pardõ à Dieu. Ceste preuue d'innocence faicte par les flammes, semble estrange, mais ce que les historiens écriuēt de ces deux personnes, ne me semble pas moins prodigieux. C'est qu'ilz vescurent ensemble en société virginalle, sans se congnoistre toute leur vie, de sorte que cest Empereur estât proche de la mort, feist congreger les parens de sa femme, & leur dist: Le premier iour que vous me donnastes vostre fille pour espouse, elle estoit pucelle: aussi ie la vous rendz pucelle, & vous commande fidellement de la garder. Et fut ensepuely l'Empereur avec sa femme vierge, en l'église Cathedrale de Bamberg, qui a autrefois esté subiecte à l'Archeueché de Maience. Ie puis à bon droict mettre au nōbre de ces deux vertueuses princesses l'histoire que recite Eusebius Cæsariensis en son Histoire Ecclesiastique, de Policarpe, lequel durant la grande boucherie, & persécution des Chrestiens, qui se faisoit soubz l'Empereur Verus, fut conduict au feu, pour estre bruslé vif, & apres qu'il eut leué les yeux au ciel, & faict sa priere à Dieu, ilz le precipiterent en vn grand feu ardent, mais au lieu que la flamme le deuoit consumer, & mettre en cendre, elle commença (avec grand merueille) de se vouter en maniere de chambre, cōme eust faict vn voile en pleine mer agité des ventz, s'esloignant du corps du martyr, lequel apparut resplendissant, cōme l'Or, ou l'Argent qu'on fond en la fournaise: Et quand les ministres de peché veirēt que le corps ne se consommoit point, commanderent au bourreau qu'il

Volateran
a écrit vn
semblable
exemple en
sa Geographi-
c.

le perfast du glaiue: Et voicy lors (dit il) vn grād
torrēt de sang qui sortoit de son corps, en si gran
de abondance, que le feu fut esteinct: dont les
spectateurs sentans vn grief remors de conscien-
ce en leurs ames, s'enfuirent tous confus. Voy
plus amplement ceste histoire au quart liure de
l'histoire Ecclesiastique d'Eusebe. chapitre 41.

Fin de la seiz jesme histoire.

HISTOIRES PRODIGIEUSES
 de plusieurs poissons estranges, Monstres marins, Ne-
 reïdes, Syrenes, Tritons, & autres Monstres
 aquatiques qui se trouuent en la
 mer. Chapitre X V I I.





'Il y a quelque chose digne de contemplation philosophique en l'vniuersel subiect des animaux irraisonnables, certainemēt sont ceux, desquelz la nature est plus esloignée de nostre sens, cōme des poissons, & autres

Monstres aquatiques : lesquelz cachez aux profonditez des mers, & quasi enterrez & enseueliz aux tenebreux abismes des lacs, & fleuues, deçoiuēt le plus souuēt les plus curieux chercheurs de leurs meurs, & facultez : Et croy qu'il n'y a aucun tant stupide ou grossier, que s'il veult contēpler de bō œil les gestes de ces petiz animaux, lors qu'ilz sont agitez de l'impetuosité des vndes, ou qu'ilz exercent leurs autres naturelles actions, qu'il ne desirast voluntiers pour quelque espace de temps estre transformé en leur espece, ou se precipiteroit voluntiers en l'elemēt ou ilz font leur demeure, afin d'en receuoir quelque plus libre, & parfaicte congnoissance. Ce qu'estant viuement apprehendé par l'Empereur Anthonin, ayant receu quelque œeuure d'Oppian, traictant de la nature des poissons, & de la pescherie, luy donna autant d'escus que son œeuure contenoit de vers. Et pour rendre encore sa liberalité plus acōplie, il reuouqua son pere d'exil. Cōradus Celtis, & apres luy Gesnerus, monstrant le desir & affectiō que les Empereurs anciēs auoiēt de congnoistre la proprieté, l'aage, les meurs & facultez des poissons, écriuent que l'an de salut

Gesner^o ci-
te ceste hi-
stoire.

1497. il fut prins vn Brochet en vn estang pres de Haylprun, cité Imperialle de Sueue, lequel auoit vn anneau de cuyure attaché à ses branches & aureilles, auquel estoit écrit en caractères grecz, ce qui s'ensuit: Je suis le premier poissō qui fut mis en cest estang par les mains de Federic second gouuerneur du monde, le cinquiesme d'Octobre, 1230. De sorte qu'il apparoiſt par le tesmoignage de ces caractères grecz, que ce brochet auoit vescu en cest estang 267 ans. Et semble que ce bon Empereur Federic second eust ensuiuy aux poissons ce que le grand Alexandre auoit faict aux cerfs: lequel, ainsi que Plinē tesmoigne, leur faisoit quelquefois attacher des chesnes d'Or à l'entour du col, puis les laissoit aller à la cāpaigne avec ces chesnes, & leurs inscriptiōs: & cent ou deux cens ans apres on les trouuoit avec leurs chesnes. Mais qui ne s'esmeruilleroit de la diligence des Romains à cōstruire leurs viuiers, & reseruoirs de poisson? lesquelz (ainsi que Varro tesmoigne) coustent tāt à édifier, tāt à peupler, & tant à nourrir ce qui est dedans, & toutesfois ilz ne pardonnoient à aucune despēce pour en auoir le plaisir. Quelquefois ilz ont ietté les hōmes cōdemnez tous vifz dedans, afin que ces petiz animaux fussent les bourreaux de leurs vices: les autres-fois ilz les domestiquoient & appriuoisoient si biē, qu'au son de leur sifflet ilz venoient mēger en leur main au bort de leurs viuiers: quelquefois ilz leurs attachoient de petiz affiquetz, & lames d'Or, ou d'Argēt aux aureilles, & les auoient en tel les delices, qu'on list que Lucius Crassus Cēseur

Prodige
d'un Bro-
chet qui a-
uoit vescu
267. ans.

Romains a-
mateurs des
poissons.

Pollio che-
ualier Ro-
main fut in-
uenteur de
ce supplice.

Macrobe.

Pline di&
toutesfois
que ce fut
Hortense.
Plutarque.

pleura & lamenta la mort d'une Murene qu'il auoit en ses viuiers, toutainfi qu'il eust faict celle de l'une de ses filles: ce qui luy fut reproché par son competeur Domitius, comme quelque vice infigne & notable, luy disant: Pusillanime & effeminé, tu as ploré la mort de ton poisson appellé Murene. Et l'autre luy respôdit: Et toy qui as eu trois femmes, tu n'en as iamais ploré vne. Je pourrois adiouster, pour plus grâd aornement & decoration des poissons, que les Empereurs Romains en leurs banquetz ont tousiours plus estimé les poissons que les volatilles, mesmes en ont eu quelques vns en si grande obseruation & reuerence, comme l'Accipenser (qu'aucuns nomment nostre Esturgeon) qu'ilz vouloient que ceux qui le presentoiēt sur leur table, fussent couronnez de chapeaux de fleurs, & que les Trompettes & Clairons feissent resonner la maison de fanfares durât qu'on le mägeoit, & encores pour le iourd'huy en tout le païs de Grece, & de Turquie ilz sont plus frians de poisson, que de chair: comme aussi estoient les anciens, qui est la cause pour laquelle les Grecz & Latins Medecins ont tousiours plus traicté en leurs liures des alimens des poissons, que de chair, par ce que la chair a tousiours esté inferieure au poisson. Et encores pour le iourd'huy les religieux d'Ægypte s'abstiennent toute leur vie de menger du poisson, pensant se priuer d'aussi grandes delices comme font noz moynes, qui s'abstiennent de menger de la chair. C'est d'ocques ce me semble assez philosophé sur la dignité & recômandatiō des poissons:

sons : Reste maintenant monstrier comme la mer
a ses prodiges beaucoup plus esmerueillables,
que la terre, desquelz ie déduiray seulement les
principaulx, & ceux qui ont engendré plus d'é-
stonnement & d'admiration aux plus excellens
philosophes du monde. Entre les prodiges de la
mer, il semble miraculeux & presque incroyable
que les poissons volent, & que ces animaux stu-
pides s'esleuent de leur element humide pour
fendre & penetrer l'air, & imiter les oyseaux, &
neantmoins il est tout certain (cōme on voit par
experiēce en plusieurs endroictz de la mer) qu'il
y a plusieurs especes de poissons volans : mais ie
ne t'ay icy figuré au commencement de ce chapi-
tre que de la seule Arondelle de mer, ainsi que
Gesnerus & Rondelet en leurs histoires des pois-
sons l'ont depeincte. Si tu en veux voir vne bien
ample description, liz ledict Rōdelet au chapitre
premier de son dixiesme liure, ou il écrit qu'au-
cuns disent que ce poisson volant nommé Aron-
delle de mer, est appellé d'autres Rate-penade,
par-ce que de la couleur, de la grandeur, des ta-
ches, & des elles il ressemble à vne Chauue-sou-
ris. Toutefois (dit-il) si vous considerez bien en-
tierement ce poisson, & sa façon de voler, il res-
semble beaucoup mieux à vne Arōdelle qu'à v-
ne Chaune-souris. Aristote faict mention de ce
poisson, li. 4. chap. 9. De historia animaliu. Op-
pianus écrit que ce poisson vole hors de l'eau, de
peur que les grāds poissons le deuorēt. Pline écrit
qu'il y a vn poisson qui vole qu'on nōme Aron-
delle, qui ressemble bien fort l'oyseau qu'on ap-

Prodiges
de la Mer.

Le pour-
trait de ce
poisson est
au commē-
cēmēt de ce
chapitre.

Aristote.
Oppian.

pelle Arondelle, lequel est rare, & se monstre par miracle avec ses grâdes elles; lequel on desseche, puis on le pend aux maisons. Je croy qu'il estoit plus rare du tēps de Pline, qu'il n'est pour le iour d'huy : car il s'en retrouue en plusieurs cabinetz de France, d'Espagne, d'Italie & d'Allemagne. I'en ay quelquefois veu deux à Rome dessechez en la maison d'un medecin, nommé monsieur Crispus, mais ilz estoient tous deux dissemblables. Claudius Campenius medecin de monsieur le Marquis de Trās m'a asseuré, que depuis trois ou quatre moys l'Admiral d'Angleterre feist quelque festin, ou il fut présenté vn poisson vollant. Ceux qui ont nauigé aux colōnes d'Hercules de nostre temps, disent qu'il y a si grâde quātité de ces poissons volans qu'ilz ne ressemblent pas que soiēt poissons, mais oyseaux de mer. Au reste, lecteur, ie ne veux obmettre de te monstre icy le pourtraict d'un poisson volāt, ou biē de quelq'autre Mōstre aquatique, lequel est cause que i'ay basti tout ce traicté des merueilles des poissons, duquel tu sçauras gré au seigneur d'Asserac, lequel ie nōme par honneur, d'autant qu'outre le continuel exercice & dexterité qu'il a des armes (comme il en a faict preue par tous endroiētz, ou de son tēps on a exposé la vie & le sang pour le seruice du Prince) encores a il vne singuliere affectiō aux lettres, ayme, cherist, honore & fauorise ceux qui en font professiō. Et nō contēt de tant de bonnes parties, & autres excellens aornemens de vertu, encores est-il fort curieux de recouurer plusieurs choses antiques & estranges, desquel-

les il a peuplé son cabinet, qui apportent vn merueil
leux contentemēt à ceux qui les contemplent. Entre
lesquelles i'ay obserué & cōsideré de point en point



ce poisson, ou Monstre aquatique, & l'ay fait pour-
traire sur le naturel, cōme plus de deux cens person-

Espece de
poisson vo
lant, pour
traict sur le
naturel de
celuy qui
est au Cabi
net du sei
gneur d'As
serac.

Autres pro
diges de
mer.

nes notables qui l'ont veu avec moy en ceste vil
le de Paris, le pourront attester. Entre les choses
émerueillables qui se peuuēt contempler en cest
animal, il a la teste fort hideuse, qui ressemble mi
eux en figure à quelque Serpent hideux, qu'à au
cun poisson: Et si a deux grandz æsslerons, qui res
sèblēt aux cartilages ou æsles de la Souris chau
ue, mais ilz sont beaucoup plus espois & solides.
Il a enuiron pied & demy de longueur, & si n'est
point encores si bien desseché, que vous n'y sen
tiez quelque odeur de poisson, le reste se peut
voir en la figure. Plusieurs hōmes doctes de cest
vniuers qui l'ont visité & manié à loisir, m'ont
asseuré que c'estoit vne espece de poisson volāt:
mais il ne conuiēt en rien aux descriptiōs qu'ont
faict les anciens & modernes de l'Arondelle de
mer, ne du Mugil alatus, ny des autres poissons
qui volent: qui me faict penser que soit quelque
forte de poisson monstrueux incongneu des an
ciens. Je n'ignore point qu'on ne contreface par
artifice diuerſes formes de poissons, Dragons &
Serpens, & autres choses semblables, esquelles
on est deceu, cōme mesmes monsieur Gesnerus a
recogneu par ses écrits y auoir esté quelquefois
circōuenue. Si est-ce que de tous ceux qui ont cō
templé ce poisson, & philosophé sur son naturel,
il ne s'en est encore trouué vn seul qui y ait recō
gneu aucun artifice, ains tesmoignent tous qu'il
est tel que nature l'a produict. La mer a encores
quelques autres prodiges qui ne sont pas moins
espouventables que les precedens: Au rang des
quelz nous pouuons mettre le poisson qu'on nō
me

me Torpille, fort vulgaire à Bordeaux & en plusieurs autres ports & haures. La Torpille est nombrée entre les poissons plats & cartilagineux. Elle a vne propriété occulte, qui est fort estrange: car estant cachée dedans le limon ou sable, elle endort par vne vertu secrette, & rend du tout immobiles & estourdis les poissons qui sont auprès d'elle, puis elle s'en paist, & les deuore, & non seulement sa vertu d'endormir s'estend contre les poissons, mais mesme contre les hommes: car si vn homme luy touche de la verge, elle luy endormira le bras, & s'il aduient qu'elle se sente prise à la ligne, elle a bien ceste ruse & astuce d'embrasser la ligne avec ses aëles, & le venin de ce poisson monte du long de la ligne, & de la perche, & endort le bras du pescheur, tellement que le plus souuent il est contrainct d'abandonner sa prise. Les auteurs de cecy, sont Aristote lib. 9. De historia animalium cap. 37. Pline lib. 32. cap. 2. Teophrastus in libro, De his quæ hyeme latent. Atheneus. Galien lib. 1. De caus. Sympto. Opianus In Halient. Plutarc. in libro Vtrum anima, &c. Ælianus. Platon aussi en fait mention In Memno. ou Socrates est comparé à la Torpille, lequel, par la violence & subtilité de ses arguments, estonnoit si bien ceux contre lesquels il disputoit qu'ilz demouroient stupides, estonnez & endormis comme la Torpille endort ce qu'elle attouche. Et quand bien tous ces fameux auteurs n'en eussent fait mention par leurs écrits, cela est si vulgaire, qu'il n'y a presque pescheur qui ne l'ait experimenté. Ilz defendent à Venise

Torpedo
en latin.

Plato l'a
aussi écrit.
Aristote.
Atheneus.
Ælian.

de vendre la Torpille au marché à cause de son venin. En Languedoc aussi on n'en tient compte. La plupart des medecins modernes écriuent qu'elle est de chair humide, mole & mal plaisante au goust. Si est-ce que Galien lib.3. De alimentorum facultatibus, & au liure. De attenuante victu, & au huictiesme de sa Methode, la louie. Je sçay qu'il y a grande controuerse entre les auteurs, à sçauoir en quelle partie du corps de la Torpille est ce venin, qui a puissance d'édormir les poissons, & les membres des hommes. Quelques vngs ont écrit que ce venin consistoit en certaine partie de son corps, les autres que non, & qu'il estoit diffus par tout, mesme iusques au fiel, ce qu'ilz confirment par le tesmoignage de Pline, qui dit que le fiel de la Torpille viue, appposé aux genitoires, reprime le desir de la chair: mais par ce que le discours de ceste matiere seroit vn peu trop esloigné de nostre subiect, nous ferons fin, & pourfuiurons les autres prodiges, qui se retrouuent és poissons. Combié que l'eau soit le propre élément, manoir, & domicile des poissons, ou ilz se nourrissent, viuēt, s'esgayēt croissēt & exercent toutes leurs autres fonctions, si est-ce qu'il y en a qui laissent souuēt la mer, les fleues & riuieres, saillent en terre, paissent & mágēt des herbes, s'esbatēt par les champs, y dorment quelquefois, y font leurs petiz, comme la Poulpe, la Murene, l'Exocet d'Arcadie. Teophraste afferme en ses écris, que pres Babilone, quand les riuieres se retirent, qu'il y a certains poissons qui demeurent dans les cauernes, sortent pour se paistre,

stre, & s'aydent à marcher de leurs æflerons, ou du frequent mouuement de leur queue, & fuyēt dans les cauernes quand on les chassē, & se defendent contre les chasseurs. Les anciens Philosophes ont écrit qu'on trouue des poissons soubz terre, lesquelz pour ceste cause, ilz appellent Focilles, desquelz Aristote entre autres faict mētiō, comme aussi faict Theophraste parlant de Paphlagonie, ou on tire des poissons terrestres (fort bons à manger) des fosses profondes & autres lieux, esquelz aucune eau ne seiourne, & s'esbahissent les hommes doctes comme ilz se sont engēdre en ces lieux sans frayer. Polybe écrit semblablement que pres de Narbonne on a trouué des poissons soubz terre. Nous pouuons nōbrer entre les prodiges de la mer, vne certaine espee de poissō, qu'ō appellē Stella, ou estoille de mer, par ce que cest animal a la figure d'une estoille peincte, laquelle Aristote nōbre entre les Testacées. Ce poisson est de nature si chaude qu'il digere tout ainsi que faict l'Autruche: Ce qu'Aristote libro. 5. cap. 15. De histo. anima. écrit, qu'elle est de nature si chaude, qu'elle cuist ce qu'elle prent. Pline, semblablement Plutarque. in lib. Vtrum anima, &c. Dict que l'Estoille de son seul attouchement fond, brusle, & liquefie tout ce qui luy touche, & que congnoissant sa vertu, elle se laisse toucher aux poissons, afin de les brusler. Monsieur Rondelet qui est encores viuant, hōme digne d'estre celebré de tous ceux qui escriuent, écrit en son histoire De piscibus qu'il a veu plusieurs estoilles de mer, mais qu'il en a veu entre au-

tres vne sur la plage pres Maguelonne, qui estoit longue presque d'un pied, laquelle il ouurit , & l'ayant anatomisée, il trouua en son ventre troys coquilles entieres & deux remollies & à demy digerées, tât la chaleur de ce petit animal est grande & furieuse. Nous auons ce me semble proposé cy dessus grand nombre d'exemples memorables des prodiges de la mer, mais si n'y a il rié qui se puisse egaller à ce que nous dirons cy apres, ne qui ayt engendré plus grande terreur ou estonnement à ceux qui ont recherché les plus intimes secretz de la mer. Ce petit animal qui a ainsi espouenté tout le monde, est appellé des Grecz Echneis, & des Latins Remora , & luy ont ainsi imposé ce nom par ce qu'il arreste les Nauires, comme nous dirons plus amplement cy apres, La rarité de ce poisson est cause que les descriptions qu'en font les auteurs ne conuiennent. Oppian & Ælian escriuent qu'il ayme la haute mer, qui est long d'une coudée, de couleur brune , semblable à vne anguille . Pline le faict semblable à vne Limace grande , & le prouue par le tesmoignage de ceux qui veirét celuy qui arresta la Galere du prince Caius Cesar, au neuuesme liure, il recite plusieurs opinions de diuers auteurs touchant ce poisson , combien que les Philosophes discordent en la description, si est-ce qu'ilz conuiennét tous qu'il est, & qu'il a puissance d'arrester les Nauires. Aristote, Pline, Ælian, Oppian, Plutarque , & presque tous ceux qui ont traicté de la nature des animaux. Encores y a il quelques philosophes modernes qui ont

ont voyagé & peregriné en plusieurs portz & haures de l'Asie & de l'Affricque, qui attestent l'auoir veu anatomisé & considéré les merueilleux effectz. C'est doncques vne chose miraculeuse ou monstrueuse de trouuer en nature vn animal aquatique de la grandeur d'une Limasse, qui ait puissance par vne secrette propriété de nature d'arrester tout court la plus pesante Nauire ou Galere qui se retrouue en la mer, l'attachant contre elle. Dequoy Pline rauy en admiration s'écrit: O chose estrange & esmerueillable, que tous les vens de toutes les parties du monde soufflent, que toutes les plus furieuses tempestes de la mer s'eslieuent, qu'elles desploient, redoublent & renforcent leurs abbays contre vn Nauire, vn petit poisson de la grâdeur d'un Limasson, leur commande, reprime leur fureur, bride leur rage, & maugré tous leurs effortz, contrainct le Nauire de demourer court, & immobile, ce que toute la rage du monde, avec leurs ancres, cordages & machines ne scauroit faire! Qui ne soit vray ce petit poisson retint la Nauire d'Antoine, Les autres en la guerre Actiaque. Adamus Louicerus lib. lisent en la De aquatilibus, confirmant ce que Pline auoit mer Actia. dict, esmerueillé & quasi rauy d'un si estrange na que. turel de poisson, sue, traueille & s'employe à toute extremité d'en rechercher la cause en nature, puis à la fin succumbant au faix, & ne pouuant s'extrinquer de ce Labyrinthe, confesse libremēt qu'on ne peult rendre aucune raison de cecy, disant: Qui est celuy tant stupide, ou hebeté qui ne soit espris d'une grande admiration, quand il

contemple à loisir les puissances de ce petit poisson? Le sçay (dict il) biẽ que l'Aymãt a la puissance d'attirer le fer, que le Dyamant sue, approché des venins & poissõs, que la Turquoise se tache quãd quelque peril est preparé à celuy qui la porte. Le sçay que la Torpille infecte & endort la main du pescheur. Le sçay que le Basilic est si venimeux, que de son seul regard il infecte l'hõme, & neantmoins de toutes ces choses estranges on peult rẽdre quelque raison, mais nous n'auõs riẽ que no^s puissio^s produire de la merueilleuse & estrange puissance de ce petit poissõ: car il vit en l'eau, prend sa nourriture en l'eau comme les autres poissons, n'exerce ses facultez qu'en l'eau. Sa petite stature tesmoigne, qu'il ne peult faire grãde violence, & toutefois il n'y a puissance qui se puisse égaller à la siẽne, ny force qui luy resiste. Il n'y a impetuosité ou machine qui puisse mouuoir la Nauire de puis qu'il s'y est vne-fois attaché, ècores que to^s les vens de la mer assemblez en vn, soufflassent à la voile, & neantmoins dès qu'il est arraché du Nauire, elle cõmẽce à voguer cõme deuant. Il est doncques force aux hõmes de confesser qu'õ ne peult assigner aucune raison naturelle de cecy, & toutesfois on cõgnoist en ce petit poisson quelque presage fatal, & semble qu'il nous vucille annoncer les maulx & perilz qui no^s doiuent aduenir. Ne retint-il pas la Nauire des ambassadeurs de Periãdre? ne retint-il pas la Nauire de Cai^s Cesar, qui fut tué biẽ tost apres à Rome de sorte qu'il sèbloit qu'il eust pitié du malheur qui luy estoit destiné? Voylã en sõme ce qu'ẽ escrit Adamus Louicerus.

Aristote
toutefois

nigerus. Ie sçay qu'Aristote, Pline & autres luy ont encores attribué d'autres proprieté outre les précédées, comme de seruir aux amours, d'attirer les enfans des corps des fêmes & autres féblables choses, lesquelles ie delaisse de peur d'ennuyer le lecteur. Plutarce. In Sympofiacis. 2. proble. 7. cherche la raison pourquoy ce poisson arreste les nauires. Quelques modernes ont écrit plusieurs autres choses merueilleuses de ce poisson, lesquelles (ce me semble) sont indignes de ce lieu. Ayant mis fin aux prodiges des eaux, ie ne pëserois auoir entierement satisfait au lecteur, si ie n'expediois encores vn membre qui en dépéd, lequel depuis la Creation du monde iusques à nostre siecle a tourmenté beaucoup d'excellens philosophes, pour la curiosité de sçauoir s'il y a des hommes Marins, Tritons, Nereïdes, & autres semblables môstres ayans figure humaine, que les anciës tesmoignent auoir veu és Fleuues, Mers, Riuieres, Rochers & Fôtaines. Ceux qui ont creu qu'il n'est aucuns, se fortifient des passages de l'escriture sainte, laquelle n'en fait aucune mentiõ, mesmes disēt que la terre est le propre domicile & tabernacle de l'hõme, en laquelle il fault qu'il demeure, & face sa residence, iusques à ce qu'il plaira au seigneur le rappeler, cõme vn prince ou Empereur faict celuy qu'il a mis en sa garnison. Ceux qui defendent le contraire, mettent en auant l'experience, & le tesmoignage de tant de doctes personnes, qui n'eussent voulu laisser à la posterité leurs écrits pleins de telles fripperies & mensonges, pour entretenir leurs enfans, parens, amys &

dit plustost
cela des opi
nions des
autres, que
de la siene.

generalement ceux qui viēdront apres eux, en erreur: Ioinct (disent-ilz) qu'il n'est nom plus absur de ou impertinent de croire qu'il y ait des hommes Marins, que d'adiouster foy à ceux qui écriuent qu'il y a des Faunes Syluains, Satyres, & autres especes d'hommes Monstrueux, & Sauuages que les Ecclesiastiques mesmes asseurent auoir veu par leurs écrits, & ce qui presse encore dauantage, c'est que de noz ans ces hōmes Marins ont esté veuz de plusieurs personnes dignes de foy. Pausanias entre les anciens asseure auoir veu à Rome vn Triton. Ceux qui ont écrit les Annales de Constantinople, desquelles vne partie est attribuée à Eutrope, écriuent qu'au dixneuuesme an de l'Empire de Maurice l'Empereur, le Preuost d'vne place nommée Delta en Egypte, se pourmenant au Soleil-leuant avec le peuple, fut estonné qu'il apperceut sur la riuē du fleue du Nil deux animaux de figure humaine, dont celuy qui representoit l'homme, estoit robuste, ayant vne mine furieuse, & truculente, avec le poil roux & herissé, lequel s'esleuoit quelquefois de l'eau iusques aux parties honteuses, puis s'estant ainsi manifesté au peuple, il se precipitoit en l'eau iusques au nombril, donnant quasi à cōgnoistre que pour vne reuerence de nature, il vouloit cacher le reste. Ce Preuost ensemble le peuple estonné d'vn si estrange spectacle, commença a l'adiurer au nom de Dieu, que s'il estoit quelque maling esprit, qu'il eust à se retirer au lieu qui luy estoit ordonné du Createur; mais au cōtraire que s'il estoit du nombre de ceux qui estoient

Pour-ce
qu'elle e-
stait bastie
selon la fi-
gure de la
lettre qu'
ilz écri-
uoient par
Delta.

ſtoïët créés pour la gloire de ſon nom, qu'il euſt à faire lá quelque ſeiour, pour contenter ce pauvre peuple affamé du deſir de ce nouveau ſpectacle. Ceſt animal quaſi lié & aſtrainct par la vertu de ceſte coniuration, demeura lá longuement en ce lieu: Quelque peu de téps au par-apres ſuruint vn autre ſpectacle, non moins eſtrange que le precedent: c'eſtoit vn autre animal, ayât figure de femme, lequel commença à fendre les vndes & ſ'approcher de la riue du fleuve, ayant vne grande treſſe de cheueux noirs, eſpars, vne face blanche, & l'air du viſage fort doux, les doigtz & les bras decentement ordonnez, les mammelles quelque peu enflées, & prominen-tes, & ſe monſtroit ainſi nud iuſques au nombril, le reſte par vne certaine reuerence de nature eſtoit caché, & enſeuely dedans les vndes. Et apres que ces deux animaux eurent ſeiourné lá lōguement, & contenté le peuple de leur veue, les tenebres de la nuit ſuruenues, ilz ſ'eſuanouirét, & diſparurent de telle ſorte, qu'ilz ne furent oncques veuz depuis. Et apres que le Preuoſt Memna eut prins atteſtation de tout le peuple de ces deux Monſtres marins, il deſpeſcha en diligence des ambaffadeurs, pour aduertir l'Empe-reur Maurice, de ce qui eſtoit ſuruenue. Baptiſte Fulgoſe écrit vne ſemblable hiſtoire d'un monſtre marin, qui fut veu de pluſieurs milliers de perſonnes du temps d'Eugene quāt Pape, en quelque port de mer. Ce Monſtre (dit-il) eſtoit homme marin, lequel ayant abandonné la Mer, auoit faiet vne courſe en terre, & raut vn enfant

qui se iouoit le long du riuage, lequel il empor-
toit avec luy en mer, mais le peuple à grandz
coups de pierres le poursuyuit si viuement, qu'il
fut contrainct de laisser sa proye, & demeura si
fort blessé qu'il ne peut gagner la mer. Sa figure
(dit-il) estoit presque humaine, reserué qu'il au-
oit son cuir comme la peau d'une anguille, & si
auoit deux petites cornes en la teste. Il n'auoit
que deux doigtz en chacune main, & ses piedz
se finissoient en deux petites queues, & si auoit
aux bras de petiz æsserons comme vne Sou-
ris chauue. Conradus Gesnerus écrit qu'il fut
veu à Rome vn homme marin à la grand riu-
e, le troisieme iour de Nouembre, l'an de salut
mil cinq cens vingt trois. Theodorus Gaza
homme docte, & bien versé en plusieurs scien-
ces, qui a regné de nostre temps, duquel A-
lexander ab Alexandro écrit, qu'estant ledict
Theodore en Grece, sur la coste de la mer, a-
pres qu'une furieuse tempeste eut ietté sur la
riu-ee vne grande quantité de poissons, il veit en-
tre autres choses memorables vne Nereïde, ou
poisson ayant face de femme, bien acom-
plie de ce qui estoit requis en nature, iusques à
la ceinture, & quant au reste, par embas elle
estoit de forme de poisson, finissant en queue
comme vne anguille, tout en la sorte que nous
les voyons coultumierement depeinctes. Ceste
Nereïde, ou Syrene (ainsi qu'il écrit) estoit sur le
grauier, & monstroït par ses gestes & contenan-
ces qu'elle souffroit quelque grande passion, qui
fut cause que ledict Theodore Gaze esmeu de
pitié

pitie (considerât au plus pres qu'elle desiroit retourner à la mer) la print, & au mieux qu'il peut la guinda en la mer. Pline semblablement écrit, que du temps de l'Empereur Tybere, les habitâs de Lisbone, ville de Portugal, enuoyerēt ambassadeurs à l'Empereur, pour le certifier qu'ilz auoient veu plusieurs foys vn Triton, ou homme marin se cacher & se retirer en vne tauerne pres la mer, & qu'il faisoit resonner certain chant dedans vne coquille de mer, & assure ledict Pline, qu'ô aduertit Octauia Auguste Empereur, aussi qu'on auoit trouué à la coste de la France plusieurs femmes marines, ou Nereïdes mortes au riuage de la mer, ce qu'Ælian écrit: semblablement Georgius Trapezuntius, homme fort celebré entre les lettrez, atteste auoir veu, passant sur la riue de la mer, vn poisson s'esleuer sur l'eau, duquel tout ce qui apparoiſſoit estoit femme iusques au nombril, dont il se trouua fort espouenté, & ce monstre (voyant qu'il le regardoit attentiuement) se remist en l'eau. Alexander ab Alexandro grand iurisque, & philosophe, cha. 8. de son troiziesme liure, écrit auoir certaine assurance qu'en Epire maintenant nommée la Romanie, y a certaine fontaine pres de la mer, en laquelle les enfans aloient puiser l'eau pour l'vsage de leurs maisons, & que de là aupres sortoit vn Triton, ou homme marin, qui se tenoit caché dedans vne cauerne, & espia tant, qu'il veit vne fillette seule, laquelle il emporta à la mer par plusieurs foys, puis la rendoit en terre, dequoy les habitans aduertis y pourueurent


si bien qu'il fut surprins, & conduit deuant la iu-
 stice du lieu, ou on luy trouua ses membres
 semblables à l'homme, & pour ceste cause le mi-
 rent entre les mains de quelques gardes, luy of-
 frans à manger, mais ce pauvre animal ne faisoit
 que se plaindre, & lamenter, & oncques ne vou-
 lut gouster de viande qui luy fust présentée, &
 mourut tant de faim que pour se veoir absenté
 de l'Element ou il auoit acoustumé de faire sa
 demeure. Petrus Gilius, auteur moderne ra-
 compte & décrit ceste mesme histoire en ses li-
 ures des animaux. Plusieurs modernes adioustent
 en leurs écritz encores vne chose plus estrange,
 & qui confirme entierement toutes les histoires
 precedentes, si elle est vraye: C'est que l'Arche-
 duc d'Austriche troisieme filz de l'Empereur
 Ferdinand, fist apporter à Gennes avec luy
 L'an 1548. vne Syrene morte, de laquelle on
 luy auoit faict present, qui engendroit si grand
 esbahissement aux spectateurs, que la plus part
 des hommes doctes d'Italie, vindrent visiter, &
 contempler cest estrange spectacle. Je pourrois
 encore faire mention de plusieurs Monstres
 aquatiques estranges, qui ont esté veuz de noz
 ans: comme de celui qui auoit figure d'un moy-
 ne, l'autre d'un Euesque, & quelques autres
 semblables, mais par-ce que ie sçay que les trois
 plus grandz pescheurs de l'Europe, les ont figu-
 rez, & décritz par leurs liures, comme aussi ont
 ilz faict l'histoire vniuerselle des poissons, ie
 me deporteray de t'en faire plus long discours,
 car ilz ont tant doctement recherché, & des-
 couuert

Gesnerus.
 Rôdelet. &
 Belon.

couuert tout ce que la mer auoit (iusques à
nostre siccle) tenu caché en ses entrailles, qu'ilz
ont presque du tout retranché l'esperance à
ceux qui viendront apres eux d'y pouuoir rien
adiouster.

Fin de la dixseptiesme histoire.

I iij



HISTOIRES
PRODIGE DES CHIENS,
qui mengeoient les Chrestiens.

Chapitre. XVIII.





I les os & cendres de tous ceux qui ont esté persecutez pour le nom de Iesus Christ, estoient pour le iour d'huy en telle esleece qu'ilz se peussent voir des yeux corporelz, nous confesseriõs nous mesmes qu'il s'en pourroit bastir vne grosse, & superbe cité: & si tout le sang qui a esté respandu pour le tesmoignage de son nom estoit congrege en certain lieu, il s'en pourroit former vn gros fleuve: Car qui voudra lire en Eusebe, & saint Augustin, les persecutions, bruslemens, boucheries, & carnages qui ont esté faictes des pauvres brebis de Iesus Christ soubz l'Empereur Domitian, Traian, Anthonin, Seuer, Maximien, Dece, Valerien, Aurelien, Diocletien, & Maximinien & plusieurs autres, il trouuera tant de milliers d'hommes mors, qu'à peine se list il qu'en toutes les plus cruelles guerres des anciens Tyrans, a il esté tât de sang humain respandu. Tous ces sacrifices de tant de martyrs & gens de bien, qui sont amplement dilatez par saint Augustin en sa cité de Dieu, li. 18. ch. 52. & par Eusebe en son histoire Ecclesiastique, & Orose, sont estranges & admirables: mais celuy qui écrit Cornelius Tacitus est prodigieux, & digne d'estre mis entre les plus celebres portentes & monstres du monde: Car ce bourreau infame Neron ne fut pas content de faire ardre les corps des pauvres Chrestiens la nuit, & de les faire

Damassus écrit que du tẽps de Maximiniẽ il fut occis & martyrisé en trente iours, dixsept mil Chrestiens, tât hommes que fẽmes. Voy de cecy Platine, en la vie du Pape Marcellin. Cornelius Tacitus, lib. 15.

seruir de torches & flambeaux aux citoiens de Rome, mais mesmes faisoit enueloper leurs corps tous vifs de peaux de bestes sauvages, afin que les chiens deceuz par la similitude des bestes, les déchirassent & meüssent en pieces. Voyla doncques les furieux assaulx que Sathan & ses complices ont machiné cõtre les membres de Iesus Christ: car il n'y a Religion qu'il ayt persecuté si furieusement depuis le commencement du monde que la nostre: mais combien qu'il eust déployé toutes ses cautelles, astuces, malices, & inuentions pour luy courir sus, toutefois elle demeure en son entier par la vertu & ayde du filz de Dieu, lequel bride & reprime la rage enuenimée de son ennemy, & combien qu'il ayt procuré la mort d'aucuns membres de l'Eglise, comme Abel, Isaie, Hieremie, Zacharie, Policarpe, Ignace, & plusieurs autres milliers d'Apostres, & de martyrs, Toutefois il ne la peut démolir: Car il est écrit mesmes, que les portes d'enfer ne pourront rien à l'encontre d'icelle. Et combien que pour quelque interualle de téps elle soit exposée en peril, & qu'elle soit esbrálée, & agitée, comme vne nef par ces orages & tépestes, Toutefois Iesus Christ n'abandonne iamais son espouse, mais il luy assiste tousiours, comme le chef à son corps: Il veille pour elle, & la garde & maintient, comme tesmoignent les promesses par luy faictes, quand il dit: Je ne vous lairray point orphenins, ie feray avec vous iusques à la consommation du siecle. Et en Esaie: J'ay mis mes parolles en ta bouche, & ie te defendray de l'ombre de ma main, & les parolles

parolles que i'ay mis en ta bouche ne sortiront hors de ta semēce, ne maintenāt ne à iamais . Puis doncques que nostre seule religion est vraye, & pure, & qu'elle a esté signée par le sang de tant de prophetes, Apostres & martyrs, mesmes scellée par le seau de Iesus Christ, duquel il nous a laissé le vray caractere, & tesmoignage en sa mort, & que toutes les autres sont illegitimes, bastardes, & inuentées par les diables, & les hommes, leurs ministres, à la confusion de la nostre, mettōs peine de la conseruer si purement & sainctemēt que nous puissions vn iour dire à nostre Dieu, ce que ce bō Roy David disoit: Seigneur i'ay hay ceux qui te haïoyent, i'ay esté marry contre ceux qui seleuoient cōtre toy, ie les haïoye de hayne parfaicte, & tenois pour mes ennemys,


Fin de la dixhuiētiesme histoire.

HISTOIRES

HISTOIRES PRODIGIEUSES

de diuſes figures, Cometes, Dragons, flâbeaux, qui ſont
apparuſ au ciel, avec la terreur du peuple, ou les cau-
ſes & raiſons d'icelles ſont aſſignées.

Chapitre X I X.



La face



A face du ciel a esté tant de fois defigurée par Cometes barbues, cheuelües, torches, flambeaux, colōnes, lances, boucliers, dragons, duplication de Lunes, de Soleilz, & autres choses sēblables, que qui voudroit raconter par or-

dre celles seulemēt qui ont apparü depuis la Natiuité de Iesus Christ, & rechercher les causes de leurs origines, & naissances, la vie d'un seul hōme n'y pourroit satisfaire. La pl^e memorable & plus digne d'estre celebrée de toutes, est celle qui conduit les sages Roys de Perse au lieu de la natiuité de Iesus Christ; laquelle n'espouenta pas seulement le vulgaire, mais elle rauit en admiration les plus doctes hōmes du monde, par-ce que contre le naturel de tous les autres astres (qui tirent de l'Orient en l'Occidēt) elle dressa son cours en la Palestine, qui est située vers le midy: qui a faict penser à saint Iean Chrysostome, que ceste estoille n'estoit point vne de celles que nous voyons au ciel, mais plustost quelq̃ vertu inuisible, figurée soubz la forme d'un astre. Mais laissons le discours de cest astre, & venōs aux autres choses estranges qui ont apparü au ciel. Gaguin liure sixiesme des gestes des Roys de France, faict mention d'une Comete fort esmerueillable, qui apparut en Septētrion du temps de Charles sixiesme. L'an 597. qui estoit l'année de la natiuité de ce faulx imposteur Mahomet, fut veüe en Constantinople vne Comete cheuelüe, si hideuse &

Homelie 6.
sur saint
Mathieu.
Fulgentius
& autres
ont écrit de
cette opi-
nion.

espouventable, qu'on pësoit que la fin du monde s'approchast. Vne autre semblable à la precedëte fut veüë quelque peu de temps auant la mort de Constantin, de laquelle Orose lib. 7. chap. 19. Et Eutrope lib. 2. font mention. L'an que Mitridates fut produict sur terre, & l'année qu'il receut le Sceptre Royal il apparut vne Comete au ciel, comme Iustin & Vincentius écriuent, laquelle par l'espace de quatre vingtz iours occupa bien la quarte partie du ciel, & si iettoit vne telle splendeur que la clarté du Soleil en estoit obscurcie.

Muraille
faicte de
testes de
morts.

En ses li-
ures De no-
bilitate.

L'an que Taburlan Tiran tua tant d'hommes & de femmes en vne deffaicte de Turcz, que de leurs testes seulemët il en feist vne muraille, (côme Matheolus écrit) il apparut vne merueilleuse Comete en Occident, laquelle Pontanus & Ioa-chimus Camerarius en son liure De Ostentis, a doctement écrit: Herodian autheur Grec en la vie des Empereurs écrit, que du regne de l'Empereur Commode, on voit par l'espace d'un iour naturel vne infinité d'Estoilles au ciel, aussi apparentes comme la nuit. L'année que Loys le Begue Roy de France mourut, on voit semblablement sur les neuf heures du matin grand nombre d'Estoilles au ciel. Hierosme Cardan liure 14. De varietate rerum, assure auoir veu. L'an 1532. l'vn-ziesme iour d'Auril estant à Venise, trois Soleils ensemble, clairs, lucides & splendides. L'an que François Sforce mourut (pour le decès duquel il fesoient tant de guerres en Italie) il fut veu semblablement à Rome trois Soleils, qui espouenterent tellement le peuple, qu'ilz feirent prieres & oraisons,

Estoilles
veües de
iour.

oraisons, pensant que l'ire de Dieu fut enflâmée
 cōtre leurs pechez. Le pape Pie second du nom,
 qui fut nommé au par-avant sa dignité, *Æneas*
Siluius, lequel mourut l'an quatre cens soixante,
 écrit en sa description de l'Europe. chap. 54. que
 l'an sixiesme apres le Jubilé qu'il fut veu entre
 Sienn & Florence vingt nuées en l'air, lesquel-
 les agitées des ventz batilloient les vnes con-
 tre les autres, chacune en son reng, reculât & s'ap-
 prochant, comme si elles eussent esté ordonnées
 en batailles, & pendant ce conflict de nuées, les
 vens faisoient aussi leur debuoir d'autre costé de
 desmolir, abbatre, briser, froisser, & rōpre arbres,
 maisons rochers, mesmes iusques à enleuer les
 hommes & les bestes en l'air. L'antiquité n'a rien
 experimenté de plus prodigieux en l'air que la
 Comete horrible de couleur de sang qui apparut
 en Vvestrie l'vnziesme iour d'Octobre, mil cinq
 cens vingt & sept. Ceste Comete estoit si horri-
 ble & espouëtable, qu'elle engédroit si grād ter-
 reur au vulgaire, qu'il en mourut aucūs de peur,
 les autres tōberent malades. Ceste estrāge come-
 te fut veuë de plusieurs milliers de personnes, &
 dura vne heure & vn quart. Elle commença à se
 produire du costé du Soleil-leuant, puis tira vers
 le midy, l'Occident & le Septentrion. Elle appa-
 roissoit estre de longueur excessiue & si estoit de
 couleur de sang. A la sommité de la comete on
 voyoit le caractere & figure d'un bras courbé te-
 nant vne grāde espée en sa main, comme s'il eust
 voulu frapper. Au bout de la poincte de ce cou-
 steau, il y auoit trois estoilles, mais celle qui estoit

*Æneas Syl-
uius.*

Bataille de
nuées.

Figure ad-
mirable
veue en
l'air.

*Conradus
Licoftenes
a décrit &
figuré ceste
Comete a-
uant moy.*

droictement sur la poincte, estoit plus claire & lucide que les autres. Aux deux costez des rayõs de ceste



comete il se voyoit grand nombre de haches, couteaux, espées coulourées de sang, parmy lesquelles il y auoit

y auoit grand nōbre de faces humaines hideuses, avec les barbes & cheueux heriffiez, comme tu la vois icy figurée. Quelque temps apres que ceste prodigieuse planette fut apparue, toutes les parties de l'Europe furent presque baignées de sang humain, tant de l'incursion des Turcs, que des autres playes que receut l'Italie par le seigneur de Bourbon, lors qu'il mist Rome à sac, & que luy-mesme y laissa la vie. Petrus Creuserus, & Ioannes Liechtber excellens Astrologiens interpreterent par écrit la signification de ceste prodigieuse planette. Et par ce que nous auons promis en l'institutiō de nostre œuure d'assigner les causes & origines des prodiges, il est maintenant requis de rechercher la matiere de plus loing, & de decider la question si souuent agitée par les anciens & modernes philosophes. Ces figures fantastiques, comme dragons, flammes, Cometes & autres semblables de diuerfes formes, qui se voyēt quelquefois au ciel, si elles portendēt, predisent ou annōcēt quelque chose à venir. Albu- mazar, Dorotheus, Paulus Alexandrinus, Ephes- sion Maternus, Aomar, Thebith, Alkindus, Pau- lus Manlius, Aberanger, & generalement la plus part des anciens Grecz, Hebreux, Caldées, Ara- bes, & Egyptiens qui en ont écrit, deferent tant aux astres, & à leurs influences, qu'ilz ont assuré la pluspart des actions humaines dependre des cōstellations celestes. Cicero premier liure De fa- to, semble leur fauoriser beaucoup, quād il écrit assez obscurément que ceux qui naissent soubz la planette de Canis ne meurent point par eau.

Planette hi-
deuse qui
apparut
l'an que
Bourbon
mist Rome
à sac.

Planette i-
terpretée.

L'opinion
de ceux qui
ont pensé
que les figu-
res celestes
denoncent
quelques fu-
turs éuene-
mens.

Faber Stapulensis en sa paraphrase des Metheores écrit que les Cometes qui apparoissent au ciel signifient sterilité de biens, abondance de grans vens, guerres, effusiõ de sang, & mort de princes. Hierosme Cardan, philosophe moderne lib. 4. De subtilitate, & lib. 14. De varietate rerum, écrit que les Cometes cheuelues, barbues, & autres semblables figures mōstrueuses qui apparoissent au ciel, sont comme indices & auantcoureurs de famines, pestes, guerres, de mutations de Royau- mes, & autres semblables playes qui suruiennent au genre humain. Encore adioust il, que tāt plus que leurs figures sont estranges & hideuses, elles portentent & annoncent de plus grands maux. Proculus l'un des pl⁹ excellēs Astrologues qu'ait produict la Grece, poursuit l'interpretation de telles predictions par tous les signes du ciel, ou il racompte par ordre les merueilleuses puissances qu'ont les astres sur les actions humaines. Il y en a eu d'autres, cōme Ptolomée, qui ont écrit, que si quelque enfant à sa natiuité se récōtroit soubz certaines constellations, il auroit puissance sur les Demons. Il y en a encores d'autres, mais biē plus effrontez & pleins de blasphemés, qui ont tant deferé aux astres, qu'ilz ont osé écrire, que si aucuns à leur natiuité se recontroiēt soubz l'aspect de certains astres, qu'ilz auroient le don de prophetie, & qu'ilz prediroient les choses à aduenir: mesmes que Iesus Christ sauueur de tout le monde, pour s'estre rencontré soubz certaines heu- reuses constellations, auoit esté aorné de tant de perfectiõs, & faisoit les miracles. Voyla les cruelz
& horri-

Blasphemes
des Astro-
logues.

& horribles blasphemes, qu'a enfanté ceste detestable & infame Astrologie iudiciaire. C'est pour quoy saint Augu. in les bannist de sa cité de Dieu: saint Hierosme les appelle Idolatres: Basille & saint Cyprian les detestent: Chrysostome, Eusebe, Lactance & saint Ambroise les abhorrent: Le concile de Tollette les reiette: les Loix ciuiles les punissent de mort: les Ethniques mesmes, cōme Varro, Cornelius Celsus, & plusieurs autres les diffament: mais beaucoup plus diuinement que les autres se monstre entre les princes Picus Mirandula, lequel les a si bien rembarrez, & descouuert le Labyrinthe de leurs mensonges en vn œuure Latin qu'il a faict contre eux, qu'ilz n'osent plus leuer les cornes. Reste dōcques maintenant retourner à nostre propos, & rechercher de plus pres si telles figures estranges, & cometes que nous voyons au ciel, annoncēt quelque chose, ou si elles se font naturellement. Aristote liure premier de ses Metheores, traictant copieusement de la nature des cometes, & de ses autres impressions, caracteres & figures qui se font au ciel, dit seulement qu'elles se font par nature, sās faire aucune mētiō qu'elles predisent ou designēt quelque chose pour l'aduenir: & est à presumer que si Aristote, qui est le premier & le plus excellēt de tous ceux qui escriuirent oncques en son art, eust peu trouuer quelque coniecture ou raison en nature qu'elles eussent deu designer quelque chose, il ne l'eust nomplus supprimé ou teu, qu'il a faict les autres secretz de philosophie qu'il nous a laissé par ses écrits. Il est doncques certain que ces

Docte traité de Picus Mirandula contre les Astrologues.

flammes fantastiques, & autres figures que nous voyons au ciel, sont naturelles, & se forment en la maniere qui s'ensuyt. Il y a trois regiōs au ciel, l'une qui est treshaute, qui reçoit en soy vne merueilleuse chaleur, pour ce qu'elle est prochaine & voisine de l'Elemēt du feu: L'autre qui est basse, reçoit les rayōs du Soleil reuerberer de la terre, de laquelle j'ay faict mention en ma description de la cause des tonnerres: Le troisieme est au meillieu de ces deux, à laquelle la force de la chaleur qui vient de la partie superieure, ensemble l'ardeur des rayons du Soleil reuerberer de la region inferieure, paruiennent, Et pour ce que selon le tesmoignage de Pline, les astres sont continuellement nourriz de l'humeur terrestre, de là procede premierement la cause des flammes celestes: Car la terre (cōme Aristote enseigne en son liure premier des Metheores) estant échauffée du Soleil, rend double aërieuse substance: l'une que nous pouuons proprement nommer exhalation chaude & seche, l'autre vapeur est chaude & humide: Et d'autāt que la premiere vapeur est plus legiere, elle paruiet à la supreme region de l'air ou elle s'enflāme, si que d'icelle sont faictz feuz, & flammes au ciel, qui en formes diuerſes & estranges resplendissent entre les nues de diuerſes figures, comme de torches allumées, de nauires, testes, lances, boucliers, espées, Cometes barbues, & cheuelues, & autres choses ſéblables, desquelles nous auons faict mention cy dessus: lesquelles engendrent grand terreur & estonnement à ceux qui en ignorēt les causes. Ce qui est quelquefois aduenü

Les astres
sōt nourriz
d'humeurs,
selō Pline.

aduenu aux Romains en la guerre de Macedone, En quel
 lesquelz furent tellement effrayez & espouentez, tēps les Ro-
 que le cueur leur commença à faillir, pour vne mains eurent
 soudaine eclipse de Lune qui apparut, & persiste congnois-
 rent en ceste craincte iusques à ce que Cneus Sul sance de l'e-
 clipse.

pitius par vne admirable eloquence commença à
 leur déduire par viues raisons que telle mutation
 en l'air estoit naturelle, & que l'eclipse ne proce-
 doit d'autre chose, que d'une interposition de la
 Lune entre le Soleil & nous, & de la terre entre
 nous & la Lune: & par ce moyē ilz furēt deliurez
 de leur erreur, la cause de l'eclipse leur ayant esté
 iusques à ceste heure là incongneue. Le sembla-
 ble se peut dire de la pluye de sang, laquelle a tāt
 intimidé de peuples les ans passez, par l'ignorāce
 de la cause dōt elle procede, cōme celle qui tom-
 ba du ciel, l'an de salut 576. du temps que les Lō-
 bars soubz la conduicte d'Albain s'espancherent Cause de la
 par l'Italie: mesmes celle qui de recente memoire pluye de
 tōba pres Fribourg, l'an 1555. Laquelle tachoit sang.

les robes & les arbres qu'elle attaignoit, de cou-
 leur rouge: & neantmoins combien que cela sem-
 ble prodigieux, si est-ce toutefois que cela est na-
 turel: car tout ainsi que la terre dōne diuersité de
 couleurs à plusieurs corps, aussi semblablement
 elle couloure l'eau de la pluye, car si la terre est
 rougeastre, elle rendra ses vapeurs & exhalations
 rouges, lesquelles estans conuerties en pluies, le
 ciel les nous rend ainsi rouges & coulourées com-
 me elles auoient esté attirées & esleuées en hault,
 & tombant sur quelque habit, elles le peuuent
 coulurer & tacher de rouge. Voyla pourquoy

plusieurs historiens Grecz & Latins entre leurs grands merueilles & rares prodiges du ciel, ilz ont faict mention des pluyes sanguinolentes. Reste donc seulemēt pour mettre le dernier séau à ce chapitre, d'assigner les causes de la pluralité des Soleilz, & des Lunes qui apparoissent quelquefois au ciel, comme les trois Soleilz que Cardan dict auoir veuz de nostre temps, estant à Venize. Et tout ainsi que nous auons dict les figures qui apparoissent au ciel estre naturelles, autāt en pourrons nous dire de la multitude des Lunes & des Soleilz, lesquelz apparoissent, par-ce que toutesfois & quātes que quelque espoisse nuée est prestē à ietter pluyes, & qu'elle se treuve à costé du Soleil, si iceluy par vne precedente refraction de ses rayons, imprime son image en icelle, comme nous voyons qu'il faict en vn acier bien bruny & poly, lors il apparoistra en diuers endroitz double ou triple, & autant en pourrons nous dire de la Lune. Voyla doncques la vraye cause pourquoy sont veuz quelquefois deux ou trois Soleilz ou Lunes. Cherchōs dōcques desormais en nature les causes & essences des choses, sans nous arrester aux fripperies, prestiges & mēsonges des Astrologues iudiciairs, lesquelz nous ont tant de fois deceuz & trompez, qu'ilz deuroient estre banniz & exilez de toutes Republiques bien constituées: mais quel trouble, perplexité & terreur engendrèrent ilz en vne infinité de consciences de pauvres creatures? L'an mil cinq cens vingt quatre, lors qu'ilz publierent par tout avec obstination, qu'il y auroit au moys de
Feburier

La cause de
la multitu-
de des So-
leilz & Lu-
nes qui se
voyent au
ciel.

Feburier vn deluge presque vniuersel pour la conionction de toutes les planettes au signe de Pisces, & neâtmoins le iour auquel se deuoient produire ces eaux, fut l'vn des plus beaux & plus temperez de l'année : Combien que plusieurs grands personnages intimidez de leurs propheties, eussent faict prouision de biscuitz, farines, de nauires & autres choses semblables propres pour la marine, craignans estre surprins & submergez de ceste grande inundation d'eaux qu'ilz auoient prédicte. Apprenons donc desormais avec Henry septiesme Roy d'Angleterre, qui a regné de nostre temps, à ne faire compte de leurs bourdes, mesmes à les chastier de leurs mensonges : lequel soudain qu'il eut entendu qu'un des plus fameux Astrologues d'Angleterre eust publié par tout, qu'il auoit trouué entre ses plus reclus secretz d'Astrologie, qu'il deuoit mourir dedans la prochaine feste de Noël, commanda soudain qu'on le fist venir deuant luy : Et apres l'auoir interrogué si telz propos estoient veritables, & que le Prognostiqueur luy eust respondu qu'il estoit certain, & qu'il auoit trouué cela infallible en sa constellation & natiuité : mais dy moy ie te prie, dist le Roy, ou te predisent les astres que tu feras ton Noël ceste année? & que l'autre luy eust respondu, que ce feroit en sa maison avec sa famille. Or congnois-ie bien dist le Roy que tes astres s'ôt méteuses, car tu ne verras, ny Lune, ny Soleil, ny astres, ny ciel, ny famille de Noël, & espouseras tout maintenant la plus

estroicte prison qui soit en la grád' Tour de Londres, & ne bougeras de lá que la feste ne soit passée. Voyla comme fut traicté ce venerable Astrologue, demourant prisonnier en extreme misere, iusques apres la feste dédiée à la natiuité de Iesus Christ.

Fin de la dixneuuesme histoire.

HISTOI-

*HISTOIRE ADMIRABLE
des flammes de feu, qui ont sorty des testes
d'aucuns hommes.
Chapitre X X.*





Il n'y auoit qu'un seul
 auteur qui eust faict mé-
 tion de l'histoire qui s'en
 fuyt, combien que sa fi-
 delité fust assez prouuée,
 ie ne l'eusse toutefois in-
 serée en mes prodiges,
 par-ce que nous n'auons
 aucun argument ou coniecture en nature, sur le-
 quel on la puisse fonder: neantmoins puis que
 tant de doctes pleumes se sont empeschées à la
 décrire, & si grand nōbre d'auteurs fideles l'at-
 testent en leurs œuures, nous deuons soubz leur
 foy croire ce qu'ilz en disent. Tite Liue liure 3.
 Decade 3. Ciceron liure 2. De diuinatione, Valere
 le Grand, liure 1. chapi. 6. Frontinus li. 2. chap. 10.
 Stratagemat. escriuent qu'apres que les Scipions,
 surprins par leurs ennemys, eurent esté deffaictz &
 tuez en Espagne, & que Lucius Martius cheua-
 lier Romain faisoit vne harengue à ses soldatz
 pour les exhorter à vengeance, ilz furent estōnez
 qu'ilz veirent vne grand flāme de feu qui sortoit
 de sa teste, sans qu'il en fust aucunement endō-
 magé, qui fut cause que les gendarmes esmeuz de
 la vision de ceste flāme prodigieuse, reprindrent
 cueur, & se ruerent si furieusement sur leurs
 ennemys, qu'ilz en deffirent trēte sept mille, sans
 le grand nōbre de captifz, & inestimables richesses
 quilz rauirent aux Cartaginiens. Ces feuz fan-
 tastiques qui ont fort de certains corps d'hom-
 mes, ne sont pas apparuz en vn seul, mais en plu-
 sieurs: Car le mesme auteur Tite Liue écrit (en
 son

son premier liure des choses memorables depuis la fondation de Rome) le semblable estre aduenu à Serue Tulle, qui succeda en la dignité Royale à Tarquinius Priscus: Du chef duquel (estant encore ieune enfant) ainsi qu'il dormoit, on veit vne flamme de feu sortir, dont la Royne Tanaquil femme dudit Priscus, afferma à son mary, que ceste flamme luy promettoit quelque grand heur & prosperité: Ce qui aduint, car non seulement espousa sa fille, mais il fut Roy des Romains apres son mary. Plutarque & les autres écriuent le semblable d'Alexandre, lors qu'il combattoit contre les Barbares, estant au plus aspre du conflict, on le veit tout en feu, ce qui causa vne merueilleuse terreur à ses ennemys. Je scay qu'il y a Cardanus,
de varietatibus rerum. quelque medecin moderne qui écrit en ses diuerses histoires le semblable estre aduenu de nostre temps à vn sien amy en Italie, nompas vne seule fois, mais plusieurs. Pline au lieu où il fait mentiõ du Lac Trasimene, qui fut veu tout en feu, faict aussi quelque discours de ces flammes admirables qui sont veuës autour des corps humains. Aristote au premier liure de ses Metheores en traite aussi: mais pour confesser ce qui en est, ny de l'vn ny de l'autre, ie n'ay sceu colliger sur quoy elles sont fondées, encores que i'eusse promis d'assigner les causes & raisons des aduenemens de noz prodiges: Si nous ne voulons dire que cela fust faict par art, attendu que nous auons veu souuent de nostre temps certains bateleurs vomir & ietter de leurs bouches flammes de feu ardentes, desquelles Atheneus liure premier de ses Dipno-

sophistes, chap. 14. fait aussi mention. Ce qui ne peut estre aduenu (ce me semble) aux histoires mentionnées cy dessus, par-ce que c'estoient de grands seigneurs, sur lesquels ces choses ont esté expérimentées, mesmes entre si grande multitude de personnes, que la fraude eust esté descouverte. Le plus expedient doncques est de croire que c'estoient prestiges de Sathan, lesquels luy estoient si familiers en ces siecles là, qu'il en inuētoit tous les iours de nouueaux, comme il est tesmoigné en l'Exode, des Magiciens de Pharaon, qui conuertirent les verges en Serpēs, & les eaux des fleuves en sang, qui sont choses aussi difficiles, que faire sortir des flammes du corps humain.

Fin de la vingtiesme histoire.

AMOURS





Platon, Ari-
stote & So-
crates a-
moureux.
Platon.

Aristote.

Socrates.

Isocrates.
Demosthe-
nes.

'Ay honte, & suis presque confuz en moy-mesme, de ce qu'il fault que ie dô ne commencement à ces amours prodigieuses par les trois plus excellës philosophes qui furent oncques renommez en la terre: Dont l'un a tant diuinement philosophé de l'ame, de la nature diuine, & de la structure admirable de l'uniuers, que saint Augustin a osé écrire & affirmer de luy, que peu de choses chagées, il seroit Chrestien. Le second a tant bien voltigé par les elemens, tant methodiquement traicté les secretz de nature, & autres choses sensibles, qu'il reluist entre le reste des philosophes, comme le Soleil entre les astres. Le tiers, outre la doctrine qui luy a esté commune avec les deux autres, encore a il eu vne telle sanctimonie, & aornement de meurs, qu'il a esté nommé entre les sept sages de Grece. Et neantmoins combien qu'ilz ayent curieusement recherché les secretz des cieux, la nature, essence & ressort de toutes les choses contenües au pourpris de la terre, si est-ce qu'ilz n'ont point encore esté si rusez, ne si bien armez des secretz de leurs sciences, qu'ilz ayent peu congnoistre la nature d'un si pusille, & delicat animal comme est la femme, ny mesmes se garder de ses furieux assaulx. Tout ce grâd tourbillon de philosophie, auquel Aristote s'est plongé depuis le berceau iusques au sepulchre, ne l'a peu si bien mortifier, qu'il n'ayt esté amoureux d'une fem-

me

me publique nommée Hermie: l'amour de laquelle l'enflamma si bien, que non seulement il se consummoit à veüe d'œil, mais ce qui est plus aliene d'un philosophe, & qui merite d'estre cōpté entre les prodiges, il l'adoroit & luy faisoit des sacrifices, comme Origene écrit: dequoy accusé par Demophilus, il fut contrainct d'abandonner Athenes, ou il auoit enseigné trente ans, & se sauuer à la fuitte. Platō (lequel seul entre les philosophes a merité le nom de Diuin) n'a point esté si superstitieux, qu'il n'ayt voulu sçauoir que c'estoit que l'humanité, & ne s'est point tant arresté à rechercher les Idées, qu'il n'ayt quelquefois voulu aussi contempler & manier les corps solides, comme il est notoire en Archenassa, laquelle combien qu'elle se feust prostituée à vne infinité d'autres en sa ieunesse, si est-ce que lors qu'elle fut abandonnée des autres, Platon en fut heritier, & demeura si bien embabouyné ce pauvre philosophe, qu'il ne l'aymoit pas seulement, mais ressonnoit souuent certains vers à sa louenge, & se lamentoit de ce qu'amour le tenoit intriqué aux rides d'une vieille, comme Athenæus autheur Grec enseigne au liure 13. de ses Dipnosophistes.

Socrates, duquel la maiesté & grauité a tāt esté célébrée par les anciens, qu'on a écrit de luy ce prodige, qu'il estoit tousiours de mesme face, sans que pour aucune eclipse de fortune, prospere ou aduerse, on ayt trouué mutation en luy, si est-ce qu'il n'a point esté si refroigné, critique, ou seuer en ses actions, qu'il ne se soit quelquefois adoucy aupres de sa fauorite Aspasia, com-

Hermia a-
mye d'Ari-
stote.

Archenassa
amye de
Platon.

Aspasia a-
mye de So-
crates.

me Clearchus nous a laissé par écrit, liure premier de ses amours. Et cōme i'ay mis en ieu ces trois, encores en pourrois-ie recenser grand nombre d'autres, comme Demosthene, Isocrate, Periclès, & plusieurs autres: les amours lasciuës desquelz sont si souuent descouuertes par les historiens Grecz, qu'en les lisant, ie me fuy esmerueillé cōme ce grand torrent de science & sagesse n'a peu si bien moderer leurs flammes, que la fumée n'en soit paruenue à la posterité. C'est pourquoy Laïs, tant renommée entre les femmes perdues, se mist vn iour en colere cōtre quelcū qui louoit fort affectueusement la vie, les meurs, & sur tout la doctrine & sagesse des philosophes d'Athenes, & luy dist, ie ne sçay (dist elle) quel est leur sçauoir, n'en quelle sciēce, n'en quelz liures estudiēt voz philosophes que vous celebrez tant, mais bien sçay-ie que moy estant femme & sans auoir esté à Athenes, ie les voy souuent venir icy à mon escole, & de philosophes deuiennent amoureux. Laissons doncques les philosophes en repos, & recherchons les autres: car qui voudroit faire vn Catalogue de tous ceux qui se sont laissez transporter à l'amour, il n'en faudroit pas seulement faire vn chapitre, mais vn liure entier. Menetor (comme Athenée recite) fait mention d'une histoire amoureuse digne de noz prodiges, par-ce qu'il n'est rien plus rare en nature, que de voir cel le qui ayme bien, vouloir faire part à vne autre de ce qui luy est si cher: ce qui est toute fois aduenu en la notable histoire que nous allons décrire. Athenée doncques fait mention d'une dame
impudque

impudique fort renommée en beauté, qui se nommoit Plangon Milefienne, laquelle ainsi qu'elle estoit extreme en beauté, aussi estoit elle souuent requise de plusieurs grands seigneurs : mais entre autres elle auoit pour ses ordinaires delices vn ieune enfant Colophonien, de beauté fort exquise, lequel auoit meilleure part en elle que les autres. Neantmoins comme ces amours lasciuies ont le plus souuent vn si legier fondement, que tout l'edifice s'en va à la fin en ruyne : Ainsi suruint il vne eclipse entre Plagon & son amy, parce qu'elle entendit qu'il auoit quelquefois esté aymé d'une autre qui s'appelloit Bachide Samienne, qui ne luy estoit en rien inferieure en beauté ou bonne grace. Assaillie doncques de ceste nouvelle ialousie, elle delibera de faire trefues d'amours, & donner congé à ce ieune gẽtilhomme. Ce ieune enfant qui eust mieux aymé mourir mille-fois, que de se veoir estranger de celle qui estoit le siege de sa vie, commença à la cuider chérir & caresser comme de coustume, mais elle ia refroidie comme vn glaçon de montaigne, ne tenoit compte de toutes ses plaictes, souspirs, & lamentations: ains elle le pria de ne se trouuer iamais en part ou elle le peust voir, sans luy faire autrement entendre la cause de sa hayne: l'enfant touché au plus vif de son cueur de ce nouveau refus, se prosternant à ses piedz tout baigné de larmes, luy dist qu'il se defferroit promptement luy mesme, si elle ne soulageoit son martyre par l'influence de quelque gracieux rayon de pitié. Plangon combatue de rage, de pitié

& d'amour, luy dist, ne te trouue de ta vie deuant moy, si tu ne me faiz present de la chesne d'Or tant celebrée qu'à Bachide Samienne. L'enfant sans autre replique s'en part en diligence pour rencontrer Bachide, à laquelle ayant faict entendre de point en point la fureur de ses flammes, & l'ardante amitié qu'il portoit à Plangon, vaincue de pitié & d'amour luy donna sa chesne, avec la charge qu'il en feroit vn present soudain, à celle qui le tourmentoit ainsi: en quoy elle se monstra fort liberalle & magnifique, veu que les historiés escriuent que tous les trefors qu'elle auoit peu épuiser toute sa vie de ceulx qui l'auoient aymée, estoient fonduz pour mettre en ceste chesne: qui estoit de monstrueuse grosseur: mesmes qu'elle la gardoit avec grande curiosité pour se soulager en vieillesse, si la fortune eust permis qu'elle eust esté surprinsé de pauureté. L'enfant se voyât posséder ce qu'il auoit tant souuent desiré, s'en vint trouuer Plangon, & luy offrant la chesne, luy feist entendre la liberalité de son ancienne amoureuse, de laquelle ny le temps, ny la distance des lieux n'auoit peu esteindre l'amitié. Plangon espouentée de l'amitié & liberalité de sa compaignie en amours, qui auoit bien osé donner en vn coup ce qu'elle auoit amassé toute sa vie, & mesme à son ennemye & compaignie en amours, ayant le cueur genereux, & ne luy voulant ceder, ny en amitié ny en liberalité, luy renuoya sa chesne, ayma l'enfant plus ardemment qu'elle n'auoit oncques faict, mesme ce qui est plus prodigieux, fist part à Bachide de ses amours; & voulut que
l'enfant

l'enfant fust commun à elles deux : Dont les Grecz en admiration la nommerent depuis Paphile. Puis que nous sommes si auant ancrez en la matiere des amours prodigieuses, il nous fault rechercher les histoires les plus rares & esmerueillables, entre lesquelles ie ne me recorde poit qu'il y ayt eu dames en tout le monde qui ayēt demené l'amour avec plus grand merueille , ne qui ayent laissé vn plus eternal tesmoignage à la posterité de leurs vies dissolues & lasciuës , que Lamie, Flore, & Laïs, desquelles ie décriray la vie selon que Pausanias Grec , & Manilius Latin en leurs liures qu'ilz ont écrit des illustres femmes amoureuses. Mais sur tous i'ensuiuray Anthoni^e de Gueuara, Euesque de Monodemo en vn docte traicté qu'il a faict de ceste matiere. Ces trois dames ont esté les trois plus belles, & plus fameuses femmes mondaines qui furent iamais nées en l'Asie, & nourries en l'Europe , & desquelles les historiographes ont plus parlé , & par qui plus de princes sont venuz à perdition. Il est écrit de ces trois quasi par prodige , qu'elles charmoient si bien ceux qui les aymoient, qu'elles ne furent oncques laissées d'aucun prince qui les ayt aimées, & si ne feirent oncques requeste de chose qui leur fust refusée: Et si est encores écrit de ces trois fêmes, qu'elles ne se moquerent iamais d'homme, n'aussi oncques homme ne se mocqua d'elles. Les historiens escriuent ces trois Courtisannes durant leur vie auoir esté les trois plus riches Courtisannes du môde, & apres leur decés auoir laissé plus grande memoire d'elles : car chacune

eut statue des peuples ou elles moururent. Chacune de ces trois, outre le don de beauté, auoit encore quelque chose de particulier pour alecher à les aymer. La Panthiere, ou Lamie prenoit ses amoureux, procedoit du regard, car par les traictz de ses yeulx elle enflammoit les hommes. Flore par son eloquence admirable. Laïs par sa douceur, & par l'harmonie de son chant plaisant. Le Roy Demetrius soudain qu'il eut receu vn traict d'œil de Lamie, il fut prins au filé, & ce nouueau feu par interualle de temps gaigna tant sur son ame, qu'il ne viuoit plus qu'en elle: & non seulement luy donnoit tout ce qu'il auoit, mais d'auantage abandonna sa femme Euxonie pour suyure sa Lamie. Plutarque recite en la vie de Demetrie, que luy ayant les Atheniens donné douze cés talens d'Argent pour ayder à payer sa gendarmerie, il fist present de toute la somme à Lamie: Dequoy les Atheniens furent fort indignez de veoir leur argent si mal employé. Ce miserable Roy Demetrie estoit si extremement passionné de sa Lamie, qu'il la reueroit comme quelque deité, iuroit par elle, cōme il eust faict par ses Dieux: mais la fortune qui trenche le fillet aux delices, & qui met fin à toutes entreprinſes, permit que Lamie mourust, dequoy ce pauvre Roy se sentit tellement outré, qu'aucuns ont écrit de luy qu'il la baïsa & embrassa apres sa mort: & non content de ceste Idolatrie, il la fist enseuelir au deuât d'une fenestre de sa maison, & quand quelqu'un de ses favoritz l'interrogea pour quelle occasion il l'auoit faict inhumer en ce lieu, il luy respondit

en

en soupirant profondement: Le lien d'amitié de Lamie me ferre si fort le cueur, que ie ne sçay en quoy satisfaire à lamour qu'elle m'a porté, & à l'obligation que j'auois à l'aymer, sinon de la mettre en tel lieu que mes pauures yeux s'exercét tous les iours à la plorer, & mon triste cucur à la penser. Le dueil & regret qu'eut Demetrie pour la mort de Lamie fut si grand & si extreme, que tous les philosophes d'Athenes furēt empeschez à disputer, laquelle des deux choses estoit plus à estimer, ou les pleurs & dueil qu'il menoit, ou les richesses qu'il auoit dépendu en ses obseques & pompes funebres. Vn an & deux moys mourut le Roy Demetrie apres la mort de Lamie. La seconde amoureuse dont auons faict mention cy dessus, se nommoit Laïs, qui estoit fille du grand sacrificateur du temple d'Apollon, homme si experimenté en l'art de Magie, qu'il prophetisa la perdition de sa fille incontinent apres sa natiuité. Ceste Laïs (comme sa compaignie) eut vn Roy pour amy, ce fut le renommé Pyrrhus, avec lequel elle alla en Italie lors qu'il y alla pour faire la guerre aux Romains, & demeura long tēps à son cāp, puis s'en retourna avec luy de la guerre: Toutesfois il est écrit d'elle, que iamais ne se voulut abandonner à vn homme seul: Ceste Laïs estoit tant bien acomplie de toute perfection de beauté, & autres dons de grace, que si elle eust voulu se cōtenir, & n'en aymer qu'vn seul, il n'y eust eu si cōstant prince au monde qui ne se fust perdu apres elle, & qui ne luy eust octroyé ce qu'elle luy eust demadé. Estât de retour de l'Italie

en la Grece, elle se retira à Corinthe, comme écrit Aulugele, & là fut poursuyue de maintz Roys & Seigneurs, qu'elle pluma si bien, qu'elle ne leur laissoit que la parolle pour racompter leurs passions, car elle a esté celebrée pour l'vne des femmes du monde qui sçauoit aussi bien faire profiter ses amours. Il se list vn prodige d'elle qui ne fut oncques leu ny entendu d'autre que d'elle: c'est qu'elle ne se monstra oncques affectonnée à homme, ny ne fut iamais haye d'homme qui l'eust congneue. Ceste Laïs mourut en la ville de Corinthe, aagée de soixāte & douze ans: La mort de laquelle fut par beaucoup de matrones desirée, & de beaucoup d'amoureux plaincte. La troisieme dame mondaine se nomma Flora, qui estoit Italienne, qui surmonta en extraction & generosité, les deux autres: Car elle estoit yssue d'un certain cheualier Romain, fort renommé en faict de guerre, lequel deceda avec sa femme, & laisserent ceste fille aagée de quinze ans, chargée de richesse, douée de grand beauté, & orpheline de tous parens: En sorte que comme la ieune dame Flore, eust ieunesse, richesse, liberté & beauté, lesquelz sont les plus grands maquereaux du monde, pour faire glisser vne femme, se voyant avec tous ces moyens, determina s'en aller à la guerre d'Afrique, ou elle mist à l'enquāt sa personne & son honneur. Ceste Flora florissoit & triompha du temps de la premiere guerre Punique, lors que le Consul Manile fut enuoyé à Carthage, le quel despendit plus d'argent à faire l'amour à Flora, qu'avec ses ennemys. Et comme Flore estoit

estoit yssue de race plus genereuse que les deux au-
 tres, aussi voulut elle voler plus haut, & se ressen-
 tir de sa grandeur: car il ne se list point qu'elle se
 soit prostituée à petiz compaignons, cōme Laïs,
 ou Lamie, & partant elle mist vn écriteau à sa por-
 te, qui disoit: Roy, Prince, Dictateur, Consul, Cé-
 seur, Pontife & Questeur pourrōnt heurter &
 entrer ccās: & n'y mist point Empereur ny Ce-
 sar: car ces deux noms illustres ne furent de long
 temps crééz apres, par les Romains: de sorte qu'el-
 le ne se voulut oncques abandonner qu'à persō-
 nes de haute lignée, de grande dignité, & de gran-
 des richesses, & disoit ordinairement que la fem-
 me de grand beauté sera autant estimée qu'elle se
 prise & estime. Laïs & Flore estoient de contrai-
 re façon de faire: car Laïs premier se faisoit payer
 qu'on eust sa iouissance: mais Flore sans faire fē-
 blant d'Or ny d'Argent, se laissoit gouverner. Et
 estant vn iour interroguée de cela, respondit: Je
 donne ma personne aux princes, & barons illu-
 stres, afin qu'ilz facent avec moy cōme illustres:
 car ie vous iure par tous nos dieux, qu'oncques
 homme ne me donna si peu, que ie n'eusse plus
 que ie ne pretēdois, & au double de ce que i'eusse
 demandé: Et disoit que la sage femme ne deuoit
 demander pris à son amoureux pour le gracieux
 plaisir qu'elle luy faict, mais plustost pour l'a-
 mour qu'elle luy porte, par-ce que toutes choses
 du monde ont certain pris, excepté l'amour, le-
 quel ne se peut payer qu'avec amour. Tous les
 ambassadeurs du monde qui venoient en Italie
 apportoiēt autant de comptes de la beauté & ge-

nerosité de Flora, que de la Republique Romaine, pource qu'il sembloit chose monstrueuse de veoir la richesse de sa maison, sa beauté, les princes & seigneurs dont elle estoit requise, & les presens qu'on luy faisoit: le iour qu'elle se pourmenoit à Rome à cheual, elle donnoit assez d'occasion de parler d'elle pour vn mois entier. Elle mourut aagée de soixante ans, & laissa le peuple Romain son heritier, & auoit tant de ioyaux & richesses, que lon estimoit la valler de ses meubles suffisans pour refaire les murs de Rome, & encores pour desengager la Republique. Faisant fin à ces femmes, il nous fault rechercher quelque chose de plus estrange en noz amours prodigieuses: Mais que dirons nous des amours monstrueuses de ce Taureau banier Nero? qui ne se contentoit pas d'auoir diffamé vne infinité de filles, femmes, & vierges Vestales, mais encores fist-il chastrer vn beau ieune enfant, qui se nommoit Sporus, le pensant transformer en femme, lequel il espousa publiquement avec grâde solemnité, luy assigna douaire & le retint pour femme, comme Corneille, & Suetone escriuent. Je ne sçay si ie dois appeller amour prodigieuse ou folie prodigieuse, celle qu'écrit Herodote, de la fille de Cheopes Roy d'Egipte. Lediect Cheopes ayant espuyté tous ses trelors, mesme employé cét mille ouuriers pour faire construire vne Piramide, se voyant desnüé de finances, commanda à sa fille qu'elle se prostituast, & qu'elle exposast son honneur au plus offrá: ce qu'elle executa, requerát à chacü qui venoit deuers elle, luy donner vne pierre,

pierre & du gaing qui sortit de son impudicité, fut bastie la Piramide qui est au meillieu des trois, vis à vis de la grande, portant en chacun frôt cēt cinquante piedz: laquelle a esté celebrée entre les merueilles du monde. Ludouicus Vartomanus écrit vne autre façon de faire l'amour, qui est pour le iourd'huy en vsage, en certaine prouince de l'Indie nommée Tarnassari, laquelle n'est pas moins prodigieuse que la precedēte, & si en a veu l'experience. Il écrit que quād quelque ieune hōme est amoureux de quelque dame, & qu'il desire luy faire entēdre le feu de ses amours, il prend vne piece de drap trempée dans l'huyle, y mettāt le feu, puis la couche sur sō bras tout nud, & endure ceste flāme iusques à ce que la piece soit toute cōsōmée, sās mōstrer aucū signe ou idicede douleur, testifiāt par cela qu'il est si fort embrasé des amours de sa dame, qu'il n'y a espee de tourmēt ou martyre soubz le ciel, qu'il ne voulist patir pour elle. Mais afin de no' degouster des amours fales & ordes, ie veux mōstrer qu'il se trouue des prodiges aux amours chastes & vertueuses, cōbiē que j'en aye assez proposé d'exemples en mes histoires tragiques. Que se peult il produire de pl' prodigieux en nature, que de se vouloir sacrifier soy-mesme pour acompagner à la mort la personne qu'on ayme? Et neantmoins il se trouue vne infinité d'exēples de femmes, lesquelles sont plus tendres, apprehensiuēs, & timides que les hommes. La chaste Porcia fille de Caton fut si seruēte en l'amitié qu'elle portoit à son marry Brutus, qu'apres qu'elle eut entēdu qu'il auoit

Valere
liu. 4.

esté tué en Theffalie aux champs Philippiques, ne pouuant promptement recouurer de couteau pour se sacrifier, elle deuora des charbons vifz & ardens. Cleopatra derniere Royne d'Egypte ne ceda en rien en amitié à la precedente: car ayant entendu la mort de son mary Anthoine, encores qu'elle fust curieufemēt gardée par Octaue Cesar, qui auoit peur qu'elle ne se tuaft, si est-ce qu'on ne la peut empescher qu'elle ne luy fist bien tost compagnie apres sa mort, & par vn gēre de tourment bien cruel: car elle se fist deuorer aux serpens comme Apianus Alexandrin^s écrit. Mettrons nous en oubly Arthemise Royne de Carie en Grece? laquelle apres qu'elle eut entendu la mort du Roy Mausolus son mary, elle espuisa presque toute l'humidité de son corps par larmes, & apres l'auoir bien lamenté, elle fist faire vn monument si excellemēt elabouré qu'il a esté mis entre les merueilles du mōde: mais encores non contente de cela, estimāt que le corps de celuy qui auoit esté l'organe de sa vie, n'estoit assez honoré d'vne tant superbe sepulture, elle voulut luy seruir de sepulchre, & fist rediger to^s les os de son mary en pouldre biē subtile, & ne cessa d'ēvser ordinairement en sō breuuage, tant qu'elle les eust tous consommez. Qui ne sera doncques esmerueillé de ces flāmes prodigieuses d'amour? lesquelles enchantent & charment si bien les sens humains, que non seulement elles cheminent incurables par toutes les plus sensibles parties de noz ames: mais, qui pl^s est, le plus souuēt elles nous font deuenir insensez, frenetiques,

Valere
liu. 4.

netiques, & brutaux, comme il est monſtré en ce ieune enfant de l'vne des meilleurs maiſons d'Athenes, lequel mourut de dueil, pour-ce qu'on ne luy vouloit permettre cherir vne ſtatue de Ven^o, laquelle il eſtoit furieuſemēt enamouré. Encore eſt-il bien plus eſtrāge que l'aguillon contagieux de ceſt amoureux venin, ne touche pas ſeulement les creatures raiſonnables, mais meſmes le ſentiment en paruiet & pētre iuſques aux beſtes brutes, comme Plutarque teſmoigne, d'vn Elephant qui fut corriual d'Ariſtophanes Grammarien d'Alexandrie: car tous deux aymoient vne chapeliere, mais l'Elephant ne faiſoit pas moins ſon deuoir de luy exprimer & mōſtrer par ſignes & geſtes amoureux l'amour qu'il luy portoit, que faiſoit le Grammarien avec ſon eloquence. C'eſt vne choſe eſtrāge que les beſtes brutes n'ayent pas ſeulement les creatures raiſonnables, mais elles ſe ſentent quelque fois ſi preſſées de leurs paſſions, qu'elles vſent de violence à l'endroit des filles & femmes. Edouart en ſes liures de l'hiſtoire des animaux écrit; qu'il y a certains genres de Singes roux aux regiōs d'Indie, deſquelz ilz ſont contrainctz de ſe prendre garde qu'ilz n'approchent des vilages, par-ce que quand ilz ſont eſchauffez de leurs fureurs naturelles, ilz ne pardōnent ny à fille ny à femme: de ſorte qu'il ſ'en trouue ſouuent de violées, principalement celles que ces méchātes beſtes peuuent apprehēder au deſpourueu. Il n'eſt rien plus certain ny vulgaire en Allemagne, que ce que décrit Saxo. liure 10. de ſon hiſtoire des Dannois, qu'vn Ours en Sueue

Voy de ce-
cy vn exem-
ple pareil
en Athenée
lib. 13. cap.
29.

Plutarque
au dialo-
gue ou il di-
ſpute ſi les
beſtes bru-
tes vſent de
raiſon.

cherchant sa proye par les montaignes, rencontra de fortune vne bergiere, laquelle il emporta en sa cauerne, & au lieu de la deuorer, il conuertit sa faim en plaisir: laquelle échapée de ses maïs suruescut tant de temps apres, qu'elle a depuis esté veüe viue de plusieurs milliers de personnes. Encore est il plus esmerueilleable, que la fureur & violence de l'amour est si grande, que les bestes brutes, farouches & cruelles ne s'en ressentent pas seulement, mais (qui plus est) les arbres & plantes vegetables, esquelz nous reconnoissons certains simulachres & rayons d'amour: de sorte qu'ainsi q̃ Theophraste & Pline ont écrit, il y a quelques arbres & plâtes, esquelles si vous tollifiez les masles, & les esloignez des femelles, elles flaitriront, & demeureront en perpetuelle sterilité, comme nous voyons à lœil de la vigne qui embrasse l'Ormeau, s'esgaye, & s'esioiust de sa presence: mesmes le Liarre qui est si amoureux de certains arbres, qu'il leur faict compagnie apres leur mort. Ce qui a donné occasion aux anciens, lors qu'ilz vouloient despeindre vne parfaicte amitié, de l'exprimer par vn tronc d'arbre mort, enuironné d'un Liarre. Encore adiousteray-ie (pour faire fin) vne chose plus prodigieuse, que les bons secretaires de nature ont recongneu quelque rayon de secrette amitié entre les metaux & les pierres. Pour ce regard l'Aymant ayme le fer, l'attire, l'ayant attiré le retient, de sorte qu'il semble estre touché de quelque ialousie ou regret quand on le luy tollist. Puissance merueilleuse d'amitié, qui s'estend mesmes iusques

aux

Alciat en
ses Emble-
mes.

aux métaux, esquelz on descouvre de prodigieux effectz d'amytié! ce qui se peut experimenter en l'Or, lequel nous voyons si manifestement affecté au Mercure, qu'il se plonge incontinent dedans, comme quasi rauy, & forcé par quelque furieux amour,

L'or & le
vif-argent
amoureux
l'un de l'autre.

Fin de la vingtuniesme histoire.



HISTOIRES
HISTOIRE PRODIGIEVSE
d'un Monstre du ventre duquel il sortoit un
autre homme tout entier,
reservé la teste.
Chapitre X X I I.



Ocellus



Cellus Lucan^o Philosophe Grec,
 en certain opusculc qu'il a fait
 de la nature del'vniuers, triaictant
 de la generatiō, no^o enseigne que
 nous n'allions pas au sacré maria-
 ge pour la volupté & plaisir (le-
 quel toute fois n'en peut estre absent) mais que
 nostre principale intentiō doit estre de procréer
 lignée, car les desis que la diuine prouidēce a don-
 nez aux hommes pour la congression, n'ont pas
 esté ordōnez pour le plaisir seulemēt, mais pour
 la perpetuelle conseruation & permanence de
 l'espece. Et pour ce qu'il estoit impossible que
 l'homme nay mortel, vescuſt perpetuellement,
 Dieu a supplié ce default par continue, & perpe-
 tuelle generatiō, afin que la terre fust multipliée,
 les Republics peuplées, & les societez huma-
 nes conseruées. En consideratiō dequoy, il fault
 retrancher toutes generations qui se font contre
 l'ordonnance de nature, par-ce que le plus sou-
 uent le fruiēt qui en sort est immūde, miserable,
 monstrueux, vicieux, odieux & detestable aux es-
 pritz, aux Dæmons, aux hommes & familles. Et
 de telz attouchemens illicites naissent quelque-
 fois plusieurs enfantemens monstrueux : comme
 celuy lequel nous voyōs figuré cy dessus, du ven-
 tre duquel il sortoit vn autre homme, bien formé
 de tous ses membres, reserué la teste. Et cest hom-
 me estoit aagé de quarante ans, lors qu'il fut veu
 en la France, l'an mil cinq cens trente. Et portoit
 ainsi ce corps entre ses bras avec si grand merueil-
 le que tout le monde s'assembloit à grâdes trou-

pes pour le veoir. Et dict on qu'il auoit esté engendré de quelque femme perdue, qui se prostituoit à tout le monde indifferemment. Je me recorde de l'auoir veu à Valence, ainsi que ie te l'ay faict pourtraire icy, du temps que monsieur de Coras y enseignoit les Loix Ciuiles. Depuis on l'a veu pres Paris, en vn bourg appellé Montlehery, comme plusieurs m'ont attesté, mesmes le bon homme Iean Longis, Libraire en ceste Vniuersité, lequel m'a asseuré qu'on l'auoit prins audict Mōtlehery pour celuy qui portoit ce Monstre, de sorte qu'on l'interrogeoit, qu'estoit deuenu ce Mōstre qu'on auoit veu le temps passé sortir de son corps.

Fin de la vingtdeuxiesme histoire.

HISTOIRES MEMORABLES
de plusieurs Plantes, avec les proprietez & vertuz
d'icelles, ensemble de la prodigieuse racine de
Baara, décrite par Iosephus auteur
Hebreu. Chap. 23.



L'histoire
del'herbe à la-
quelle
ce chié
est atta-
ché, ne
est dé-
crite
qu'à la
fin de
ce cha-
pitre.



' Il y a quelque chose digne d'estre considerée en toutes les principales parties de Medecine, certainemēt c'est celle qui verse en cognoissance & recherche de la nature & proprieté des plantes : car outre la cōmu-

ne vtilité qu'elles apportēt au genre humain, en-

L'antiquité
des herbes.

cores y descouurirōs nous vne antiquité si grande, que nous ne la pourrons apprehēder, sans vne

extrême admiration: Car estant presque tous les ars inuentez si tost que l'hōme fut crée de Dieu, & par apres augmentez par l'industrie de plusieurs, les seules herbes, & plantes soudain apres la creation des Elemens, & lors qu'il n'y auoit encores homme viuant sur terre, sortirent (suyuant le commandement du Seigneur) des cauer-
nes & entrailles de la terre, garnies de leurs propres & diuines vertuz : Car outre l'assurāce que ce grand legislateur de nostre Dieu, Moysē, nous donne de cecy en l'Exode, encores y pourrons bien adiouster le tesmoignage des anciens Poë-

Les anciens
poëtes
Grecz ont
traicté des
plantes.

tes. Grecz, comme d'Orphée, Musée, & Hesiodē, qui ont traicté la louenge du Pouliot, comme aussi a faict Homere celle de l'Alisier & autres, comme en semblable Pithagoras a loué l'Eschalotte, Cryssippus le Chou, Zeno le Caprier, Encore est-ce chose plus estrange que Salomō Roy des Iuifz, Euax Roy des Arabes, Iuba Roy de Mauritanie ont esté fort curieux, non seulement de congnoistre les plantes, ains la plus-part d'eux

en ont

en ont diligemment écrit. Autres ont entretenu grans Philosophes & Arboristes en plusieurs desers de l'Asie, Europe & Afrique, pour descouvrir les secretz des herbes & plantes. Encores est-ce chose plus esmerueillable, que grād nōbre de plantes bien renōmées, ont prins leurs noms de plusieurs Roys, Princes, Empereurs & Monarques, cōme la Gentiane a prins son nom de Gentius Roy des Illyriens, La Lymachie de Lyzima chus Roy des Macedoniens. Teucrium a esté inventée par Teucer, l'Achilea d'Achiles, l'Arthemisia d'Arthemise Royne de Carie. Mais nous nous arrestons, ce me semble, par trop à rechercher l'antiquité & louenge des plâtes. Reste dōcques, suyuant nostre coustume, d'aduiser si nous pourrons trouuer es herbes quelque chose de monstrueux, prodigieux ou estrange, cōme nous auons faict en la plus part des autres choses contenues soubz la concauité des cieux.

Herbes qui ont prins leurs noms des Roys.

Les anciens ont recōgneu ie ne sçay quoy d'esmerueillable en vne plâte qu'ilz appellēt l'Agnus castus, qui a les fueilles semblables à celle de l'Oliuier : car presque tous ceux qui ont écrit de la nature & propriété de ceste plâte, disent qu'elle resiste au peché de la chair: Et que ceux q la portēt sur eux, ou qui en boyuēt le suc, ne fōt iamais tentez d'incontinēce: & pour ceste occasion les filles anciennemēt portoient des branches & rameaux de ceste herbe en leur main, ou en courōnoient leur chef, pēsant par ce moyen amortir & esteindre les ardeurs de la chair. Dioscoride, cha. 15. de son premier liure de l'histoire des plâtes, dit

En Grec Agnos & ligos.

Ceste plâte croist en arbre.

Il y a deux sortes d'Agnus Castus, l'un blanc & l'autre noir: le noir croist à la grandeur des saulx.

que les Grecz ont nommé cest arbre Agnos, c'est adire chaste, par-ce que les dames qui iadis en la cité d'Athenes gardoient chasteté es sacrifices de Ceres, faisoient leurs couches d'agnus castus.

Herbes pro
pres pour
les filles &
fêmes lasciu-
es.

Tout ainsi que nous auons décrit la singularité de l'Agnus castus, qui red les personnes chastes, aussi nous fault il maintenant faire mention d'une autre herbe du tout contraire à la precedente, & quasi son ennemye capitale, car elle rend ceux qui en vsent lascifz, promptz & desreiglez aux actes veneriens.

Le Satyriū
viét en abō
dace en Al
lemaigne,
& se trouue
coustume-
remēt es iar
dins, prez
& lieux fa-
blonneux.
On l'appel-
le en Frâce
couillon de
chien.

Les anciens ont nommé ceste herbe Satyriū, par-ce que ce furent les Satyres & Dieux sauuages qui furent inuenteurs de ceste plante, pour mieux satisfaire à leurs lasciuētez & concupiscēces, lors qu'ilz alloient iouer par les forestz & caruernes avec les nymphes.

Les Grecz l'ont nommée Orchis, ou Cynosorchis, pour-ce qu'elle a sa racine semblable à deux couillons de chien, de sorte qu'il semble que nature ait voulu laisser quelque marque & enseigner en ceste plante, pour monstrier ses merueilleux effectz aux œuures naturelles. Ceux doncques, dict Dioscoride au 22. chapi. de son troisieme liure des plantes, qui desirēt auoir la compaignie des fêmes, doiuent vser de ceste racine, pour-autāt qu'elle rend les hommes plus prompts à l'exercice de Venus, mesme à ce qu'on dict sa racine tenue en la main, prouoque à desirer le plaisir de la femme. Encore y a il vne chose digne de consideration en ceste plāte, & quasi prodigieuse, c'est que l'une de ses deux racines, qui ressemblēt (cō-

Herbe pro
pre pour les
hōmes, qui
ne peuuent
satisfaire à
leurs fêmes

me

me nous auons dict) aux genitoires d'un chien, excite desmesurément aux actes veneriques. L'autre racine qui est vn peu plus petite, esteinct & empesche le desir de la chair, de sorte qu'une mesme plante apporte le mal & le remede. Pline, Dioscoride & Galien sont autheurs de cecy, mesmes Dioscoride écrit que les femmes en Thessalie donnēt à boire de la racine de celle qui est la plus charneuse aux hōmes, pour les induire aux actes de Venus. Aussi, lecteur, ne veux-je oublier à t'aduerdir que tu n'esperes point de moy en tout ce traicté de prodiges des plātes, les descriptions, facultez, temperamens, & diuisions d'icelles, parce que cest œuvre seroit excessif, & excéderoit les limites de mon subiect: mesme que Dioscoride, Theophraste, Galien, Pline, Martheolus, Fusch, Ruel & plusieurs autres, t'ont tant bien satisfait en cela, qu'il ne se peult rien desirer qu'ilz n'ayent décrit: ce que j'ay bien voulu mettre en auant pour ceux qui penseroient que i'eusse icy confondu les diuerfes especes de Satyrium, comme celuy que les Grecz ont appellé Orchis Serapias, duquel paulus Aegineta, & Actius font mentiō, lequel aucuns disent auoir receu ce nom, de Serapius Dieu des Alexandrins, pour raison de la grande & impudēte lasciueté, pour laquelle on l'adoroit en vn lieu dit Canope, là ou il auoit son temple de grande reuerence, & religion, comme Strabo recite au 17. liure de sa Geographie. Il me suffira doncq' en ce chapitre de décrire simplement ce qu'il y a de plus esmerueillable, & prodigieux en chacune plante, en particulier.

Les Grecz
l'ont nom-
mée Ocy-
mon, & les
Latins Oci-
mum.

Les anciens, comme Chrysippus, ont trouué
ie ne sçay quoy de prodigieux en la plante que
nous appellons vulgairement le Basilic : ilz ont
eu opinion qu'il faisoit venir l'homme incêsé, &
lithargique, & que les cheures n'en vouloient
point manger, à ceste occasion que l'homme le
deuoit fuyr. Ilz ont adiousté, que le broyant, & le
mettant soubz vne pierre, il engendroit vn scor-
pion, & si on le masche, & qu'on le mette au so-
leil, il procrée des vers: qui plus est, aucuns disent
que si quelqu'un est picqué du scorpion le iour
qu'il aura mangé du basilic, il n'en pourra guerir:
mesmes assurent que broyant vne poignée de Ba-
silic avec des Cancres marins ou de riuere, que
tous les Scorpions de lá au pres viennent à luy.
Ie n'ignore point que ceux qui sont venuz apres
Chrysippus, n'ont pas ainsi abhorré le Basilic, &
en ont vsé plus hardiment.

De l'herbe
à Pucés.

L'herbe
qui empes-
che que
l'eau ne
bouille.

L'herbe
qui tue les
bestes &
faulx l'hō
me.
Herbe qui
deliure des
enchante-
mens.

L'herbe à pucés appellée des Latins *Herba pu-
licaris*, a vne si grande vertu refrigeratiue, que si
vous la iettez dedans l'eau bouillante (ainsi que
Dioscoride écrit) sa chaleur s'amortira.

La Carline, que les Latins appellent *Chama-
leon albus*, sert à l'homme de theriaque & d'an-
thidote contre les poisons & venins, cōme Dio-
scoride & Pline escriuent, & toutesfois elle tue les
ratz & les chiens.

L'herbe nommée *Scilla*, en François Squille,
pēdue à l'entrée d'une maison, empesche les char-
mes, forceries, & enchantemens, comme Diofco-
ride, Pline, & Pithagoras escriuent.

Les bons chercheurs des secretz des plantes
ont

ont trouué par experience, que nostre Persil, que les Latins appellét *Apium hortense*, & les Grecz *Selinon*, par vne secrette propriété engendrer l'Epilepsie, que nous appellons mal caduc, de sorte que Symeon Sethi écrit qu'il faut que ceux qui sont subiectz à ceste maladie, se gardent entiere-ment d'en vser: car il est souuent aduenü qu'aucuns qui estoient presque venüz à conualescence de ceste maladie, vsant de Persil, sont retöbez du hault mal. Pline écrit que les nourrissees se doiuent garder d'vsr de Persil, par-ce que les enfans qui tetent le lait d'une femme qui en aura menagé, seront persecutez de mal caduc.

*Persil d'age
reux aux
nourrices.*

La Consyre, que les apothicaires (frians de motz barbares,) ont appelée *Consolida maior*, a si grande vertu de reünir, rassembler & reioindre les playes fresches faictes ensemble, que mesme mise avec les pieces de chair, quand elles cuisent au pot, elle les reioinct, comme tesmoigne Pline & Dioscoride: c'est pourquoy les Grecz l'ont nommée *Symphyton*, pour la grande vertu qu'elle a de reioindre & reünir.

Les anciens Grecz & Romains ont tousiours celebré entre leurs plantes excellentes, celle qui est dictée en Grec *Peristereō*, en latin *Verbenaca*, & en François *Veruaine*. Elle a esté nommée anciennement *Hierabotane*, & *sacra herba*, c'est à dire herbe sacrée, par-ce qu'à Rome, le tēps passé, elle seruoit à purifier les maisons, & tous les domestiques estoient ceincts de ceste herbe, & en balloyoit on l'Autel de la table de *Iupiter*, auant que luy faire sacrifices. Les ambassadeurs aux le-

*Histoire
notable de
l'herbe ap-
pellée Ver-
uaine.*

Herbe qui
chasse la
melencolie.

gations saintes en estoient couronnez, ou (comme dit Dioscoride) par-ce qu'elle estoit fort propre pour chasser les malings espritz, & purger les maisons pëdue ou attachée à icelles. Les anciens ont tousiours esté en ceste opiniõ qu'elle chassoit la melencolie. Dioscoride & plinẽ escriuent que la salle arrousee d'eau ou la veruaine aura trëpé, rend les personnes ioyeuses, & que ceux qui assisteront au banquet seront gays & resiouys.

La plante que les apoticairez appellent Nenu-phar, & les Grecz & Latins Nymphaea, qui croist és Estangs, & Riuieres, qui a de grandes fueilles verdes, a si grãd vertu cõtre ces ardeurs furieuses qui bouillonnët en la ieunesse, que prise en bru-uage vne fois le iour, par l'espace de quarãte iours elle esteinët du tout entieremët l'appetit de pail-lardise, & la prenant à ieun avec les viandes, elle chasse tous songes impudiques, & veneriës : mais il fault entëdre cecy de la premiere espee de Ne-nuphar, qui a la fleur iaune, semblable au lys.

Nenuphar
propre
pour ceux
qui se sen-
tent presse-
des aiguil-
lons de la
chair.

Plinẽ & Dioscoride sont autheurs de cecy, mes-me l'expériëce en fait foy : car on en ordõne cou-stumieremët pour refrigerer les religieuses, moy-nes, & autres gës de deuotiõ, qui veulët mortifier leur chair. Les anciës la nômerent Nymphaea, par ce que la pucelle Nympha (d'ou ceste herbe a prins son nom) estãt ialouse d'Hercules, deuint si maigre, passe, deffaicte & lãgoureuse, que la mort s'en en suyuit. Et apres, ainsi qu'ilz croyët, elle fut muée en ceste herbe marescageuse & aquatique, pour luy refroidir ses chaleurs : ceste plãte est vul-gaire par tout : nous l'appellõs en François blanc d'eau,

d'eau, ou iaune d'eau, ou Lys d'Eståg, & y en a de deux sortes, l'une q a la fleur blâche, l'autre iaune.

Combien que le Liarre, dict en Latin Hædera, en Grec Cissos, soit vulgaire par tout, si est-ce qu'il contiēt en soy beaucoup de choses dignes de consideration. En premier lieu, il trouble l'esprit, si on en préd par trop: il produict vne larme & gomme, laquelle (ce dict Galien) brusle occul tement comme vn cautere, sans s'en apperceuoir: mesme sert de depilatoire, pour faire tomber les cheueux, & tout autre poil qui est sur le corps de l'homme ou de la femme.

Les petitz Raisins ou grains du Liarre, que les arboristes appellent Corymbes, prins en breuua- ge, font deuenir les hommes steriles.

Les grains des corymbes qui ont le ius safran- né, prins en breuua- ge deuant toute autre viande, engardent qu'on ne s'en-yure.

Ietrouue d'auantage, dict pline, que les gens melancholiques, & subiectz aux maladies de la rate, se guerissent filz boyuent és tasses ou gobe- letz faictz de bois de Liarre.

Toutes les especes de Pauotz ont vertu de refri- gerer, de prouoquer le sommeil, & principalemēt le Pauot noir faict dormir, & si on prend par trop de son ius, ou liqueur, il faict venir les gēs lithar- giques, & les tue. Pline, Dioscoride, & Simeō Se- thi, sont auteurs de cecy. Le pauot est pour le iourd'huy en si grād vsage en perse, Iudée, & tou- te la Turquie, que si vn homme n'auoit vaillant qu'un aspre; il en emploira la moitié en pauot: ce qui faict qu'il est en si frequent vsage, & qu'en

Du Liarre.
Pline &
Dioscoride

Le Liarre
trouble l'es-
prit.

Gomme de
Liarre brus-
le comme
le feu.

Les grains
du Liarre
rendēt phō-
me sterile.

Vaisseau à
boire pro-
pre pour les
melancholi-
ques.

Papauer en
Latin.

Lithargie
est vne ma-
ladie mor-
telle, en la-
quelle on
dort tous-
iours.

Merueilleu-
se supersti-
tion des
Turcs en
l'usage du
Pauot,

plusieurs lieux on en sème les champs comme de blé, c'est pour-ce que les Turcs ont vne certaine opinion, qu'ayant mangé du Pauot ilz sont plus furieux, adroictz, vaillans & desesperez en la guerre, de sorte qu'ayans prins de ceste herbe, ilz s'exposent temerairement à tous les perilz, & hazards de la guerre: Et s'il aduiét que le Turc dresse quel que armée, ilz deuorēt tāt de ce Pauot, & en font si grande dissipation, qu'ilz en degarnissent tout le pays, & en portent tousiours avec eux, du tēps de guerre, ou de paix: ilz en tirent le ius, qu'ilz appellent Opium: voy ce qu'en écrit Pierre Belon au liure de ses Peregrinations de Leuant, ou il en a veu l'experience deuant ses yeux.

Des mer-
ueilles de
la Mandra-
gore.

La Mandragore a apporté grand esbahissement à ceux qui ont décrit ses proprietéz, facultez, & puissances. Pithagoras l'a nommée Antropomorphon, pour raison qu'il semble que sa racine represente la forme humaine. Autres l'ont nommée Circea, & luy ont baillé le nom de Circe, pour-ce qu'ilz auoient opiniō que sa racine estoit bōne pour faire aymer, & qu'il y auoit quelque charme amatoire en ceste plante. Je vey dernièrement à la foire saint Germain en ceste ville de Paris, vne racine de Mandragore, qu'un Sophistiqueur auoit contrefaict par art, qui auoit certaines racines si bien entassées l'une dedans l'autre, qu'elle representoit proprement la forme de l'homme, & asseuroit ce dōneur de bons iours, que c'estoit la vraye Mādragore, & demādoit vīgt escus de ceste racine: mais sa fraude fut incōtinēt descouuerte, & croy qu'il fut cōtrainct en fin emporter sa racine

racine en Italie, dont il disoit qu'elle estoit venue. Laissons doncques les fraudes, & retournons aux singularitez qui se retrouuent en ceste plante. Dioscoride parlant des merueilles de cest herbe, écrit qu'elle a le bruiet d'amolir l'Yuoire, & la rendre ayfée à tourner, & mettre en œuvre en quelque forme qu'on voudra, faisant cuire ladite racine avec l'Yuoire par l'espace de six heures. Il est tout certain qu'elle a vne merueilleuse efficace d'endormir, & d'enfevelir si bien les sens à ceux qu'on veut cauteriser, ou couper quelque membre, qu'ilz ne sentent aucune douleur, filz ont premierement prins du ius de Mandragore. Les autres l'ordonnēt en parfum, pour ce mesme effect. Il y a deux especes de Mādragore qui naissent en plusieurs lieux es montaignes d'Italie, & principalement en Pouille, au mont S. Ange, dont les arboristes en apportent les pommes & racines.

Yuoire amolie par vertu de la Mādragore

Plante qui red l'homme insensible.

C'est vne chose estrāge de ce que les Philosophes attribuēt à la plāte, que les Latins appellent Neriō, & les Grecz Rhododēdros, en François Rosage. Ceste plāte a les fleurs de Rose, & fueilles de Laurier, mais c'est chose merueilleuses que les fueilles de ceste plāte tuēt chiēs, asnes, muletz, & plusieurs autres bestes à quatre piedz : mais aux hommes, prinses en breuueage avec du vin, elles seruent de contrepoison, & remede souuerain contre morsures de toutes bestes venimeuses: Et neantmoins si les cheures, brebis, & autres bestes debiles boyuent seulement de l'eau, en laquelle les fueilles de ceste plāte ayent trempé, elles sont

Plante salutaire aux hommes & mortelle aux bestes.

Pline & Dioscoride.

incontinent estouffées , & meurent soudainement.

Plante qui
fait songer
songes es-
pouëtâbles.
Plante qui
fail deuenir
les hommes
Lepreux.

La Lentille, que les Latins nomment Lens, ou Lenticula, fait songer songes espouëtâbles , & terribles, spécialement sa premiere decoction, selon Pline & Dioscoride: Et ceux qui ne tiennēt moyen à manger de ceste viande, deuiennent lardres, selon Galien & Pline. C'est assez doncques (ce me semble) curieusement recherché les proprietēz estrâges de plusieurs plantes: Reste maintenant de monstrier les vertus admirables de celles qui ont puissance de deffaire l'homme, pour l'vsage duquel nō seulement les plâtes, mais tout ce qui est contenu au pourpris de ce monde visible, est, & a esté créé: Et neantmoins afin de le tenir en bride, & qu'il ne dressast ses cornes trop hault, ou qu'il ne fust par trop enflé d'orgueil & d'ambition, le seigneur a voulu créer de petites plantes & racines, qui ont pouuoir à tous les moments du iour de rabatre & brider son audace, mesme de luy auancer sa mort.

Ciceron en
ses questiōs
Tusculanes, & Plutarque en
la vie de
Socrates.

La Cigue, appelée Cicuta des Latins, assez congneuë par tout, est du genre de ceux qui tuēt: laquelle suffoque & esteinct la personne, qui en préd en breuage: Et pour-ce les Atheniēs voulās faire mourir le tressage philosophe Socrates, lequel auoit esté fausemēt accusé par Anytus & Melnirus d'auoir mal parlé des Dieux, vsèrent de ceste herbe, comme de supplice publicq', luy faisant faire l'office de borreau. Dioscoride au traitté qu'il a faict des venins & poisons, & de leurs remedes, exaggere avec vn merueilleux artifice

les

les accidens & symptomes de celuy qui a beu ou mangé la Cigue. Celuy (dit il) qui en a beu ou mangé, il a la vertu visive des yeux offusquée, & a si bien l'esprit troublé, qu'il ne peut discerner aucune chose, il sanglotte à toute heure, & a toutes les extremitez du corps froides. Et finalement le venin de ceste plante restrainct si bien l'alaine & le soufflet en la canne du poulmon, que les patients meurent estranglez, & spasmez: Et pour-auxtant (dit il) ce venin se doit au commencement tirer hors du corps avec vomissemens, & par-apres avec clysteres, afin que ce qui est descendu aux boyaux, sorte pareillement. Plin e scrit que ceux à qui on auoit baillé à manger de la Cigue, estans ainsi tuez, certaines taches & pustules apparoissoient sur leurs corps.

L'If, qu'aucuns appellent Thymio, & les Latins Taxo, prins par la bouche, est venimeux, & enfroïdist si bien tout le corps, qu'il estranglé & tué en peu de temps.

L'herbe de Sardeigne mangée, faict deuenir l'homme insensé, & engendre vn certain spasme es leures, en sorte qu'il semble que ceux qui l'ont mangée, rient tousiours, & de là est né le malheureux prouerbe, Le ris de Sardeigne. Voy de cecy Solin. Dioscoride, & sur tous Erasme en ses Chiliades, en l'explication du Prouerbe, Rius Sardonijs.

L'If mortifere.

Herbe qui fait rire en mourant.

La plante semblablement que les Latins appellent Hiosciamus, & les Grecz Hyosciamos, les François Iusquame, principalemēt celle qui

Iusquiane a la gréne noire, réd l'homme insensé, endormy,
mortel. & luy faiçt perdre le sens, selõ Plinẽ, & Galiẽ: &
 selon Dioscoride beu ou mangé, il faiçt faire les
 mesmes folies que l'yurongnerie de vin. *Ælian*
 recite en son histoire, que les porcs-sangliers se
 paissans de ceste herbe, viennent à se pasmer, &
 sont en danger de mort, filz ne se lauent incont-
 nent en de l'eau.

Del'Aco-
nit le plus
cruel de to⁹
venins.

Il y a vne espee de plante appellée en *Latin*
Aconitum, en François *Aconit*, qui mettra fin à
 noz herbes venimeuses: par ce que c'est la plus
 prompte, & plus subite à faire mourir, de toutes
 les plantes, spécialement celuy qu'on appelle *Par-*
dalianches, qui tuẽ les *Pards*, & a les fueilles sem-
 blables aux cõcombres sauvages: mais elles sont
 plus petites & aucunement aspres & rudes. La
 seconde espee d'*Aconit* se nomme *Lycothonõ*,
 par-ce que les loups en ayans mangé, meurẽt in-
 continent. La premiere espee croist par tout, la
 seconde espee es profondes vallées d'entre les
 montaignes. *Leonarthus Fuschius* dit qu'il y en
 a grande quantité en la montaigne pres *Tubin-*
ge. Toutes especes d'*Aconit* tuent promptement
 par erosion d'entrailles, & putrefaction de bon-
 nes humeurs. La premiere espee tue les pards,
 porcs-sangliers, & toutes bestes sauvages, mise de
 dans de la chair: Et ceux qui chassent aux loups
 souuent en vsent pour les faire mourir. *Plinẽ* suy-
 vant sa coustume, depeinct l'*Aconit* de toutes ses
 couleurs, & n'a rien laissé entierement de ce qui
 appartient à la description & vertu de ceste cru-
 elle plante. Il est tout certain (dit il) que l'*Aconit*
 est

Galien &
Dioscori-
de.

est le plus soudain de toutes les poisons & venis,
 & que mesmes les femelles de quelques bestes
 que ce soyent, meurent le iour que leurs mēbres
 genitaux ou honteux ont esté touchez de cest
 herbe. Puis il adioust vn autre prodige meruei-
 leux de ceste plante. L'Aconit (dit il) donné à
 l'homme en du vin chauld, est de ceste nature,
 qu'il le tue promptement, s'il ne trouue quelque
 chose au corps de l'homme qui le puisse tuer: car
 lors il luiſte & combat là dedans, ayant trouué
 son pareil, comme s'il rencontroit quelque autre
 poison dedans les parties interieures, & la chose
 est esmerueillable, que deux mortelles poisons e-
 stans en l'homme, se tuent & deffont l'vn l'autre,
 & l'homme demeure sain & saue.

Le Nappellus produict ses fueilles, non trop
 dissemblables à la grand Armoise, les fleurs pur-
 purines, quand elles ne sont ouuertes, semblables
 à testes de mors, & ouuertes semblables à celle
 de l'ortie morte, la graine petite & noire, recluse
 en de petitz cornetz.

Ce Nappellus icy est le plus contagieux de
 tous les venins: mesmes a vne propriété, par la-
 quelle il excède les autres, car les couteaux, da-
 gues, & autres armes trenchantes qui sont trem-
 pées en son suc, rendent les playes mortelles ou
 elles atouchent, & font promptement mourir
 ceux qui en sont blessez.

Laiſſons les herbes veneneuses, & venōs aux
 autres qui sont plus familiares & amyes de l'hō-
 me, entre lesquelles les anciens ont tousiours ce-
 lebré le Baulme entre les plus rares prodiges des Le Baulme.

plantes. Aucuns écriuent que ceste herbe excellente du Baulme, a creu autrefois seulement en la seule ville de Ierico, d'ou elle a prins son nom: car Ierico en Hebreu, signifie bõne odeur. Pline écrit que le Baulme est preferé à toutes odeurs, & qu'il n'y a que la Iudée qui en ayt. Il ne croissoit le temps passé qu'en deux Iardins, qui estoient tous deux Royaulx. Il croist hastiuement, & ne se peult soustenir s'il n'est appuyé, & le fault lyer comme la vigne. La fueille du Baulme ressemble à la Rue, & tousiours est verde. Il ne souffre poist qu'on le coupe, ou blesse avec le fer. Cornelius Tacitus écrit, que quand on met du fer aupres, il s'effraye de peur qu'il en a, & partant il le fault entamer avec instrumens d'os ou de verre: car si on l'attouche avec le fer, pour en auoir sa liqueur, ou huile, il se meurt incontinent apres, quand il est coupé il rend vn suc qu'on appelle Opobalsamum, qui est d'vne merueilleuse douceur, mais la goutte qu'il rend est bien petite. Cependant qu'Alexandre le grand estoit en ce lieu, ou n'en pouuoit remplir qu'vne coque d'escaille d'huiſtre tout au long d'vn iour d'Este. La principale vertu de ceste plante, est en la larme, la seconde en la semence, la tierce en l'escorce, la moindre est au boys. Apres que Titus prince Romain eut destruiſt Ierusalem, vengeance la mort de Iesuschrist, l'herbe & plante du baulme fut transportée en Ægypte. Pierre Belon fort diligent rechercheur de plusieurs choses rares, écrit que du tēps de sa peregrination de leuant, il alla voir le iardī ou croissēt les baulmes, qui n'est qu'à

Le Baulme
se meurt
si on le tou
che avec du
fer.

qu'à vne bonne lieuë du Caire, il dit n'en auoir veu que neuf ou dix plantes, lesquelles estoient enfermées de murailles, & fort curieusement gardées: Il écrit amplement de ceste matiere, voy ce qu'il en dit en ses obseruations. Plusieurs en ont écrit, comme Dioscoride Pline, Diosdore Sicilien, Cornelius Tacitus, Strabo, Pausanias, mais ilz discordent presque tous en la description de ceste plante. Ce precieux baulme a vne merueilleuse efficace de preseruer de corruption (par longue espace de temps) la chair qui en sera frottée.

Il y a vne herbe qui a esté autrefois rare, qui commence à deuenir vulgaire, qu'on appelle Pied de Lion, qui naist es montaignes, & a ses fueilles ressemblées à celles de la Maulue, mais elles sont plus dures, plus nerueuses & plus crespes. Elle naist en May, & florist en Iuin: elle est admirable pour consolider les playes interieures & exterieures, & fort familiere aux Chirurgiës d'Allemagne pour cest effect. Les Medecins modernes mettent ceste plante au rang des prodigieuses, pour la merueilleuse puissance qu'elle a de consolider. Ilz escriuent que si les filles & fêmes corrompues en vsent, elle les faict apparoir vierges, principalement quand elles continuent aucuns iours en sa decoctiõ. Les pieces de toille baignées dans son eau, appliquées sur les mammelles, les faict retirer, de maniere qu'elles deuiennent rondes & dures. Elle commence pour le iourd'huy d'estre congneüe en Italie, spécialement des femmes qui l'ont en particulieres delices.

Plante qui
se cōuertist
en pierre,
tirée hors
de la mer.

Le Corail qui est appellé Lithodendrō, c'est à dire arbre de pierre, merite bien d'estre mis au rang des plantes qui ont ie ne sçay quoy d'esmerueillable, veu que c'est vne plante qui croist en la mer (ainsi que tesmoigne Dioscoride) qui s'endurcist quand on la tire du profond de la mer, de l'aer qui l'enuironne, & deuient pierre: cest arbrisseau de Corail est verd, & mol estant en la mer, & porte du fruit semblable à des cornes tât en grandeur, qu'en figure. Quand on tire ceste plante de l'eau, elle est toute moussueuse, & n'est point rouge, mais venant par-apres es mains des ouuriers, ilz la polissent artificiellement sur le tour, ou par force de lime, & la brunissent avec la pouldre de Tripoli, pour luy donner le lustre. Toutes les especes de Corail sont trescongneuës & vulgaires en Italie, par-ce que lon en pesche en diuers lieux de la mer Thirhene. Les Corailz ont vne vertu occulte contre l'Epilepsie, ilz conseruent les maisons de foudre, & restraignent le flux menstrual, ilz valent aux corrosions des genciues, aux vlceres de la bouche, à la disenterie, au flux de semence. Auicenne le nombre entre les medecines cordialles, pour engendrer ioye & gayeté de cuer. Dioscoride ne faict que deux especes de Corail, des rouges & des noirs, si est-ce qu'il s'en trouue aussi es mers de l'Europe de fort blâcs, mais ilz sont plus spōgieux, & plus legiers.

Proprietez
du Corail
aux vsages
de Medecine.

Prodige
merueilleux
d'une
plante en-
seignée en

Diodore Sicilié en son 17. liure, racompte vne histoire admirable d'une plâte qui fut enseignée à Alexandre en vision, dont il guarit ses gens qui estoient blesez de ferremens enuennimez, laquelle

le

le m'a semblé digne d'estre recensée en ce lieu, dormant à par-ce que l'effect de ceste plante fut prodigieux. Alexandre le grand. Apres(dit-il) qu'Alexandre eut eu la victoire contre les Brachmanes, & qu'il les eut tous tuez ou prins prisonniers, il fut estonné quand il trouua plusieurs Macedoniens blesez, & qui estoient en tresgrand danger de leur vie, pour-ce que le fer des Barbares estoit enuenimé, & sur ceste confiance, auoient prins la hardiesse de venir à la bataille. Le venin estoit faict de quelques Serpens que ces Barbares prenoient, & les mettoient to'mors sécher au Soleil, la chaleur duquel en faisoit sortir vne sueur, & parmy celle sueur sortoit aussi le venin du Serpēt, lequel estoit si violent, que l'hōme blessé du ferrement qui en estoit enuenimé, perdoit incontinent tout sentiment, & tantost apres venoit à sentir les douleurs tresangoisseuses, avec retraction de nerfz, & tremblement de toute sa personne: la chair en deuenoit noire & plombée, & luy prenoit vn tremblement de tous les membres, & par vomissement rendoit grande quantité de colere: Outre tout cela, il sortoit de la playe vne escume noire, & s'y engendroit vne putrefaction, laquelle si tost qu'elle estoit formée, gaignoit incontinent les parties nobles, & faisoit ainsi mourir le patient en grand martyre, & aussi bien mouroient ceux qui n'auoient qu'vne legiere égratigneure, comme ceux qui auoient esté bien fort blesez. Et quant aux autres qui mouroient de ce venin, il n'en faisoit pas si grand mal au Roy: mais il estoit dolent à l'extremité de Ptolomée, qui estoit pour lors l'vn de ses plus

fauoritz, qui depuis la mort d'Alexãdre fut Roy bien voulu, & aimé de tous, tant pour sa vaillance, que pour sa liberalité & beneficence, de laquelle il vsoit enuers tous. Comme chacun estoit dolent pour le martyre de Ptolomée, il aduint vn cas rare, & digne de grand merueille, de maniere (dit Diodore) que plusieurs le referent à vne expresse preuoyance des Dieux: Car le Roy Alexãdre en dormant eut vne vision, en laquelle il luy sembla voir vn dragon, qui tenoit vne herbe en sa gueule, de laquelle il luy enseignoit la vertu, & le lieu ou elle croissoit. Alexandre s'esueillant lá dessus, alla incontinent chercher ceste herbe: & l'ayant trouuée, la pillá, & en emplastra tout le corps de Ptolomée, & luy en donna du ius à boire. Ceste herbe eut telle efficace, que dedans peu de iours il retourna à conualescence, & fut rendu sain & net. Le remede estant ainsi esprouue, les autres malades qui en furent medicinez puis apres, guerirent tous. Diodore racontant ceste histoire, n'exprime point le nom de ceste herbe: mais Pline racomptant vne histoire semblable à la precedente, exprime le nom de certaine herbe, qui guarist aussi vn soldat, disant ainsi: Quelquefois l'vsage, & l'experience de certaines plantes se trouue fortuitement, ou, pour en parler à la verité, par certain oracle des Dieux, comme est celle de la plante dicte Cynorrhodon, qui est vne espeece de rose sauuage, qui guarist de la morsure des chiens enragez. La vertu de ceste plante fut trouuée par fortune: Car quelque femme ayant vn sien filz qui estoit à la guerre en Espagne, lequel

lequel auoit esté mordu d'un chien enragé, & estoit desia en tel peril, qu'il commençoit à craindre les eaux, & autres choses liquides, qui est vn indice de mort. Ceste femme songeant de nuict en ceste maladie, luy fut aduis qu'elle enuoyoit à son filz ceste herbe, appelée Tynor-rhodon, pour boire en du laict, laquelle le iour precedent elle auoit veüe en quelque lieu aux champs: & donnant foy à ce songe, elle enuoya à son filz vne lettre, par laquelle elle l'acertenoit de ce qu'elle auoit songé. Le filz obeïssant au cōtenu de la lettre, fut guarý par le moyen de ceste herbe, & depuis les autres qui ont esté persécutez de sēblables maladies, ont vsé du mesme remede de ceste herbe. Voyla comme sa proprieté & vertu nous a esté manifestée: chose certainement esmerueillable, que la bonté de Dieu est si grande, qu'en dormant mesmes il nous aduertist des remedes qui nous sont salutaires. Nous trouuons encores de plus grandz & esmerueillables prodiges en certaines plantes, desquelles les anciens philosophes ont faict mention par leurs écrits, mais par ce qu'ilz n'ont point exprimé les noms de leurs plantes prodigieuses, plusieurs modernes avec grand' curiosité se tourmentent à les chercher. Theophraste a faict mētion de certaine herbe Indique, laquelle esmouue tellement le corps humain, qu'elle espuise tout ce qu'il y a de semēce en nature: Ce qui a donné occasion à aucuns d'écrire, qu'Hercules auoit depucelé en vne nuict vn grād nōbre de vierges, par le secours de

ceste plante. Les Scythes semblablement ont vne herbe frequēte en leur pays, qu'on ne nomme point autrement que l'herbe Scytique, laquelle retenuë en la bouche, reprime la faim & la soif, dix ou douze iours. *Ælian* historiē Grec faict mention d'une herbe, qu'il appelle l'herbe à la huppe, qui enseigne les trefors cachez. *Pline* faict mention de l'herbe au Piuert, qui ouure les conduictz fermez.

Nous auons racompté cy dessus les vertus & essences de plusieurs plantes admirables, si est-ce qu'il n'y a rien qui se puisse égaller en dignité, en merueille, miracle ou prodige, à la racine de Baara, tant celebrée par *Iosephe* autheur Hebreu, & par-ce que son histoire sort d'une boutique qui n'est point suspecte, & d'un autheur qui tient le premier lieu entre tous les historiens ecclesiastiques, elle nous a semblé digne de ce lieu. Au tēps passé (dit *Iosephe*) il croissoit vne racine en Iudée, nommée Baara, ayant couleur & splendeur de flamme, & esclairoit la nuit comme vne lampe, laquelle estoit de nature si mesueillable, qu'elle faisoit mourir prôptement ceux qui la pēsoiēt attoucher pour la recueillir, si premierement elle n'estoit arroufée de sang ou d'vrine de fēme: encores pour cela n'estoit on pas en seureté, car elle tuoit celuy qui la touchoit : de sorte qu'on fut contrainct apres auoir experimenté le venin de ceste herbe, d'attacher à la fin vn chien à la plâte, lequel voulant suyure son maistre, l'arrachoit en se secouant. Ceste racine auoit vne proprieté esmerueilleable & monstrueuse, car depuis qu'elle estoit

estoit arrachée on la pouuoit manier sans peril, & si auoit encores avec cela, vne autre proprieté & vertu, car pendue au col des forcenez, demoniacles & autres qui estoient possedez des diables, elle les guarissoit. Hierosme Cardan medecin Milannoys, trauaille (comme il a de coustume) à rechercher en nature la cause de ceste plante, & dit, qu'il ne trouue pas estrange qu'elle fist mourir celuy qui l'arrachoit, & que le petit nauet dict Napellus (duquel i'ay parlé cy dessus) ne se peult arracher sans peril: puis se plongeant en vn grand abisme de philosophie, il adioust ce qui l'ensuyt: Baaran, dont ceste racine est dictée Baara, est vne vallée en Iudée, region treschaulde, & abondante en Bitumen, duquel Bitumen la portion trop cuitte & tressubtile distilloit des montaignes, de laquelle (comme il est vray-semblable) ceste racine estoit engendrée: & par ce que ceste racine (peut estre) croissoit en l'ombre perpetuelle, le venin ne s'expiroit en rié, & estoit de substance chaulde comme feu, laquelle quand elle estoit arrachée, la vapeur ardente, & putride, receuë au cerueau de celuy qui l'arrachoit, incōtinent le faisoit mourir. Il adioust encores quelques autres raisons de l'vrine & du sang de la femme, par lequell la fureur de ceste racine estoit adoucie: mais pour dire la verité, combien que le bon homme face l'office d'un bon bracqué, & qu'il trace, qu'il flaire, & qu'il sente s'il pourra trouuer le sentier & secret de ceste plâte, si est-ce que ie croy infaliblement que tous les philosophes du monde congregez ensemble n'en sçau-

roient assigner autre raison, que celle du prophete, ou il dict: Le Seigneur est esmerueillable en toutes ses œuvres: Qui est-ce qui a congneu ses secretz, ou qui a esté son conseiller? Je t'ay monstté le pourtraict de ceste plante, au commencement de ce chap. ou tu voys le chien attaché.

Fin de la vingtroisiesme histoire.

*HISTOIRE PRODIGIEUSE
d'un Mōstre ayāt figure humaine, qui fut prins l'an mil
cinq cēs trēte & vn, en la forest de Haneberg: Duquel
Georgius Fabricius enuoya le pourtraict à Gesne-
rus, tiré au naturel, comme il est icy figuré.*

Chapitre X XIII.





Eux qui mesurent la grandeur des œuvres de Dieu selon la capacité de leurs entendemens, à peine se pourront persuader que ce monstre qui est icy figuré, ait esté en nature : mais quant à mon regard, j'ay protesté plusieurs fois que ie ne rempliray mes écritz d'aucune chose fabuleuse, ny d'histoire aucune, laquelle ie ne verifie par autorité de quelque fameux auteur Grec, ou Latin, sacré ou prophane. Gesnerus en son histoire De quadrupedibus viuiparis, écrit qu'en la forest de Saxonie du costé de Dace, il fut pris quelques animaux monstrueux, ayans figure humaine, dont la femelle fut tuée des chiés des veneurs, le masle fut prins & amené vif, lequel fut domestiqué & appriuoisé, de telle sorte qu'il aprint à parler quelque peu, mais sa parole estoit imparfaicte, & rauque, comme celle d'une cheure : au reste, quant à ses actions, elles estoient plus brutales qu'humaines, & lors que ses ardeurs natu-

Tu en as la figure pour traicte selon le naturel au comment de ce chapitre, en uoyée à Gesnerus, par Georgius Fabricius.

relles le pressioient, les femmes n'estoient point en seureté avec luy, car il se mettoit en effort de les violer publiquement. Vn semblable à cestuy fut prins l'an mil cinq cens trente & vn, en vne forest de la seigneurie de Salcebourg en Alemaigne, lequel ne peut oncques estre apriuoisé, ny mesme endurer le regard des hommes, de sorte qu'apres auoir vescu quelques iours, il se laissa mourir de faim, sans vouloir receuoir pasture de creature viuante.

Du temps que Iaqués le Quart Roy d'Escoce regnoit, qui fut l'an mil quatre cens & neuf, & qu'il enuoya Iacobus Egilinus en ambassade vers le Roy de Frâce, ledict ambassadeur par tempeste de mer fut reietté en quelque isle en Noruagie; ou il veit de semblables môstres à ceux cy, comme il a attesté à son retour, & s'estant enquis des gens du pays quelles especes d'animaux c'estoient, ilz luy respondirent, que c'estoient quelques bestes de figure humaine, lesquelles de nuit venoient quelquefois iusques à leurs maisons, & sans qu'elles estoient repoussées des chiens, elles eussent mangé & deuoré les hōmes, & les enfans. Je me recorde que saint Augustin en sa Cité de Dieu, faisant mentiō de certains monstres de formes estrāges, qui se retrouuēt es desers, & ailleurs, suscite la question, filz sont descenduz du premier homme Adam, & s'ilz ont ame raisonnable ou non, & s'ilz ressusciteront au iour de la generale resurrection, comme les autres : mais par-ce que la decision de ceste matiere est vn peu trop prolix, pour la briueté de ce chapitre, ie me reserueray en autre lieu plus cōmode, à la dissoudre.

Fin de la vingtquatriesme histoire.

HISTOIRES
BANQUETZ PRO-
digieux.

Chapitre X X V.





Si ie n'auois assez ample-
 mēt traicté au premier li-
 ure de mon Theatre du
 monde, les infirmitéz &
 maledictions, que le ma-
 lheureux vice de Gloutō
 nie apporte au genre hu-
 main, i'aurois maintenant
 vn subiect assez ample pour m'esgayer & dilater
 le vol de ma plume: mais sans resonner si souuent
 vne mesme chanson, il me suffira pour le present
 de décrire en ce lieu nompas seulement les prodi-
 galitez, mais mesmes les prodiges & monstrueux
 appastz de gueulle desquelz les anciens & moder-
 nes ont vsé en leurs festins & banquetz. Les Per-
 ses & les Grecz (comme Herodote tesmoigne)
 ont esté si dissoluz en leurs festins, qu'ilz propo-
 soient vn pris public par le cry d'un Herault à
 ceux qui inuenteroient nouueaux delices, & qui
 mieux boyroiet, ou mengeroient à outrāces. En-
 cores se reprochoient ilz les vns aux autres par
 maniere de mocquerie & gayeté, qu'ilz ne par-
 toient iamais de leurs festes qu'affamez, & leur rai-
 son estoit telle, par-ce qu'ilz farcissoient si bien
 leurs corps de toutes especes de viandes & breu-
 uaiges, qu'ilz estoient contrainctz rēdre compte
 à nature, & faire inuentaire de ce qu'ilz auoient
 prins auāt partir de table. Et ainsi ayans l'estomac
 vuyde, la faim les reprenoit. Athenée faisant mē-
 tion de l'excessiue prodigalité de Xerxes Roy
 des Perses, assure que depuis qu'il demeueroit vn
 iour en vne cité, & qu'il y soupoit & disnoit, le

Abomina-
 ble infamie
 des Perses
 et des grecz

En ses Di-
 pno. sophi-
 liure 4.

Incroyable
prodigalité
de Darius.

Athenæus.

vulgaire appauvry s'en resentoit vn an ou deux par apres, cōme s'il y eust eu quelque famine ou sterilité de biēs en leur prouince. Puis continuant son propos, il faict mention de la superflue & sumptueuse despence de Daire Roy des Perfes, lequel (dict-il) auoit quelque-foys pour tel souper quinze mille hommes pour l'accompagner, & despendoit pour les festoyer quatre cens talés: lesquelz si vous les diuisez en quinze mille, vous trouuerez que chacun de ses hostes despendoit seize escuz pour son souper. Ce grand gourmād Alexādre n'a en riē esté inferieur à Daire, ou Xerces, en crapules, ou excessiues despences, car depuis qu'il eut penetré aux Indes, il commença à se donner en proye aux delices, & proposa vne bataille publique de bien boire, avec pris ordonné pour celuy qui reporteroit la victoire, qui se montoit quelques fois iusques à la concurrence de trente mines, sont trois cens escuz: ou d'vn talent, sont six cens escuz. Et combien que ce combat ne fust ordonné qu'à coups de verres, si est-ce qu'il se trouuoit à la fin si tragique & sanglant, que pour telle fois il y en est mort iusques au nombre de trente-six: lesquelz noyez, & suffoquez du vin, terminoient ainsi miserablement leur vie, comme Chares Mitylenæus écrit aux gestes d'Alexādre. Combien qu'Esopé n'egalast ny en biens ny en dignitez les precedens, si est-ce que Pline recite au dixiesme de ses liures, qu'entre les plus renommées friādises & prodigalitez, le plat d'Esopé a esté en grande admiration. Ce plat estoit d'vne inuention estrange & prodigieuse: car il
recher-

rechercha avec grande curiosité en vn banquet qu'il feist, ce qu'il peut trouuer en toute la cité de Rome de petitz oyseaux enclos en cages, qui scauoient mieux imiter la voix humaine: comme lynottes, alouettes, estourneaux, merles, calendres, & autres semblables, lesquelz se vendoyent plus cher que l'Or, à cause de leurs châts harmonieux, & du plaisir qu'on receuoit en les escoutant. Puis en ayant assemblé iusques au nombre d'un cent, il les feit deuorer en vn repas à certains citoyens qu'il auoit cōuiez: lesquelz (si nous voulons recevoir Pline pour tesmoing) auoyent cousté six mille sesterces la piece, qui se peuuent apprecier (selon Budée) à quinze mille escuz. Ce qui ne fera trouué estrange ou aliene de verité de ceux qui ont leu aux auteurs, que non seulement ce tragique Esope estoit fort riche: mais encores apres tant d'exces & despences, laissa il son filz si riche qu'il exerçoit la mesme, ou plus grâde prodigalité que son pere. Ces choses sont admirables, mais il ne se list rien de si monstrueux en nature, que la richesse & magnificence de Pithius, lequel n'estoit ny Roy ny prince, ny auoit aucun tiltre de dignité: & neantmoins il receut & traita par l'espace d'un iour naturel l'exercite de Xerces filz du grand Roy Darius, lequel se montoit iusques au nombre de sept cens octante & huiet mil hommes. Encore te semblera il plus estrange ce qu'Herodote, Pline, & Budée escriuent, qu'il offrit à Xerces (partant de sa maison) de luy soudoyer son camp cinq moys, & le fournir de Blé. Mais sans no' escarter ou desuoyer par trop

Pithius le plus riche homme de l'Asie.

Liure de Asie.

de nostre premier sentier, reprenons les erres de noz magnificences & báquetz. Il nous fault mettre Cleopatra Royne d'Egypte sur les rangs, laquelle (comme dict Plutarque) auoit la parole si douce & armonieuse, que lors qu'elle vouloit deployer sa langue pour entretenir quelque grand seigneur, elle la faisoit resonner cōme vn instrument armonieux de plusieurs cordes, qui fut la premiere penthiere & filé ou ce pigeō de Marc Antoine se laissa prédre: Car depuis qu'il fut emmiellé de la douceur de ceste diuine eloquēce affaïsonnée d'une rare & prodigieuse beauté, avec vne incroyable magnificence de festins & banquetz, au lieu de poursuyure le proces de grand'consequēce qu'il auoit intenté contre elle, il demeura si bien captiué de ses bonnes graces, qu'il auoit plus besoing de pitié que de proces: Et cōbien qu'il fust au cōmencement acteur, il demeura neantmoins vaincu. Pour dōner dōcques commencement à la magnificēce de Cleopatra, il faut entendre, ainsi que décrit Plutarque, qu'Antoine allant contre les Parthes, l'enuoya adiourner à comparoistre en personne deuant luy, quand il seroit en Cilicie, pour respōdre aux crimes & charges dont elle estoit accusée, sçauoir est d'auoir donné confort & ayde à ses ennemys cōtre luy, mais celle qui auoit le cœur hautain, ne peut oncques estre abaissée, n'autrement intimidée, & tant s'en faut qu'elle eut acoustrement de personne accusée (comme estoit la coustume des anciens) qu'elle s'orna des plus sumptueux habitz qu'elle eust encore porté. Et pour ne laisser rien derriere de ce

de ce qui appartenoit à l'entier aornement & de-
coration d'une grâde princesse, elle fist equipper
vn Galio, pour venir vers luy, par le fleuve Cyd-
nus, dont la poupe estoit d'Or, les auirons d'Ar-
gent, & le voile de pourpre, estant assise souz vne
tente dorée, enuironnée de chantres & d'autres in-
strumens armonieux, & de toutes autres choses
qui peuuent apporter plaisir ou contentement à
l'homme. Antoine sachant sa venue l'enuoya prier
de venir souper avec luy, mais celle qui auoit le
cœur hault, se sentât éguillonnée de telle reque-
ste, luy manda que s'il luy plaisoit de venir vers
elle, il seroit le tresbien venu, tant elle se confioit
en sa beauté & faconde, & à bon droit : Car oul-
tre la perfection de beauté, dont nature l'auoit
douiée, encores auoit elle vne parfaicte intelligen-
ce de la diuersité des langues, tellement qu'elle
respondoit aux Arabes, à ceux de Syrie, aux He-
breux, aux Medes, aux Parthes, aux Ethiopes &
Troglotides, sans interprete ou truchement : qui
fut cause qu'Antoine (voyant ce torrent de per-
fections en cest admirable subiect) fut incont-
inent surprins, ce qu'il nous a fallu deduire vn peu
de plus loing, d'autant que la magnificence du
banquet que fist puis apres Cleopatra à Antoine,
en despend. Antoine doncques assailly de ceste
nouuelle beauté, cōmēça à mettre en oubly Octa-
uie seur d'Octaue Cesar son espouse legitime,
pour se dōner en proye & dependre du tout des
mignotises, blandices & pompes de sa nouuelle
amye, laquelle par traict de temps sceut si bien
gagner & cōfire en delices, que si ie racomptois

par ordre la prodigalité de laquelle elle vſa en la reception d'Antoine (cōme Athenæus auteur Grec l'a décrit) i'aurois peur de n'en eſtre pas creu, tant elle ſe monſtra prodigieuſe en deſpence, mais ie feray ſeulement mention de ce que preſque tous ceux qui ont traicté les geſtes d'Antoni-
 us & de Cleopatra racomptent. Cleopatra dōcques apres auoir deſployé tout l'artifice que nature luy auoit dōné à inuenter nouuelles diſſolutiōs en deſpence, pour mieux entretenir ſon Antoine en delices, elle ſe voulut monſtrer extreme en vne choſe, car ainſi que propos ſ'eſtoiēt meuz entre-eux de leurs deſpences & magnificences ordinaires, elle diſt à Antoine: Ie feray plus: car vous ne me ſçauriez ſi bien ſurprendre au deſpourueu, que ie ne deſpende cent foys feſterces, pour vous traicter en vn ſeul feſtin. Antoine, qui eſtoit vn vray formulaire de prodigalité, deſirant veoir l'experience de ſon dire, luy cōtredift: en ſorte qu'il y eût Iuges eſleux de tous coſtez, & gages mis en ſequeſtre pour l'eſprouue de leur contétion. Quelque temps apres, Antoine la voulant ſurprendre, vint ſouper avec elle, & combien qu'il trouuaſt ſa table bien peuplée d'vne infinité de viandes exquisés, ſi ne peut il onques imaginer que telle deſpēce ſceuſt reſpondre à la ſomme qu'elle auoit promiſe, iuſques à ce qu'il apperceut Cleopatra tirer deux groſſes perles qu'elle portoit pendātes à ſes oreilles, dont elle en feit promptement diſſoudre l'vne en ſa preſence, & la beut: Et voulant faire le ſemblable del'autre, les Iuges l'ayant aſſeurée de ſa victoire,
 l'em-

Sont deux
 cēs cinquā-
 te mille eſ-
 cuz.

Il y en a
 d'autres
 qui appre-
 cient ceſte
 ſōme à deux
 cens trente
 qurtre mil-
 le trois cens
 ſoixāte cīq
 ducatz.

l'empescharent. Ceste perle estoit de si monstrueuse grosseur (ainsi que Pline tesmoigne) qu'elle pesoit demye once, qui sont quatre vingtz quatz, & la plus grosse qui se puisse auiourd'huy re trouuer, à peine poise elle vn quart d'once. C'est pourquoy Pline, parlant de l'excellence de ceste perle, l'appelle l'vnique, & le singulier chef d'œuvre de nature en son espee, & non sans cause: car par la plus commune appreciation qu'en font les historiens, ilz la prisent deux cens cinquante mille escuz. L'Empereur Getta avsé d'une si estrange & curieuse magnificence en la solennité de ses banquetz, que ie ne me recorde point iamaïs auoir leu en aucun historien le semblable: Car il se monstroit si honorable & magnifique en ses festins publiques, qu'il se faisoit seruir de diuersité de viandes, de chair, & de poisson, par ordre alphabetique: car toutes les volatiles, quadrupedes & poissons qu'il pouoit recouurer, qui commençoient par A, il en faisoit couvrir sa table pour le premier seruice, comme Alloüettes, Autruches, Anchois, Aloses, & autres semblables. Puis quand ce venoit au second seruice, il pratiquoit le semblable: car il auoit des cuisiniers expressement deputez pour luy acheter toutes especes d'animaux & de poissons qui se commençoient par B: cōme Becasses, Butors, Brochetz, & autres: lesquelz ne faisoient faulte incontinct que le premier seruice estoit leué, de preséter le secōd en pareil ordre. Autant en faisoient-ilz au tiers, qui se commençoit par C: auquel on ne failloit à presenter ce qui s'estoit peu retrouver, qui se cō-

mençoit par C: comme Connils, Canes, Cou-
lombs, Cailles, Carpes, & ainsi consequemment
de toutes autres viandes, iusques à ce que toutes
les lettres contenues en l'alphabet fussent accom-
plies & parfaites. Mais sans no^r amuser si curieu-
sément à chercher la magnificēce des anciēns ban-
quetz, ie veulx décrire ce qui est auenu de nostre
temps en Auignon, lors que i'estudiois en droict,
souz feu de bonne memoire Aemilius Ferretus,
Iurisqueconsulte excellēt, du temps duquel il y eut
vn Prelat estrangier, duquel ie tairay le nom, tant
pour sa dignité, que pour sa trop grande supersti-
tion. ce magnifique prelat, pour laisser quelque
tesmoignage à la posterité de sa magnificence,
cōua vn iour entre les autres les plus illustres &
notables citoyens d'Auignon & leurs femmes.

Prodigalité Et pour le commencement de sa magnificence,
d'un Prelat entrant en la salle ou le bāquet estoit appareillé,
Italien. vous voyez vn grand beuf escorché, & purgé
d'entrailles, lequel auoit vn cerf entier, acoustré
de semblable pareure dedans le ventre, & tout
farcy de petits oyseaux entiers, comme Cailles,
Perdris, Allouettes, Phaisans, Aesgrettes, Pales,
Herons, & autres semblables irritemēs de gueul-
le, qui estoient tous enclos au ventre du second
animal, le tout si bien agencé par ordre, & pro-
portionné l'un avec l'autre, qu'il sembloit que
quelque bō mathemaicien en eust faict l'ordon-
nance. Et ce qui rédoit encores ce spectacle plus
celebre, c'estoit que tous animaux ainsi assem-
blez, se cuysoient & tournoient tous seuls en
vne broche par certains cōpas, mouuemēs & cō-
duits,

duits, sans que personne y mist la main. Pour l'entrée de table de ce banquet (combien que cela soit vulgaire, ie n'obmettray toutefois de l'écrire) il fut présenté force pâtisserie, en laquelle il y auoit plusieurs petits oyseaux vifs enclos, lesquels incontinent que la crouste fut ostée, commencerent à voleter (avec grand merueille) par la salle. Et, ce que ie ne veulx obmettre digne d'admiration, c'est que parmy les autres seruices il fut présenté de grans plats d'argent, pleins de gelée, si industrieusement elabourée, qu'on voyoit au fons des plats grand nombre de petits poissons vifs, qui nageoyent, & sauteloient en l'eau sucrée & musquée, avec grand merueille & plaisir des spectateurs. Encores n'est il moins estrange, que toutes les volatiles qui furent seruies sur table, estoient lardées de Lamproyon, combien que ce fust en saison qu'il coustoit demy escu la piece. ce que i'ay dict est admirable, mais ce qui l'ensuyt est quasi prodigieux : c'est qu'il fist presenter autant de volaille viue, qu'il en fut seruy de morte sur table : de sorte que si on seruoit vn Phaissant cuit sur table, il y auoit quelques gentils-hommes deputez qui en presentoyent vn autre vif, qu'ilz tenoyēt en leur main, pour monstrier la magnificence de la maison, puis le reportoyent à la cuisine. Que restoit-il plus à monsieur le Prelat, pour la consommation de ses delices, sinon de se faire seruir le visage couuert d'un cresp, de peur que l'aleine des gentils-hommes (qui le seruoient) ne touchast à son boire, ou à ses viandes, comme paul Venitien écrit du

Le grand grand Cam? I'ay bien voulu décrire, & mettre au
Châse fait rang des autres le banquet prodigieux de ce Pré-
seruir le vi- lat, nompas pour l'imiter, mais pour le detester,
saige cou- car peut estre, que ce pendât qu'il auoit les reins
uert, de au feu, & qu'il iouissoit ainsi à pleine voyle de
peur que ces delices; le pauure Lazare estoit à sa porte, qui
l'aleine n'at transsissoit de froid, de faim & de soif: mais bon
touche les viandes. Dieu! qu'eussent peu dire, ou penser saint Iean

& saint Pierre, qui n'auoient pas vn denier pour
dōner l'aumosne au pauure boyteux, qui la leur
demandoit à la porte du temple, & les autres apo-
stres qui estoient contrainctz par faim de mager
les espiz de blé tous crudz, filz eussent veu leur
successeur (mais nompas imitateur) en vne cuisi-
ne si chaude, & tant peuplée de viures? Mais que
ce mauuais garçon Iudas eust eu bonne occasiō,
fil se fust trouué en ceste assemblée, de crier hault
sur eux: Vt quid perditio hæc? potuisset hoc mul-
tum vendi, & dari pauperibus. Si tu veulx veoir
quelques autres prodigieuses despences d'autres
prelatz, lis Platine au traicté qu'il a fait De ho-
nesta voluptate. Encores si tu veux penetrer les
autres monumens des anciens historiens, tu trou-
ueras vn' autre histoire de quelque Cardinal du
temps du pape Sixte, lequel despendit en deux
ans en banquetz, festins, dissolutions, & autres
telles especes de vanitez, la somme de trois cens
mille escuz, desquelz plusieurs pauvres mēbres
de Iesus Christ (qui peult estre sont morts de
faim, & de paureté) depuis eussent peu estre
longuement sustantez, & beaucoup de pauvres
escoliers maintenez & entretenez aux estudes.

Laiſſons

Laiſſons doncques les noſtres en repos, & retour
 nons aux anceſtres : car tant plus leurs vices ſont
 eſuentez, le ſcandalle en eſt plus grand, & la tra-
 gedie de leur vie moins honorable. Tout ce que
 nous auons donc dict cy deſſus, n'eſt qu'un vm-
 bre ou figure de magnificēce, eu eſgard aux mō-
 ſtrueux & diaboliques feſtins de ce grand gouf-
 fre de viandes Heliogabalus Empereur des Ro-
 maïs, lequel a eſté ſi deſbordé en ſes delices, qu'il
 a faiſt employer toute la vie d'un excellent hiſto **Aelius Lā-**
 riographe à les décrire. Ce malheureux organe **prius.**
 de Sathan, & ceſte cloaque inſatiable de vian-
 des, ne fiſt oncques repas, depuis qu'il fut crée
 Empereur, qui ne couſtaſt du moins ſoixante
 marcs d'Or, leſquelz (ſelō noſtre computation)
 reuiennent à la ſomme de deux mille cinq cens
 ducatz : Encores eſtoit il ſi fantaſtique & deſ-
 reiglé en ſes appetitz, qu'il n'vſoit point de vian-
 des vulgaires en ſes repas, mais il ſe faiſoit faire des
 paſtez de creſtes de Coq, de langues de Paon, de
 Roſſignolz, d'œufz de Perdrix, de teſtes de Pape-
 gaulx, de Faiſans, de Paons, & meſmes par-
 ce qu'il auoit entendu ou leu quelque choſe de ra-
 rité du Phenix (que lon dict eſtre ſeul au mōde)
 il eſtoit enuieux d'en mēger, & promettoit ie ne
 ſçay quantz mille marcs d'or à qui luy en pour-
 roit fournir, & diſoit en cōmun prouerbe, qu'il
 n'eſtoit ſaulce que de cherté : & ne luy ſuffiſoit
 de ſe paiſtre de telles viandes rares & exquisēs, ſi
 d'abondant il ne conuioit ſes ſatrapes & gentilz-
 hommes à faire le ſemblable: meſmes iuſques à
 ſes chiens & Lyons qu'il faiſoit nourrir de chairs

de Phaïsans, de Paons & d'Oyes, encores n'exercoit il pas sa prodigalité seulement en despence de bouche, mais (qui plus est) il estoit extreme en tous autres appareilz de seruice: car il se faisoit seruir à table à quatre filles nues, & quelque foys trainer en vn chariot par la cité de Rome en tel estat. Il ne beuuoit ny ne mägeoit iamais en vn vase qu'une foys, & si tous les vtencilles de sa maison estoient d'Or ou d'Argent tout pur, mesmes iusques au pot ou il rendoit ses excemens. Au lieu du feu de cire pour luy donner clarté, il faisoit mettre en ses lampes du basme fort excellent, qu'il faisoit apporter de Iudée & d'Arabie. Ce malheureux Empereur estoit si frenetique en toutes ses actions, qu'il inuenoit des choses dont les diables ne s'en fussent oncques peu aduïser: car il faisoit contrefaire des viâdes artificielles de marbre, de boys & d'autres choses, puis faisoit affamer des gens, & les contraindoit asseoir à table, regardant ces viandes en pitié. Il faisoit quelque foys des festins ou il conuioit huiët chauues, huiët bossus, huiët boyteux, huiët gouteux, huiët sourds, huiët noirs, huiët blancs, huiët maigres, huiët gras, afin d'acoustre à rire à ceux qui asistoient à ses banquetz: il faisoit quelquefois yurer ses hostes, puis leur faisoit fermer les portes des lieux ou ilz estoient endormis, & y faisoit enclorre avec eux des Ours, des Lyons sans ongles ny dens, afin que quand ilz seroiët esueillez, ilz mourussët de peur de se trouuer entre ces bestes cruelles & hideuses. Encore en faisoit il boire d'autres iusques au creuer, puis
quand

quand ilz auoient bien beu, il leur faisoit lier les piedz, les mains & tous les conduictz de l'vrine : de sorte qu'ilz ne pouuoient piffer, & les laissoit ainsi mourir. Puis quand on le reprenoit de ses folies, & qu'on luy remonstroit que l'exces de ses despences le pourroit vn iour faire tomber en pauureté, il ne respõdoit autre chose, sinon qu'il n'estoit que de se faire heritier de soymesme & de sa femme, & qu'il ne desiroit aucuns enfans, de peur qu'ilz ne conspirassent cõtre luy. Voyla doncques les charitez, voyla les prodigieux banquetz, esquelz ce venerable Empereur despẽdoit le reuenu de son empire. Mais par-ce que telles prodigalitez tesembleront (peut estre) incroyables, lis *Ælius Lampridius* en sa vie, *Sextus Aurelius victor*, *Eutrope*, *Iule Capitolin*, & *Spartiã* en la vie de *Septime Seuer*, & tu trouueras que ie n'ay pas seulement commemoré la moitié de ses profusions, & despences. Que nous reste il plus maintenant, sinon de monstrier quelle a esté la fin de toutes ces delices, & quelles confictures a apresté nature à ces gloutons pour le dessert de leurs banquetz ? Quelle a esté la fin de *Daire*, & de *Xerxes*, lesquelz nous auõs au commencement mis sur les rangs ? Ces canaulz & gosiers par lesquels ilz auoient tant faict passer de viandes, ne furent ilz pas à la fin miserablement tranchez ? Mais qu'elle fut l'issue de ce grand crapulaire *Alexandre* ? Vn petit scrupule de poison luy fist digerer en vn coup ce qu'il auoit deuoré toute sa vie. Succeda il point mieux à ce prodigue *Marc-Antoine*, ou à sa friande *Cleopatra* ? quel miroir,

Aucuns attribuent ce cy à l'Empereur Tybere.

Lãpridius en a écrit plus copieusement que les autres.

Xerxes occis par son preuost, *Daire* par *Alexandre*. *Alexandre* empoisonné

Marc-Antoine se tua soy-mesme

Paulus O-
rosius.

Cleopatra
se fist mor-
dre à vn as-
pic. Appia-
nus Alexan-
drinus.

Andebout
mourut
yure.

quel spectacle pour ceux qui vivent en ce monde comme en vn eternal paradis de delices ? Mais quelle punition pouoit il receuoir de sa vie Epicuriene, que de se seruir luymesme de bourreau ? Sa compagne en delices Cleopatra receut elle meilleur traictement ? laquelle ainsi qu'elle auoit esté desfreiglée & dissoluë en appareil de viandes, elle fut en fin deuorée d'un aspic, qui est presque le plus venimeux de tous les animaux. Que deuint semblablement ceste grande fournaise de biens Heliogabale ? eschappa-il la fureur de la iustice de Dieu nomplus que les autres ? Non certainement : car ainsi qu'il auoit englouty vne infinité de diuerses especes d'animaux, aussi fut il en fin deuoré d'iceux : car apres que ses suiectz furent ennuyez de ses tyrannies & dissolutions, ilz coniuèrent en fin contre luy, & le tuerent : puis le ayant trainé comme vn chien mort par les carrefours de Rome, ilz le precipiterent au Tibre, ou il fut faict proye des poissons ausquelz durant sa vie sa gueule auoit faict la guerre. I'ay honte encores qu'il fault que ie passe oultre, & que ie die qu'il y en a eu qui n'ont pas esté contens de faire boire ou manger les autres à oultrance, comme les precedens, mais eux mesmes en ont tant prins, que nature se trouuant vaincue & accablée, ilz sont en fin demouréz suffoquez, comme cest infame Roy d'Angleterre Andebout, lequel farcit si bien son corps de liqueurs & viandes en vn souper, que faisant cession à nature, il fut incontinent estouffé. L'Empereur Iouian, & Septimus Seuerus (comme Baptiste Ignace tesmoigne)

tesmoigne) moururent de semblable maladie. Il y a encores eu vne autre espece de banqueteurs, qui ne sont point mors pour auoir trop beu ou mangé: mais

Figure & pour traitt de Denis Heracleor qui deuint si gras qu'il estoit cōtrainct se faire tirer la gresse avec les Sages. Voy vne semblable histoire en Galie, de Nicomachus Smyrneus, le quel deuint si gras qu'il ne se pouoit remuer



ilz engressoyent si bien leur pance, qu'ilz n'en va-

loient gueres mieux. Entre lesquelz Maximin l'Empereur a esté le premier patriarche, lequel apres ses festins & banquetz se trouua tellement chargé de cuisiné, qu'il eust bié faict tourner vn moulin à vent de force de souffler, & si auoit coustumieremēt deux hōmes deuant luy à luy porter le ventre, & deuindrent ses membres par succession de temps si chargez de gresse, que les braceletz de sa femme luy seruoient d'anneaux à ses doigtz, comme les historiens écriuent. Comme en semblable ce grand Tyrant Denis Heracleot se laissa si bien transporter à ses delices, qu'il s'habitua en fin de ne faire autre chose que boire, manger & dormir tout le iour, & fist en sorte que la gresse gaigna tant sur luy & ses membres qu'ilz deuindrent si gros & mōstrueux, qu'il n'osoit se manifester au peuple, de peur d'estre moqué, & demeurant ainsi reclus, il s'enfla si bien de graisse qu'il estoit contrainct iour & nuict se faire appliquer grande quantité de sangsues sur les membres, pour luy tirer l'humeur qui le rendoit si gras, autremēt il eust estouffé, comme tu le vois en ce precedent pourtraict.

Athenæus
lib. xij.

Fin de la vingtcinquiesme histoire.

VISIONS PRODIGIEUSES,
avec plusieurs histoires memorables des Spectres,
Fantomes, figures & illusions qui apparois-
sent de nuit, de iour, en veillant
& en dormant.

Chapitre. X XVI.





E ne me veux point icy plonger en ce labyrinthe douteux de rechercher si les ombres des mortz retournent , ou si les espritz ayans eschappé le naufrage de ceste vie mortelle , nous visitent quelquefois. Je sçay comme ces deux bons Prelatz saint Augustin & saint Hierosme , & presque tous les Ecclesiastiques se sont tourmêtez à dissoudre le doute de Samuel, pour sçauoir si c'estoit le vray esprit du Prophete qui retourna par l'euocation de la femme enchanteresse , ou si ce fut vn prestige que Sathan laissa à la posterité. Il me suffira seulement en ce chapitre de raconter fidelement & en termes de Philosophe , ce que les autheurs plus fameux en ont écrit : donnons doncques commencement à noz visions prodigieuses. Les anciens ont tousiours eu entre leurs plus grands merueilles, l'histoire des deux Arcades, laquelle est si souuent recensée en leurs histoires, qu'ilz l'ont tousiours tenuë pour vn vray infallible oracle de verité. Entre les modernes, le Pape Pie second du nom en fait souuent mention comme de chose veritable: entre les anciens, Valere, & plusieurs autres , qui ont traité les gestes des Grecz & des Romains , écrivent qu'il y auoit deux Arcades qui s'aymoient vniquement, & symbolisoient si bien en humeurs & actions , que ce n'estoit presque qu'un mesme cœur. Vn iour ilz prindrent complot de venir à
Megare,

Megare, ville de Grece, pour certains affaires, à la quelle arriuez, l'un se retire en quelque maison de sa cognoissance, l'autre suyuant la coustume, va loger en vne hostellerie: celui qui s'estoit retiré chez son familier, ayant soupé, pressé du sommeil, & ennuyé du chemin, se coucha, & incontinent qu'il fut au liect, il commença à entrer en vn profond sommeil, qu'il continua l'espace d'une heure ou de deux. Ce repos ne fut point tranquille, mais il fut inquieté d'un terrible & espouventable songe: Car il luy sembloit aduis qu'il voyoit son compagnon passe & hideux deuant luy, qui imploroit son ayde pour le deliurer des mains de son hôte qui l'auoit assaillly: Donnant foy à la vision, & sollicité par la feruente amitié qu'il portoit à son cōpagnon, il se leue, & se mist en voye pour l'aller trouuer, mais il ne cōtinua gueres en ce vouloir, qu'il ne se persuadast que ce n'estoit que resuerie, & changeant propos s'en retourna coucher: mais il ne tarda gueres au liect, qu'il ne fust de rechef assaillly de ce fantosme, & biē d'une façon plus estrange: Car il auoit figure d'un mort, & si estoit couuert de sang en plusieurs endroits, lequel luy dist: Puis que tu as tenu si peu de compte de me secourir en la vie, au moins venge ma mort: car ce mesme corps que tu vois ainsi meurtry & mutilé deuant toy, est à la porte de la ville, couuert de fient en vne charette, par la cruauté de mon hôte. Ce ieune homme se sentant importuné de la seconde requeste de son amy, pria quelques vns de l'accompagner iusques à la porte de la ville, ou ilz trouuerent le corps mort

Autre hi-
stoire.

de l'Arcade, caché en du fient, comme il l'auoit
veu figuré en dormant:& soudain que ce male-
fice fut descouuert,il fist prendre l'hoste, & ayât
faict entendre tout le succès des choses aux Pote-
statz de la ville,le meurtrier auoüant le faict, eut
la teste trenchée. Alexander ab Alexandro, chap.
9. du second liure de ses iours Geniaux, racom-
pte vne histoire admirable, & bien conforme à
la precedente de ces Spectres, Fantosmes & figu-
res, qui apparoissent quelquefois, laquelle il di-
soit auoir entendue d'un sien familier & intime
amy, homme graue, docte, & duquel la vertu &
intégrité de vie estoit tant cogneuë de tous, que
pour mourir il n'eust voulu mentir. Cest homme
estant à Rome fut prié de quelque sien amy, de
luy faire compagnie iusques aux baings de Cu-
mes, pensant trouuer allegeâce d'une maladie in-
curable qui l'auoit vexé par plusieurs années, ce
qu'il luy accorda voluntiers: Et apres auoir che-
miné quelques iournées, ce malade attenuë du la-
beur non accoustumé, ne peut passer outre, ains
fut arresté par la violēce du mal, & vaincu de dou-
leur, rendit l'esprit à dieu en certaine hostelerie.
Les funerailles faictes, & ce corps rendu à la ter-
re, l'autre voyât qu'il ne luy estoit besoing passer
outre, reprint la route de Rome: mais surprins de
la nuit, il fut cōtrainct de demeurer en quelque
hostelerie chāpestre: soudain qu'il fut au lict, veil-
lât encores, voicy l'image & figure de son com-
pagnon qu'il auoit enterré le iour precedent, pal-
le, maigre & defaict, qui se vint presenter à luy
en l'estat qu'il estoit durant sa maladie, le regar-
dant

dant intentiuement. L'autre presque trāsi de peur, l'interrogea qui il estoit: mais sans luy rendre aucune responce, despouilla ses vestemens, se vint coucher aupres de luy, & s'approchant cōmença à l'embrasser, cōme s'il luy eust voulu faire feste. Ce pauvre hōme demy mort de crainte, s'eslançāt hors du liēt, se sauua promptement à la fuitte, sans que depuis ceste vision luy ait apparu: mais si ne se peut il si bien asseurer au par-apres, que de la craincte & apprehension de ceste vision, il ne tumbast en vne grosse maladie, laquelle le mina si bien à la longue, qu'il cuida rendre l'ame. Retourné à conualescence, entre les choses esmerueillables qu'il racomptoit de ce fantosme, il asseuroit n'auoir oncques senty glace qui se peust egaller en froideur au froid qu'il auoit senty lors que ce mort le touchoit de ses piedz s'estant mis en son liēt. Le mesme autheur, chapitre vnzième du premier liure de son œuvre cy dessus allegué, racompte vne semblable histoire, laquelle il n'a point leuë ny entendue d'aucun, mais luy mesme l'a experimētée en vn sien fidelle seruiteur, hōme sincere, vertueux & entier: lequel couché en son liēt, & dormāt profondemēt, cōmença à se plaindre, souspirer & lamenter si fort, qu'il esueilla to^u ceux de la maison: son maistre (lequel le fist esueillier) l'interrogea de la cause de son cry: Le seruiteur luy respōdit, hélas dit-il, ces plainctes que vous auez entēdues ne sont point vaines, car lors que ie me tempestois ainsi, il me sembloit aduis que ie veoyois le corps mort de ma mere passer par deuāt mes yeux, que l'ō portoit en terre. I'ob

feruay (dit Alexandre) l'heure, le iour & la saison, en laquelle cecy estoit aduenue, pour sçauoir si ce fte vision annonçeroit point quelque desastre au garçon. Et ie fuz, dict il, estonné que quelques iours apres ie veïs venir à ma maison vn seruiteur de sa defuncte mere, qui nous annonça sa mort, combien qu'aucun de nous n'eust encores entendu nouuelles de sa maladie: & m'estant enquesté du iour & heure de sa mort, & l'ayant conféré avec ce que i'en auois écrit, ie trouuay infalliblement qu'elle estoit morte le mesme iour, & la mesme heure qu'elle s'estoit representée morte à son filz. Ce qui ne pourra (dit-il) sembler fabuleux ou esloigné de verité à ceux qui sçauent que pour le iourd'huy il y a encore des maisons à Rome si infames & odieuses, qu'il n'y a aucun qui y ose habiter, pour les espritz qui y frequent. Ce que Plutarque écrit de Damon au commencement de la vie de Cimon. Semblablement ce qu'on écrit de Pausanias, de Cleonice, & de Bizantia vierge, confirme toutes les histoires precedentes: mesmes ce que Pline écrit au septiesme des Epistres, du phantosme & vision qui estoit en vne maison d'Athenes. Encores plus, ce que Suetone écrit quand Caligula fut occis, duquel la maison estoit agitée & inquietée de monstres & visions prodigieuses par plusieurs ans, tant qu'elle fut bruslée. Ce qui encores mieux est confirmé par Marcus Paulus Venicien, qui écrit que pour le iourd'huy les Tartares sont tant puissans par les enchantemens des espritz, qu'ilz font venir les tenebres quand ilz veulent, & là ou leur plaist:

plaist:& qu'une fois circonuenue par tel art, à peine il eschappa. Haytonus est tesmoing de cecy en son histoire des Sarmates, qui a écrit que l'armée des Tartares presque deffaicte, fut restituée, & demeura victorieuse par l'enchantement d'un port-enseigne, qui fist venir les tenebres si obscures, que toute l'armée de sa partie aduerse en fut enuelpée. Mais nous nous arrestons trop (ce me semble) à cōmemorer les exēples des prophanes: cōfirmons maintenāt les histoires precedētes par l'authorité des Ecclesiastiques. Sainct Augustin, liure 12. chapitre 17. sur Genese, racōpte vne semblable histoire, d'un Phrenetique qui predist la mort d'une fēme. Quelques vns estans à la maisō de ce Phrenetique, aīsi qu'ilz entrerēt en propos de certaine femme qu'ilz cognoissoyēt, laquelle estoit viue, faisant bōne chere:& sans aucune apprehensō de mal, le Phrenetique leur dist, Comment parlez vous de ceste fēme: elle est morte, ie l'ay veuē passer par icy deuāt avecques ceux qui portoiēt son corps en terre. Vn iour ou deux apres elle mourut, & ceux qui portoiēt le corps en terre passoiēt deuant la porte du Phrenetique, cōme il auoit predict, cōbien qu'elle ne sentist aucū mal à l'heure de sa predictiō. Le mesme sainct Augustin au lieu dessus allegué, racompte vne histoire si estrange de ces visions prodigieuses, que ie n'en eusse voulu faire mention en cest œuvre sans l'authorité, fidelité & saincteté de celuy qui l'a décrit. Il y auoit (dit-il) vn ieune enfant en nostre cité qui fut si asprement vexé d'une douleur de genitoires, qu'il crioit comme vn demoniacle,

Histoire ad
mirable.

lors que la fureur de son mal le pressoit , ayant toutesfois l'entendement sain : lequel entre les grands combatz de ses douleurs demouroit quel quefois immobile cōme vn tronc, ayant les yeux ouuers, ne recognoissoit aucun des asistans, & estoit si bien abstraict & rauy de ses sens, qu'il ne se mouuoit pour aucune poincture ou agitation. Sa douleur quelque peu sedée, il retournoit à son bon sens, & racomptoit ce qu'il auoit veu pendāt son extase. Entre autres choses il asseuroit que par toutes ses visions, se presentoit à luy deux hōmes, dont l'vn estoit de figure d'enfant, l'autre estoit d'aage plus parfaict: au commencement du Careſme ces deux hommes se representerent encore de rechef à luy , & luy dirent qu'il se fist coupper le prepuce, & que de quarāte iours il ne sentiroit aucune douleur: ce qu'il feit, & de quarante iours apres il ne sentit douleur. Ce tēps expiré, ses douleurs se renouellerent , & ces deux hommes commencerent encores à se représenter deuant luy, lesquelz luy conseillerēt qu'il se precipitast en la mer iusques au nombril , & qu'il y demeurast quelque temps , & que sa grand'douleur cesseroit, toutesfois qu'il resteroit tousiours quelque humeur visqueux qui decouleroit : ce qu'il feit, & luy aduint comme ces deux hōmes luy auoient predict. Qui ne sera esmerueillé de ceste Philosophie de saint Augustin , ensemble de la vision? mais qui pouuoyēt estre ces fantomes, ou qui leur auoit enseigné ces secretz de Medecine? Ces choses sont estranges, & engendrent terreur à ceux qui les lisent. Mais encore n'ay ie

rien leu ny aux prophanes, ny Ecclesiastiques pl^e es-
merueillable que la visiõ de Catalde Euesque de Ta-
rète, laquelle est apparue de noz ans, & nõ sans engé-



drer de grands scrupules aux consciences humaines:
car par sa vision il a laissé assez de matiere à em-

Tarente est
euesché, si-
tué en
Pouille, ti-
rant en Si-
cile.

pescher tous les Theologiens & Philosophes du monde. Catalde homme de saincte vie auoit esté erigé depuis mille ans, en la dignité episcopale, de Tarente, lequel neantmoins apres tant d'années expirées, se representa vne nuict en vision à vn ieune enfant, qui estoit du tout dedié à Dieu, & luy en chargea expressement, qu'il eust à cauer certain lieu de la terre qu'il luy enseigna, auquel il auoit caché & enterré vn liure écrit de sa main, pendant qu'il estoit au mode, & qu'incontinēt qu'il auroit recouuert le liure, il ne faillist à le faire tenir à Ferdinand premier Roy d'Arragon, & de Naples, qui regnoit de ce temps. Ce ieune enfant n'adioustant point de foy à ceste vision, n'en tenoit compte: laquelle neantmoins ne delaisa à le solliciter par diuerses fois de ce faire: Mais l'enfant ne peut estre persuadé d'y entendre, iusques à ce qu'un matin auant iour, ainsi qu'il faisoit sa priere en l'Eglise, il aduisa Catalde en son habit Episcopal, lequel se presentant deuant luy avec vne contenāce seuerē, luy dist: Tu n'as tenu conte par cy deuant de chercher le liure que ie t'auois enseigné, & de l'enuoyer au Roy Ferdinād, soys assēuré ceste fois pour toutes, que si tu n'executes ce que ie t'ay commandé, que mal t'en aduiendra. L'ēfant intimidé de ces menaces, publia le matin le contenu de sa vision à tout le monde. Le peuple esmeu de ce nouueau message, s'assembla avec grande curiosité, pour acompagner l'enfant au lieu designé pour ce liure: auquel arriuez, & ayant fouy & caué la terre, ilz trouuerent vn petit coffre de plōb si biē cloz & cimēté, que l'air n'y

n'y eust sceu entrer, & au fond du coffre trouuerēt le liure ou toutes les miseres, playes, & maledictiōs, qui deuoyent aduenir au Royaume de Naples, au Roy Ferdinād, & à ses enfans, estoient decrites en forme de Prophetie : lesquelles ont depuis si biē succedé par ordre, qu'il ne s'e est pas trouué vne seule syllabe faulse. Mais quelle a esté l'infortune de ce miserable Roy Ferdinand, lequel fut tellement pressé de la fureur de l'ire de Dieu, qu'il fut tué au premier cōflict? Quelle infortune aduint il apres à son filz aîné Alfōce, lequel n'eut pas à peine loisir de s'emparer de son Royaume, qu'il ne fut mis en route par ses ennemis, & cōtrainct de mourir en vn miserable exil? Mais que deuint apres Ferdinād son filz puisné? lequel ainsi qu'il pensoit heriter au royaume de Naples, mourut miserablemēt en la fleur de son aage, si enuelopé de guerres, qu'à peine pouoit il respirer. Et que deuint apres Federic filz du filz du defūct Ferdinād? ne vid-il pas deuāt luy sacca ger, brusler & ruiner son païs, & presque baigner toute sa terre de sang? Puis vint à la fin se rendre entre les mains de son ennemy. Or ça aduifons maintenant quelle a esté la fortune du royaume de Naples: & si no' voulōs estre iuges equitables, & adiouster foy à ce qu'e escriuēt les historiēs, no' trouuerōs qu'être tous les royaumes du mōde à peine s'en trouue il aucū qui ait enduré de pl' furieux traictz de fortune, ne qui ait esté plus subiect à mutation, ne pour lequel il y ait eu plus de sang respandu, que ce petit Royaume de Naples: de sorte qu'il semble proprement à le bien confi

derer, que ce fust la butte & le blanc ou la fortune a descoché toutes les fleches de ses maledictions, & vn vray esgout & cloaque ou toutes les miseres de tout le corps de l'Italie se sont venues espurer & vider. Voila ce qu'annonça ceste vision prophetique de ce bon Prelat Catalde, cōme Alexander ab Alexandro (apres plusieurs autres) a fidelement racompté au liure de ses iours Geniaux. Nous auons (ce me semble) déduict assez grand nombre d'exēples de ces visions, spectres, ombres & fantosmes qui apparoissent aux hommes de nuict, de iour, dormans, veillans, en maladie & fanté. Reste maintenant (suyuant l'ordre que nous auons commencé en tous les precedēs discours de noz histoires) de rechercher les causes dont toutes ces illusions fantastiques procedent & naissent: & par-ce que ceste matiere est vn peu chatouilleuse, nous ensuyurons saint Augustin, lequel me semble auoir volé plus hault que les autres, & mieux espluché ce subiect. Il est doncques necessaire auant que passer outre, pour mieux esclarcir les choses que nous dirons cy apres, d'en faire vne generale partition, en la deduction de laquelle nous suyurons ce qu'il a écrit chap. 28. Contra Adimantum, ou il procede ainsi: Il y a (dict il) plusieurs especes de visions qui se retrouuent aux saintes lettres, dont les vnes se font selon les yeux du corps, cōme celle des trois hommes qui apparurent à Abraham: Et celle de Moyse quand il veit ardre le buisson: & celle de Moyse & d'Helie aux Apostres, lors que Iesus Christ fut transfiguré sur la montaigne. Au second

Genes. 18.

Exod. 3.

Matth. 7.

cond genre des visions se doyuent mettre celles qui se font par imagination, comme quand nous imaginons les choses que nous sentons par le corps: car lors que nostre pensée est rauie & esleuée au ciel, & que les rayons de diuinité penetrēt en nostre ame, plusieurs choses estrāges luy sont manifestées, non par les yeux du corps, oreilles ou autres membres charnelz, mais par diuine influence & celeste inspiration: comme quand S. Pierre rauy d'entendēmēt, veit en vision ce grād vaisseau descendant du ciel en vn linceul qui paruenoit iusques à luy, auquel estoient contenuz toutes sortes d'animaux, puis il entēdit vne voix qui luy dist: Pierre lieue toy, tue & mange, & ce qui s'ensuit au texte du chap. ii. des actes des Apostres. Et par-ce que i'ay traicté assez amplemēt en mon liure de l'excellence de l'homme, de ces extases, visions & rauissemēs, il me suffira d'auoir proposé ces deux exemples. Le troisiēsme genre de vision se peult nommer Intellectuel, par-ce qu'il se fait en la pensée, comme quand le Roy Balthasar veit vne main qui escriuoit en la muraille: & plusieurs autres visions semblables de Nabuchodonosor, qui sont amplement décrites en Daniël. Ayant donques basty ce premier fondement de noz visions, il nous reste maintenant de recenser par ordre quel a esté l'aduis de saint Augustin en ce qui concerne ces apparitions & visions estranges. Ce bon prelat au chapitre 18. de son liure, De cura pro mortuis agenda, écrit ce qui s'ensuit: On racompte (dit-il) tant de diuerses choses de ces visiōs nocturnes, que la disputa-

tion n'en doit estre mesprisée, veu que la questiō est douteuse. On dict (dict-il) que les morts ont apparu quelquefois aux viuans, & qu'ilz ont enseigné à aucuns les lieux ou leurs corps estoient cachez, afin de les pourueoir de sepulture. Si nous disons que ces choses soient faulses ou fabuleuses, nous cōtredirons impudemment à plusieurs écritz de beaucoup de fideles, lesquelz mesmes les ont apprehendez par leurs sens. Mais il fault (dit-il) respōdre à ces choses, que combiē qu'ilz ayent apparu, si ne s'ensuyt il pas pour cela que les morts qui apparoissent en sçachēt ou en sentent rien. Ne voyons nous pas quelques-fois des hommes viuans apparoistre à aucuns en veillant ou en dormant, & neantmoins qu'on leur demande s'ilz ont apparu, ilz respondront qu'ilz n'en sçauēt rien, & qu'ilz n'en ont aucune cognoissance. Ces visions doncques se font (dit-il) par l'operation des anges, ausquelz il est permis du seigneur, ou cōmandé de ce faire. Voila le texte que j'ay traduit au plus pres selon qu'il est contenu au Latin. Je n'ignore pas neātmoins que quelque fois ces visions ne se facent autrement, cōbiē que saīct Augustin ne l'ait pas exprimé en ce lieu, qui est matiere propre pour les Ecclesiastiques, ausquelz ie m'en raporte du tout, me submettant en toutes ces choses au iugement de l'Eglise catholique, auquel ie veux persister imuable, iusques au dernier soupir de ma vie. Quelque-fois aussi nous sōmes deceuz par les illusiōs des espritz malins, cōme saīct Augustin enseigne, liure troisieme De Trinitate, chap. vnzieme, ou il exprime,

avec

avec vn merueilleux artifice, la puissance de Sathan & de ses complices, disant ainsi : Il est facile aux malings espritz avec leurs corps etherez, faire beaucoup de choses merueilleuses & espouventables, lesquelles nous ne pouuons comprendre par noz sens, aggrauuez & ensepueliz en ce corps terrestre. Si nous sommes (dit-il) ravis quelquefois en admiration de veoir aux theatres & spectacles quelques hommes terrestres représenter des choses miraculeuses, mesmes lesquelles nous ne croirions pas si elles nous auoient esté racomptées par d'autres, tant elles excedent la capacité de l'entendement humain, pourquoy deuõs nous trouuer estrange que le diable & ses Anges (avec leurs corps elementaires) abusent nostre chair, deçoyuent noz sens, & nous representent quelques-fois des Phantosmes, des images, Idoles & figures, en veillant ou en dormant, afin de nous faire trebucher? Leurs fonctions (dit-il) sont diuerses, les vns perturbent noz pensées, les autres offencent noz corps, les autres se meslent en nostre sang, en nostre cœur, & nous suggerent vne infinité de folies & visions: les autres engendrent des maladies en noz corps, comme celuy duquel il est fait mention en saint Luc, qui auoit tellement persecuté de maladie la fille que Iesus Christ guarit, que par l'espace de dix-huict ans elle estoit demourée si courbée, qu'elle ne pouuoit regarder le ciel: Puis il adioust en son liure de la diuination des Demons, l'antiquité des diables, la noblesse de leur creation, car ilz sont Anges de nature, leur longue experience apprise depuis

Luc. 13.

qu'ilz ont esté créez, le continuel conflict qu'ilz ont avec les anges, qui les aguerrist : l'agilité de leurs corps etherez, par lesquels ilz surpassent la viuacité des bestes & des oyseaux : l'acrimonie de leur sens, la cognoissance de toutes disciplines, tant diuines qu'humaines: vne parfaicte cognoissance de la propriété des plantes, pierres, métaux, avec plusieurs autres choses semblables, sont comme les instrumens avec lesquels ilz forgent & trament les illusions & machines qu'ilz desployent à tout' heure cōtre nous, & sont les lassons, amorces, & gluaux avec lesquels ilz tafchēt à tous les momēs & minutes du iour d'enuelōper noz pauvres ames : & par ce moyen, dit-il, ilz predisent quelque-fois les choses futures, ilz font quelques saintz miracles, par lesquels ilz deçoient & trompent ceux qui adioustent foy à leurs prestiges & mensonges, comme ces pauvres femmes lesquelles seduittes par les illusions fantastiques de Sathan, se persuadent qu'elles vont toute la nuit à cheual, adorent les diables, lesquels se transfigurent en Anges de lumiere, pour mieux iouer leur rolle: les autres-fois en autres diuerses especes & figures de personnes. Quelques-fois ilz leurs representēt des choses ioyeuses, ores des tristes, les autres-fois ilz leurs representēt des personnes cogneuēs, autres-fois d'incogneuēs. Ces choses sont estranges, & seront trouēes de difficile digestion, à ceux qui mesurent les œuures de Dieu selon la capacité de leur entendement grossier: mais encore me semble il plus esmerueille & estrange, ce que saint Augustin racōpte

au xviii. liure de la cité de Dieu, quand il se plonge en ceste profonde contéplation de la puissance admirable des espritz malings, ou il faict mention de certaines femmes, qui regnoient en Italie de son temps, instruiçtes es ars magiques, lesquelles donnoient quelque poison aux passans, meslée en du fourmage: & soudain qu'ilz l'auoyent mangée, ilz estoient cōuertiz en Iumentz, & portoyēt les choses qui leur estoient necessaires. Et apres auoir acomply leur voyage, & ce qui leur estoit enchargé, ilz retournoyēt en leur premier estat. Ce qui aduint mesmes au pere de Prestantius, lequel porta les bledz & viures de certains cheualiers, estant deuenue cheual: laquelle chose fut trouuée auoir esté ainsi faicte, comme il auoit raconté, nō pas (dit saint Augustin) que ie croye que le corps ou la pensée de l'hōme puisse estre par illusiō diabolique cōuertie en beste, ny prendre leurs corps & leurs membres: mais bien que la fantasie, ou les sens des hommes eussent peu estre tellement deceuz par les diables, qu'ilz pensoyent estre faictz semblables aux bestes. Puis il conclud: Et quāt aux fardeaux, c'estoyent (peut estre) les diables qui les portoyent eux mesmes, afin de mieux entretenir les miserables creatures en erreur: mais afin que nous ne pensions que telles illusions des esprits malings ayent seulement regné du temps de saint Augustin ou des autres anciens, ie veux maintenant produire des choses qui ne sembleront pas moins émerueillables, que nous auons experimenté de noz ans. Gasparus Pucerus en ses commentaires de Diuina

tione, apres auoir par plusieurs raisons disputé de
 l'artifice des diables, racompte vne histoire adue-
 nue de nostre siecle, qui n'est pas moins admira-
 ble qu'espouventable. Il y a eu (dict-il) de noz ans
 vne certaine vierge Batelereſſe à Boulongne, la-
 quelle pour l'excellence de son art estoit fort re-
 nommée par toute l'Italie, neantmoins elle ne
 sceut auec toutes ses ſciéces si bien prolonger sa
 vie, qu'en ſin ſurprinſe de maladie elle ne mou-
 rust. Quelque autre magiciē qui l'auoit tousiours
 acompagnée, ſachant le profit qu'elle tiroit de
 son art durant sa vie, luy miſt par l'ayde & ſe-
 cours des eſpritz malings quelque charme, ou poi-
 ſon ſoubz les aiſelles, de forte qu'il ſébloit qu'elle
 euſt vie, & commença auſſi bien à ſe retrouver
 aux aſſemblées publiques, iouant de la harpe, chā-
 tant, ſaultant & danſant comme elle auoit acou-
 ſtumé: de forte qu'elle ne differoit en rien du viſ,
 que de la couleur, laquelle estoit exceſſiuement
 palle. Quelques iours apres il ſe trouua de fortune
 à Boulongne vn autre magicien, lequel aduer-
 ty de l'excellence de l'art de ceſte fille, la voulut
 aller voir ioüer comme les autres: mais ſoudain
 qu'il eut quelque peu aſſiſté à ce ſpectacle, il ſ'eſ-
 cria tout hault: Que faiſtes vous icy meſſieurs?
 celle que vous voyez icy deuant voz yeux, qui
 faiſt ces beaux ſoubrefaultz, n'eſt autre qu'une
 orde & vile charongne morte. Et à peine auoit il
 acheué ſon propos, qu'elle tomba morte à terres
 au moyē dequoy le preſtige du diable & de l'en-
 chanteur fut deſcouuert. Encores y a il eu vne
 autre femme enchantereffe à Pauie, qui a regné
 du



Pour-
trait
de la
fême
enchâ-
teref-
se, qui
tûba
morte

du temps de Leonicens, qui n'estoit pas moins es-
merueillable que la precedente : mais elle auoit l'a-
uantage en vne chose, qu'il ne se pouuoit rien faire
de mal à Paue si secretement, que par son artifice il

ne fust incontinent defcouuert, de sorte que tous les plus renommez philosophes de l'Italie excitez de la renommée des merueilles qu'elle faisoit par l'art des diables, la venoyent voir. Or y auoit il de ce temps lá à Pauie vn professeur publicque & philosophe, hōme de saincte vie, lequel pour priere ou requeste qu'on luy sceust faire, n'auoit peu estre persuadé d'aller voir ceste femme, iusques à la fin que vaincu par l'importunité de quelques magistratz de la ville, il s'accorda d'y aller: & lors qu'il fut arriué deuant cest organe de Sathā, afin de ne demeurer muet, & pour la bien sonder au vif, il la pria (entre autres choses) de luy dire à son aduis lequel estoit le meilleur de tous les carmes que Virgile eust iamais faict: La vieille sans refuer, ou y penser d'auantage luy respondit à l'instant mesme:

Virgil. lib. *Discite iustitiam moniti, & non spernere diuos.*

6. Aencid. Voyla (dist-elle) le meilleur, & le plus digne carme que le poète Virgile fist oncques: va-t'en, & ne retourne plus icy pour me tenter: Ce pauvre Philosophe, & ceux qui l'acōpagnoyent s'en retournerent, sans autre replique, & ne furent en leur vie plus estonnez d'une tant docte responce, attendu qu'ilz sçauoiēt tous qu'elle n'auoit en sa vie aprins, ny à lire, ny à écrire. Hierosme Cardā, lequel merite d'estre mis au premier rang de tous les plus celebres philosophes de nostre temps, ra cōpte presque vne semblable histoire de ces espritz malings, de laquelle l'experience se voit encores pour le iourd'huy à Milan de tous les citoyens, avec grand' merucille. Il y a (dit-il) enco-

res

res pour le iourd'huy vne femme viuante, nommée Margarite, femme d'un peintre, qui est résidente ordinairement à Milan, laquelle n'a point de honte de publier par tout qu'elle a un diable, ou certain esprit familier, qui la fuyt & l'accompagne par tout, hors-mis qu'il s'absente d'elle quelque deux ou trois mois l'année. Ceste femme ne se nourrist ou maintient d'autre gaing que de l'expérience, & plaisir qu'elle dōne de cest esprit, car elle est souuent appelée en beaucoup de bonnes maisons, & incontinent qu'on luy a faict cōmandement d'euoquer son esprit, elle courbe sa teste en son sein, ou l'envelope de son tablier, & commence à l'appeller & adiurer en sa lāgue Italiēne: Il se represente soudain à elle, & respōd à son euocation: mais la voix de cest esprit ne s'entend pas au pres d'elle, mais loing, cōme si la voix sortoit de quelque trou de muraille, & si quelqu'un se veult approcher du lieu ou la voix de cest esprit resonne, il est estōné qu'il ne l'entend plus en ce lieu, mais il l'entend en quelque autre coing de la maison. Quāt à sa voix, elle n'est point articulée, ny autremēt formée qu'on la puisse entēdre: mais elle est gresle & foible, de sorte qu'elle se peut dire plus proprement murmure ou son, que voix. Et apres que cest esprit a ainsi sifflé, & murmuré, ceste vieille luy sert de truchemēt, & faict entendre aux autres ce qu'il a resonné. Elle a demouré en quelques maisons, ou il y a des femmes qui ont obserué ses façons de faire, qui disent qu'elle enferme quelque-fois cest esprit en un linceul, & qu'il a de coustume de luy mordre la bou-

che, mesme qu'elle a presque tousiours les l. ures
 vicerées. Ceste miserable femme est en si grand'
 horreur à tout le monde, à cause de cest esprit,
 qu'elle ne treuve personne qui la vueille loger,
 ou frequenter avec elle. Ceste histoire me remet
 en memoire ce que les anciës ont creu de l'esprit
 de Socrates, ce qui ne me semble fabuleux, par-
 ce que Socrates a tousiours esté trouué veritable,
 que pour mourir il n'eust voulu dire vne mésou-
 ge:mesmes que les Platoniciens ont tousiours re-
 ceu Socrates pour vn certain oracle de verité: &
 neantmoins Socrates a confessé & écrit de luy-
 mesme qu'il en auoit vn, comme il est tesmoigné
 au Theage en Platon, ou il est introduict, disant
 ainsi: Il m'a esté concedé par quelque sort diuin,
 d'auoir eu vn Dæmon dès mon enfance, lequel
 m'a tousiours suiuy, lequel est vne voix qui me
 dissuade lors que ie veux faire quelque chose qui
 m'est contraire: mais il ne me suade iamais ce que
 ie doys faire. Puis il adiouste: Thimarcus me fera
 tesmoing de cecy, lequel se voulant leuer d'un
 banquet ou nous estiõs, aduertty par mon Dæ-
 mon de son desastre, ie le cuiday retenir deux
 foy: toutefois ie ne sceu tant faire qu'il ne se des-
 robast de moy, & qu'il n'allast tuer Nicias filz de
 Hiroscamandre, lequel apres qu'il eut esté con-
 demné pour ce meffaiët, il dist à son frere, qu'il
 mouroit par default d'auoir creu le conseil de
 Socrates, qui luy auoit dissuadé de ne sortir point
 à telle heure. Franciscus picus Mirandulanus phi-
 losophe excellent & noble, qui a regné de nostre
 temps, a asseuré en ses œuures qu'il auoit cogneu

vn prestre, aagé de soixante & quinze ans, lequel par l'espace de quarante ans assiduz auoit eu vn esprit familier en sa compagnie, lequel beuuoit, mangeoit, couchoit, parloit avec luy, & l'acom-
paignoit en toutes ses actions: de sorte que le vul-
gaire ne pouuant comprendre le mystere de ces
choses, se persuadoit qu'il fust fol. Et ce prestre
nōmoit son esprit Hermelina. Je n'ignore point
semblablement qu'il n'y en ait plusieurs qui ont
asseuré par leurs écritz qu'il y auoit des espritz fa-
miliers, qui conuersoiēt avec les hommes: ce que
Cardan atteste de son pere Facius Cardanus, le-
quel par l'espace de vingt & huiēt ou trente ans
sest aydé de certain esprit familier. Pausanias en
ses nuitz Attiques, recite que le hennissēmēt des
cheuaulx, & la course des combatans estoient
ouys au camp de Marathō, ou Miltiades ia qua-
rāte ans passez auoit faict mourir 10000. des Per-
siens, & cecy estoit plus esmerueillable, que ce
cry & tumulte n'estoit point entēdu de ceux qui
alloient expressement pour l'entendre, mais seu-
lement de ceux qui fortuitemēt se retrouuoient
en ce lieu. Plutarque écrit en la vie de Cymon,
qu'apres que Damon fut tué en trahison dans les
estuues, qu'il fut longuemēt qu'en ce lieu appa-
raissoiēt des espritz, & que lon y entendoit des
gemissēmēs & souspirs, de sorte qu'on feist con-
demner & murer la porte de l'estuue, & qu'enco-
res au-iourd'huy ceux qui se trouuent lá au pres
afferment qu'ilz y voyēt des visiōs, & y entendēt
des voix & cris espouētables. Il y a encores quel-
ques autres visiōs des Demōs ou malings espritz,

qui font apparuz de nostre temps & apparoissent encores pour le iourd'huy aux mines metalliques du grand Turc qui sont en Sidero capsa, ilz se font quelquefois representez en forme de cheures dedans les mines à ceux qui tiroient les metaux de la mine. Il y en a vne certaine espeece qui ne faiet aucun mal aux ouuriers, mais il y en a eu d'autres qui les ont tant tourmentez, qu'ilz ont esté contrainctz d'abandonner les mines qui estoient de grand reuenu. Georgius Agricola philosophe excellēt, qui a eu la charge des mines de l'Empereur, assure qu'il s'est trouué des espritz malings tant cruelz en quelques mines d'Allemagne, que les ouuriers ont esté contrainctz les abandonner, & entre autres il écrit qu'à la mine d'Anneberg vn esprit metallique tua douze artisans, qui fut cause que la mine fut delaissee, combien qu'elle fust fort riche & opulente en argent. Il y auoit de semblables espritz malings, du temps que Iesus Christ estoit sur terre, qui habitoient es sepulchres des morts, lesquelz estoient si cruelz & terribles qu'aucun n'osoit passer par ceste voye lá, cōme il est écrit en saint Mathieu 8. en saint Luc. 8. chap. Je sçay que Porphirius, Psellus, Plotinus, Proclus, Iâblicus, mesmes quelques autres modernes ont assuré par leurs écritz que la supreme region de l'air est aussi peuplée d'espritz, que nous appellons en Grec Dæmones, comme nostre air est d'oyseaux : ce qui les a induitz à croire ces choses, c'est que l'air & l'æther ou sont les quintes essences, sont tant grands & sont regions tant pleines d'amenité & de plaisir :

fir : & que nous voyons la terre auoir ses matieres viuantes, les metaux, pierres, plantes, & que nous voyons l'eau auoir ses poissons , & que nous voyons l'air infirme d'icy bas auoir ses animaux qui respirent & viuent : puis (disent ilz) que cecy est obserué de nature es autres elements, mesmes au ciel . Il fault doncques croire, que toute ceste grande machine de l'air superieure, est pleine de ces espritz, qui doiuent estre d'autant plus excellens que les animaux inferieurs, d'autant que les regions y sont plus claires, plus pures, que ceste inferieure : mais par ce que toutes ces choses nous semblent indignes de nostre philosophie Chrestienne, nous les passerons soubz silence. Et afin qu'aucuns ne pensent que nous vueillons lascher la bride si longue aux diables & malings espritz, qu'ilz puissent ainsi abuser des creatures de Dieu, lesquelles par le sang precieux de son filz, ont esté si cheremét rachetées, il nous est besoing d'affaisonner ces choses, & les borner par tel téperamét, que nous môstrôs qu'il ne leur est pas loisible de faire de nous, comme vn fol de sa marotte, ou côme les balsteleurs de leurs marmousetz : car s'il estoit ainsi que leur puissance ne fust bornée par la main forte de Dieu, ilz ont en si grand' haine le genre humain, auquel le simulachre & caractere de Dieu est imprimé, que long tēps a par leurs cruautez, prestiges & tyrannies ilz l'eussent du tout exterminé & esteinct : mais s'ilz n'ont pas eu seulement puissance d'entrer au ventre des pourceaux, sans demander congé, comme l'écriture enseigne, de

combien deuons nous estre plus asseurez qu'ilz ne nous peuuent nuire, sans la permissiõ de Dieu, qui sommes rachetez de son sang, s'õmes son domicile, & qui portons sa marque, simulachre & caractere? Mais quel plus grãd tesmoignage vous l'õs nous de la debilité, & petite puissance du diable, que ce qu'il en atteste de luy mesme en Iob premier? ou demandãt cõgé de persecuter ce prophete Iob, il ne luy dict pas, permetz moy de luy nuire: mais mesme il luy dict, Mitte manũ, & tangge carnẽ eius: Enuoye dict-il ta main, & touche sa chair: comme s'il eust voulu dire, qu'il n'estoit quel'organe pour executer la volunté de Dieu, appellant sa permission, sa main. Nous en auons encore vn semblable tesmoignage en saint Luc xxij. ou le Sauueur Iesuschrist dict à Simon: Simon, Sathan a demandé congé de vous tourmenter, & vaner comme le blé, mais i'ay prié pour toy, afin que ta foy ne defaille point. Voyla vn merueilleux tesmoignage, que le diable ne nous peut nuire sans congé, veu qu'il n'osa s'adresser à l'Apostre, sans demãder son sauſconduict à dieu. Ce grand oracle de Dieu, saint Augustin, lequel auoit tant de milliõs de fois esprouuẽ les furieux assaux de Sathan, nous donne vne consolation merueilleuse, liure xij. chap. xiiij. sur Genese, lors qu'il dict: Que le diable te forge de iour & de nuict tant d'illusions qu'il voudra, qu'il te represente en vision des corps qui ne sont point corps, que peut nuire cela à ton ame, moyennãt que ne consentes point à la vision? Vis donc asseuré, car il ne te peut nuire sans cõgé: & toutesfois la per-

Augustin.
in euange
Ioan. tra-
ctatu. 7.

mis-

mission qu'il luy est donnée, n'est point pour te damner ou meffaire, mais pour te chastier de ton peché, ou faire prouue de ta fidelité. Sainct Paul nous seruira de tesmoing irreprochable en cecy, lequel au deuxiesme des Corinthes, chap. xij. atteste luy mesme, que le Seigneur permist à Sathã de le souffleter, de peur qu'il ne fust eleué oultre mesure, pour l'excellence de ses visions. Encore a il bien fait d'auantage, come luy-mesme tesmoigne en l'Epistre premiere à Timothée, chap. premier, ou il fait entendre à Timothée, qu'il a baillé Hymenée & Alexandre à Sathan, afin qu'ilz apprennent à ne plus blasphemer. Voyla d'oc comme le Seigneur vse quelquefois des malings espritz comme des bons, à nostre salut : lesquelz se transfigurent quelquefois en diuerses formes & figures de nuit & de iour, pour nous oppugner & tirer au cōbat : mais celuy ne sera point couronné, qui n'aura virilement combatu. Apprenons doncques desormais avec l'Apostre, à vestir les armes de Dieu, car nous n'auons pas seulement (comme il écrit aux Ephesiens) la guerre contre le sang & la chair, ains contre les principautez, contre les puissances, contre les recteurs du monde, & des tenebres de ce ciecle. Tenons nous d'ocques sur noz gardes de peur d'estre circonuenuz de ce faulx enchâteur & trompeur : ne voyons nous pas comme il est effronté, & cōme il dresse ses cornes ? Quel plus grãd tesmoignage de sa rage & fureur, que ce qui est écrit au prophete Michée ? ou il le voyt deuant Dieu criant & huyant : Je sortiray, & seray menteur deuant la

3. Reg. 22.

Zacha. 3.

face de tous les prophetes d'Achab. Et en Zacharie, comme il est tousiours à la dextre du grand prestre pour empescher qu'il ne descende quelque benediction sur Ierusalem. Ce qu'estant viuement apprehédé par ce grand Euesque d'Hippouense saint Augustin, il crie apres le Seigneur, disant : Deliure nous Seigneur, de nostre aduersaire ordinaire, lequel soit en richesse, en pauvreté, en ioye ou tristesse, en parolle ou en silence, en dormant, veillant, beuuant, mengeant, ou en toutes noz autres humaines actions il nous espie, nous suy, nous talône, & presse, il dresse ses retz, darde ses fleches, ordonne ses machines, lassons & gluyaux pour surprendre nostre pauvre ame. Puis il conclud avec le Psalmiste : Deliure nous dōc Seigneur des lacx des veneurs. Puis que nous sommes doncques outre nostre esperance ancrez si auant en ce profond abyfme de visions, auant hauser noz voiles, encores nous faut il mettre fin au dernier membre qui en depend. Il y a encores d'autres especes de visions, lesquelles ne se font ne par illusions diaboliques, ny par aucun secret ne ministere des anges, ny autrement : mais elles s'engendrent par corruption d'humeurs, ou par indispositiō de l'imaginatiue, ou par quelque autre infirmité de nature, de sorte que nous pēsons veoir les choses qui ne sont point, & telles especes d'imaginatiōs tourmentent & vexēt le plus souuent les melancholiques, comme Galien enseigne de celuy qui se pensoit estre transformé en Coq, frequentoit avec eux, imitoit leurs chāts quand il les entendoit chanter, mesmes se battoit quel-

August. So.
liloqui.
cap. 16.

quelque foys des bras ainſi qu'ilz font des ælles: cō me en ſemblable il y en a d'autres qui ſe perſua doient eſtre transformez en vaiſſeaux de terre, de ſorte qu'ilz ne bougent des plaines & campagnes, & n'oſent approcher des arbres ou maiſons, de peur de ſe heurter, & mettre en pieces. Il y a eu certaine damoiſelle de laquelle Alexander Tralianus liure premier, chap. 20. écrit l'hifoire, laquelle par quelque corruption de l'imaginatiue ſe perſuadoit auoit deuoré vn ſerpent en dormant, & ne peut oncques eſtre deliurée de ceſte maladie, iuſques à tant que luy ayant ordōné vn vomitoire, on luy ſuppoſa vn ſerpent viſ au baſſin, par le moyen duquel elle fut deliurée de ſon mal: car elle ſe perſuada aſſement qu'elle l'auoit vomy. Il y a encores quelques viſions qui procedent d'auoir mangé quelques venins ou poiſons, comme Plinē & Edouardus enſeignent de ceux qui mangent la ceruelle des Ours, laquelle deuorée faiſt pēſer qu'on eſt tranſformé en Ours. Ce qui eſt aduenū à vn gentil-homme Eſpagnol de noſtre temps, à qui on en fiſt manger, & il alloit errant par les deſers & montaignes, penſant eſtre tranſmué en Ours. Encores y a il d'autres viſions, leſquelles ſelon les Phificiens ſe peuuent faire par cauſes naturelles, comme quand qu'elqu'un eſt occis & enterré, nompas trop profondement en la terre, il ſort (comme ilz diſent) du corps mort des exhallations & vapeurs, leſquelles eſleuées en l'air nous repreſentent l'eſfigie & idée de celui qui eſt anterre. Encores y a il pluſieurs autres choſes qui deçoyuent

noz sens soubz couleur d'illusiōs, comme quand l'air est agité de ventz contraires, par leur agitation ilz engendrent vn bruyt & murmure, qui ressemble proprement au muglement des bestes, ou à des plainctes de femmes & petitz enfans. Quelque-fois aussi l'air penetre dedans les soupiraux & concautez des rochers, & vieilles murailles, puis quand il est repercuté, il resonance si distinctemēt, qu'il semble que ce soit quelque voix articulée : comme nous experimentons souuent en ce que nous appellōs Echo, laquelle prononce quelque-fois cinq ou six paroles, avec si grād merueille, que ceux qui ignorent les causes d'icelle se persuadent (la nuit principalement) que soyent quelques espritz ou Demons. Ce qui est aduenü de nostre temps à vn conseiller & secretaire d'un prince, lequel par default d'auoir bien obserué la cause de l'Echo, faillit à se noyer, cōme vous entēdrez par la memorable histoire que Hierosme Cardan medecin Milannois racompte en ses liures des merueilleuses inuentions. Ledit Cardan écrit qu'Augustinus Lauisarius conseiller & secretaire d'un prince, estoit quelque iour aux champs, foruoyé de son chemin, & pressé de la nuit, sans sçauoir à qui auoir recours : Estant en ceste peine, il se trouua merueilleusement troublé, car il cheua choit le long d'un petit fleue, & ne sçauoit sil deuoit passer de l'autre costé ou non, & tourmenté ainsi en son cœur, il commença à dire : Oh, qui est vne plaincte commune aux Italiens, quand ilz ont quelque ennuy. L'Echo, qui estoit en quelque rocher là
au pres,

aupres, luy respond incontinent, Oh: Lauisarius biē
aïse, en pensant que ce fust quelque homme, luy de-



mande en sa langue, *Vnde debo passa?* L'Echo respōd,
passa: puis le pauvre homme estant encores en plus

grand peine, luy demãda: *chi?* qui signifie en nostre langue, icy: l'Echo luy respondit: *chi:* n'estant point encore bien asseuré, il luy demande de rechef, *debo passa chi?* l'Echo respond, *passa chi.* Ce pauvre homme pensant auoir certaines nouuelles de son chemin, se mist en l'eau, cuydant traueser le fleuve, mais il fut estonné que son cheual commença à perdre le fond de l'eau & à nager, toutefois le cheual qui estoit puissant & adroict, apres auoir longuement gasouillé en ce fleuve, tira son maistre à bort, lequel n'eut en sa vie si belles affres, & fut contrainct monsieur le conseiller de passer la nuit en prieres & oraisons, trempé comme vne esponge sur le bord de ce fleuve. Quelques iours apres arriué à Milan, il fist ses cõplainctes à Cardan (son intime amy) de ce qu'il auoit trouué quelque esprit maling qui l'auoit cuydé faire noyer dans vn fleuve. Et quãd ledit Cardan l'eut interrogé du lieu, il congneut incontinent l'ignorance de monsieur le Conseiller: car il scauoit qu'il y auoit vn Echo admirable en ce lieu, qui rendoit les voix si bien formées & articulées, qu'il sembloit que ce fust quelque creature qui parlast. Et pour luy en donner certain tesmoignage, il le mena au lieu mesme ou ilz trouuerent en fin que son *passa*, n'estoit autre chose que la reuerberation de l'Echo. Voyla doncques comme nous sommes quelquefois deceuz es visions, mesmes en l'Echo, qui n'est rien: mais puis que nous sommes enfournez si auant au traicté de l'Echo, ie ne veux mettre en oubly que pendant que ie composois ce liure, i'en ay obserué

obserué vne au bourg de Charenton pres Paris, laquelle ne cede en rien à celle que décrit Cardan: car elle rend les parolles toutes entieres, distinctes, & articulées, sept fois l'une apres l'autre, comme l'Echo septuplex des anciens, tant celebrée de Pline: & me suis souuent estonné comme ceux qui ont écrit les antiquitez & choses memorables de Paris, n'en ont fait aucune memoire en leurs escrits: car ie ne me recorde d'auoir oncques obserué la semblable en diuers voyages que i'ay faitz par les haultz alpes d'Italie & d'Allemagne, & qui ne voudra adiouster foy à noz écrits, l'experience en est assez aisée: car le lieu est prest de ceste cité. Il ne reste plus, pour mettre le dernier séau à toutes especes de visions, que de traicter des visions artificielles, lesquelles ordonnées, & basties par certains secretz & mysteres des hommes, engendrent grand terreur à ceux qui les contemplent, comme celle de laquelle fait mention Hector Boetius en ses Histoires d'Ecosse, laquelle combié qu'il y eust de l'artifice, si est-ce que son effect fut merueilleux & estrange, & cause de la conseruation d'un Royaume, comme vous entendrez cy apres. Les Pictes ont tousiours esté (comme lon trouue aux histoires) ennemis capitaux des Ecossois, de sorte qu'apres plusieurs escarmouches & batailles, ilz tuerent en fin le premier Roy d'Ecosse, & deffirent presque la pluspart de la noblesse du pays. Cenethus second Roy d'Ecosse, & filz de celuy qu'auoyent meurdry les Pictes, desirant de venger la mort de son pere, exhortoit

fouuent la feigneurie du païs de reprendre les armes , & de courir sus aux Pictes : mais par ce qu'ilz auoyent esté si malheureux aux precedentes batailles , & que la pluspart des plus grans Princes du païs auoyent esté tuez , il n'y eut ordre par moyen aucun de les inciter à reprendre les armes. Cenethus se ressentant du meurdre de son pere , voyant qu'il ne pouoit les induire à vengeance pour aucune suasion ou priere , il eut refuge à l'art : & feignant de vouloir consulter des negoces du païs , il manda ce qui restoit de Princes pour assister au conseil: Les ayant retenus quelques iours avec luy , il les fist tous loger en certain chasteau ou il estoit logé , puis s'aduisa de gaigner quatre ou cinq hommes , ausquelz il se fioit le plus , & les fist mettre en quelque autre lieu secret aux chambres deputées pour les princes , les ayant premierement acoustrez de quelques vestemens horribles , faictz de grandz peaux de loups marins , desquelz il y en a en abondance en leurs pays , à cause de la mer : encore n'estoit ce pas tout , car ilz auoient chacun vn baston en la main de ce vieil boys qui reluist la nuict , & si auoient encores en leurs mains dextres chacun vne grand corne de beuf , percé par le bout , & se tenoient ainsi reclus iusques à ce que les princes furent enseuelis de leur premier sommeil , & lors ilz commencerent à se produire avecques leurs bastons qui esclairoient , & resonnoyent aussi certaine voix hideuse par leurs cornes de beuf , laquelle contenoit qu'ilz estoient enuoyez de
Dieu,

Dieu , leur denoncer la guerre contre les Pi-
ctes , & que la victoire leur estoit ordonnée
au ciel. Ainsi ces fantosmes , aydez de la fa-
ueur de la nuit , qui est mere nourrice de ces
illusions , iouerent si bien leur rolle , qu'ilz e-
uaderent aysement sans estre descouuertz. Ces
pauures princes ainsi intimidez passerent le re-
ste de la nuit en prieres , puis le matin vindrent
trouuer le Roy , auquel chacun communica sa
vision. Mais ce bon Roy Cenethon qui e-
stoit bien guarý du sot , leur dist aussi , que sem-
blable vision luy estoit apparue : mais qu'il n'o-
soit publier les secretz de Dieu iusques à ce qu'il
en eust plus certain aduertissement. Ces pau-
ures princes enflammez à la guerre , comme
filz eussent eu Iesus Christ pour leur chef , as-
saillirent les Pictes si viuement qu'ilz ne les des-
furent pas seulement en bataille , mais ilz en ex-
terminerent si bien la memoire , qu'onques-
puis on n'en ouyt parler . On list plusieurs
semblables exemples de ces visions artificiel-
les aux historiens , mais par ce que ceste cy
m'a semblé la plus memorable que i'aye iamais
leuë & qui a mieux succedé , i'en ay voulu faire
mention en ce lieu. Il s'en est encore trouué de
noz ans , qui ont mis des chandelles allumées
dedans des testes de morts , pour espouënter le
peuple , & autres qui ont attaché de petites chā-
delles de cire allumées , sur des coques de Tor-
tues & Limaces , puis les mettoient dedans les
cymetieres la nuit , afin que le vulgaire voy-
ant ces animaux se mouuoir de loing avec leurs

flammes, fust induict à croire que c'estoyent espritz des morts, qui retournoient demander quelque chose en ce monde, & par tel moyen on a tiré l'argent subtilement du populaire simple, mais ces larrons infames rendront compte vn iour, au Seigneur des pauures brebis de Iesus Christ, qu'ilz ont ainsi escorchées & tyrannifées, souz le pretexte de vision. Il y a encore d'autres visions diaboliques, qui se sont faictes de noz ans avec certaines chandelles, composées de suif humain: & pendant qu'elles estoient allumées de nuict, les pauures gens demeuroyent si bien charmez, qu'on desroboit leur bien deuant eux, sans qu'ilz se sceussent mouuoir de leurs lits, ce qui a esté practiqué en Italie de nostre temps: Mais nostre Dieu qui ne laisse rien impuny, a permis que les auteurs de telles vanitez fussent apprehendez, comme le larron sur le fait, lesquelz conuaincuz, ont depuis terminé leurs vies miserablement au gibet. Il y a encore quelques autres visions artificielles, qu'ilz font avec vne huile ou liqueur, extraicte de ces vers qui esclairent la nuict: mais par ce que ces choses sont indignes d'estre referées entre nous Chrestiens, ie m'en tairay pour le present, mesmes me suis esmerueillé, comme quelques hommes doctes les ont osé inserer en leurs écrits, veu que nous sommes assez promptz à inuenter le mal, sans adiouster encore l'huile à la meche. Prends donc en gré, lecteur, ce traicté de visions, lequel i'ay dilaté vn peu plus copieusement que ie n'auois promis au commencement,

ment, mais par ce que ceste matiere est rare, & que ie n'ay encore trouué aucun autheur Grec ou Latin, qui ayt comprins toutes les especes de visions, i'ay bien osé l'entreprendre, & croy que si tu n'es ingrat, ou censeur trop critique, tu approuueras mon labeur.

Fin de la vingtsixiesme histoire.

HISTOIRES
HISTOIRE PRODIGIEUSE
d'un Monstre veu par Celius Rhodiginus.
Chapitre. XXVII.



A fin



Fin de nous dégouter de ces visions prodigieuses (lesquelles peut estre auoient par trop ennuyé le Lecteur) il m'a semblé bõ de monstrier icy le pourtraict de deux admirables monstres, l'vn masse l'autre

femelle, veuz en diuerses prouinces par deux excellens Philosophes qui ont regné de nostre aage. Le premier qui est masse fut veu par Ludouicus Celius Rhodiginus, comme il écrit au 3. chapitre du 24. liure de ses antiques leçons, cõme il s'ensuyt: Il fut (dit-il) produit vn Monstre à Sarzare en Italie, l'an de grace 1540. Le 19. iour de Mars, digne d'estre considéré pour beaucoup de causes: l'vne, par ce qu'il sortit au monde du temps que l'Italie estoit agitée de diuerses tēpestes de guerres domestiques, & que cest enfant mōstrueux estoit comme vn certain herault qui denonçoit ces maulx, les autres causes pour lesquelles il merite d'estre diligemmēt obseruē, sont pour les estranges & merueilleux effectz que nature exhiba en ce petit subiect, car en premier lieu, lors que la mere l'enfanta, il estoit aussi grād & biē formé que s'il eust eu quatre moys accomplis, qui est chose mōstrueuse en nature: Secondement il auoit deux belles testes accomplies de toutes leurs parties, & deux faces ioignantes l'vne à l'autre, & entées sur la tige du col, avec vne proportion merueilleuse en chacune de ses parties: Il auoit les cheueux vn peu lōguetz & noirs,

& entre ses deux testes auoit vne troisieme main qui n'excedoit pas la longueur d'une oreille. Quant au reste du corps, il estoit si bien faict & proportionné de tout ce qui est requis, qu'il sembloit que nature se fust delectée à le faire & à le former si beau. Apres auoir seiourné quelque temps en ce miserable monde, il mourut : Et parce qu'il en fut faict vn present à vn Lieutenant du Roy d'Espaigne, qui commandoit en ceste terre, il fut besoing, de peur qu'il se corrompist, de luy ouurir le ventre, & tirer les entrailles: mais apres l'auoir ouuert il se representa à la veüe des spectateurs vne chose qui n'est pas moins esmerueillable que les precedentes. C'est qu'il auoit deux foyes, deux rates, & n'auoit qu'un cueur. Voyla la description que faict Celius de ce Monstre. Ce second Monstre de la femme à deux testes, que tu voys figuré auecques l'autre, est plus admirable que le premier en vne chose, parce qu'il a vescu plusieurs ans, qui est contre le naturel des Monstres, lesquelz ordinairement ne viuent gueres, car l'abondance de l'humeur melancholique qui redonde en eux, pour se veoir ainsi en opprobre de tout le monde, les desseche & consume si bien, que leur vie est briefue, ce qui n'est aduenü en ceste fille que tu voys icy figurée, car lors que Conradus Licostenes la veit au Duché de Bauiere, mil cinq cens quarante & vn, elle estoit aagée de vingt & six ans. Ce docte philosophe Licostene écrit vne chose merueilleuse de ce Monstre, car reserué la duplication de la teste, nature n'y auoit rien obmis. Ces deux testes

(ainsi

ainsi comme il écrit) auoient mesme desir de boire, de manger, de dormir, & auoiét la parole semblable, comme aussi estoient toutes leurs affections. Ceste fille alloit d'huy en huy chercher sa vie, & on luy donnoit volontiers pour la nouveauté d'un si estrange & si nouveau spectacle, neantmoins qu'elle fut chassée à la longue de la Duché de Bauiere, par-ce qu'elle gastoit le fruit des femmes grosses, pour l'aprehension qui demouroit en l'imaginatiue de la figure de ceste femme monstrueuse.

Fin de la vingt septiesme histoire.

R ij

HISTOIRES
MONSTRE VIE, DVQUELLES
intestins & autres parties intrinseques se
voyent nuës & découuertes.
Chapitre. XXVIII.





V temps que Seruius Galba, & M. Scaurus estoient Consulz, vne femme noble & genereuse à Nursine, enfanta vn filz vis, qui auoit la partie superieure du ventre tellement ouuerte, qu'on luy voyoit les intestins nudz & descouverts, & si estoit solide, & entier en la partie posterieure, & croy que si vous lisez tous les autheurs Grecz ou Latins, qui ont écrit des prodiges de nature, à peine en trouuerez vo' encore vn semblable. Et ainsi que les Romains ont tousiours esté superstitieux en toutes choses, aussi eurent ilz quelque augure & presage par ce monstre, de la victoire qu'ilz eurent contre Iugurtha, comme Iules Obsequenz écrit, chapitre 100. des prodiges Romains. Et si les anciés medecins Grecz & Arabes (qui estoient si frians de rechercher les secretz de la fabrique du corps humain qu'ilz demandoyent aux Roys les corps des condemnez, pour les ouurir tous vifz) eussent eu ce petit monstre à leur commandement, ilz n'eussent exercé telle boucherie, tyrannie & cruauté à l'endroit des creatures viues, comme ilz faisoient: Car iectans l'œil seulement sur le corps de ce petit monstre, sans faire autre ouuerture ou lesion aucune, ilz eussent veu & descouuert la substance, la magnitude, le nôbre, la figure, la situation, l'vtilité, & l'action de toutes les principales parties du corps humain, les espritz estans dedans: ce qui n'est pas de petite

consideration en nature, attendu que par l'ignorance de ces choses, s'il aduient qu'un nerf, ou un muscle soit incisé, le plus souuent le sentiment s'en perd, aucunefois le mouuement, & souuentefois l'un & l'autre, & quelquefois la mort s'enfuit. C'est pourquoy les anciens Roys & Princes, comme Marc Antoine, Flavius & Boëtius (comme Galien tesmoigne) ont prins si grand plaisir aux anatomies & dissections des corps, qu'eux mesmes en ont exercé l'art, lequel pour n'auoir pas esté bien curieusement obserué, a faict errer les plus renommez philosophes du temps passé, comme Aristote liure premier & troisieme de l'histoire des animaux, chap. 7. ou il écrit que les sutures de la teste, par lesquelles les matieres fuligineuses du cerueau s'euaporent, sont dissemblables & différentes es hommes & femmes: Et toutefois nous voyons par experience ordinaire, le contraire. Le mesme autheur aussi a esté deceu en ce qu'il a écrit, que les testes des chiens n'auoyent aucunes sutures, & toutefois en les anatomisant, nous y trouuons des sutures come en la teste des hommes. Cornelius Celsus semblablement, l'un des plus excellens qui ayt écrit la medecine en Latin, s'est trompé en ceste mesme matiere des sutures, liure 8. cha. 1. ou il écrit que les testes qui n'ont aucunes sutures sont les plus saines & moins suiectes à maladie, & toutefois cela est apertement faux, par le tesmoignage d'Hipocrates, lib. primo De homine, ou il écrit que les testes qui ont plus grand nombre de sutures, sont les plus saines. Et comme i'ay produict l'inaduertence de ces

ces deux en matiere des dissection des corps, aussi en pourrois ie descouurir vne infinité d'autres erreurs qui se trouuent en Mundinus, Carpus & autres, lesquelz en leurs écritz se sont souuent trompez en la dissection de la fabrique du corps humain: mais par ce que nostre suiet est des prodiges, nous ferons fin à ceste matiere, sans mettre plus auant la faux en la moisson des medecins.

Fin de la vingthuiëtiesme histoire.

R. iiij

HISTOIRE PRODIGIEUSE

d'un Chien Monstrueux, engendré d'un Ours, & d'une Dogue d'Angleterre, observé par l'auteur à Londres, avec plusieurs autres discours mémorables sur le naturel de cest animal.

Chapitre

XXIX.



Par-ce



Ar-ce(lecteur) que ce fut en Angleterre, en la fameuse cité de Londres, que i'obseruay premier le naturel & la figure de cest animal, lequel tu vois icy dépeinct, iay bien voulu, auant qu'en faire

plus ample description(pour n'estre accusé d'in-gratitude) celebrer la memoire de ceux desquelz i'y ay receu quelque faueur. Au premier rang desquelz ie doy à iuste droict mettre la maiesté de la Royne Elizabeth, laquelle, combien qu'elle fust mal disposée lors que i'arriuay, & qu'elle eust occasion de ne se rendre communicable à personnes de si petite qualité comme ie suis, si est-ce qu'elle me fist tant d'honneur de me faire appeller deuant sa maiesté, ou en presence de plusieurs grandz seigneurs & dames, elle commença à discourir de plusieurs choses haultes & ardues: Et non contente de tant de faueurs & tesmoignage d'humanité, pour ne laisser rien en arriere de ce qui appartenoit à sa generosité, & grâdeur, encores me fist elle vn present si honorable, qu'un grand seigneur eust eu bonne occasion de s'en contenter. Je ne puis semblablement passer soubz silence, les courtoisies & honnestetez que i'ay receuës de monsieur l'Admiral d'Angleterre, Monsieur Scicile premier Secretaire de la Royne: & entre autres de monsieur le Conte d'Arfort, lequel outre le gracieux acueil & autres faueurs particuliers que ie receuz de luy, encores me fist il vn present si

honeste, qu'il merite biẽ d'estre publiẽ en ce lieu. Je meriterois d'estre mis au premier rang de tous les plus extremes ingratz du monde, si ie taisois semblablement la liberalitẽ de monseigneur le Conte de Candalle, de monseigneur le Marquis de Trans, & de mōseigneur le Marquis de Nelle, qui estoient pour lors en ostage en Angleterre, lesquelz non contens de m'auoir receu à leurs maisons comme leurs propres personnes, encores n'y eut il celuy d'entre eux, lequel à mon departement ne me fist present digne de n'estre iamais supprimé. Et par-ce que ie ne puis en tout le cours de ma vie auoir moyen de m'en reuencher, ny satisfaire à tant d'honestes obligatiõs, ie ne puis moins faire (ce me semble) que les magnifier, & en dōner attestation à la posterité, par mes écritz. Mais afin que nous reprenons les erres de nostre matiere, cest animal monstrueux, que tu vois figuré au commencement de ce chapitre, est engendré d'une Dogue d'Angleterre & d'un Ours: de sorte qu'il participe de l'une & de l'autre nature: Ce qui ne semblera estrãge à ceux qui ont obserué à Londres, comme les Dogues & les Ours sont logez en de petitz cachotz, les vns aupres des autres: & quand ilz sont en leurs chaulx, ceux qui sont deputez pour les gouverner, enferment vne Ourse & vn Dogue ensemble, de sorte que pressez de leurs fureurs naturelles, ilz conuertissent leur cruauté en amour, & de telles coniunctiõs naissent quelque fois des animaux semblables à cestuy, encore que soit biẽ raremẽt: entre lesquelz i'en ay obserué deux, qu'on auoit donné

La mere
qui le por-
ta, estoit
chienne, &
le male qui
la couurit,
estoit Ours

donné à monseigneur le marquis de Trans: l'un duquel il fist présent à monsieur le conte d'Alphestan, ambassadeur de l'Empereur: l'autre qu'il a fait amener en Frâce, sur lequel j'ay fait retirer cestuy au naturel, sans que le peintre y ayt rien obmis. Et par-ce que nous auons fait mentiõ cy dessus, que ce chië que tu as veu icy figuré, estoit engendré d'un Ours & d'un Chien, & que peut estre telles coniunções tesembleroyent estranges, il m'a semblé bon te prouuer que cecy n'est point nouueau, par attestation de quelques fameux auteurs. Les animaux (dit Aristote) qui sont de diuers genres, peuuent coïr, & se ioinde ensemble, mais que leur nature ne soit pas beaucoup differente, cõme sont les chiens, les Loups, & les Renards. Puis en un autre lieu il écrit que les chiens des Indes sont engendrez d'un Tigre & d'un chien, & que les Indiens attachent aux deserts leurs chiënes, quand elles sont chaudes, à quelque arbre, afin d'estre couuertes des Tigres. Polux & Plinc escriuent le semblable. Patrice de Senes, liure troisieme de sa Republique, tesmoigne que non seulement les Indiens ont fait couvrir leurs chiens à quelques animaux d'autre genre, mais mesmes que les anciës François faisoient couvrir les leurs aux loups, afin que le fruit qui sortoit de telles mixtions de semées fust plus furieux. August. Nyphus écrit vne histoire conforme à cecy, laquelle il n'a point leüe aux auteurs, mais luy mesmes l'a obseruée. Ainsi (dict-il) que le seigneur Federic de Montforce & moy retournions de la chasse, nous égarasmes

de fortune l'un de noz chiens, lequel nous ne pouvons rappeler, ny par le cry du cornet, ny par la clameur des veneurs : & apres l'auoir longuement cherché nous le trouuâmes en fin ioinct avec vne Louue au coing d'un boys, estant sa cruauté vaincue par le plaisir. Hierosme Carda medecin Milannois assure auoir veu un renart engendré d'une chienne & d'un renart : Mais afin de retourner à la description de nostre animal, duquel tu vois la figure si monstrueuse, qui ressemble à un Ours racourcy, aussi auoit les gestes, le muglement, & toutes ses autres façons de faire plus approchées de l'Ours que du chien, mais ie te puis assurer que c'est l'une des plus furieuses bestes que lon puisse regarder : car il n'y a espee d'animal auquel il ne s'attache, soit Ours, Lyon, Taureau & autres semblables : & si est si ardent en ses combatz, que depuis qu'il a mis la dent sur quelque beste, il se feroit plustost demêbrer que laisser prise, comme i'ay veu par experience à Londres, quand on le fist combattre contre l'Ours. Ce qui me remet en memoire ce que les historiens escriuent d'un chien qui fut donné à Alexandre aux Indes, lequel (cōme aucuns assurent) estoit engendré d'un Tigre & d'une Chienne : Et parce que ceste histoire est racomptée diuersement par Ælian, Diodore Sicule, Strabo, Plutarque, Patrice & plusieurs autres, ie racōpteray seulement ce qui est plus vray semblable. Ainsi qu'Alexandre le grād voyageoit par les Indes, un grand seigneur pour luy gratifier, luy donna un chien engendré d'un Tygre, de monstrueuse corpulence.

Alexandre

Alexandre desirant d'experimenter si le cœur de cest animal respondoit à sa forme, luy fist presenter vn Ours pour le combattre. Le chië qui estoit couché, ne se daigna oncques leuer : Alexandre commanda de rechef, qu'on luy presentast le Taureau, puis le sanglier. Le chië nomplus esmeu de l'vn que de l'autre, ne se voulut leuer, ne faire aucun semblant d'estre irrité de leur presence, encore qu'on le prouocast par tous moyens au cōbat. Alexandre indigné outre mesure, dequoy nature auoit si mal employé vne si grand masse de chair en vn animal si timide, cōmanda qu'on le tuaist, dequoy le seigneur qui en auoit faict le present à Alexandre, aduerty, se presenta incontinent deuant la maiesté de l'Empereur, & le supplia auant qu'on executast ce qu'il auoit cōmandé, qu'on fist presenter le Lyon, ou l'Elephant à son chien. Ce qui fut faict promptement: Et lors le Chien auec vne furie merueilleuse commence à s'eslancer sur ce Lyon, & le caresser si viuement à grandz coups, que là ou il imprimoit ses dentz, on n'en pouuoit effacer le caractere, & si estoit si acharné sur cest animal, qu'on ne luy sceust oncques faire lascher prise : Dequoy l'Indien contenté, afin de donner encores plus grand plaisir à l'Empereur cōmāda qu'on luy coupast la queue, ce qui fut faict, mais le Chië san estre aucunemēt esmeu de ce tourment, persista immuable en son entreprinse, non content de cela, luy fist couper les quatre iābes l'vne apres l'autre, & le fist presque du tout démēbrer : mais tout en vain, car ce pauvre Chien demeura tousiours constant, &

aheurté cōme le loyal ouurier sur sa tasche: mais
 par-ce qu' Alexandre se courrouçoit, voyant vn
 chien si genereux ainsi mutilé, l'Indien luy dict,
 I'en ay encores deux autres semblables, desquelz
 ie vous faiz present, avec la charge, que si vous
 en voulez auoir plaisir, il les fault experimenter
 contre les Lyons ou Elephans, car ilz contem-
 nent coustumierement tous les autres animaux,
 estimant la victoire honteuse qu'ilz pourroient
 remporter sur les autres. C'est chose esmerueilla-
 ble des louanges que les anciens ont donné à ces
 animaux, & comme ilz ont celebré leur fidelité
 par leurs écritz. Les chiens seulz entre les bestes
 irraisonnables (dit Aelia & Columele) cognois-
 sent leus maistres, entendent leurs siffletz, les fla-
 tent, cherissent, en sont ialoux, les acompaignent
 par tout le mōde, sont si fideles gardiens de leurs
 biens, que pour mourir ilz ne voudroient souf-
 frir qu'on les desrobast. Plutarque au dialogue
 ou il dispute si les bestes ont raison, confirmāt les
 choses precedentes, racompte vne histoire de la
 fidelité d'un chien si estrange, qu'à peine y pour-
 roit on adiouster foy, sans l'autorité de celuy
 qui la décrit. Les Atheniens (dit-il) auoient vn
 temple appellé le temple d'Aesculapius, garny
 de tresors & richesses, pour la garde duquel ilz
 nourrissoient vn chien excellent, nommé Capa-
 rus: ce chien ne peut estre si loyal gardien, que
 quelque larron de nuict n'entraist au temple, &
 qu'il ne derobast les plus excellens ioyaux. Ce
 chien voyant que les procureurs & secretains ne
 faisoient compte de ses hurlemēs, & abbays, sort

du tēple quasi furieux & enragé, poursuyt ce larron & sacrilege qui s'enfuyoit, & pour pierres que le larrō luy sceust ietter, il ne se desista point. Or quand le iour fut apparu, le chien s'arrestoit par tout ou le larron s'arrestoit, sans s'approcher toutesfois de luy, de peur que le larron luy mesfeist. Le larron considerāt l'artifice du chien, luy offrit du pain, auquel ne voulut oncques toucher, ains il abbayoit, & le poursuyuoit sans cesse, lesquelles choses cogneuës par quelques vns de ceux qui alloient & venoient, qui furēt cause que les Atheniens enuoyerent en diligence apres ce larron, lequel fut apprehendé à Cromion, & remené à Athenes : mais le plaisir estoit de veoir sauteler le chien deuant le larron, se resiouyssant, & quasi estimāt que ce larron & sacrilege fust sa prise & sa proye : & lors les Atheniēs ordōnerēt que le chien fust nourry aux despēs de la ville, & que les prestres en eussent le seing toute leur vie. Tous les historiens presque, qui ont écrit de la nature des animaux, racōptent vne semblable histoire, de la fidelité d'un chien, que le Roy Pirrhus chemināt avec son armée, rencontra de fortune, gardant le corps de son maistre mort sur un grand chemin, & apres auoir contēplé par quelque espace de temps ce piteux spectacle, il fut encores plus estōné, quand quelques passantz l'aduertirēt qu'il y auoit trois iours que ce chiē n'auoit bougé de ce lieu, sans auoir beu ny mangé, ny abandoné le corps mort de son maistre. Le Roy passionné outre mesure, cōmanda que ceste charongne fust enterrée, & que le chiē pour sa fide-

lité fust nourry & entretenu, & qu'on fist vne
 prompte enqueste du meurdre: & toutefois quel
 que diligéce qu'on y employast, on ne peut rien
 descouurir du forfait. Aduît que quelques iours
 apres les gendarmes du Roy Pirrus firent leurs
 môstres, & le Roy en personne y voulut assister
 pour voir leur equippage, & ordonna qu'ilz pas
 sassent tous deuant luy. Le chien duquel nous a
 uons fait mention, auoit tousiours acompagné le
 Roy, & s'estoit tenu coy & muet, iusques à ce
 que ceux qui auoyent tué son maistre passerent:
 Lors d'une impetuosité & furie merueilleuse il se
 rue contre eux, se mettât en effort de les desmem
 brer & deschirer: puis avec certains gestes, & pi
 teux hurlemens tournoit ça & là, regardant quel
 quefois le Roy Pirrus intentiuement, semblant
 quasi luy demander iustice, qui fut cause que le
 Roy & tous les assistans soupçonnerent inconti
 nent le meurdre auoir esté commis par iceux: tel
 lement que par ces coniectures furent examinez,
 gehennez, conuaincuz & puniz du delict (chose
 certainemēt miraculeuse) monstrant nostre Dieu
 estre si iuste en ses iugemens, & qu'il a en si gran
 de abhomination les meurdriers & prodiges de
 sang humain, qu'il permet mesme que les bestes
 brutes soient les bourreaux & ministres de leurs
 iniquitez: comme i'ay plus amplement monstté
 au premier liure de mon Theatre du monde, fai
 sant mesme mentiō de ceste histoire: mais par ce
 que mon subiect est des prodiges, elle ne m'a sem
 blé indigne d'estre repetée en ce lieu. Plutar. Ae
 lian, & mesmes Tzetzes, Chiliade 3. chap. 131. écri
 uent

uent qu'apres que Darius dernier Roy des Per-
ses, fut vaincu par Alexâdre, & bleccé de plusieurs
playes par Bessus, & Nabarzane, il demeura aban-
donné de tout le monde, & son corps mort de-
stitué de tout humain secours, fors que d'un chié
qu'il auoit nourry ieune, lequel n'abandonna onc-
ques la charongne de son maistre, ains luy fist
compagnie apres sa mort, cōme il luy auoit esté
fidele en la vie. Tous ceux qui ont écrit les gestes
memorables des Romains font souuent mention
en leurs écritz de la fidelité du chien de Titus Fa-
binus, lequel apres qu'il eut esté condéné à mort
par iustice luy & sa famille, & que le corps de ces
pauures condamnez fussent respenduz sur la ter-
re, le chien n'abandonna iamais le corps de son
maistre, & abayoit & hurloit si piteusemēt, qu'il
esmouuoit tous les assistans à pitié, faisant co-
gnoistre par ses gestes, qu'il auoit quelque senti-
ment du desastre de son maistre : Et incontinent
qu'on luy eut offert du pain, pour le penser ap-
paiser, il le print, & en presence de tout le peuple,
avec les pates il ouuroit la bouche à son maistre
mort, & luy enfournoit le pain là dedans, pen-
sant soulager son mal . Et apres que ce corps
mort eut esté ietté dedans le Tybre, le chien se
lance soudainement, & se precipite dedans le fleu-
ue, & ne cessa de nager tant qu'il eust attainct le
corps, lequel en presence de tout le peuple, il
traina au bort de l'eau, pensant par ce moyen
l'auoir deliuré du peril . Voyla comment nous
experimentons vne plus grande fidelité & amitié
en ces bestes brutes, qu'aux creatures raisonna-

bles, lesquelles sont le plus souuent comme l'arondelle, ilz s'enfuyent dés-que l'hyuer vient : car dés-qu'ilz sentent que nous sommes combatuz des traictz de la fortune aduerseté, ilz s'enfuyent, & nous abandonnent. C'est pourquoy Massinissa ce grand Roy de Numidiene volut oncques se fier la nuict aux hommes pour la garde de son corps, mais il faisoit nourrir huiet ou dix mutes de grands Chiens, lesquels il faisoit coucher en sa chambre, pour la tuition & defence de son corps : ce qui est encores pour le iourd'huy practiqué en vne ville de Bretagne, close de mer, appellée saint Malo, en laquelle vn grand nombre de Dogues d'Angleterre & autres chiës, sont le guet & la sentinelle si dextremēt, qu'ilz se confient & commettent la garde & protection de leur ville en la fidelité de ces animaux, autant qu'ilz feroient à quelques soldatz des vieilles bandes de Piedmont, & si ne leur fault point de gages ny armures, ains ilz se contentent seulement de la vie, laquelle leur est ordonnée du public, en certaines caues tenebreuses, esquelles ilz ne peuuent veoir clarté aucune, afin qu'ilz soyent plus furieux la nuict au combat : mais encores est ce chose plus digne d'admiration, que ces animaux ne recognoissent aucun que ceux qui en ont le soing, & qui sont deputez de la ville pour les nourrir & garder, de sorte qu'il est force au soir quand on les tire de leurs caues, & cachotz, de sonner les trompettes, fifres & tabours, afin que le peuple se retire : car ces animaux sont si duietx à cela, que depuis que la retraicte est sonnée,

née, il n'y a homme si effrôlé qui s'ose presenter deuant eux, s'il ne se veult mettre au hazard d'estre incontinent laceré & mis en pieces. Les Ecclesiastiques font mention d'une histoire memorable de ces animaux. Ilz écriuēt que l'Empereur Aurelian voulant contraindre Benignus martyr, d'adorer les ydoles, fist ieusner quatre ou cinq iours de grans chiens acoustumez de se paistre de chair des Chrestiens, puis leur fist exposer le corps du martyr, lyé contre terre, mais ces animaux qui ne voulurent estre les ministres du peché du tyran, ne feirent que le lecher & sentir le corps, sans luy faire aucune lésion ou blessure, qui me remet en memoire vne histoire qu'Appius Grec, & Aulugele le Latin, Iouianus Pontanus, lib. i. Amorum, & Antoine de Gueuare, Euesque de Monodemo, racomptēt, laquelle combien qu'elle traicte d'un autre animal que du Chien, si est ce que d'autant qu'elle est prodigieuse & bien conforme aux histoires precedētes, ie tiendray le temps pour bien employé, que j'auray mis à la décrire. Le discours de ceste histoire est tel, selon que les dessusdictz auteurs la racomptent. L'Empereur Titus filz de Vespasien, à son retour de la guerre d'Allemagne, determina (comme aussi les grandz seigneurs auoient de coustume) de solenniser à Rome la feste du iour de sa natiuité. Estant venu le iour de la feste de la natiuité de Tite, il ordonna qu'on fist de grands triumphes au Senat, & qu'on donnast de grands thresors aux Romains: l'Empereur commanda puis apres qu'on fist prouision de plusieurs Lyons, Ours, Cerfs, Onces,

Rhinocérons, Taureaux, Sangliers, Loups, Chameaux, Elephans, & autres innumerables especes d'animaux sauuages, fiers & cruelz, desquelz la plus grande part se treuuent es desers d'Egipte, & en la valée du mont de Caucase. Long temps au parauant l'Empereur auoit commandé que tous les larrons, brigans, homicides, faux tesmoings, traistres & rebelles, ne fussent executez, mais fussent reseruez pour estre ce iour lá dechirez & puniz par ces animaux, afin qu'ilz ne fussent pas seulement bourreaux des malefices de ces malheureux, mais mesme que le cōbat qu'ilz auroient les vns cōtre les autres apportast quelque plaisir aux spectateurs. L'ordre qui s'obseruoit en cecy, estoit tel, qu'on mettoit ces hōmes les vns apres les autres, en vn lieu qui est pour le iourd'huy encores en essence à Rome, nommé le Collifée: puis on laissoit sortir quelque vn de ces animaux à la veuë de tout le peuple, & si de fortune la beste mettoit l'hōme en pieces, cela luy seruoit pour la punition de son delict: & si l'homme aussi la mettoit à mort, il estoit absoulz du crime & peché qu'il auoit cōmis, sans que la iustice l'eust peu chastier, ou apprehēder au parapres. Et si est à noter, qu'ilz affamoient quelque espace de temps au parauant ces bestes cruelles, afin de les rēdre encores plus aspres & furieuses au combat. Entre les autres bestes qui furent amenées à ce combat, ilz voulurent auoir le plaisir d'un Lyon qui auoit esté prins aux desers d'Egipte, lequel estoit grand de corps, horrible de regard, en ses hurlemēs effroyable, & aux cōbatz desesperement cruel,

lequel

lequel auoit desia mis en pieces cinq ou six hommes, lesquelz toutefois on ne luy auoit voulu laisser manger, de peur qu'estant ressasié, il n'eust peut estre point prins de plaisir au combat. L'Empereur ennuyé, commanda qu'on luy mist deuant luy quelque esclau, & que s'il aduenoit que le Lyon fust victorieux, qu'on luy laissast deuorer, par ce qu'on le laissoit par trop en la place sans manger: les gardes obeïssans au commandement de l'Empereur, mirent en ieu vn pauvre esclau, tât maigre, & attenué de prison, qu'il ne desiroit pour son repos que quelque prompte & soudaine mort. Ce fier Lyõ rugissant ia ayant faict deux tours à l'entour du Colisée, sembloit se preparer pour se paistre de ce miserable esclau, mais c'est chose merueilleuse à ouïr, & fort estrange à voir, qu'incontinent qu'il se fut approché de l'esclau, & qu'il l'eut intentiement regardé entre les deux yeux, tant s'en fault qu'il eust volenté de luy faire aucun mal, que mesme s'approchant de luy il comença à luy lécher les mains, & se prosternât deuant luy en terre, luy monstroït signe de le recognoistre, & de luy estre redeuable. Alors ce pauvre esclau voyant ce Lyon ainsi apriuoisé, commença à se reasseurer, & chasser la froide peur qui le tenoit assiégué, & afin de ne demeurer ingrat de son costé, il caressoit & cherissoit ce Lyon cōme s'il l'eust autrefois veu. l'Empereur Tite, & le peuple Romain estonnez d'une chose si esmerueillable, laquelle iamais n'auoit esté veüe, ny leuë, commencerent à coniecturer que cest esclau estoit Necromancien, & qu'il auoit enforcélé & en-

chanté ce Lyon, & lors l'Empereur ennuyé de leurs caresses, s'escrie tout hault, dy moy esclau e, qui es tu ? d'ou es tu ? quel est ton nom ? qu'as tu faict ? pourquoy as tu esté icy amené & liuré à ces bestes ? Quoy ? as tu nourry ce Lyon ? t'es tu trouué à sa prise ? l'as tu deliuré de quelque mortel danger ? Ou bien si tu es quelque enchâteur, ie te commande, à peine d'estre desmêbré tout vif, de nous dire verité : car tō affaire me semble si admirable, que peult estre depuis que Rome est fondée elle n'a veu le semblable. L'esclau obeissant au commandement de l'Empereur Tite, estant le Lyon couché à ses piedz, avec vn cœur asseuré respondit à l'Empereur ce qui s'ensuyt : Serenissime Empereur, encore que tu me voyes maintenant esclau, & mō pauvre corps en si piteux estat, qui tient plus du mort que du vif, si est-ce que tel que tu me vois, ie suys cheualier du païs d'Esclauonye, de la lignée des Androniques, autant celebrée en mon païs, comme celle de Quintus Fabius, & de Marcus Marcellus est à Rome. La cité dont ie suys, est appellée Mantuca, laquelle s'estant reuoltée cōtre l'obeissance des Romains, tous ceux de la ville qui furent prins, furent mis en seruitude, & renduz esclauës, dont (infortuné que ie suis) le desastre me fut si grand, que i'en estois l'un d'iceux : mais puis qu'il plaist à vostre maiesté que ie vous racompte la Tragedie de ma miserable vie, il y a vingt & six ans que ie fuz pris prisonnier en mon païs, & autant de temps que ie fuz amené en ceste cité, & vendu au champ de Mars, à vn seieur de bois, lequel me voyant mal conuenable

conuenable à ce mestier, me vëdit au Consul Dacus, qui est encor pour le iourd'huy viuant, lequel, combien qu'il fust homme prudent, & bien experimenté, si est-ce qu'il auoit pour contrepoix de ses vertus vn vice familier, qui obscurcissoit presque tout ce qu'il y auoit de bõ en luy: car il estoit si confict en auarice, qu'il me laissoit presque mourir de faim, & si me faisoit tant traualier iour & nuiçt, que mō pauvre corps estoit tout fondu, & miné à son seruice, de sorte que i'enduray vaze continuelles années ceste miserable vie, au bout desquelles ie le suppliay tresafectueusement de me vendre à quelqu'autre, ou de mettre fin à ma miserable vie. Voyant donc mō maistre ne fleschir pour aucune requeste que ie luy fisse, ains augmenter de iour en iour sa cruauté en mon endroict, sentant d'autre costé la vieillesse me menacer, & ma vigueur s'affoiblir, quasi desesperé, ie deliberay de m'enfuir aux solitaires deserts de l'Egypte, dequoy la fortune m'appresta vne bien pröpte occasion: car le Consul mon maistre partit bien tost apres de Rome, pour aller visiter vn païs, qui est appellé Tamutha, situé entre les confins de l'Egypte & d'Afrique: Et vne nuiçt le voyant couché & endormy, ie prins vn peu de raisins dessechez, & vne bouteillee d'eau, & m'expose en tel estat à la misericorde de la nuiçt, & de la fortune: & ayant cheminé toute la nuiçt, sentant le iour s'approcher, estant assureé qu'on me faisoit chercher, pressé de sommeil & labeur, craignât d'estre surpris, ie me mis dans vne cauerne, que ie trouuay de fortune

en quelque lieu desert & montueux, & apres auoir reposé lá dedás trois ou quatre heures, ie fuz estonné que i'aperceu vn Lyon fort hideux, qui entroit en ma loge, lequel auoit la gueule & les piedz ensanglantez. Et voyát cest animal couché à l'entrée de ceste cauerne, & considerant que ie n'auois aucun moyen de fuyr, ny force pour luy resister, ie cōmençay d'apprehéder la mort, & cognoistre au plus pres que mon corps deuoit estre ensepulture dans les entrailles de cest animal. Et apres que ce Lyon eut vn peu seiourné à la porte de ceste cauerne, il s'aduifa d'entrer dedás, trainát l'vn de ses piedz apres les autres, & se doulat grandement, & s'approchant de moy, qui estois túbé en terre de peur, il mist son pied malade dessus mes mains, cōme feroit vn homme sage, qui decouure son mal à vn autre: qui fut cause que ie cōmençay à prendre cœur, voyant ce superbe animal si bien apriuoisé, & demander secours pour estre guery. La maladie de ce pauvre Lion, estoit vne grosse espine qu'il auoit dans le pied, tellement que son pied estoit enflé, & prest à rendre matiere: lors avec la poincte de mon couteau ie donnay vét à l'apostume, & fis sortir la bouë, & luy tiray l'espine, puis luy lie le pied avec vne bá de de ma chemise: apres luy auoir vsé de ceste charité, ce pauvre animal, avec vne extreme patiëce, demoura aupres moy tout ce iour & la nuit, & quand le iour commença à esclarcir, & que nous veismes la clarté entrer quelque peu dedans la cauerne, ie cōmençay encōre de rabiller sa playe comme i'auois faict le iour precedent: & deux heures

heures apres ce pauvre Lyon assailly de la faim, s'en alla par le desert , chercher quelque chose pour manger, & voyant mon hoste departy , ie me sauue promptement à la fuitte : mais par-ce que mon maistre auoit donné aduertissement de moy par tous les passages, ie fuz prins au premier village, & mené deuant mon maistre, qui me fist lier & garroter, puis m'euoya à Rome, avec grád. nombre d'autres prisonniers, ou i'ay de fortune rencontré ce Lyon, qui est celuy auquel ie ostay l'espine. Par-tant (Cesar) puis que les Dieux ont permis que nous ayons recogneu l'un l'autre en cel lieu , ie supplie treshumblement ta maiesté, nous laisser la vie sauue. Andronique ayant faict cest estrange discours à Tite , il esmeut tellement les spectateurs à pitié & compassion , qu'il n'y eut celuy qui ne cōmençast à crier à haulte voix apres l'Empereur, qu'il luy pleust le mettre en liberté, & ne tuer point le lyon: ce qu'il leur accorda volontiers, & dés l'heure mesme le Lyon & Andronique s'en allerent par les rues de Rome, lequel tout le peuple regardoit , & prenoit vn merueilleux plaisir de voir ce lyon, avec vn bast sanglé, lequel portoit de grandes besaces pleines de pain, de ce qu'on luy donnoit par les maisons, & quelquefois souffroit que les enfans montassent dessus, pour auoir de l'argent. Et les estrangiers qui venoient à Rome, estonnez de ce nouveau spectacle, demandoient avec grande curiosité que c'estoit, & pour leur satisfaire, on escriuit vn billet qu'on attacha à la poictrine du lyon, ou estoient écrits les motz: Hic leo est hospes huius

hominis. Et en la poictrine de l'hōme estoient é-
 cris ceux cy: Hic est medicus hui' leonis, c'est a-
 dire, ce Lyon est hoste de cest hōme, & cest hō-
 me est medecin du Lyon. Voyla dōques vn mer-
 ueilleux exēple de charité en vn animal stupide,
 & grossier cōme le Lyō. Ce n'est dōques sans cau-
 se qu'un philosophe Indiē nōmé Dephile, auoit
 acoustumé de dire, que ceste grāde ouuriere na-
 ture auoit graué certaines loix aux animaux, qui
 deuoyēt estre comme exēplaires, & formulaires
 aux hōmes, pour leur ayder à conduire l'estat de
 leurs vies: car si nous voulons considerer, & con-
 tēpler les façons de faire des bestes brutes, nous
 trouuerōs qu'elles surpassent les hōmes en beau-
 coup de choses, & semble qu'elles ayēt quelque
 vertu naturelle en chacune affection de courage,
 en prudence, force, couiardise, clemēce, vigueur,
 discipline, erudition, elles congnoissent les vnes
 les autres, discernent entre elles, appetēt les cho-
 ses qui leur sont vtils, fuyent le mal, euitēt le pe-
 ril, trompent souuent & deçoient l'hōme, pour-
 ueoient à l'aduenir, amassent ce qui leur est neces-
 saire pour viure. Ce qu'estant considéré par plu-
 sieurs anciēs philosophes, n'ont point eu de hōte
 de disputer ou reuoquer en doute, si les bestes
 brutes estoient participantes de raison: mesmes le
 sage Salomon nous enuoye quelquefois à leurs
 escoles: Et Esaie reprochant aux Israelites leur
 ingratitude enuers Dieu, leur propose pour exē-
 ple le beuf & l'asne qui recongnoissent leur mai-
 stre, mais Israël a mesconneu son Seigneur.

Fin de la vingtnuesiesme histoire.

HISTOIRES PRODIGIEUSES

de certaines femmes, qui ont enfanté grand nombre
d'enfans, & d'autres qui ont porté leur fruit
cinq ans mort dans leur ventre.

Chapitre XXX.





E grand oracle de philosophie Aristote a creu & asseuré en ses écritz, que la femme ne pouuoit enfanter en vn coup plus de cinq enfans, encores bien rarement: Toutesfoys (dict il) cela est quelquefoys aduenü à la seruante d'Auguste Cesar, la quelle d'une portée acoucha de cinq enfans, lesquels nom plus que la mere, ne vesquirent que bien peu de temps. En memoire dequoy l'Empereur Auguste luy fist faire vn monument, & fist écrire dessus le nombre d'enfans, desquelz elle auoit acouché. Combien qu'Aristote ayt creu la femme ne pouuoir excéder en vn coup le nombre de cinq enfans, si est-ce que le contraire a souuent esté expérimenté en plusieurs: mesmes qu'il y a beaucoup d'Auteurs graues qui l'ont attesté par leurs écritz. Entre autres, ce docte prince Picus Miradulanus en ses Cômétaires sur l'hymne seconde, asseure qu'une Allemande (appelée Dorothée) acoucha en Italie par deux diuerses foys de vingt enfans, l'une foys d'unze, l'autre foys de neuf: Laquelle pendants qu'elle estoit grosse, auoit le ventre si grand qu'elle estoit contraincte pour la pesanteur du faix, de tenir une seruiette en sa main, liée à l'entour du ventre pour la soulager de sa charge. Il n'y a celuy de ceux qui ont leu les Annalles, & histoires de Lombardie qui ne sache comme du temps que Algemont premier Roy des Lombars regnoit, une certaine femme publique accoucha de sept enfans masculles,

L'an 1554.
 à Berne en
 Souisse la
 femme de
 Jean Gislin
 ger docteur
 enfanta d'une
 portée, cinq enfans:
 trois masculles,
 & deux filles.

les d'un coup, laquelle pour l'horreur de son peché, les precipita tous en l'eau. Mais le seigneur qui par son conseil admirable voulut eterniser la memoire de ce meffaict, permist que le Roy Algemot de fortune se pourmenaist ioignant le fleuve ou elle les auoit iettez, qui en retira vn de l'eau avec la hampe d'un espieu qu'il tenoit en sa main, & aperceuant qu'il auoit vie, il le fist nourrir & instruire aux disciplines & vertuz. Et croissant cest enfant d'age, creut & s'augmenta tellement en perfections & dons de graces, qu'il fut Roy apres Algemon, & est celuy duquel les histoires font mention, qui se nommoit Lanytius second Roy des Lombards. Et si tu veux lire l'histoire de Martinus Cromerus, liure sixiesme des faictz memorables de Poloigne, tu trouueras vne histoire de la femme du Côte Virboslaus qui surpassa encore toutes les precedentes en multitude d'enfans. Toutes ces histoires sont admirables de si grand nombre d'enfans enfantez en vn coup, mais encores ne se list il point aux historiens qui le décriuent, que pour la multitude d'enfans qu'ilz ont eu, il les ayt faillu ouurir, briser, anatomiser, ou mettre le fer en leurs corps, pour en tirer leur fruiet: mais c'est vne chose estrange, voire prodigieuse, qu'une femme pour vn seul enfant ayt esté ouuerte, & qu'elle ayt porté cinq ans son fruiet mort en son corps, comme tu entendras par le discours de la memorable histoire qui s'ensuyt, laquelle Mathias Cornax docteur & excellent Phisicien de Vienne a écrit en vn œuure latin qu'il enuoya par miracle à Ferdinand,

qui est pour le iourd'huy Empereur. Et combié qu'il dilate l'histoire assez proluxement, si est-ce que ie la décriray le plus succinctement qu'il me sera possible. Il écrit dōc à l'Empereur Ferdinād que l'an mil cinq cens quarante & cinq, il y auoit à Vienne en Autriche vne certaine femme nommée Marguerite, femme d'un citoyen de la ville, appelé Georges Vvolczer, laquelle estāt grosse, sentit son enfant mouuoir biē fort depuis la saīct Barthelemy iusques à la saincte Luce, mais quelque peu apres que le terme de ses couches fut venu, elle comença à sentir les furieuses & aspres douleurs qu'ont acoustumé de souffrir les femmes aux angoisses de leurs enfans: & partant elle fist appeller sa mere & quelques sages femmes pour la soulager: mais quand ce vint à ce grand conflict de nature, lors que l'enfant veut rompre les pēnicules pour sortir, ilz entēdirent vn bruyt & tintamarre, comme vn éclat dedans le ventre de ceste pauvre martyre, lequel leur fist penser, ou que l'enfant estoit mort, ou qu'il y auoit quelque grand effort & bataille en nature: mais ce bruit appaisé, ilz ne sentirent plus aucun mouuement de vie en l'enfant, qui fut cause qu'apres auoir desployé tout leur art en vain, pensans tirer cest enfant hors du corps de la mere, ilz furēt en fin cōtrainctz de l'abandonner, & laisser pour vn temps en la misericorde de Dieu. Quelques iours apres sentant ses douleurs se renouueller, elle eut son refuge aux plus excellens & experimentez medecins, non seulement de sa prouince, mais de toutes les autres, desquelz la memoire estoit plus

ſtoit plus celebrée:leſquelz avec tous leurs phar-
maques reſolutifz , attractifz , ſuppuratifz , ne la
ſceurent deliurer de ſa miſere , ne luy dire autre
choſe que ce q̃ l'Ange diſt au Prophete: *Diſpone do-
mū tuū, quia morieris.* Ceste pauvre creature, voyāt
que toute l'eſperance qu'elle pouuoit auoir aux
hōmes eſtoit eſteincte, elle ſe delibera de laiſſer
faire à nature, & perſiſta ſi conſtāmēt en ce mar-
tyre, qu'elle porta avec vne extreme douleur l'eſ-
pace de quatre ans, ceste charongne morte en ſon
ventre : Les quatre ans expirez , la cinquieſme
année venue, elle reſolut en elle meſme que c'e-
ſtoit le plus expedient de ſ'expoſer à quelque
prompte mort, que de ſe laiſſer ainſi longuement
miner, par la cruauté de ce tourment. Et arreſtée
en ceste deliberation, elle fiſt appeller les chirur-
giens & medecins, leſquelz elle impetra ayſemēt
d'eſtre ouuerte: Et l'an mil cinq cēs cinquante, le
douzieme iour de Nouembre ilz luy ouurirēt le
vētre, duquel ilz tirerēt l'enfant à demy pourry,
qu'elle auoit trainé cinq ans: Et apres l'auoir pur-
gée & medicamentée, ilz la rendirent par l'aide
du ſauueur en tel eſtat, quelle eſt encore ce iour-
d'huy pleine de vie, & ſi ſaine qu'elle peut enco-
re conceuoir enfans, cōme il eſt plus amplement
contenu en l'œuure latin enuoyé à l'Empereur
Ferdinand.

Fin de la trentieſme hiſtoire.

HISTOIRES
HISTOIRE PRODIGIEUSE
d'un enfant Monstrueux, qui naquit le iour que les
Geneuois & Venitiens furent reconciliez.
Chapitre. XXXI.



Combien



Combié que nature(ainfi que Ga
lien tesmoigne Liure 14. De l'y-
sage & vtilité des parties) eust
souuerainement desiré que son
ouurage eust esté immortel fil se
fust peu faire, mais pour ce qu'il
ne luy estoit loisible par la matiere corruptible
des elemens, & de l'esprit ætheré, elle s'est faict &
fabriqué vn subside & supplemēt pour l'immor-
talité: car elle a trouué vn moyē admirable, pour
au lieu de l'animal qui doit mourir d'en substi-
tuer & remettre vn autre en sa place: & pour ce-
ste cause nature a donné à tous animaux conuen-
ables instrumens pour conceuoir & engendrer.
Or est il qu'en ces instrumens ainfi ordonnez
par nature, combien qu'elle ayt tasché à les ren-
dre parfaictz, il s'y treuve du vice, & du default,
duquel l'animal qui est formé se ressent par-apres:
Comme Hypocrates enseigne au liure De geni-
tura, ou il monstre par la similitude des arbres
cōme les enfans sortēt du vêtre de leur mere mō-
strueux & difformes, disant ain si: Il est necessaire
que le corps qui se meut en lieu estroict deuie-
ne mutilé & manque, pour ce qu'ainfi que les
arbres deuant qu'ilz yssent hors de terre silz n'ōt
libre espace pour sortir, & qu'ilz soyent retenus
par quelque empeschement, ilz naissent tortus,
gros en vne partie & gresles en l'autre: Ainfi est il
de l'enfant, si au ventre de la mere il a les par-
ties les vnes retraictes & contrainctes en lieu
plus estroict que les autres: & ce vice(dict-il) pro-
uient de l'angustie du lieu trop estroict en la ma-

trice. Puis vn peu au dessus philosophant sur ceste mesme matiere, il assigne d'autres raisons, par lesquelles les enfans sont renduz monstrueux & difformes, comme par les maladies hereditaires des parens : car si les quatre especes d'humeurs dont se fait la semence, ne contribuent entiere-ment à la geniture, il y aura quelque partie mutilée. Puis adiousté encores d'autres raisons des enfantemens monstrueux, comme quand la mere reçoit quelque contusion ou blessure, ou que l'enfant deuienne malade au ventre de sa mere, ou que le nourricmēt dont il deuoit accroistre soit escoulé hors de la matrice, toutes ces choses le peuuent rendre hideux, mutilé ou difforme. Et si nous voulons considerer tresexactement ceste philosophie d'Hipocrate, sur la generation des montres, nous trouuerons infaliblement que celui duquel tu vois le pourtraict, est engédre ainsi difforme par l'vne des causes qu'il assigne, sçauoir pour l'angustie du lieu, car nature en voulāt créer deux, a trouué la matrice par trop estroicte, qui est cause qu'elle s'est trouuée manque, de sorte que la matiere contraincte s'est coagulée & amassée en vn, dont s'est formée ceste superfluité de membres, que tu vois figurez en ce petit mōstre masle, qui a quatre bras & quatre iambes, & n'a qu'vne teste, avec la proportion gardée en tout le reste du corps, lequel fut engédre en Italie le propre iour que les Venitiens & les Geneuois (apres auoir respandu tant de sang d'vn costé & d'autre) confirmerent leur paix, & furent reconciliez ensemble: lequel fut baptisé, & vesquit

quit quelque temps apres, comme écrit Iobus Fincelius en son liure De miraculis post renatum Euangelium : Et en l'an mesme Leopold de Duc d'Austriche, vaincu des Suisses, mourut: Et Galeace fut crée Vicôte de Milan, apres la mort de Barnaboüe.

Fin de la trente-Œ-uniesme histoire.

T ij

HISTOIRES
SERPENT MONSTRUEUX
achepté par les Venitiens en Afrique, puis en-
uoyé en France embasné, comme aucuns
modernes ont écrit.
Chapitre. XXXI I.



Conradus



Onradus Lychoftenes , en son docte traicté latin des prodiges , duquel i'ay emprunté le pourtraict de cest horrible serpent à sept testes , écrit que cest animal monstrueux fut apporté de Turquie aux Venitiés ambasmé, duquel au par apres ilz en feirent present au feu de bonne memoire Roy de France François de Valoys: Puis il adiousté que pour sa rarité, il fut apprecié six mille Ducatz: mais cōbié que ie me sois enquis assez curieusement si se trouuoit point vn serpēt semblable à cestuy au cabinet du dessusdict Roy de funct, si est-ce que ie n'en ay encores rien peu descouurir de certain. Si la chose est veritable (cōme il est vray-semblable eu esgard à l'autorité de celuy qui la décrit) ie croy que nature n'ayt riē produict de plus esmerueillable entre tous les Mōstres de la terre: car outre la figure mōstrueuse & espouventable de ce serpent, encores y a il ie ne sçay quoy digne d'estre cōsideré en ses faces, lesquelles representent mieux la figure humaine que la brutalle. En ce qui concerne la multitude des testes, il me semble qu'il n'est nomplus estrāge de trouuer des serpens à deux ou trois testes, que de trouuer des hōmes & femmes qui en ayēt deux, comme nous auōs cy dessus racōpté, mesmes que les modernes qui ont voyagé aux Indes, attestent par leurs écrits en auoir veu : Cōme en semblable Pierre Belon tesmoigne auoir veu des corps tous entiers, embasmez de certains serpens

Superstitiō
du peuple
de Calicut.

aslez qui ont piedz, qu'on dict voler de la partie d'Arabie en Egypte, desquelz il t'en a monstré vn pourtraict, qui n'est gueres moins esmerueillable que cestuy. Ludouicus Vartomanus en son liure Des peregrinations des Indes, écrit qu'il a veu en Calicut ville Indique, des serpens à quatre piedz, naissans dans certains marescages, qui sont de la haulteur, & du corps d'un gros pourceau, ayans la teste plus grosse, plus laide & difforme, & ont quatre brasses de long. Puis il en faict mention encores d'autres especes, qui sont si veneneux, que depuis qu'ilz ont attouché l'homme iusques au sang, il tōbe tout incōtinēt mort à terre. Il écrit semblablemēt que si le Roy peut descouurir ou est l'habitation de ces serpens, il leur fait bastir de petites loges pour se retirer, lors que les eaux croissent, ou par pluye, ou par inundation: Ioinct que si quelqu'un en auoit tué vn, le Roy le feroit mourir tout à l'heure, comme s'il auoit mis vn homme à mort: Car les habitās de ce païs ont vne folle & superstitieuse opinion que ces serpens soient quelques espritz de Dieu: Et que filz n'estoient telz, par leur seule morsure ilz ne pourroient tuer ny mettre vn homme si promptement à mort: de sorte que ces bestes se pourmeinent par la ville sans aucun peril, combien que pour vne nuit l'un de ces animaux estāt entré en vne maison, mordit neuf personnes que lon trouua le matin mortes & enflées: & nonobstant cela ilz ne laissent de les auoir en admiration, tellement que si en allant en quelque voyage, ilz rencontrent vne de ces bestes, ilz reputent cela

cela à bon heur, esperans que leurs affaires & entreprises en succederont mieux, tant ce pauvre peuple est aueuglé & enseuely en son erreur. & superstition. Iambol ancien marchand Grec, en ses peregrinations des Indes, écrit qu'il se trouue en ces regions là certains serpens volans, longs de deux brassées avec æstes membraneuses en forme de Chauue-souris, lesquelz volent de nuict, & sont si mortellement veneneux, que filz laissent seulement distiller vne goutte de leur vrine, ilz tuent promptemēt l'animal sur lequel ceste vrine tombe. Quelques ambassadeurs de Portugal ont apporté de noz ans à leur prince l'vn de ces serpens embasme, qui estoit si effroyable, que les femmes & les enfans n'en osoyent approcher, combien qu'il fust mort. Les anciennes histoires sont toutes pleines du serpet monstrueux, & admirable qui apparut en Afrique à Atilius Regulus, lequel fist mourir grand partie de ses gens, auant qu'il peust estre vaincu, & sans les dars, machines & autres tourmens de guerre qu'ilz dardoient incessamment sur luy, il eust rompu & mis en pieces tous ses gens. Tous les historiens s'accordent que la peau du dessusdict serpent auoit six vingtz piedz de longueur, duquel aussi les machoüeres demurerent pendues & exposées en lieu public, iusques au temps de la guerre de Numance. Diodore Sicilien liure troisieme, écrit vne histoire d'vn serpent qui fut mené vif en Alexandrie au Roy Ptolomée Philadelphie, non moins admirable que veritable, laquelle ie decriray par or-

Iambol.

dre seló qu'elle est cōtenuë au texte, par-ce qu'elle est bien conforme à nostre subiect. Voyant (dict-il) la liberalité & magnificence de laquelle vsoit le Roy Ptolomée à ceux qui luy apportoiēt quelques bestes monstrueuses & estranges, certains veneurs delibererent de luy presenter de dans Alexandrie vn serpent vis, & combien que l'entreprise fust difficile, toutefois fortune fauorisa à leur dessein: car quelques iours apres, ainsi qu'ilz espioiēt s'ilz pourroient trouuer quel que animal, ilz aperceurent vn grand serpent auprès des eaux, lōg de sept toises & demye, lequel estāt ployé & courbé en cercle, ainsi que les autres animaux alloient à l'abbreuoir il s'esleuoit soudainemēt, & en engloutissoit & deuoroit aucuns: il les entortilloit avec sa queue, puis s'en repaissoit au par-apres. Ces chasseurs ayans regardé & cōtemplé à loisir les gestes & façons de faire de ce serpent le voyans lourd & stupide, s'adresserent hardiment à luy, pēsans l'arrester avec quelques cordes & chaines: mais quand ilz commencerēt à s'approcher de plus pres, & qu'ilz veirent ses yeux enflambez comme feu, & ses dentz grādes, & que la durté de ses escailles rendoit vn merueilleux bruit quand il se remuoit, ou qu'il se lechoit de tous costez, & que le surplus de sa teste estoit si espouventable, ilz commencerent à changer couleur, & estre grandement intimidez: & neantmoins combatuz de ceste craincte, ilz ieterent leurs cordes, & laqs sur la queue de cest animal, lequel se sentant ainsi touché, se lança furieusement contre eux avec grands sifflemens, &

engloutit

engloutit tout vif celuy qui se presenta le premier deuant luy: Et ayant semblablement attiré de sa queue celuy qui le secôdoit, il le tua & mist en pieces: ce qui donna si grand estonnement aux autres qu'ilz se sauuerent à la fuytte, sans toutesfois perdre le soing & le desir d'y retourner quelque autre fois, surmontant l'esperance du gaing & profit, la peur, & le danger auquel ilz estoient: par-tant ilz delibererent de se fortifier & assaillir encore cest animal, plus par art & astuce, que par force: qui fut cause qu'ilz firent vn filé de grosses cordes concaues cōme vne masse ou poche profonde, assez pour contenir iceluy serpēt dedans, & puis apres auoir regardé de loing le lieu de sa retraicte, ayant semblablement noté le temps de ses allées & venues, si tost qu'il fut fort pour aller deuorer quelque beste pour son repas, ilz boucherent l'entrée de sa cauerne avec des pierres & de la terre, puis cauerent soudainemēt vn certain endroit de la terre pres du lieu, ou ilz tendirent le filé. Ce serpent s'estant repeu & viandé, cuidāt retourner au lieu de son repos, fut estonné qu'il entendit vne grand' clameur de trompettes, de cheuaux, de chiens & d'hommes, qui faisoient retentir l'air aupres de luy: Et se cuydant retirer en sa cauerne, il se trouua enuelopé de ceste poche, ou il fut en fin acablé de coups, nonobstāt ses efforts. L'ayant ainsi dompté ilz luy arracherent les dents, puis le menerent en Alexandrie, enclos en son filé, & en firent vn present au Roy, qui ne fut oncques plus estonné de voir vn si estrange spectacle, lequel cōmanda que de là en auant on luy

diminuaſt ſon manger, afin d'affoiblir ſes forces: ce qui fut fait avec telle dextérité, que ce ſerpẽt horrible, par ſucceſſion de temps fut ſi bien domeſtiquẽ & rẽdu priuẽ, que le Roy Ptolomẽe le faiſoit monſtrer par miracle aux eſtrãgiers qui venoient à ſa court. Ceux qui ont écrit les geſtes d'Alexãdre, font mẽtiõ qu'apres que ce grãd monarque eut penetrẽ en l'Indie, & qu'il pourſuyuoit Porrus Roy des Indes, qui fuyoit ſa fureur, que paſſant par les deſers, & ſablons ardens, il ſe trouua pluſieurs ſerpens, nõmez Ceraſtes, & autres qui faiſoient retentir l'air de leurs ſifflemens, & auoient les yeux tous eſtincellans de venin, leſquelz aſſaillirẽt ſes ſoldatz de telle furie, que nõobſtant leur effort & reſiſtence, ilz occirent bien vingt hõmes de guerre, & bien trente ſeruiteurs. On trouue encore es lieux ardents, vne autre ſorte de ſerpens que les vns appellent Dipſas, les autres les nomment Preſter, lequel eſt bien court, blanc en couleur, & a deux rayes noires en la queue. Celuy qui en eſt mordu, eſt ſi fort alterẽ, & eſt ſi preſſẽ d'vne ſoiſ ardẽte, que iamais ne peut eſtre raſſaſiẽ de boire: & cõbien qu'il boiue inceſſamment, il retõbe en auſſi grand ſoiſ, cõme ſ'il n'eũſt oncques beu. Et par-tant (dit Dioſcoride) que les anciens medecins, trouuans les morſures de ces ſerpẽs de ſi grãde malignitẽ, & ſi mortiferes, n'y pouans trouuer remede, les laiſſoient du tout incurables. Il y a vne eſpece de ſerpent, duquel les hitoriens font mention, qui ſe nõme Boa, qui ſe paiſt le plus couſtumiẽrement de laiẽt de vache, qui croiſt en ſi demeſurẽe grãdeur, que
du

du tēps de Claudius Cesar il en fut prins & occis vn, auquel il fut trouué vn enfant tout entier dās son ventre. Plutarque auteur graue écrit, que tout ainsi que les mousches à miel s'engendrent des bœufz, les fressōs des cheuaux, & les crabrōs *Crabrones.* des asnes, ainsi s'engendrent ilz certaines especes de serpens de la moelle & charongne des hōmes: mesmes qu'il s'en trouue souuent dedans les sepulchres des morts, qui se sont engendrez de ceste corruptiō. Ce qui est aduenü du tēps de mes estudes en Auignon, ou vn certain artisan, ourant le cercueil de plomb d'un mort, fut mordu d'un serpent qui estoit enclos lá dedans: la morsure duquel estoit si venimeuse, que s'il n'eust esté promptement secouru, il eust terminé sa vie par ce genre de tourmēt. Conradus Lycostenes écrit en ses Prodiges que l'an 1494. au mois de Septembre, vne certaine femme en Cracouie, en vne place qu'on nomme le saint Esprit, enfanta vn enfant mort, qui auoit vn serpent vis attaché à son dos, qui rongeoit & deuoroit la charongne de ceste miserable creature morte. Encores n'est il pas moins esmerueillable ce que Baptiste Leon écrit, que du temps du pape Martin cinquiesme, il fut trouué en vne perriere vn serpent vis en vne grande pierre solide si bien enclos, qu'il n'y auoit aucune apparoiſſance, ou vestige par lequel il eust peu respirer, & les sages qui furent congregez en ce lieu, pour rendre raison de la naissance, & de la vie de cest animal, dirent bien qu'il estoit engendré de la substance humide de la pierre, laquelle putrifiée auoit produit

cest animal, mais quand il failloit rendre les causes de sa respiration, ilz furēt bien empeschez: car la pierre estoit solide, & si n'auoit aucuns meatz ou conduictz, par lesquelz l'air se fust peu euaporer, nom plus que celuy qui fut trouuē au sepulchre, duquel iay faict mention cy dessus, qui estoit si bien cimenté, & plombé par tout que l'air n'y eust sceu penetrer. Combien que nous ayons icy mis en auant grand nombre d'histoires, qui font mention de plusieurs serpens cruelz & venimeux, si est-ce que la terre ne produict rien de plus esmerueillable que le Basilic, qui a tousiours d'antiquité esté appelé Roy des serpens. Le Basilic donc est vne espece de serpent, qui porte vne tache blanche en la teste, qui luy sert comme de couronne: Sa teste est fort ague, la gueulle rouge, ses yeux & sa couleur tirent sur le noir, il chasse de son sifflement (cōme Pline écrit) tous les autres serpens, il faict mourir les arbres de son aleine, il brusle les herbes, rompt les pierres, infecte l'air ou il demeure, tellement qu'aucun oyseau ny sçauroit passer sans peril. Il tue les hōmes de son seul regard, ainsi que la femme souillée infecte & tache le miroir: combien que cest animal n'ayt pas plus d'un pied de longueur, si est-ce qu'il est si veneneux, qu'il esteinct & suffoque mesme les autres serpens de son aleine. Brief il est si confict en venin, qu'il infecte de sa seule aleine les citez & prouinces situées pres du lieu ou il faict sa demeure. Les historiens prophanes ne font pas seulement mention du Basilic, comme Dioscoride, Pline, Ælian, Lucain, Isidore & plusieurs autres,

mais

mais mesmes les Ecclesiastiques. Hierosme Cardan en ses liures des diuerfes histoires, faisant mention de cest animal, racompte vne chose admirable, aduenue de nostre temps, laquelle il décrit ainsi qu'il s'ensuit. Du temps que ie composois mes liures des diuerfes histoires, le xxiiij. iour de Iuillet, aduint vne chose digne d'admiration, à laquelle i'assistay, & fuz present. Depuis vn mois en ça, Iaques Philippes Cernuse fist faire souz terre vn esgout & cloaque, & la fist vouter: La voute acheuée, afin qu'elle se consolidast mieux, il la fist clorre & boucher. Quelques dixhuiët ou vingt iours apres, il commanda qu'on l'ouurist pour tirer les arches de boys: quelque vn des ouuriers obeissant à son commandement descend avec vne eschelle, lequel parueni au meillieu de l'eschelle, tûba mort: Le maistre de l'œuure voyât que son hōme ne retournoit point, y voulut luy-mesme descēdre: mais si tost qu'il fut parueni au lieu ou l'autre estoit tombé, il tomba semblablement mort cōme le precedēt: Ceux qui estoient là presens ennuyez du retour de ces deux, en renuoyerent vn tiers, puis vn quart: Brief ilz moururent tous d'une mesme sorte. Les autres voyans qu'aucun ne retournoit de ceux qu'ilz y auoient enuoyez, commencerent à soupçonner quelque chose mauuaise, & s'aduiferent d'y enuoyer vn gros homme robuste, qui estoit presque en reputation de fol: Ce cinqiesme descend iusques au lieu ou les autres estoient descenduz, & ne tomba point, & avec vn crochet de fer il tira l'un de ceux qui estoient mors, voyans qu'il auoit retiré

cestuy, le courage luy creut & y voulut retourner encores vne fois: mais si tost qu'il commença d'auancer sa teste soubz la voulte, il tōba: ilz trouuerent moyē de le retirer, & avec force remedes propres ilz le firent reuenir de pasmoison, mais si ne peut il recouurer la parole iusques au iour sequent. Quand i'apperceu (dit Cardan) qu'il commençoit à parler ie l'interrogay, mais il ne se recordoit de chose qu'il eust faicte ou dicte, sinon qu'il auoit souuenance d'auoir descendu. Depuis on descendit encores vn chien, mais il estoit demy mort quand il en fut tiré. Plusieurs ne pouuans comprēdre la cause de cecy, ont pensé qu'il y eust vn Basilic en ceste cauerne, lequel on appelle autrement serpent Royal. Nous auōs doncques (ce me semble) assez suffisamment traicté cy dessus des especes de serpens monstrueux & estranges qui se retrouuent en diuerses prouinces, reste maintenant rechercher les choses singulieres qui se retrouuent en particulier. Ceux qui ont traicté de la nature des serpens ont obserué que leur excrement sent bon, car la bonne odeur prouient de ficcité. Or les serpens sont de nature seiche, puis leur excrement est bien cuit pour l'angustie de leurs entrailles: mesmes qu'o'a écrit qu'il y a aucuns serpens qui ont l'aleine si odoriferate qu'il semble que soit musc. Il y a quelques serpens, qui gardēt & retiennent leur venin apres leur mort, cōme les viperes, car autrement leur chair ne profiteroit à la cōpositiō du Theriaque, si du tout elles estoient sans venin: mesmes d'ou viendroient l'excoriation en la lepre pour les auoir mangées,

En la composition du Theriaque, il y entre des viperes.

mangées, si elles ne retenoient quelque venin en foy? ioinct qu'il est aduenue de nostre temps, que ceux qui escorchoient les bœufz occis par la morsure des viperes, sont morts de semblable maladie. Dioscoride en son sixiesme liure, ou il traicte des poisons & venins, dict qu'apres que la vipere a mordu quelqu'un, la morsure s'enfle & se seche, & deuiét de couleur blanchastre: il sort au commencement de la morsure vn marc igneux, tout tainct de sang, & naissent à l'entour aucunes vessies, semblables à celles de brulures du feu, puis il se cause de la morsure predicte vne ulceration: outre cela les genciues saignent, & s'enflambēt les parties qui sont à l'entour du foye, & se font vomissemēs choleriques, trenchées, profond sommeil, trēblemens, passiōs d'vrine, & sueur froide. Quelques medecins modernes ont écrit que la vipere des anciens n'est autre chose que le serpēt que nous appellōs en Frāce l'Aspic. On a obseruē que la vipere a en horreur l'hōme nud, & le craint beaucoup plus que vestu: ce qui est aussi propre presque à tous serpens. Les Physiciens escriuent que si les yeux sont frottez tous les matīs de la peau & despouille de la vipere, que la veuē n'est iamais hebetée ny blecée de suffusiō. Encores adioustēt ilz d'auantage, que si ceste vieille peau est brulée quand la Lune est pleine en la premiere partie du signe d'Aries, & que la cēdre amassée soit aspergée sur la teste, elle excite des songes terribles. Pline & Isidore escriuent, que la terre ne reçoit iamais en ses entrailles le serpent, depuis qu'il a mordu l'homme, comme si

Cruel gēre de maladie que la lepre ou les malades sont cōtrainctz de se paistre des serpens.

Cali° Rhodiginus.

par certaine benignité elle auoit en horreur ce-
 luy qui a offensé le Roy, chef & Prince de tous
 les animaux. Pline écrit, que la salie de l'hōme,
 spcialement de celuy qui est à ieun, est veneneu-
 se au serpent, de sorte que s'il en gouste tant peu
 que ce soit, il meurt: & si on crache seulement sur
 luy, il est aussi grieuement offensé, que si on luy
 iettoit dessus de l'eau bouillante. On a obserué
 que les serpens veneneux n'habitent iamais, ny se
 cachent au treffle: par-ce que ceste herbe leur est
 mortifere. Ceux qui veulent manier les serpens
 avec les mains sans danger, qu'ilz se lauent pre-
 mier la main de ius & suc de raues: Car ilz ont la
 raue en si grand horreur qu'ilz mourroyent plus
 tost que mordre le lieu frotté de raues, mesmes
 l'odeur seulement de la raue les faict mourir, &
 demourer sans force. Cardan au xviij. liure De
 subtilitate, au chapitre ou il traicte des inuētions
 merueilleuses, dit: que le concombre sauage, l'e-
 lebore noir, la grande serpentine, dicte Drachon
 tium maius, le risort, sont de si grāde efficace con-
 tre les serpens, que ceux qui sont oingt & frot-
 tez de leur suc, n'en sont iamais blesez ny offen-
 sez. L'adiousteray vne histoire cōforme à ce pro-
 pos, laquelle ie n'ay leuë ny entendue, mais i'en
 ay veu l'experience deuant moy, du temps du pa-
 pe Iules dernier mort. Ceux qui ont frequenté
 l'Italie scauent qu'il y a certains Charlateurs, qui
 se disent enchanteurs de serpens, qui ont de gran-
 des boettes pleines de serpens vifz, desquelz ilz
 enuironnent leur col, & soubz ce pretexte viuēt,
 & vèdēt quelques huilles, qu'ilz disent guerir de
 mor-

Can du bla
 Pour ma-
 nier les ser-
 pens vifz.

morsures de chiens enragez, & de serpens. Entre ceux icy i'en obseruay vn en Rome, qui auoit plusieurs de ces animaux, mais entre autres il en auoit en la main vn de pied & demy de longueur, auquel en presence de plus de mille psonnes il se fist mordre sa lāgue, laquelle cōmença à s'enfler grosse comme le poing, & outre la tumeur, elle deuint toute noire & scabreuse, de sorte qu'on iugeoit aysement qu'elle estoit infectée de venin. Incontinent apres il commença à frotter sa langue de certaine huile, qu'il appelloit huile Balsamin, laquelle soudain apres ce liniment & friction, deuint aussi belle qu'elle auoit oncques esté, & soubz couleur de ce miracle, il vendoit ses drogues ce qu'il vouloit. Je fuz fort attentif à regarder sil vsoit point d'art, mais ie ne sceu oncques descouurir qu'il y eust fraude, ny. mesme aucun de ceux qui assisterent à cest estrange spectacle. Monsieur Paludanus medecin celebre, sil y en a aucun en Italie, & duquel nous attendons tous les iours ses écritz, m'a racompté & attesté par serment vne histoire semblable à la precedente, à laquelle i'adiouste foy, comme si i'y auois esté present, pour la fidelité de celuy qui m'en a fait le recit, qui en a veu l'experience, & qui est homme ayant le sens si bon, qu'il n'est pas ayse à deceuoir, mesmes aux choses qui concernent son art. Il disoit que l'an mil cinq cens trente trois il y auoit en vne ville fameuse d'Italie, nommée Bresse, (seigneurie aujourd'huy par les Venitiens) deux de ces Charlatans & en-

chanteurs de serpens, qui vendoyent leurs huilles, & pharmaques en mesme rue, & pour mieux autoriser leur traficque, ilz monstroyét au peuple grand nōbre de serpens vifz, & tiroient ainsi les deniers du vulgaire. L'vn de ceux icy qui estoit natif de Veronne, ialoux du profit de son compagnon, va publier par tout que ce n'estoit qu'un affrōteur, & que les huilles & pharmaques qu'il vendoit au peuple ne valoient rien, ce qu'il monstreroit par effect, si les magistratz de Bresse luy en vouloient dōner permissiō: ce qu'ilz acorderēt aisemēt, tant pour en auoir plaisir, que pour manifester leur fraude au peuple qui y couroit comme au feu. Ce Veronnois au iour assigné fist eriger vn petit theatre, afin que les assistens peussent veoir l'experience de ce qu'il leur auoit promis, si tost qu'il fut monté sur cest échaufault, il appelle l'autre qui estoit Padouan, lequel se retrouua promptement au mesme lieu comme l'autre: Puis il luy dict: Padouan, si tu as du vray huile de bausme, comme tu te vantes pour deceuoir le peuple, & voler leur argent, donne-m'en maintenant quelque experience. Et lors il commença à ouurir vne boette de laquelle il tira avec la main nue vn gros crapault vif, enflé de venin: puis en la main sinistre il tenoit quelque racine: & luy dict: Es-lis maintenant celuy que tu ay mesmieux deuorer de ces deux, ou la racine ou le crapault, car ie ne faudray à l'instant mesme que tu en auras prins l'vn, de manger l'autre, & on cognoistra promptement qui se sçaura mieux garantir.

rantir. Le Padouen quelque peu estonné, print la racine & la mangea : Le Veronnois à l'instant mesme deschira ce crapault avec les dentz, & le mist en son corps : ayans acheué leur chef d'œuvre, ilz eurent incontinent refuge à leurs drogues, & se munirent d'antidotes : mais si ne purent ilz si bien iouër leurs rolles ; qu'il n'y en demeurast vn pour espie : car enuiron deux ou trois heures apres le Padouen commença à changer couleur & s'affoiblir si bien, qu'il le faillit emporter pasmé du theatre, & quelque remede qu'on y sceust appliquer, il mourut dedans vingt & quatre heures, enflé comme vn hidropique. Celuy qui auoit mangé le crapault, ayant entendu l'issue de la tragedie de son compagnon, se sauua à la fuitte : si est - ce qu'on l'a veu encores plus de deux ans apres en Italie, vendant son triacle, & ses autres drogues, comme on auoit acoustumé. Aucuns que les Grecs ont nommé Ophirgenes, du seul attouchement guerissoient les picqueures & morsures des serpens : & mettans la main sur vn corps blessé de ces animaux, ilz en tiroient le venin, comme aussi font les Psilles, & Marciës, peuple d'Afrique : l'Ambassadeur desquelz nommé Exagon, estant venu annoncer quelque chose aux Romains, fut mis nud en vn tonneau plein de serpens, viperes, aspicz, & autres bestes venimeuses, pour experimenter si leur dire estoit veritable : mais incontinent qu'il se fut precipité dedans, au lieu de l'offenser, ilz commencerent à le cherir, flatter & lecher.

HISTOIRES

Constantin Cesar en ses liures de l'Agriculture écrit, que si on veult congreger tous les serpens d'un champ, il fault faire vne fosse en terre, & y mettre vn pot ou vaisseau ou il y ait eu des confitures, & les serpens de tous les lieux circonuoisins avecques grand merueille se viendront rendre en ce lieu.

Fin de la trente-deuxiesme histoire.

F A M I-

PRODIGIEVSES.
FAMINES PRODI-
GIEVSES.

155

Chapitre XXXIII.





E me recorde d'auoir traicté au 3. liure de mō Theatre du monde, comme la famine est l'vn des bourreaux & ministres de la Iustice de Dieu, comme luy-mesme tesmoigne souuent par ses Prophetes & Apostres, quelquefois menassant les pecheurs de leur donner vn ciel d'Airain, & vne terre de fer, c'est-adire qui ne produira rien: neantmoins ie ne laisseray en ce lieu de faire mention de deux memorables famines recensées par les Ecclesiastiques, afin que puisans les histoires aux viues sources des lettres saintes, cela nous esmouue d'auantage, & touche de plus pres au marteau de nostre conscience. Il est faict mentiō au quatriesme liure des Roys, chapitre sixiesme d'une famine qui aduint en Samarie du tēps d'Helisée, qui fut si extreme que la teste d'un Asne se vendoit quatre-vingtz pieces d'argent, & la quatriesme partie d'une mesure de fiēt de Coulon, cinq pieces. Encores ce qui est plus esloigné de toute humanité, après que tous leurs viures furent consommez, les meres mangeoient leurs enfans: de sorte qu'une pauvre femme, citoyenne de la ville forma sa complaincte au Roy d'Israël, le voyant sur la muraille, de ce que sa voisine ne vouloit garder vn pact & accord faict entre-elles, qui estoit tel: qu'elles mengeassent ensemble son enfant, & qu'incontinēt qu'il seroit failly, ilz mangeroient celui de sa voisine, ce que i'ay (dict elle au Roy)

faict

Leuiti. 26.


faict & accompli : car nous auons cuit & mangé mon filz, & maintenant elle cache & muce le sien, de peur de me substantier. Et quand le Roy eut entendu ce que ceste femme luy auoit dict, le cœur luy cuyda fendre & creuer de dueil, & commença à deschirer ses vestemens, & couvrir sa chair d'un sac, disant : Dieu me face ainsi, & ce qui s'ensuyt au texte. Iosephe autheur Hebreu liure septiesme, chapitre troisieme de la guerre des Iuifz, racompte vne histoire presque conforme à la precedente, mais executée d'une plus estrange & furieuse façon : il écrit qu'il y auoit vne femme noble & riche lors que Hierusalem fut assiegée, qui auoit assemblé quelque reste de biens qu'elle auoit en certaine maison de la ville, & viuoit frugalement de ce peu qui luy restoit : mais les soldatz & gens-d'armes en peu d'heure luy rauirent tout, de sorte qu'elle fut contraincte de mendier : mais la misere estoit, qu'incontinent qu'on luy auoit donné quelque chose pour se substantier & alimenter, les soldatz luy rauissoient tout, tellement qu'en fin, se sentant pressée de faim, despourueüe de viures & de conseil, elle commença à s'armer contre les Loix de nature, & regardant d'un œil piteux vn petit enfant sien, qu'elle allaiettoit & tenoit entre ses bras : elle s'escrie : O malheureux enfant, & moy plus malheureuse mere, qui t'ay porté en mes flancs ! que pourray-je faire desormais de toy, estans les choses deplorées comme elles sont ? Car combien que j'eusse volonté de te sauuer la vie, tu demeureras en la perpetuelle seruitude

des Romains. Vien doncques mon enfant, vien, fers d'aliment, & de nourriture à ta pauvre mere affamée, fers de terreur aux gens d'armes qui ne m'ont rien laissé, & aux siecles aduenir de memoire de pitié. Et apres qu'elle eut prononcé ce triste arrest de mort contre son enfant, elle elance ses cruelles mains dessus son tendre corps, elle le tuë, le mist en la broche, le rostist & en mangea la moitié, & incontînét apres qu'elle eut ioué ceste piteuse tragedie, voicy de rechef les soldatz venuz, lesquelz sentans l'odeur de la viande rostie, cōmencerent à la menacer de mort, si elle ne leur enseignoit la viande, mais elle resolute en sa rage, & qui ne cherchoit que les moyens d'accompagner son filz mort, sans fester aucunement, leur dist: Taisez vous soldatz, ie suis plus loyalle que ne pèsez, car ie vous ay gardé vostre part. Et acheuant ces propos, elle produict le reste de l'enfant sur la table, dequoy les soldatz estonnez, espouventez & confuz, se sentirent si pressez en leur ame d'un remors de conscience, que demeurans muetz, ilz n'eurent le cœur de luy pouuoir respondre vn seul mot: mais elle au contraire, effrayée comme le Tigre qui a perdu son fruit, avec vn regard furibond, & vne contenance truculente & seuerre, leur dist: Quoy mes amys? c'est mon fruit que vous voyez! c'est mon enfant! c'est mon sang! c'est ma chair! sont mes os! ie m'en suis repeuë la premiere: estes vous plus scrupuleux ou delicatz, que la triste mere qui l'a engendré? Desdaignez vous les viandes desquelles elle a vsé deuant vous? & en fera encores tout main
tenant

tenant l'essay en voz presences: mais les soldatz qui ne pouuoient souffrir vn spectacle si piteux deuant eux, s'enfuirent, & la laisserent seule, avec l'vne des parties de son enfant, qui estoit en somme le reste de ce qu'ilz luy auoient laissé de ses biens. Voyla le propre texte de Iosephe, lequel i'ay traduit au plus pres, selõ qu'il est cõtenu en la lettre. Cecy me remet en memoire vne autre hystoire que i'ay leuë en Auëzouar medecin Arabe, d'vne si cruelle famine qui affligea le lieu de sa natiuité, qu'apres que le vulgaire & pauvres gens eurent farcis leurs corps de toutes viandes ordes & sales, qu'ilz peurent trouuer, comme chiens, cheuaux, ratz, souris, herbes, plâtes & autres choses semblables, ne trouuans plus riẽ que manger, ilz furent tellemẽt pressez de faim, qu'ilz furent contrainctz de faire la guerre aux morts, & se paistre de leurs charõgnes: Car incontinent qu'on auoit enterré quelque corps mort, ilz se leuoient la nuict, ouuroient les sepulchres, & amortissoient leur faim de chair humaine: de sorte qu'on estoit contrainct de mettre des gardes à l'ẽtour des sepulchres, pour reprimer la fureur de ce pauvre peuple enragé.

Fin de la trentetroiesme hystoire.

HISTOIRES
HISTOIRE PRODIGIEUSE
d'un Oyseau qui n'a aucuns pieds, & vit en l'air
& n'est trouué que mort en la terre,
ou en la mer.
Chapitre. XXXI III.





Est oyseau que tu vois icy
 depeinct, est tant mōstrueux
 & esmerueillable, qu'il a ap-
 presté assez de matiere à to'
 les philosophes du monde
 pour les empescher: Et qui
 voudra considerer les grāds
 prodiges de nature qui se retrouuent en ce petit
 animal, il confessera aysemēt que l'air, auquel il
 faict sa continuelle demeure, ne soustient rien de
 plus estrange, ny plus digne de contemplation:
 Car en premier lieu, oncques hōme ne le mania
 vis: il ne vit que de rosée, & si n'a aucuns piedz,
 qui est contre le tesmoignage expres d'Aristote,
 qui écrit que nul oyseau n'est sās piedz: mais par-
 ce que ie n'eu oncques cest heur de le voir, ie dé-
 criray fidelemēt ce que i'ay leu aux auteurs La-
 tins modernes, qui l'ōt veu, manié & décrit. Ges-
 nerus en son hystoire Latine des oyseaux (duquel
 i'ay emprunté ce pourtrait) écrit ce qui s'ensuit:
 Cest oyseau duquel tu vois icy la figure, s'apelle
 Oyseau de paradis, ou Apis Indica: sa figure m'a
 esté cōmuniquée par tresnoble & tresdocte per-
 sōnage Cōradus Pétigerus, lequel tesmoignoit en
 auoir veu vn mort semblable. Depuis quelque
 tēps on a imprimé vne Carte à Norēberg, avec la
 figure de cest oyseau semblable à cestuy que tu
 vois icy depeinct: laquelle Carte no' a esté éuoyée
 avec ces motz: L'oyseau de paradis, autremēt nō-
 mé Apis Indica, ou Martinet des Indes, est de la
 grādeur d'vne griue, mais d'vne legereté, & celeri-
 té si admirable, qu'il n'y a nauire poulsee des pl'

impetueux vens qu'il ne deuance en la mer. Il est garny d'æles longues & tendres, transparentes & lucides. D'auantage il a de grandes plumes longues (si plumes se doyuent appeller pluſtoſt que poil) elles ſont longues & eſtroictes, approchantes de la durezza de la corne. Ceſt oyſeau n'a aucuns piedz, & vole touſiours, & iamais ne ſe reſoſe, ſi non à quelque arbre ou rameau, ou il ſe pend & attache par l'un de ſes longs poilz. Il eſt de grand pris à cauſe de ſa rarité : les grands ſeigneurs de Leuant aornent du poil ou plume de ceſt oyſeau les creſtes de leurs armes: il eſt monſtré à Noremburg, chez Iean Cromere. Les Alemans en leur langue nomment ceſt oyſeau Luſtuogel, qui ſignifie oyſeau d'air, ou bien pour raiſon qu'il vit en l'air, ou qu'on eſtime qu'il vit d'iceluy. Quelques vns eſtiment que la femelle a vn receptacle & reſtraict ſoubz les æles, ou elle couue & entretient ſes œufz. Les Roys de Marmin aux iſles des Moluques n'agueres ont eſté perſuadez de croire les ames eſtre immortelles, par la conſideration de ceſt oyſeau, n'eſtans émeuz d'autre argument, ſi non qu'ilz obſeruoient vn petit oyſeau de beauté extreme, qui n'atouchoit iamais à la terre: mais quelqueſois tomboit mort du hault du ciel en bas. Et comme les Mahometiſtes trafiquoyent avec eux, ilz leur euſſent monſtré ceſt oyſeau, leur perſuaderent qu'il venoit de paradis, & que paradis eſtoit vn lieu de delices, & le repos des ames deſunctes. Par tant ce peuple groſſier & barbare, adiouſtant foy à ce que les Turcs leur auoient dict, ilz commencerent à ſ'enqueſter bien curieuſe.

curieusement de leur loy , & en fin se rendent Mahometistes, & s'uyuent pour le iourd'huy la loy de Mahomet , & pour ce ilz nomment cest oyseau Manucodiata, c'est adire oyseau de Dieu: lequel oyseau ilz ont en telle reuerence & honneur, que les Roys ayans cest oyseau sur eux , se tiennent assurez de tout peril & danger en la guerre. Les Roys de ces isles dessusdictes enuoyent à Charles cinquiesme Empereur, cinq de ces petitz oyseaux morts, car comme nous auõs dict, aucun ne les peut apprehender vifz. Maximilianus Transsylvanus Gesnerus poursuyuant l'histoire de cest oyseau, adiousté encore ce qui s'ensuit: J'auois (dict-il) acheué d'écrire ces choses, quand les lettres de Melchior Guillaudin Beruce, homme de grande science & doctrine, me furent apportées de Padouë, par lesquelles il décrit l'oyseau de paradis, comme il s'ensuit: Ceux qui ont laissé par écrit les nauigatiõs des Espaignolz aux estranges païs , assurent & affirment qu'il s'engendre, & naist vn petit oyseau aux isles des Moluques fort elegant, & de beauté singuliere, duquel le corps est petit en grandeur, neãtmoins il se monstre fort grand pour la magnitude de ses plumes, qui sont grandes & prolixes, disposées en rondeau, de sorte qu'elles representent le circuit d'vn cercle. Ce petit oyseau approche en grandeur & forme à la caille, estant aorné & circuit de ses plumes de diuerfes couleurs, fort elegantes, belles, & qui contentent merueilleusement la veuë de ceux qui le contemplent. La teste est proportionnée au corps, vn peu plus gros-

se que celle de l'Arondelle, les plumes qui decorrent le sommet d'icelle depuis la partie superieure du dos de l'eschigne iusques au tronc du bec, sont courtes, grosses, dures, espoisses, & de couleur iaune, & reluisante comme l'or trespur, & ainsi resplendissantes comme les rayons du Soleil, les autres qui couurent le menton sont plus delicates, plus tendres, & semble qu'elles soient de couleur perse, tirant sur le verd, & non beaucoup dissemblables à celles que nous voyôs sur les testes des Canards estans directement opposées au Soleil: Cest oyseau n'a aucuns piedz, & est fort semblable au Heron, touchât les plumes des ailes: sinon qu'elles sont plus tendres & plus longues, teinctes de couleur brune, participante du roux & du noir. Le masse de cest oyseau a vne cavitè sur l'eschine du dos, ou la femelle pond ses œufz, & les couue: & ne sont substantez d'autres viandes que de la rosée du ciel, qui leur sert de breuusage & aliment. Et si tu visites l'interieur de cest oyseau, tu le trouueras farcy & replet de gresse continuelle: desquelles choses ie puis asseurément parler, car i'en ay veu deux, lesquels n'auoient aucuns piedz, qui est contre ce qu'Aristote a écrit, que nul oyseau est sans piedz, il demeure assiduëment en l'air. Je me suis icy voulu amuser à te descrire entierement la forme de cest oyseau par ses particules, comme Gesnerus le décrit, selon le tesmoignagne des dessusdictz auteurs: mais si tu es curieux d'en veoir vne plus ample description, lis ce qu'en écrit ledict Gesnerus, au chapitre ou traicté De Aue paradi-

sea,

sea, au liure De auium natura. Hierosme Cardan en ses liures De subtilitate, au lieu ou il traicte des bestes parfaictes, écrit semblablement ce qui sensuyt: Aux isles dictes des Moluques, on trouue sur la terre ou en la mer, vn oyseau mort appelé Manucodiata, qui vault autant à dire en langue Indique comme oyseau de Dieu, ou oyseau de Paradis, lequel on ne voit point vif, pour ce qu'il n'a aucuns piedz. I'ay desia veu cest oyseau par trois fois, lequel seul en tout le mōde est sans piedz: Il habite en l'air hault, loing: son corps & son bec est semblable à l'Arondelle en magnitude & en forme, les pennes des æsles & de la queuë sont presque aussi grandes que celles de l'Aigle quand il les estend. Les pēes de cest oyseau sont menues, & semblables (fors la tenuité) aux plumes de la femelle du Paon, non à celles du masle, pour ce qu'elles n'ont les yeux telz que nous voyons en la queuë du masle. Le dos du masle de cest oyseau est creux, & la raison monstre que la femelle faict ses œufz en ceste cauité, veu que la femelle mesme a le ventre creux: en sorte que par l'vne & l'autre cauité, elle peult couuer ses œufz. En la queuë du masle se tient vn fil plus long que troys paulmes, de couleur noire, moyen entre quarré & rond, ne gros ne menu, presque semblable à celuy dont les cordonniers cousent leurs pantoufles & souliers. I'estime que la femelle est liée & ioincte au masle plus fermement par ce fil, quand elle couue ses œufz. Il habite tousiours en l'air, il est certain qu'il se soustient de soy-mesme quand ses

ailes & sa queue sont estendues en rotondité, & fil a quelque lassitude, le changemēt la luy peut oster. Je pense qu'il n'ayt autre viande que la rosée du ciel, qui luy est le manger & le boire : & ainsi nature semble auoir pourueu diligemment à tant grand miracle, afin que cest oyseau peust habiter en l'air. Il n'est vray-semblable, qu'il soit nourry d'air pur, pour-ce que cest air est trop subtil, & n'est vray-semblable qu'il soit nourry de petites bestiolles, par-ce que la matiere pour engendrer ces petites bestes n'est engendrée en l'air, mesme qu'on ne trouue aucunes de ces bestes au ventre de cest oyseau, comme on saict en celuy des Arondelles. Cest oyseau n'est point aussi nourry de vapeur qui abonde cy bas: car on verroit l'oyseau quand il descendroit: mesme la vapeur est aucunesfoys pernicieuse, & cest oyseau n'est iamais consommé que par la seule vieillesse. Il est doncques vray-semblable qu'il est nourry de rosée durāt la nuit. Voila ce qu'ē écrit Cardā & les autres modernes. Il ne sera (ce me semble) aliene de mettre en ce chapitre vne autre histoire prodigieuse des oyseaux. Les historiēs, & entre autres Hector Boetius, & Saxo, escriuēt qu'ō trouue certains arbres en Escoce, qui produisent le fruit enuveloppé dedans les fueilles, lequel quād il est tombé en l'eau en tēps conuenable, il prend vie & se tourne en vn oyseau viuant, qu'ilz appellent vn oyson d'arbre. Cest arbre croist en l'Isle de Pomonne, qui n'est pas loing d'Escosse, vers Aquilon. Æneas Syluius neantmoins escriuant de cest arbre, dit ce qui s'ensuyt: Nous auōs

autre-

autrefois entendu qu'il y auoit vn arbre en Escocce, lequel estant creu sur le riuage d'une riuie-
re, produisoit des fruietz qui auoient la forme de
cannes, & que estans prestz de meurir, ilz tom-
boyent d'eux mesmes, les vns en terre, les autres
en l'eau, & que ceux qui tōboient en terre, pour-
rissoient, ceux qui tomboient en l'eau prenoient
vie, & nageoyent sur les eaux, & s'en volloient a-
uecques ælles en l'air. De laquelle chose nous es-
tans en Escocce, nous enquerãs vers Iaqués Roy,
homme biẽ quarré & chargé de gresse, nous ap-
prismes que cest arbre tant renommé ne se trou-
ue pas en Escocce, mais aux Isles Orchades.

Fin de la trentequatriesme histoire.

HISTOIRES
HISTOIRES PRODIGIEUSES
de deux filles jumelles, liées & conjoinctes par les
parties postérieures, venues en diuers lieux,
l'une à Rome, l'autre à Veronne.
Chapitre XXXV.





Es Indiens & Brachmanes anciennement se sont monstrez fort ceremonieux en l'observation des natiuitez de leurs enfans : Car deux mois apres le iour de leur naissance ilz les faisoient produire en public , & contemploient fort intentiuement filz estoient beaux ou difformes , filz estoient conuenables à la paix ou la guerre. Et apres les auoir ainsi religieusement obseruez , filz cognoissoient qu'apres l'education, ilz peussent seruir au public, ilz les faisoient instruire & nourrir aux arts & sciences plus propres à leur naturel. Si au contraire ilz les trouuoient monstrueux, difformes ou mutiliez de quelque membre , quasi en contumelie de nature, ilz les faisoient incontinet meurdrir & tuer. Les Spartains en Grece , par l'ordonnance des loix de Licurgue , faisoient eriger & nourrir les enfans bien formez & accompliz de leurs membres : mais si nature auoit faict quelque eclipse, ou qu'ilz fussent autrement monstrueux ou corrompuz , ilz les faisoient porter es regions estranges, en quelques isles & desers, & les exposoient à la misericorde de la fortune. Les Atheniens incontinent qu'il se trouuoit quelque enfant monstrueux en leur cité, ilz le faisoient precipiter en la mer, & faisoient purifier leur ville à quelque nombre de vierges qui alloient chantât des hymnes & carmes par leur ville, & faisoient des sacrifices à Iuno. Les anciens Romains suyuât l'ordonnance de Romulus , iectoient le fruit

Plutar.

Alexander.
ab Alexandro libr. 2.
cap. 25.

monstrueux au Tybre, ou brusloient les corps, & en ventotent les cendres. L'Empereur Maurice (combien qu'il fust Chrestien) ensuyuoit en cecy les loix des anciens, lequel soudain qu'on luy eut mōstré vn ieune enfant monstrueux il le fist tuer, puis baïsa le couteau avec lequel auoit esté executé ce carnage. I'ay bien voulu memorer tout cecy, pour ces deux filles iumelles, desquelles tu vois le pourtraict: par-ce que si elles eussent esté produictes sur terre du temps des anciens Indiens ou Bracmanes, ou des Spartains & Lacedemoniens, ou du temps des Romains, ou du regne de l'Empereur Maurice, leur histoire & figure eust esté enseuelie avec leurs corps, & n'eussēt esté veuz de tāt de milliers de personnes comme elles ont. L'an de grace. 1475. ces deux filles que tu vois ainsi conioinctes par les reins, depuis les espaules iusques aux fesses, furent engendrées en Italie, en la fameuse cité de Veronne: Et par-ce que les parens estoient pauvres, elles furent portées viues par plusieurs villes d'Italie, pour amasser argent du peuple qui estoit fort ardent de voir ce nouveau spectacle & prodige de nature. Aucuns ont écrit que ce monstre, lequel est dit à monstrando, montra & predist de merueilleuses mutations par les prouinces: Car en l'an mesme qu'il fut engendré, Charles duc de Bourgongne occupa la Lorraine: Ferdinand le grand Roy d'Espaigne diuisa le royaume avec Alphonse Roy de Portugal. Mathias & Vladislaus roys, firent la paix entre les Hongres & les Bohemes. Edouard Roy d'Angleterre, appelé en

Les monstres, selon aucuns, annoncent quelque chose aduenir.

en France, par le duc de Bourgogne, fut reconcilié avec le Roy Loys. L'an de grace mil quatre cens quatre vingtz & treze, vn semblable mōstre à cestuy fut engendré à Rome , avec grand' merueille de tout le peuple, du temps du Pape Alexādre vj. lequel (comme Polydore écrit) prognostiquoit les maux, playes & miseres, qui suruindrent du temps de son pontificat.

Fin de la trentecinquesme histoire.

X iij

HISTOIRES
HISTOIRES PRODIGIEU-
ses de cruauté.
Chapitre. XXXVI.



Plusieurs



Eusieurs se sont estōnez d'v
ne infinité de prodigieux ex
emples de cruautéz, qui ont
regné non seulement entre
les Ethniques, mais mesmes
(ce qui est plus à plaindre)
entre nous Chrestiens, qui
sommes tous yssus d'une

mesme souche, sommes tous cōposez de sembla
bles elemēs, sommes incorporez en vne Eglise, a
uōs vn mesme chef Iesus Christ, sōmes to'enfans
d'un pere celeste, sōmes viuifiez d'un mesme es
prit, sommes racheptez d'un sang, regenerez d'un
baptisme, nourriz de pareilz sacremēs, participōs
d'un mesme Calice, & bataillons tous soubz la
Croix & Baniere de Iesus Christ, auōs vn cōmun
ennemy Sathā, sōmes to' appelez à pareil herita
ge: & neātmoins no'n'auōs point de hōte de no'
desmēbrer & deschirer l'un l'autre, avec telle hor
reur & cōfusion, qu'il semble que nous voulons
cōbatre contre nature, & espuiser la terre de sang
humain, & la laisser deormais deserte. Mais qui
ne s'esmerueillera de ce que les historiēs escriuent
de la grāde effusion de sang qui fut respandu en
la bataille d'Edouart le quart Roy d'Angleterre,
contre les Escossois, ou il y eut de tuez & meur
driz de la part des Escossois seulement iusques
au nombre de soixante mille hommes? Mais quel
plus horrible spectacle en nature que celuy que
décrit Sabellique de Charles Martel Roy de Frā
ce, & d'Abidaran, ou en vn seul conflict il fut tué
& meurdry trois cens cinquante mille hommes?

Mais quelle boucherie & carnage y eut il des pauvres brebis de Iesus Christ en la bataille qu'eut Ladislaus Roy de Paonye contre Amurat Empereur des Turcs? veu que de la part mesme des Turcs qui furent victorieux, il s'en trouua quatre cens mille morts, comme Sabellique tesmoigne : mais quel prodige ou horreur en nature se peult trouuer semblable à celle que décrit Iosephe en la guerre des Iuifz, ou il y mourut vnze cens mille personnes? Ce grand boucher Alexandre en la sanglante bataille qu'il eut contre Darius, fist mourir vn million d'hommes. Cyrus Roy des Perses fut si infortuné en la bataille qu'il eut contre les Scytes, que de deux cés mille hōmes qu'il auoit en son armée, il ne s'en sauua pas vn seul pour rapporter les nouuelles de leur perte. Or lis maintenant aux historiés ceux que Silla tua des Mariens, ceux que tua Pompée des soldatz de Mytridates, ceux que Ptolomée tua de Demetrius, ceux que Cesar tua en dix ans qu'il mist à expugner les Gaules, ceux que Lucullus tua en la guerre qu'il eut contre les Armeniens, ceux que tua Attila, ceux que tua Milciades, ceux que tuerēt Marcus Claudius & Cornelius, avec vne infinité de semblables boucheries, qui se retrouuēt par les historiens Grecz, & Latins, & tu trouueras que si tu les veux to⁹ mettre en cōpte, il te fault inuēter vne arithmetique nouuelle, & croy que si on auoit faict vn rolle de tous le beufz, moutōs, veaux, cheureaux, & autres quadrupedes qui ont esté tuez depuis mil ans en toutes les boucheries de l'Europe, il ne se trouue

roit

roit point tant de bestes mortes que d'hommes. Encore est-ce peu de faire ainsi mourir l'homme en bataille par fer, il a faillu chercher des moyès nouveaux & inufitez pour les meürdrir, comme Eusebe enseigne en son histoire Ecclesiastique, de ce bourreau infame de Diocletian Empereur, lequel voyant que les Chrestiens qui regnoient de son temps ne vouloient pas renoncer le nom de Dieu, & adorer ses ydoles, ne fut pas content de leur faire couper le nez, les oreilles, leur mettre des eclyes de bois dedäs les yngles, & de leur mettre du plomb & de l'estain fondu sur les parties honteuses : mais mesmes il faisoit abaïsser à grand force quatre arbres, esquelz il faisoit attacher les piedz & les mains de ces pauvres creatures, puis les laissoit ainsi iusques à ce que par la violēce & effort des arbres ilz fussent desmēbrées & rompues comme tu vois pourtraict en la figure cy dessus : lequel tourment a ainsi esté practiqué en Piedmont de nostre temps contre certain soldat qui auoit voulu trahir vne ville, comme le seigneur de Langé écrit en son Art militaire. Astiages ce grand Roy des Medes n'a pas seulement surpassé le precedent en cruauté, mais mesmes il a executé ce que vous auriez horreur non seulement de lire, mais mesmes de l'apprehēder ou conceuoir en voz cœurs. Ce grand patriarche doncques de tyrānie, ayant songé de nuit quelque chose touchant vn sien petit enfant qui luy sembloit difficile à digerer, & craignant qu'il ne sortit vn iour son effect, il voulut preuenir son desastre, & afin de mieux executer sō entreprise,

Grādes per
secutions
pour souste
nir le nom
de Dieu.

La figure
de ce tour-
ment est fi-
gurée cy
dessus au cō
mencement
du chapitre

J'ay fait
mention de
cecy en mō
Chelidoni⁹

il fist appeller Arpalus l'un de ses plus fauoritz & principaux de son Royaume, auquel il dit en secret qu'il eust à faire mourir promptemēt vn sien petit filz, sans le sceu d'aucun, pour certaines causes qu'il luy feroit entendre plus à loisir. Arpalus ayant entendu ce triste commandement d'un pere enuers son enfant, commença à sentir vn furieux combat en son ame: car si la pitié & l'innocence de l'enfant le tiroit d'un costé, l'obeissance & le commandemēt de son maistre le tourmentoit de l'autre: mais raison & remors de conscience gaignerēt tant sur luy, que la victoire demeura du costé de la pitié: de sorte qu'il resolut non seulemēt de sauuer la vie à l'enfant, mais aussi de le faire nourrir en lieu secret, sans le sceu de son maistre: toutesfois il ne peut si bien iouer son rolle, que quelques iours apres le Roy Astiages ne descouurist sa fraude, & comme outre son gré la vie estoit demeurée sauue à son filz: ce qu'il dissimula pour vn temps avec assez bon visage, de sorte que ce pauvre Arpalus pensoit estre exempt de soupçon: & viuât en ceste liberté d'esprit, il fut estonné que son maistre le fist appeller pour luy faire compaignie à disner, ayant au par- auant fait tuer vn des enfans d'Arpalus qu'il auoit fait assaisonner & si biē desguiser à ses cuisiniers, qu'il estoit difficile à discerner quelle viande c'estoit. Puis il la fist seruir sur table sans qu'il en eust aucune congnoissance: A raison dequoy le pauvre Arpalus n'y pēsant point, en mengea volontiers: mais ce tyrāt infect Astiages insatiable en ses cruautéz, ne fut content de luy auoir fait manger

la chair de son propre enfant, si d'abondant pour le dessert il ne faisoit mettre dedans des platz, la teste,



les piedz & les mains de ce petit innocēt, afin que le pere recogneust q c'estoit sa chair, son sang & ses os

qu'il auoit mangez, puis sa rage & cruauté estant vn peu adoucie, il luy demanda en plaissant, & par maniere de moquerie si ces viandes ainsi assaisonnées luy sembloient bones, auquel le pauvre Arpalus, faisy d'une extreme compassion en son ame, craignant d'auoir pis, luy respondit modestement: que tout estoit bon à la table d'un roy. Ces cruautéz sont grandes, mais celles desquelles vsa Maximian Empereur des Romains, ne leur cedent en rien: Car il ne fut pas content de tuer vne infinité de personnes par la fureur des quatre elemens, comme bruslant les vns, noyant les autres, enterrant les autres tous vifz, faisant estouffer les autres: mais encore chercha il vn prodige en nature plus grand, car il volut que le mort tuast le vif, il faisoit lier les corps des homes tous vifz, avec les corps des morts face à face, bouche à bouche, & les laissoit ainsi, iusques à ce que le mort par la putrefaction eust tué le vif. Passerons nous soubz silence ce bourreau de Satan l'Empereur Tybere, lequel me semble auoir surpassé en cruauté tous ceux desquelz les historiens firent oncques mention, car il defendoit sur peine de mort (ce qui ne se liest d'autre que de luy) de ne larmeter, plorer, soupirer, ou faire autre semblable dueil d'une infinité d'hommes qu'il faisoit mourir innocemment, & auoit des satrapes & ministres expressément deputez par toutes les cruautéz qu'il executoit, qui n'auoient autre charge, que d'espier & regarder intentiuement ça & lá, si l decouloit quelque larme de la face de quelqu'un, ou si l sortoit quelque soupir de son cœur,

ou

ou fil donnoit quelque autre tesmoignage de tristesse ou doleance, afin que tout soudain il fust conduict au supplice pour estre puny de pareille peine que celuy duquel il lamétoit l'innocence. Toutes ces cruauitez & tyrannies cy dessus mentionnées sont extremes : mais les sequentes plus brutalles, & executées d'une façon plus estrange : car aux premieres on ne s'attachoit qu'aux creatures viues, mais en celles qui suyuent, on faisoit guerre aux morts. Cábises Roy des Perses ne fut pas rassasié d'auoir faict cruellement mourir Psamenite Roy d'Egypte, & plusieurs autres : mais encores estant au Caire, il fist tirer du sepulchre la charongne de Damafus, la fist ignominieusement foïetter, piquer d'aiguillons comme si elle eust eu quelque sentiment de vie : finablement la fist brusler, comme Herodote tesmoigne. Ce qui ne s'est pas seulement experimété à l'endroit des hommes, mais mesmes des femmes, ausquelles les loix de pitié sont volontiers plus familiers : Car apres que Cyrus Roy des Perses eut tué en bataille le filz de Thomiris Royne de Scithie, estant fortifiée de nouueaux soldatz, elle pourfuyuit le roy de telle fureur, qu'elle mist tout en route ou en pieces : ce qui se rencontra, & le Roy Cyrus mesmes y laissa la vie : mais pour tout cela ceste rage enflammée ne fut en rien adoucie : car se ressentant encore de la mort de son filz, elle feist separer la teste d'avec le corps mort de Cyrus, la lança soudain en vne cruche pleine de sang humain, puis la contemplant d'un regard furieux, luy dit : Herodotus Cyrus, tu as quelque fois espuisé le sang de mon lib. 2.

Cruauté
des femmes

filz, tu as eu foif du mien, or maintenant rassasie toy de sang. Tulie fille de Tarquin Roy des Romains a encore surpassé la précédete en cruauté, car elle fist tuer son pere, pour heriter à son Royaume, & plaire à son ruffien, voyant le corps de son pere mort en terre, estant môtée sur son chariot, elle passa par dessus, & combien que les chevaux (espouventez de la personne morte) refusassent de passer, & que le chartier qui les conduisoit, sentant l'aiguillon de pitié, les voulust faire tourner ailleurs, afin que le corps du Roy ne fust point déchiré. Ceste parricide infame, surpassant en cruauté les chevaux, elle les contraignit à force passer sur la charongne de celuy qui l'auoit engendrée.

Fin de la trentesixiesme histoire.

HISTOI-

HISTOIRE PRODIGIEVSE
*d'un Mönstre produit vif sur terre, lequel depuis
le nombril en hault estoit de figure hu-
maine, & le reste de chien.*

Chapitre XXXVII.





Es anciës Ethniques ont eu en si grand horreur les adulteres, & fornicateurs, qu'il n'y a eu presque peuple, nation ou prouince qui ne les ayt chastiez par quelque seueres loy. Strabo, lib. 16. écrit que les Arabes punissoiët de peine

Diodorus
Siculus.

de mort les adulteres, comme aussi faisoient les Lombards. Les Ægyptiens faisoient fouëtter le paillard par la cité, & coupoient le nez à la femme, afin qu'elle fust défigurée en la partie de la face qui la rendoit plus difforme. Iustin écrit que les Parthes entre tous les vices, punissoient plus seuerement l'adultere. Les Locrenses arrachoiënt les yeux à ceux qui estoient deprehendez en ce vice : mesmes que leur Roy Zaleucus, (qui estoit autheur de ceste loy) ordonna par decret, que son filz qui y auoit esté surprins eust vn œil arraché. Les anciens Allemäs (ainsi que Tacite écrit) coupoient les cheueux à leurs femmes adulteres, puis les faisoient folietter par les rues. Les Romains permettoiët au mary de sa propre autorité de tuer le paillard & sa femme, s'il les apprehendoit en ce forfait. Macrin 19. Empereur faisoit brusler tous vifz ceux qui estoient deprehendez en adultere : & ayant esté informé que quelques soldatz auoient violé la chambriere de leur hostesse, il fist ouurir le vëtre de deux grandz beufz tous vifz, & fist coudre, & enclorre lá dedans les soldatz, reseruë la teste qui apparoissoit dehors,

Valere.

Cruel sup-
plice.

Iulius Ca-
pitulinus.

afin

afin qu'on les peust veoir, & qu'ilz parlaffent les vns avec les autres. Aurele 29. Empereur, ayant fceu que l'un de fes gendarmes auoit violé la femme de son hofte, voulut inuenter vn nouveau fupplice pour le faire mourir plus cruellemēt: car il fift abbaiffer, & ployer deux grands arbres par force, puis y fift attacher le foldat, afin que les arbres rerournans à leur lieu le déchiraffent & mif *Vopifcus.* fent en pieces. Or penetrons plus auant, & voyons maintenāt fi les adulteres ont receu meilleur traictement. Dés les hiftoires facrées par la Loy de Moyfe ilz eftoiēt lapidez, affommez & meurdrez. Sainct Paul aux Hebreux 13. dict: que Dieu condamnera les fornicateurs & adulteres: puis en la 1. des Corinth. 6. il fefcrie: Ne vous trompez point, les fornicateurs ny les idolatres, ny les adulteres ne poffederont point le Royaume de Dieu: Entre les principales caufes du Deluge, quand le Seigneur fift plouuoir son ire fur la terre, les paillardifes font nombrées. Cinq fameufes citez (comme il eft écrit aux liures de Moyfe) furent ruynées pour leurs diffolutions & villenies. Au liure des nombres douze princes furent penduz pour leurs paillardifes, & 24000. hommes tuez. Il eft écrit au Leuitique 28. chapitre que les Chananées ont efté deffaictz pour leurs paillardifes. Au 39. des Iuges prefque toute la lignée de Beniamin fut defaïcte par le forfaict cōmis en la femme du Leuite. Au liure des Roys griefues pei *Roys 11. & 12.* nes font enuoyées à Dauid pour son adultere. Pour la mefme caufe Salomon idolatra, & fut donné en fens reprouué: mefme le Prophete Ie-

remie racompte souuēt entre les causes de la ruyne de Hierusalem, les adulteres. Plusieurs Royaux ont receu mutation & changement, & leur administration transportée à d'autres par ce mesme vice. Troye la superbe fut ruinée pour le raiuissement d'Heleine. Thebes la populeuse, pour le rapt de Chryssipe, & pour l'inceste d'Edipe a esté defaict. Les Roys furent bannis, & leur nom exterminé de Rome, pour le raiuissement de Lucretse. Aristote au 5. de ses Politiques, assigne entre les principales causes de la ruyne & mutation des Royaumes, les paillardises & adulteres. Pausanias ce Prince tant renommé Licaonien, pour auoir premierement stupré, puis apres tué vne fille à Constantinople, fut aduerty par vne statue de sa fin, & mort prochaine: chose prodigieuse, que les malings espritz mesme à leur confusion aduertissent les paillards des peines qui leur sont préparées: ce qui l'esprouua estre veritable: car les Ephores le contraignirent apres mourir de faim. Or si les histoires sacrées & prophanes sont toutes remplies des griefues peines, cruelz supplices, ires & maledictions qui sont enuoyées de Dieu coustumierement sur les paillards, que doiuent esperer les Sodomites & autres qui se ioignēt en l'ignominie de Dieu & de nature, avec les bestes brutes? comme il nous est euidentement monstré en la honteuse histoire, de laquelle tu as veu le pourtraict au commencement de ce chapitre, d'un enfant qui fut conceu & engendré d'une femme & d'un chien, ayant depuis le nombril en hault la forme & le simulachre de la mere, bien accompli,

Tu en as la figure au commencement de ce chapitre.

acomply, fans que nature y eust rien obmis, & depuis le nombril en bas il auoit la forme & figure de l'animal qui estoit le pere, lequel (ainsi que Volaterranus écrit) fut enuoyé au Pape qui re-
 gnoit en ce temps lá, afin qu'il fust expié & pur-
 gé. Conradus Licoftenes écrit vne semblable hi-
 stoire en ses Prodiges, d'une femme qui enfanta
 du temps de l'Empereur Lothaire, vn enfant &
 vn chien, ioinctz & collez ensemble par les par-
 ties posterieures, depuis l'espine du doz iusques
 aux fesses. Celijs Rhodiginus lib. 25. cap. 32. de
 ses antiques leçons, écrit qu'un pasteur nommé
 Crathin en Cibare, ayant exercé avec l'une de ses
 Cheures son desir brutal, la Cheure enfanta quel
 que temps après vn cheureau, qui auoit la teste de
 figure humaine, & semblable au pasteur, qui e-
 stoit le pere, mais le reste du corps ressembloit à la
 cheure. C'est ce que saint Paul dict au quatries-
 me chapitre des Ephesès, que la peine des pail-
 lards, c'est de tomber en auuglement, & deuenir
 enragez, apres qu'ilz sont delaissez de Dieu, & ne
 voyent point, & ne peuuent escouter bons con-
 seilz, & prouoquent l'ire de Dieu contre eux.

Fin de la trenteseptiesme histoire.

Y ij

*COMPLAINCTE NOTABLE QUE
fist un homme Monstrueux au Senat de Rome, contre
les tyrannies d'un Censeur, qui escorchoit le pau-
vre peuple du riuage du Danube, par
exactions rigoureuses.
Chap. XXXVIII.*





E grád Monarque Marc Aurelle, non moins philosophe qu'Empereur, s'estât retiré aux champs avec grand nôbre d'hommes sages, tant pour decepuoir quelques ennuyeuses parties de l'an, que

pour moderer l'ardeur d'une fieure qui l'auoit vexé par plusieurs iours : afin de ne demeurer oisifz, ilz commencerent à instituer diuers propos entr'eux de la corruption des princes, de la mutation des republiques, & generallement du desordre vniuersel qui se retrouuoit presque entre tous les estatx du monde. Et apres que chascun en particulier eut déduit ce qu'il luy en sembloit, ce bon Empereur voulut estre de la partie, & cōtinuant le propos, leur dist: Mes amis, combien que chacun de vous ait bien dignement philosophé sur la questiō proposée de la corruption des Princes, & des Republiques, si est-ce que l'origine de ce contagieux mal ne me semble proceder d'ailleurs, que des flateurs qui seruent aux affections des Princes, & les entretiennent en leurs delices, sans leur oser dire verité. Ilz leur huillent la teste de benedictions, leur mettent le carreau soubz le coule, les endorment en l'armonieux chant de leurs faulses louenges, & s'engressent de leurs pechez: de sorte que i'en congnois aujourd'huy, desquelz les iambes ny les piedz ne les peuuent plus porter, ny les forces du corps soustenir debout, ny les mains leur ser-

uir à écrire, la veuë à lire, les dentz à prononcer, les machoïeres à manger, les oreilles à ouyr, ne la memoire à negocier: aufquelz toutefois la langue ne default à requérir du Prince presens, graces & faueurs pour eux ou pour les leurs, de sorte que ces pauvres miserables se trouuent tant aueuglez en leur auarice & conuoitise, qu'ilz ne congnoissent & ne sentent point que tout ainsi que leur auarice va tousiours en augmentation & multiplication, aussi de mesme leur vie s'en court en diminution & decadéce. Voyla doncques en somme (mes amys) la cause de l'entiere corruptiõ des Princes & Republiques. Et pour vous faire entendre la difference de l'ancienne liberté de parler aux Princes, & de l'auare seruitude, & pusillanimité qui regne auiourd'huy entre ceux qui leur assistent, ie vous veux racompter vne histoire, laquelle ie n'ay entendue d'aucun, ny leuë au liure des anciens, mais i'en ay veu l'effect par presence. La premiere année qu'on me fist l'honneur de me créer Consul, il vint à Rome vn pauvre vilain du riuage du Danube, demãder iustice au Senat contre vn Censeur, qui tourmentoit le peuple de subfides & exactions tyranniques, lequel fut si hardy & disert à former sa cõplaincte, que le plus asseuré capitaine du monde, ou le plus eloquent orateur n'eust sceu mieux dire. Ce vilain auoit le visage petit, les leures grosses, les yeux profondz, la couleur aduste, les cheueux herissez, la teste descouuerte, les fouliers de cuir de porc-épic, le saye de poil de cheure, la ceinture de ioncz marins, la barbe longue & espoisse, les sourcilz
qui

qui luy couuroyent les yeux, l'estomac & le col couuert de poil comme vn Ours, & vn baston en la main:& estant en cest equipage quand nous le vismes entrer au Senat, nous pensions que ce fust quelque animal, ayant figure d'homme: mais apres que nous eusmes entendu la grauité de ses propos, & maiesté de ses sentences, nous iugeasmes que c'estoit quelque deité: Car si sa figure estoit mōstrueuse, ses propos estoient prodigieux. Ce vilain ayant quelque peu respiré, & tourné ça & lá ses yeux furibondz, nous dist: Peres cōscriptz, & peuple heureux, moy rustique & malheureux, habitant es citez, qui sont pres le Danube, Saluë vous autres Senateurs de Rome, qui estes icy assemblez, & prie aux dieux immortelz qu'ilz vous inspirent à bien gouuerner la Republique, à laquelle vous presidez, & qu'ilz reiglēt aujourd'huy ma langue, afin que ie die ce qui est necessaire pour mon pays, les tristes destinées le permettant, & noz dieux courroucez nous delaisans. Nostre terre de Germanie fut subiuguée par vous Romains: mais si vostre gloire en est maintenant grande, aussi sera vostre infamie es siecles futurs extreme pour les cruautéz & tyrannies que vous y auez exercées. Et veux que vous sachez (si ne l'auez sceu auant ces heures) que lors que les malheureux se font conduire en leurs chariotz de triomphe, & crier deuant eux, viue Rome. D'autrepart les pauvres captifz pleurans gouttes de sang en leurs cueurs, criēt apres les dieux, iustice, iustice. Romains, Romains, vostre conuoitise est si grande de raur

les biens de voz voisins, & vostre arrogâce si desmesurée à commander aux terres estranges, que la mer ne vous peult profiter en ses abismes, ny la terre asseurer en ses champs: mais tenez vous asseurez que tout ainsi que vous autres sans raison, iettez les autres hors de leurs maisons, terres & possessions, autres viendrôt qui avec raison vous chasseront de Rome & d'Italie: car la Loy est infallible, que l'hôme qui prend par force le bien d'autrui, perd le droict qu'il tiét au sien propre. Et dy d'auantage, que tout ce que les mauuais accumulent avec tyrannie en plusieurs iours, les dieux iustes leur osteront tout en vn iour, & au contraire tout ce que les bons perdrôt en diuers ans, les dieux leur rendront en vne heure, & si vous esperez en laisser l'vsage à voz enfans, vous estes grandement deceuz: car le prouerbe ancien a tousiours esté veritable, que de l'iniuste gaing des peres, vient en apres la iuste perdition des enfans. Accumulez dōcques tout ce que voudrez, & que lon facetout ce que commanderez, & vous congnoistrez que pensans vous faire seigneurs des prouinces estranges, vous vous trouuez en fin estre faictz esclaués de voz propres richesses, & larrons des sueurs, du repos & labeur d'autrui. Mais ie vous demande (Romains) quelle actiō auiez vous, estans nourriz aupres du Tybre, de vouloir planter & dilater voz bornes iusques à la riuiera du Danube? Auiōs nous presté quelque faueur à voz ennemys? Auions nous cōquesté voz terres? Auez vous trouué quelque loy atique, qui die q̄ la genereuse Germanie deust de

de neccssité estre subiecte à Rome la superbe? Estions nous point voyfins? Et qu'il y eust quelque chose à departir entre nous, qui ayt suscité ce ste querelle? non certainemét, comme vous mesmes estes loyaux tesmoings. Ne pensez d'ócques (Romains) que si vous estes faictz seigneurs de la Germanie, que ce ayt esté par aucune industrie de guerre: car vous n'estes pas plus belliqueux que nous, ny plus courageux, ny plus hardiz, ny plus vaillans: mais comme nous autres auions offensé noz dieux, ilz ordonnerent en leurs secretz iugemens que pour chastier noz desordonnez vices, vous fussiez les cruelz bourreaus. Si doncques nous auons esté ruinez, non pour estre couards, craintifz ou debiles, mais seulement pour estre mauuais, & n'auoir eu les dieux propices, qu'esperez vous que sera de vous autres Romains, estans comme vous estes vitieux, & tenans comme vous tenez les dieux courroucez? Et si ie ne me trompe, nous auons enduré assez de misere, pour appaiser les dieux: mais voz cruautez s'ont si grâdes, & extremes que la vie de vous & de voz enfans ne peult satisfaire à voz fautes. Ce n'estoit pas assez (Romains) de no' auoir tolly nostre ancienne liberté, & de nous acabler d'insupportables exactions & subsides, si pour nous confire encore du tout en toutes especes de miseres, vous ne nous enuoyez des iuges pardeça si bestiaux & ignorans, que ie vous iure par les dieux immortelz, qu'ilz ne sçauent ny nous declarer voz loix, ny beaucoup moins entendre les nostres: & qui pis est, ilz prennent tout ce qu'on leur presente

en public, & tirent tout ce qu'ilz peuuent en secret, & soubz couleur qu'ilz sont de Rome, ilz n'ont aucune crainte de rober toute la terre.

Qu'est-ce cy (Romains) iamaïs n'aura fin vostre orgueil à commander? ny vostre conuoytise à de terrorer vostre prochain? Si nous sommes desobeissans, & que noz seruices ne vous contentent, cōmandez qu'on nous oste la vie: car pour vous dire verité, le couteau ne sera tāt cruel en noz gorges, comme sont voz tyrannies en noz cueurs.

Si vous le faictes pour nōz enfans, chargez les de fers, & les prenez pour esclaués, & vous ne les chargerez pas plus qu'ilz en pourrōt porter: mais de cōmandemēs & de tributz, vous nous en donnez plus que n'en pouōs porter ny souffrir. Sçauuez vous à quelle extremité vostre tyrānie & cruauté nous a redigez (Romaïs?) C'est que to' ceux de nōstre miserable royaume auōs iuré ensemble de iamaïs n'habiter avec noz femmes, & de tuer noz propres enfans, pour ne les laisser tomber es mains de si cruelz & iniques tyrās cōme vous estes: car nous desirōs plus qu'ilz meurent avec liberté, que nō qu'ilz viuēt avec seruitude & captiuité: partant cōme desesperez nous auons resolu d'endurer deormais les furieux mouuemēs & asfaulx de la chair, & nous sequester d'avec noz femmes, à celle fin qu'elles deuiennēt steriles: ay mās beaucoup mieus nous contenir vingt ou trente ans, que de laisser noz enfās esclaués perpetuelz: car s'ilz ont à souffrir ce que leurs pauvres tristes peres ont souffert, non seulement il est bon de ne les laisser viure, mais il leur seroit beaucoup plus profi-

proffitabile de ne les laisser naistre , pour experimenter tant de maulx en leur vie. Voulez vo'entendre(Romains)cōme voz officiers se gouuernent par deçà? Si le pauvre vient leur demāder iustice, & qu'il n'ayt argent que bailler, ny vin que presenter, ny huille que promettre , ny pourpre que offrir, ny faueur pour s'ayder , ny reuenu pour se secourir , au commencement on trouue moyē de luy faire despēdre le peu qu'il a, le nourissant d'une vaine esperance de gagner son proces: puis quand il y est vn peu enfourné, ilz luy font cōsommer par dilatiōs le meilleur de sa vie, chacun luy promettāt faueur; & apres tous ensemble le perdent, ruynent & destruisent: la pl^e grād part d'entr'eux l'asseurent qu'il a bon droict, & apres tous ensemble prononcent contre luy sa sentence: de maniere que ce pauvre miserable, qui est venu à se complaindre d'un, s'en retourne en son pays se plaignant de tous, maudissant sa triste fortune, & reclamāt les Dieux iustes & pitoyables. Je ne veux pas écore faire fin, Romais: mais auant passer outre, ie vous veux cōpter ma vie, & l'entédant vous cōgnoistrez quelles sont les delices de ceux de mon païs: Je viz d'amasser du gland en esté, aucunefois ie pesche , tant par necessité comme par passe-temps : de maniere que ie consume le miserable cours de ma vie seul aux champs, ou en la montaigne, & si vous desirez sçauoir pourquoy, entendez, & ie le vous diray. Je voy tant de tyrannies en voz Censeurs, tant de volleries & larrecins qui se font es pauvres miserables, tant de dissentions en nostre roy-

aume, & tant de playes & miseres en nostre republique, que ie me determine(cōme malheureux) me bannir de ma propre maison, & de ma douce compaignie, afin que ie ne voye de mes yeux choses si lamentables, aymant trop mieux vaguer seul par les champs, que d'entendre à toute heure les tristes plainctes, souspirs & sanglotz de mes voisins: car estant confiné aux champs, les bestes cruelles ne m'offencent si ie ne les assaulx, mais les hommes mauditz en ma republique, encores que ie les serue, m'ennuyent & tourmentent. Romains cruelz, Romains, n'aurez vous aucun sentiment des choses que ie metz en auant, puis que seulemēt les reduisant en memoire, mes yeux s'en aueuglent, ma langue s'engrossist, mes membres se desioignent, mon cueur s'esuanouyst, mes entrailles se rompent, ma chair se consume? mais de combien est il plus grief de les voir en mon pais avec mes yeux, les ouïr avec mes oreilles, les toucher avec mes doigtz, & les experimenter avec mes sens? Voyla les iniquitez de voz Iuges Romains, & la misere & desolatiō de nostre pauvre royaume. L'une des deux choses deuroit estre faicte, ou me chastier si ie mentz, ou vous priuer vous autres de voz offices, si ie diz vray: & si ma langue vous offense, ayans respandu la poison de mon cueur, ie m'estans en ce lieu afin que me coupez la teste, desirant plus gagner l'hōneur de m'offrir à la mort, que vous gagniez vous autres avec moy en m'ostant la vie. Icy donna fin le rustique à son propos. Incontinent apres l'Empereur Marc Aurelle s'escria: **Que vous semble**

mes amys? Quel noyau de la noix, quel or de la mine, quel grain de la paille, quelle rose des espines, quelle mouelle des os, quelles raisons tant haultes, quelles parolles si bien ordonnées, quelles sentences tant bien dictes, quelles veritez tant veritables, quelles malices couuertes tant bien descouuertes? le vous iure (dit Marc Aurelle) que nous demourasmes tous si espouventez, que le plus hardy ne luy eust osé respondre vne seule parolle: mais seulement determinasmes le iour suyuant de pouruoir de iuges nouveaux au riuage du Danube, & de faire chastier ceux qui auoient ainsi corrompu leur republique, & commandasmes qu'il nous donnast par écrit sa harangue, afin qu'elle fust mise au liure des bons dictz des estrangiers, qui estoient au Senat: & le rustique pour recompense fut faict Patrice, & fut substanté du tresor public. Voyez Chrestiens quelle sanctimonie, quelz oracles soubz l'escorce des parolles d'un Ethnique! mais que n'auons nous auourd'huy de telz rustiques pour reformer noz republiques chrestiennes, & pour descouurir les ruses, finesesses, cautelles, corruptions & iniquitez des Iuges mercenaires qui se retrouuent par les prouinces? car qui voudroit décrire fidellement les tromperies, finesesses, euenemens, & dangereuses fins de proces, ce ne seroit vn subiect qui se deust écrire avec ancre noire, ains plustost de vif & pur sang: par-ce que si chacū qui plaide souffroit autant pour la sainte foy Chrestienne comme il endure à la poursuite de ses proces, il y auroit autant de martyrs par les Cours, Chancelle-

ries, Palais & Iustices des princes, comme il en y eut iadis à Rome du temps des persecutions des anciés Empereurs : de sorte que de chercher ou commencer proces aujourd'huy, n'est autre chose fors que donner à son cueur matiere de souspirer, à ses yeux occasions de pleurer, à ses piedz & iambes de trotter, à sa langue de se plaindre, à ses mains de s'enterrer à toutes heures en vne bource, aux amys de prier, aux varletz de courir, & à tout le reste du corps de se pener & trauailler: Ioinct que qui ne sçait que c'est que de proces, il fault qu'il aprenne & entende que ses effectz & conditions d'iceux ne sont autres, que de riche, deuenir pauure, de ioyeux triste & melancholique, d'homme libre seruiteur, de magnanime couard, de liberal auare, de pacifique & benign, colere & chagrin: d'aymé hay, & de terrible desesperé : de sorte que si nous lisons les Egyptiens auoir esté iadis bartuz & flagellez de dix playes par la main de Dieu, nous pouons dire à bon droict les miserables plaideurs estre tous les iours tourmentez de dix mille: & la difference de leurs tourmens & playes, n'est autre, sinon que celles des Egyptiens leur furent causées de la prouidence diuine : mais celles des plaideurs ont esté inuentées par la malice des hommes. Et si les playes des Egyptiens furent faictes par morsures de bestes, riuieres de sang, grenouilles, mouches guespes, tempestes, ladrerries, sauterelles, brouillats : ausi celles des plaideurs sont seruir aux Presidens, payer Notaires, Grefriers, caresser leurs clerks, leur oignant tousiours

les mains de quelque teston, contenter les Aduocatz, faire la court au Iuge & rapporteur, prier les huissiers, chercher argent à prester, trotter de maison en maison, solliciter les procureurs, sans mettre en compte qu'il fault former accusation, donner delaiz à la partie, bailler sa demande d'un costé, ses defenses & exceptions de l'autre, faire enqueste, examiner tesmoings, reproches, inuentoriser, instruire le proces, apres le mettre en rapport, noter, breueter le tout iusques aux exploitz, & par fois dilayer & reculer la vuidange, pour ne l'auoir encore bien instruit de sa part, & à ces fins recuser le Iuge, pour faire languir partie aduerse, bailler requestes, & le supplier d'enore le reuoir, & le remettre au conseil: Et à la fin appeller de sa sentence, leuer le proces, pour le porter aux superieurs, avec vne infinité de copies & doubles qui luy conuiendra tirer pour eiter la perte des pieces, & autres surprinses, lesquelles depuis qu'on les a cogneues & essayées, elles sont suffisantes de persuader à l'homme sage de se contenter de perdre plustost vne partie de son bien, que d'en acquerir d'autre nouveau par tant de tourmens & penibles moyens. C'est pourquoy ce docte Euesque de Monodeme, Antoine de Guevara escriuoit à bon droit en quelque sien œuvre, que les plaideurs sont vrais saintz & martyrs: car de tous les sept pechez mortelz on ne les peut accuser, que de trois seulement: Et quant aux autres quatre, cōbien qu'ilz les voulussent cōmettre, ilz n'en auroient ny le moyen, ny le loysir: car cōmēt seroit-il possible

que les plaideurs fussent orgueilleux : car il leur conuient à toute heure aller le bonnet au poing, en grande humilité solliciter de maison en maison, maintenant monsieur le iuge resongné, tantost les critiques procureurs, & seueres aduocatz & greffiers. Et comme pourroient ilz aussi commettre le peché d'auarice, veu qu'à toutes heures il leur conuient mettre la main à la bourse, pour retirer leurs lettres multipliées, pouruoir à leurs affaires, offrir presens à monsieur, à madame, de sorte que le plus souuent il ne leur reste vn liard, pour retourner à leur maison. Quant au peché de paresse, ilz n'en peuuent semblablement estre entachez, veu que le plus souuent ilz passent les nuitz sans dormir, & ne cessent de se douloir, souspirer & plaindre, & le iour de trotter, negotier, solliciter, tantost chez l'un, tantost chez l'autre. Encore moins du peché de gloutonnie: car il ne leur fault ny entrée ny yssue de table, pour les mettre en appetit, & leur conuient le plus souuent dîner debout, à gros morceaux mal machez & digerez, pour se trouuer aux entrées & issues du palais, pour ne faillir à saluer monsieur le Conseiller, tirer monsieur l'aduocat par la manche, faire signe au clerc qu'il ayt son affaire pour recommandé. Puis il conclud finalement que proces est vne si dangereuse beste, & serpent si venimeux, que qui voudra souhaiter vn grád mal & de fortune à son ennemi, qu'il ne luy desire ny souhaitte point de le voir pauvre, miserable, hayneux, mal voulu d'autrui, bāny

ny de son païs, malade, ny mort, mais qu'il prie
seulement Dieu de luy donner quelque mechat
proces: car on ne pourroit au monde prédre plus
grande vengeance de son ennemy, que de l'en-
gouffrer en proces, à la suitte d'une court ou de
Chancellerie.

Fin de la trentehuitiesme histoire.

Z

HISTOIRES
HISTOIRE PRODIGIEUSE
d'avarice, avec plusieurs exemples memora-
bles sur ce mesme subiect.
Chapitre XXXIX.



Diegen



Iogene Laërce écrit , que vn Rhodië se gaudiſſant vn iour avec le philoſophe Eſchines,luy diſt: Ie te iure par les dieux immortalz (Eſchines) que i'ay grand pitié & cōpaſſion de te voir pauvre cō

me tu es. Lequel ſoudain luy reſpondit: Et par les meſmes dieux ie te iure que i'ay encores plus grande compaſſion de toy , te voyant ainſi riche comme ie te voy,puis que les richesses ne donnent que peine & tourment à les acquerir, ſoing & ſollicitude à les conſeruer,encores plus grand deſplaiſir à les deſpendre , peril à les garder,& occaſion de grands inconueniens & dangers à les defendre. Et ce qui me ſemble encores plus grief & mauuais , c'eſt que touſiours la part ou tu tiens tes treſors cachez,tu y laiffeſ premier ton cueur enſeuely . Herodote écrit que les habitans des iſles Baleares defendirent qu'on ne laiſſaſt iamais entrer ne porter dans leurs pays & terres aucun or , argent, ſoye ny pierres precieufes.Ce qui leur ſucceda ſi bien,qu'en quatre cens ans que durerent les guerres cruelles entre les Romains & Carthaginois , & entre les François & Eſpagnolz,iamaſ aucune deſdictes natiōs ne ſ'eſmeut pour leur courir ſus en leurs terres, par ce qu'ilz n'y euſſent trouuë ny or ny argent, ny autre choſe de pris ou valeur pour deſrober. Ie veux encores adiouſter vne autre choſe plus prodigieuſe:c'eſt que Phalaris Agringen

tin, Dionise Syracusan, Catiline Romain, & Iugurthe Numidien, tous ces quatre fameux tyrans ne maintindrent iamais leurs estatz & royaumes par aucunes vertuz qu'ilz eussent, ains seulement par les grans dons & presens qu'ilz faisoient à leurs adherans. Je voudrois donc que tous les fauoritz des Princes notassent bien ceste parolle, c'est qu'il est impossible qu'une grande faueur, ioincte & acompagnée d'une grande auarice, durét longuemēt ensemble. Je ne suis point hors de propos d'auoir mis toutes ces histoires en auant car nostre siecle est si corrompu, que nous n'entendons auioird'huy par noz Republiques parler d'autre chose, que d'une bruslante auarice qui regne en tous les estatz du monde, nommément entre les Ecclesiastiques: ce qui ne se peult prononcer sans larmes, attendu qu'ilz ne sont que dispensateurs des biens du Seigneur, & toutefois nous les voyons si ardens & affectionnez à thesauriser, qu'il semble qu'ilz doiuent enterrer leurs biens avec leurs corps, ou espuiser toute la terre de tresors. I'en ay traicté en quelques autres miés escritz plus amplement, faisant mention du Cardinal Angelot, partant ie retourne à mes prodiges: car depuis que ce pestilent venin d'auarice a respandu sa poison par le monde, la plus part des prouinces en sont si bien demeurées infectées, qu'on ne pardonne pas mesme aux corps humains qu'on ne mette en vente pour tirer argent. Cælius Rhodiginus en ses antiques leçons liure 13. chap. 56. est tesmoing de cecy, qui racompte que de son temps quelques meschans vendoient la

chair

chair d'hômes si bien assaisonnée, qu'il sembloit que ce fust de la chair de pourceau, & continuerent en leur meschanceté iusques à ce que Dieu permist qu'on trouuast quelque doigt d'hôme meslé parmy leurs viandes, qui fut cause qu'ilz furent prins & cruellemēt puniz. Ce qui ne semblera estrange ou fabuleux à ceux qui ont leu en Galien liure troisieme des alimens, que la chair humaine a telle similitude avec celle du pourceau, & approche si bien du goust & saueur d'icelle, qu'aucuns en ont mangé pensans que ce fust chair de porc. L'histoire de Cælius Rhodiginus est estrange, & monstre apertement que l'auarice a si bien aueuglé l'hôme, & rangé à si hault degré d'iniquité, qu'on n'y peult plus riē adiouster: mais Conradus Licostenes racompre encore vne autre histoire prodigieuse d'auarice qui n'est en rien inferieure à la precedente. Il écrit qu'au Duché de Vvittéberg vn malheureux hoste preséta à souper à quelques vns qui estoient logez en sa maisō, de la chair d'un porc qui auoit esté mort d'un chien enragé, laquelle estoit si bien infectée du venin de cest animal, que tous ceux qui en mangerent, enragerent, & estans ainsi pressés de la fureur de leur mal, se mangeoient & déchiroient les vns les autres.

Tu as le
pourtrait
de ceste hi-
stoire au cō-
mencemēt
de ce chapi-
tre.

Fin de la trenteneufiesme histoire.

HISTOIRES
MONSTRE ENGENDRE
à Rauenne du temps du Pape Iule second,
& du Roy Loys douziesme.
Chapitre XL.



Lecteur.



Lecteur, ce monstre que tu vois icy depeinct, est si brutal & esloigné de l'humanité, que i'ay peur de n'estre pas creu de ce que i'en écriray cy apres:

neantmoins, si tu le conferes avec celuy qui a les faces de chiens, & cinges, duquel ie t'ay descrit l'histoire cy dessus, tu trouueras l'autre beaucoup plus monstrueux. Iaqués Rueff, en ses liures De conceptu & generatione hominis, duquel i'ay emprunté ceste figure. Conradus Licoftenes en son traicté des prodiges. Iohannes Multiuallis & Gasparus Hedio qu'il cite, escriuent que l'an mil cinq cens douze, du temps que le Pape Iules second suscita tant de sanglantes tragedies en Italie, & qu'il eut la guerre avec le Roy Loys, à la iournée de Rauenne, il fut engendré à Rauenne mesme (qui est l'une des plus anciennes citez de l'Italie) vn monstre ayant vne corne en la teste, deux æsles, & vn pied semblable à celuy d'un oyseau rauissant, & avec vn œil au genoil: il estoit double quant au sexe, participant de l'homme & de la femme, il auoit en l'estomac la figure d'un ypsilon, & la figure d'une croix, & si n'auoit aucuns bras. Ce monstre fut produict sur terre du temps que toute l'Italie estoit enflammée des guerres, non toutefois sans apporter grande terreur au peuple: de sorte que de toutes les prouinces de l'Italie & de la Grece ilz venoient voir ceste miserable creature. Chacun en parloit diuersement; entre autres il sy trouua quelques hommes do-

ctes & celebres, qui commencerēt à philosopher sur la misere de cest enfant, & sur sa figure monstrueuse, lesquelz disoient que par la corne estoit figuré l'orgueil & l'ambitiō: par les æsles, la legiereté & inconstance: par le deffault des bras, le deffault des bonnes œuures: par le pied rauissant, rapine, vsure & auarice: par l'œil qui estoit au genoil, l'affection des choses terrestres: par les deux sexes, la Sodomie: & que pour tous ces pechez qui regnoient de ce temps en Italie, elle estoit ainsi affligée de guerres: mais quant à l'Ypsilon & à la Croix, c'estoiēt deux signes salutaires: car l'Ypsilon signifioit vertu, & puis la Croix, qui denotoit que s'ilz vouloyēt se cōuertir à Iesus Christ, & songer à sa Croix, c'estoit le vray remede de recouurer la paix, & de moderer l'ire du Seigneur, qui estoit enflammée contre leurs pechez.

FIN DE LA QUARANTIESME
& derniere Histoire
prodigieuse.

762
1941



TIM
#92

W.H. K. Amey
Robert La Plais

Colt. Compt -

49 bri. + 1 Lt. green

SPECIAL

92-
B13125

THE GETTY CENTER
LIBRARY

440

48

